

# № 202 Жаҳон АДАБИЁТИ



## МУАССИСЛАР:

ЎЗБЕКИСТОН МАТБУОТ  
ВА АҲБОРОТ АГЕНТЛИГИ

ЎЗБЕКИСТОН  
ЁЗУВЧИЛАР  
УЮШМАСИ

РЕСПУБЛИКА  
МАЪНАВИЯТ  
ВА МАҶРИФАТ КЕНГАШИ

1997 йил июндан  
чиқа бошлаган

№ 3

2014 йил, март

*Боши мухаррир:*

*Шуҳрат РИЗАЕВ*

**Жамоатчилик кенгаси:**

Эркин ВОХИДОВ  
Абдулла ОРИПОВ  
Омонулла ЮНУСОВ  
Муҳаммад АЛИ  
Муҳаммаджон ҚУРОНОВ  
Қаҳрамон ҚУРОНБОЕВ  
Иброҳим ҒАФУРОВ  
Низом КОМИЛОВ  
Шуҳрат СИРОЖИДДИНОВ  
Муҳаммаджон ХОЛБЕКОВ  
Хурийд ДҮСТМУҲАММАД

**Таҳрир ҳайъати:**

Омонулла РИЗАЕВ  
(масъул котиб)  
Амир ФАЙЗУЛЛА  
Назира ЖЎРАЕВА  
Музффар АҲМАД  
Дилдора АЛИЕВА  
Алимурод ТОЖИЕВ  
Шаҳноза НАЗАРОВА  
Севара АЛИЖОНОВА

## М У Н Д А Р И Ж А

Алишер НАВОИЙ. *Шоҳбайтлар*.....3

НАСР

А.ГАЙГЕР. *Қувғиндаги кекса қирол.*  
Қисса. (*Немис тилидан Мирзаали Акбаров тарж.*).....4  
Т.ДРАЙЗЕР. *Сармоядор.* Роман. (*Рус тилидан Амир Файзулла тарж.*).....48  
М.ГОРЬКИЙ. *Ҳикоялар*.....39  
Л.ГОДЕ. *Мозамбик кечасида.* Ҳикоя.  
(*А.Қосимов, С.Хўжаев тарж.*).....122

ГЛОБУС  
АФРИКА МАМЛАКАТЛАРИ

Африка: кеча, бугун, эртага.....105  
Африка шеърияти. ....110  
Африка ҳикоялари.....134  
Унутилмас сиймолар.....147

АДАБИЁТШУНОСЛИК. ФАЛСАФА

Жўра ХУДОЙБЕРДИЕВ. *Миллион-миллион шамнинг шуъласи*  
(*О.Шарафиддинов билан сұхбат*).....158  
Марио Варгас ЛЬОСА. *Мутолаа ва адабиёт васфи*.....163  
Маъмур УМАРОВ. *Театр санъати қондалари*.....174

ҚИЁС ВА ТАЛҚИН

Абдуғафур РАСУЛОВ. *Оби ҳаёт*.....183  
Ойбарчин АБДУЛҲАКИМОВА. *Бадиинятнинг икки буюқ обидаси*.....188  
Фаррухбек ОЛИМ. “Ҳамсат ул-мутахайирин” ва Абдураҳмон Жомий....193  
Одинарону ҚУЛМУРОДОВА. *Қуш тили тилсимлари*.....199  
Муковамизда .....204  
Тақвим.....205



## НАВОИЙ ШОХБАЙТЛАРИ

*Баҳор андоққу булбул гулъузори тоза истармен –  
Ки, ул гулбонг<sup>1</sup> ила ўзни баланд овоза истармен.*

\* \* \*

*Ёрдин айру кўнгул мулкедурур сultonи йўқ,  
Мулкким сultonи йўқ, жисмедурурким, жони йўқ.*

\* \* \*

*Ошиқ бўлурда билмадим мен нотавони хастаким:  
Ҳажср ўлса – гам куйдургуси, васл ўлса – ёр ўлтургуси.*

\* \* \*

*Оникор айлаб юзин, кўзумни ҳайрон айлади,  
Ёшурун олди кўнгул, кўзумни ҳайрон айлагач.*

\* \* \*

*Шакарлаблар табассум қилганин кўргач кўнгул берма –  
Ки, бедилларни аччиғ ииёлатур охир бу шаккарханд<sup>2</sup>.*

\* \* \*

*Жаҳон лаззотини ширин кўрарсен, лек бандингдур,  
Гирифтор ўлма, вожиф бўлки, қайду қанд эрур монанд.*

\* \* \*

*Замона ўқ киби тузларни<sup>3</sup> синдуруб, ёдек  
Аларки эгридуурур, шаҳга муҳтарам қиласадур.*

\* \* \*

*Навоиё, чу аламсиз мурод мумкин эмас,  
Десангки, васл топаи, ҳажср ўтига ёқилакўр.*

\* \* \*

*Ишқ баҳрида дури васл истаманг, эй аҳли дард,  
Кўнглунгуз ул нақди ёди бирла хурсанд айлангиз.*

\* \* \*


*Ёр валига қувондим, қовди қўйидин мени,  
Эй Навоий, ҳеч киши давлатқа мағрур ўлмасун.*

<sup>1</sup> Гулбонг – баланд овоз билан нола тортиш; хушвоноз билан сайраш.

<sup>2</sup> Шаккарханд – ширин табассум, гўзал кулги.

<sup>3</sup> Туз – тўғри, рост.

**ЖАҲОН АДАБИЁТИ**



Арно ГАЙГЕР

Муаллиф 1968 йилда Брегенц (Австрия)да туғылған, австриялык истеъдодлы замонавий ёзучылардан бири. Унинг күплаб ҳикоя, қисса ва романлари чөп этилған бўлиб, турлги мукофотлар билан тақдирланган.

2011 йилда нашар эшилгэн “Күвгиндагы кекса үрөл” қиссаны адилга нафақат Европа, балки дунё миңесида ҳам шұхрат көлтируди. Үнда мұаллиф Алжаймер касалығынша (хотираниң аста-секин сусағын, үйкөлип бориши) дұчор бұлған кекса отасы хакида хикоя қылади.

Асар юксак ахлоқий-тарбиявий аҳамиятга эга. Қиссада ёзуучи ўз падари бузрукворинциң ҳәёти, ижтимоий келиб чиқиши, туриш-турмуши, ўй-кечинмалари, ҳис-түйгүлари ва дарду изтироблари ҳақида бир озғамгин, бир оз күенок ва бир оз киноя билан ҳикоя қыларкан, одамлар, оила, шахс ва жамият үртасидагы ўзаро муносабатларни мөхирона очиб беради, оиласый ва ижтимоий масъулият, тил ва хотира, ватан ва ўзлук, эркінлик ва инсон шаңын, қадр-қиммати сингари долзарб мавзуларда баҳс юритади, кишиларни ўзаро меҳр-оқибатли, инсоф-диёнатлы бўлишга чақиради.

## Таржимондан

## КУВГИНДАГИ КЕКСА ҚИРОЛ

Kucca

Бобом мени танимай қолганида, олти ёшли бола эдим. У пастда, бизнинг ёнимиздаги кўшни уйда истиқомат қиласарди. Мактабга бораётуб, йўлни кисқартириш мақсадида кўпинча бобомнинг боғини тиккалай кесиб ўтар эдим, шунда бобом ортимдан ёғоч ўқталиб қолар, норози оҳангда тўнгиллаб кўярди. Баъзан эса, менга кўзи тушиши билан хурсанд бўлиб кетар, тўғри олдимга келиб, мени Ҳелмут деб атай бошларди. Шунда мен нима дейишни билмай, тек туриб қолардим. Кунларнинг бирида бобом, ниҳоят, бандаликни бажо келтирди. Ушбу воеалар – хасталик отамда пайдо бўлмагунига қадар – эсимдан чиқиб, унутилиб кетди.

Русларда шундай бир мақол бор: *Хаётда хатоларимиздан бўлак ҳеч бир нарса бошқа қайтиб келмас экан*. Бу ҳодиса айниқса, ёшимиз бир жойга етганда кучайиб бораркан. Отамиз ҳам нафақага чиққандан сўнг, қандайдир ғалати бўлиб қолган эди. Буни биз унинг ён-атрофидагиларга бўлган ҳар қандай қизиқишидан мосуво бўла бошлаган пайтида сезиб қолдик. Ўзини тутиши, юриш-туриши, хулқ, феъл-атвори, муомаласи бизларга ўзига хос, ғалати туюлди. Шу боис ҳарна ўзини қўлга олсин деб, бир неча йил давомида ғиди-биди қиласвериб, ҳоли-жонига қўймадик. Бугунга келиб шуларни ўйлаб туриб, бехуда чиранганимиз алам қилиб кетади; чунки биз касалликни баҳона қилиб, шахс нафсониятига тегиб кетгандик. “Илтимос, унақа қилиб юргагин!” Бу гапни унга юз марталаб айтгандирмиз, у эса бизга сабр-тоқат билан қулоқ солар, тақдирга тан бериб, ожизлигини бўйнига олса, енгил тортадигандек кўринарди. Бироқ у унутишдан буткул

## ЖАХОН АДАБИЁТИ

халос бўйлумас, эсадалик, хотира қайдларидан умуман фойдаланмасди, ҳатто дастрўмолчасига кимдир билдирим тугун туғиб қўяётгани ҳақида шикоят қилишдан ҳам тоймасди. Бинобарин, отам ўз руҳий тушкунлигига карши ҳеч қандай кураш олиб бормаган, бу ҳақда лоақал бирор марта бўлсин, гарчи у – бугунги кун нуқтаи-назаридан олганда – кечи билан тўқсонинчи йилларнинг ўрталарида масала жиддий эканини англаб етган бўлса ҳам, гапирганини эслолмаймиз. Агар у болаларидан бирортасига, шунаقا-шунаقا, миям жойида эмасга ўхшайди, деб қўйганда ҳам, биз барчамиз вазиятга бундан бошқачароқ, яъни яхшироқ ёндашган бўлармидик. Шундай қилиб, ўтган кўп йиллар мобайнида отам сичқон, биз – сичқонлар, касаллик эса мушук бўлиб, бир-биримиз билан сичқонмушук ўйнаб келганимиз.

Нихоятда асабга тегадиган, хавф-хатар, ишончсизлик, шубҳа-гумон ва ноаниқларга тўла илк давр, мана, ҳарқалай ортда қолди, гарчанд буни эслаш мен учун ҳамиша ҳам оғир бўлса-да, бироқ бир нарсани, яъни таслим бўлишда ҳам фарқ бўлишини, бунга курашишга ортиқ ҳоҳиш-истак қолмаслиги ё мағлуб бўлганини билишлик сабаб эканини энди-энди тушуниб етаяпман. Отам эса ўз-ўзини мағлуб бўлган деб хисобларди. Умрининг муайян бир даврига етиб келгач, руҳий куввати адо бўлиб, энди у ички бир кайфиятга суюниб қолганди; кучли таъсир қиласидан дори-дармонлар танқис бўлган бир пайтда касалликка қарши курашда оила аъзолари учун бу ҳам ўзига хос қулай, амалий имконият вазифасини ўтарди.

*Милан Кундера<sup>1</sup> шундай деб ёзади: Ҳаёт деб атамии мана шу муқаррар мағлубият олдида уни тушунишга уринишидан бошқа иложсимиз қолмайди.*

Деменция<sup>2</sup> касаллигини, отам ҳозир унинг ўртача ҳолатида эди, мен тахминан қуидаги тасаввур қиласман: одам ўзини гўё уйқуси бузилгандек, гаранг ҳис қиласи, қаердалигини билолмайди, теварак-атрофидаги нарсалар, ерлар, йиллар, одамлар гир-гир айланаверади. Киши ўзининг қаердалигини билиб олишга уринади, бироқ бефойда. Атрофида нарсалар, марҳумлар, тириклар, хотиралар гир айланаверади, худди тушдагидек галлюцинациялар<sup>3</sup> содир бўлади, узук-юлуқ гаплар эшитилиб туради, лекин бари бехуда – мана шунағанги ҳолат бутун кун давомида ҳам ҳеч бир ўзгаришсиз давом этаверади.

Ўйда қолган пайтларимда, биз, фарзандлар отамизга навбати билан қараб туардик, уни одатда эрталаб тўққизга яқин уйғотардим. У ўринда батамом фаромушхотир ҳолда ётаверарди, бироқ ётоқхонасига ўзи танимаган одамларнинг кириб-чикишига бутунлай кўнишиб қолганди.

– Қани, турақолмайсизми энди, – дейман унга самимий оҳангда ва кайфиятига бир оз некбинлик баҳш этиш умидида кўшиб қўяман:

– Ҳаётимиз қандай ажойиб-а.

Ишонқирамайгина ўрнидан туаркан:

– Балки сен учун шундайдир, – дейди у.

Сўнг пайпокларини узатаман, у пайпокларга қошларини кўтарган кўйи бир зум хайрон бўлиб қараб тургач:

– Қани учинчиси? – деб сўрайди.

Унга кийимларини кийишида ёрдамлашаман, у бунга монелик қилмайди, вақт эса ўтиб боради. Шундан кейин уни ошхонага олиб бораман. Нонуштадан сўнг, унга соқолини қиртишлаб олишини таклиф қиласман, у эса менга кўзларини қисиб:

<sup>1</sup> Милан Кундера – замонавий чех ёзувчisi, 1929 й.да Брно(Чехословакия)да туғилган. 1975 й.дан буён Францияда яшайди.(Шу ва бошқа барча изохлар таржимонники – М. А.).

<sup>2</sup> Деменция – ақли заифлик.

<sup>3</sup> Галлюцинация – қораҳаёт, йўқ нарсаларнинг бор бўлиб кўриниши, эшитилиши ёки сезилиши.

— Яхиси, мен уйда қолақолай, — дейди. — Сени кўриш учун яқин орада келолмасам керак.

Отамга ваннахонага олиб борадиган йўлни кўрсатаман. У бўлса: “ЭХудо, тавба, тавба” дея вақтдан ютишга интилади.

— Соқолингизни олволинг, — ялинаман унга, — сизни кўрганлар нима дейди.

У ҳардамхаёллик билан айтганларимни қила бошлайди. “Агарда бундан бирон нима кутаётган бўлсанг…”, ғўлдирайди у ва қўзгуга қараб, тикка соchlарини иккала қўли билан шунақангি қаттиқ ишқалайдики, натижада соchlар бир текис бўлиб қолади. Яна тағин ойнага қарайди. “Деярли япянги”, ўзича жилмайиб, кимгадир самимий миннатдорчилик билдиради.

Яқин орадан бошлаб, у кимгадир тез-тез миннатдорчилик билдирадиган бўлиб қолди. Бундан бир неча кун аввал, сабабини ҳеч қандай англаёлмадим, у менга шундай деди: “Мен сенга олдиндан чин дилдан миннатдорчилик билдираман.”

Бунақанг “янги” гапларга мен ҳам ўз навбатида хушмуомалалик билан: “Арзимайди”, “Марҳамат” ёки “Бажонидил” дея жавоб қайтарадиган бўлдим. Чунки одамин довдиратадиган ёки саросимага соладиган сўраб-суриштиришлардан кўра тасдиқловчи жавоблар маъқулроқ эди, зоро, бундай саволлар, борди-ю agar уларни фаҳмлаб қолгудек бўлса, шахсий камчиликларига бориб тақалар, ундай жавоблар эса ҳамма ишлар жойида эканлигини билдириб, отам кўнглини бир озгина тинчлантиарди.

Аввалига бундай “мослашув”лар ҳолдан тойдирадиган даражада оғир ва азобли кечди. Негаки, ҳар қандай бола, фарзанд ўз ота-онасини кучли инсонлар деб ҳисоблайди, уларнинг ҳаёт ноҳақликларида сабот билан бардош беришларига ишонади, секин-аста пайдо бўлаётган камчилик, ожизликларидан эса ҳаммадан ҳам кўра кўпроқ азият чекади. Бироқ шунга қарамасдан, янги ролимга тез орада кўнишиб, анча ўрганиб қолдим. Деменцияга дучор бўлган бемор ҳаёти учун янгича тартиб ва мезонлар зарурлигига ишонч ҳосил қилдим. Агар отам миннатдорчилик билдиримоқчи бўлса, марҳамат, ҳеч қандай важ-корсонсиз миннатдорчилик билдираверсин, agarда у ҳамма мени ташлаб кетди деб, шикоят қилмоқчи бўлса ҳам, майли, унинг фикри далилларга дош бера оладими-йўқми, бундан қатъи назар, шикоят қилаверсин. Зотан, унинг учун деменциядан бўлак бошқа олам мавжуд эмас, буни тушунишимиз керак. Шунинг учун ҳам оиланинг бир аъзоси сифатида беморнинг чалкаш, чигал ҳолатини инобатга олиб, бутун бошли бир қайгу, ғам-ғуссани бир оз бўлса-да, енгиллатишга уриниб кўришгина кўлимдан келарди, холос. Отам менинг оламимга кириб кела олмаяптими, демак, мен унинг олдига боришим керак. У ёқларда, унинг аҳволи-руҳияси сарҳадлари оша, мақсадга йўналтирилганлик ва моддийликка асосланган бизнинг жамиятимиздан нариги томонларда у мўътабар зот, гарчи умумий ўлчов-мезонларга кўра, у қадар эсли-хушли бўлмаса ҳам, ҳархолда ажойиб одам, ахир.

Боғ ичидан мушук юриб ўтди. Отам:

— Илгари менинг ҳам мушукларим бўларди. Ёлғиз ўзимники эмас, албатта, шунчаки шерик сифатида.

Бир куни ундан аҳволлар қалай, деб сўрасам, у шундай жавоб қилди:

— Мўъжизалар бўлмайди, лекин аломат бор нарса.

Ундан кейинги гапига ақл бовар қилмайди, худди тушдаги каби учкуйруғи йўқ:

— Ҳаёт муаммоларсиз ҳам осон бўлиб қолмайди.

Бунга нимаям дейиш мумкин, Август Гайгернинг шунчаки қочирим, кинояси ва донишмандлиги, холос. Фақат бир нарсага ачинасан, у ҳам бўлса, унинг одами ҳайратга соладиган мана шундай ҳикматли гаплари

тобора камайиб бораяпти. Уларнинг бора-бора йўқолиб бораётгани менга алам қиласди. Бу худди шундайки, гёё кўп қон йўқотаётган отамни вақт лупаси орқали кузатиб тургандекман. Ўндан хаёт, тириклиқ томиб, томчилаб, сизиб турибди. Шахсдан шахсият томчи-томчи бўлиб сирқимоқда. Бу менинг отам, мени боқиб катта қилган инсон, деган туйғу ҳали завол топгани йўқ. Бироқ отамни илгариги қиёфасида кўролмаётгандим, бу айниқса, оқшомлари яққол сезилиб қоларди. Тонгнинг нималар олиб келишини кечанинг ўзидаёқ илк сезгинг билан ҳис эта оласан. Чунки қоронгилик тушиши билан кўркув босиб келади. Шунда отам қувфндаги кекса қирол янглиғ нима қилишини билмай, у ёқдан бу ёққа бетиним саросар кезиниб, юриб чиқади. Кўзи тушган ҳамма нарса унга кўрқинчли, мўрт, бекарор, лиқиллаган бўлиб туюлади, худди бир лаҳзадаёқ ёрилиб, бўлинниб, парчаланиб, эриб, йўқ бўлиб кетадигандек. Гўёки уйингдаги ҳеч бир нарса ўз жойида эмасдек.

Мен ошхонада ўтирган кўйим ноутбукимда ёза бошлайман. Кўшни хонадан телевизор овози эшитилади. Отам даҳлиздан оёқ учиди юриб ўтиб, унга кулоқ солади ва ўзича минғирлайди:

– Ҳеч нимани тушуниб бўлмайди-я.

Сўнг аста ошхонага кириб келади ва ўзини гёё ёзувимни кузатаётгандага солади. Бироқ кўз қиrimни ташлаб, сезиб турибман, кўнглини кўтаришим керак.

- Бир озгина телевизор кўрмайсизми? – сўрайман ундан.
- Ундан нима фойда?
- Шунчаки эрмак-да.
- Яхиси, уйга кетмоқчиман.
- Сиз ҳозир уйдасиз.
- Биз ўзи қаердамиз?

Мен унга кўчанинг номини ва уй рақамини айтаман.

– Шундайку-я, лекин бу ерда ҳеч қачон бўлмагандекман.

– Мана шу уйни ўзинг эллигинчи йиллар охирида қургансиз, ўшандан бери шу ерда яшаб келаяпсиз.

Унинг афти буришиди. Бу маълумотлар уни қониқтирмади шекилли. Энсасини қашиб:

– Мен сенга ишонаман, лекин бир шартим бор. Уйимга бормоқчиман. Унинг юзига тикилиб қарайман. Ҳижолат бўлаётгани шундоқкина сезилиб турибди, буни яширишга уринаётган эса-да, пешонасидағи терлар ошкор қилаётганди. Салкам ваҳимага тушиб қолаётган бу одамга қараб туриб, аъзойи-баданим музлаб кетди.

Ўз уйимда эмасман деб, изтироб чекиши – ушбу касалликнинг намоён бўлишидир. Буни мен шундай тушунаманки, деменция билан оғриган бемор ўзининг ички бузилиши, рухий парокандалиги сабабли хотиржамлик туйғусидан маҳрум бўлиб, шу хавфсизлик, хотиржамлик бор жойни қўмсайверади. Ана шу асабий ҳаяжон энг яқин, қадрдон макон-масканларда ҳам босилавермагач, ҳатто ўз уйингдаги тўшак ҳам ортиқ керак бўлмай қолади. Хуллас, Марсел Пруст<sup>1</sup> таъкидлаб ўтганидек, *йўқолган жсаннат ҳақиқий жсаннат ҳисобланаркан*. Мазкур ҳолатда яшаш жойингни ўзгартиришдан ҳам ҳеч қандай наф йўқ. Эҳтимол, ашула айтиш билан бир озгина чалғиши мумкиндири, балки. Деменцияга дучор бўлган кишилар куйлашни ёқтиришади, чунки қўшиқ қўнгилни хушлайди. Куй-қўшиқ, бу – ҳис-ҳаяжон, жўшқинлик, таъбир жоиз бўлса, моддий оламдан ташқаридаги ватандир.

Кези келганда шуни ҳам айтиш керакки, бундай беморлар худди ёш болага ўхшаб кетади – бамисоли истиоралардан воз кечилган матн; бу

<sup>1</sup> Марсел Пруст – машҳур француз ёзувчиси (1871-1922).

эса ачинарли, чунки катта ёшдаги одам ҳеч қачон қайтадан болага айланыб қолмайди, бинобарин, олдга қараб ривожланиш бола табиатигагина хосдир. Болалар қобилиятга эришиб борсалар, деменция билан оғриган беморлар лаёқатини йўқота борадилар. Бундай bemорлар билан бўлган сухбатда йўқотиш сари юз тутсанг, болалар билан мулоқотда тараққиёт сари нигоҳ ташлайсан. Асл ҳақиқат шуки, қарилек ҳеч нимани қайтариб бермайди, у бамисоли яхмалак отишга мўлжалланган қия тепалик, шуниси хам борки, кексалик даври чўзилган сайин ташвишлар ҳам ортиб бораверади.

Мен СД-плэйрни қўяман. Синглим Ҳелга халқ қўшиқларидан иборат тўпламни харид қилиб, олиб келиб қўйган.

*Бир замонлар беши ёввойи оқкуши –  
Сариқ аравада учиб бораркан ...*

Баъзан ҳийла-найрангимиз ҳам иш бериб қолади. Ярим соатча шодон минғир-минғир хиргойи қиламиз. Мусиқа “юқди” шекилли, қариянинг авзойи бирдан ўзгаради, буни кўриб кулгим қистайди. Фурсатдан фойдаланиб, унга ўзимча “дирижёрлик” қилган бўлиб, аста ётоқхонасига бошлайман. Мана, энди кайфияти анча яхши, гарчи замон, макон ва воқеаходисалар тўғрисидаги тасаввури ҳамон ўзгармаган эса-да, бу нарсалар ҳозирча уни бозовта қилмайди.

Голиб бўлмоқ эмас, чидамоқ керак экан, ўйлайман ўзимча. Қарасам, пижамани ечмай тек турибди. Нима қилиш кераклигини айтганимдан кейин, кўрпа орасига аста сирғалиб кираркан, деди:

– Энг муҳими, бу ерда ухлаш учун жой бор экан.

У атрофига аланглаб, қўлини кўтарди ва фақат ўзи учунгина мавжуд бўлган ким биландир саломлашгач, қўшиб қўйди:

– Бу ер ҳам аслида ёмон эмас экан, чидаса бўлади.

Ишонсангиз, ўша кундан бошлаб ўзим ҳам худди падари бузрукворимга ўхшаб, ҳолдан тойиб, қаттиқ чарчаб қоладиган бўлдим.

*Аҳволлар қалай, дада?*

*Нима десамикин, ёмон эмас. Шунчаки бир нави, бу ҳақда нима ҳам дея олардим.*

*Хўш, вақт ўтиши ҳақида нима дейсиз?*

*Вақт ўтиши дейсанми? Унинг тез ёки секин ўтишининг аслида менга ҳеч қандай фарқи йўқ. Мен бу масалаларда даъвогарлик ёки талабчанлик қилолмайман.*

Гарчи орадан бир неча йиллар ўтиб кетган бўлса-да, ушбу хасталикнинг пайдо бўлиш сабаблари хаёлимга ҳануз кўланка ташлаб, мени таъқиб этиб келади. Деразадан қишики сукунат чўмган боққа назар ташлаб, бўлиб ўтган воқеаларни эсларканман, йўл қўйилган хатоларнинг оғир юки елкамдан босиб келади.

Отамизнинг хасталиги шундай бир чалкаш-чигаллик билан бошландикки, бўлаётган ўзгаришларга ўзимиз ҳам дафъатан тўғри баҳо беролмай қолдик. Улар дехқонча ривоятдаги қазо мисол юрганда “суяги қирсилласада”, лекин ўзи кўринмай аста пусиб кириб келди. Биз шовқинни эшигандик, аммо эски, кўхна уйдаги шамолнинг овози бўлса керак, деб ўйлаганимиз.

Касалликнинг дастлабки белгилари тўқсонинчи йиллар ўртасида на-моён бўлган, бироқ биз бунинг сабабларини ўз вақтида тўғри изоҳлай олмаганимиз. Айвонли уйимизни таъмирлаш чоғида отам аввалги (сув)

**ЖАҲОН АДАБИЁТИ**

тиндиригич хоналарнинг бетон қопқоқларини жойига қўйиб қўйиш учун уринганини, бироқ бир ўзи ёлғиз кўтара олмай, уларни уриб, синдириганини ҳали-хануз аччиқ афсус-надомат билан эслайман. Ўшандা, бу биринчи марта эмасди, мен жўрттага қилаяпти деб ўйлаб, бақириб берганман. Шундан кейинги ишларга ортиқ юрагим бетламай, қарашиш ўрнига мунтазам равишида уйдан чиқиб кетаверганман. Яна бир воқеа – Швейцария радиоси мухаррири ташриф буюрган кун эсимда қолган. 1997 йилнинг кузи, биринчи романим босилиб чиқкан кезлар эди. Мен китобдан бир бобни ўқиб беришим, мухаррир эса матнни магнит тасмасига ёзиб олиши лозим эди, шу боис пешиндан кейин уйда шовқин бўлмасин деб, отамдан илтимос қилдим. Ёзувга энди киришган ҳам эдикки, устахонада бирданига тарақа-турук бошланиб қолса бўладими... Узлуксиз, бетўхтов тақиллаш то микрофон ўчирилгунга қадар давом этса денг. Шунда ўз отамнинг бундай назар-писандиз хатти-харакатига ичимда фазабим қўзиб, гапнинг очиғи, ундан нафратланган ҳам эдим. Шу воқеадан кейин бир неча кун мобайнида гаплашиш у ёқда турсин, кўзига кўринмай юрдим. Пароль эса, оддий эди: саботаж.

Акам Петер қачон уйланган эди-я? Ҳа, 1993 йил. Тўй куни отам меъёрдан ортиқ овқат еб қўйган, ўн ё ўн беш бўлак тортни пақкос тушириб, корни қаттиқ оғриб қолганди. Кеч оқшом уйга аранг судралиб келиб, шу ётгандан икки кун кучли оғриқдан тўлғаниб чиқкан. Ҳатто ўлиб қоламан деб, ваҳима қилган, бизлар эса ўшанда кўп еган кетга зўр, ажаб бўлсин, дея кулиб қўяқолгандик. Шу тариқа кундалик қобилиятидан аста-секин маҳрум бўлиб бораётганини, афсуски, ҳеч ким сезмай қолган. Хасталик ўша пайтда отам узра ўз тўрини секинлик билан, билдиримай ёя бошлаган, у эса тўргачувалашиб, илиниб бўлган, биз буни пайқамай қолганмиз.

Биз, болалар ўша белги-аломатларни нотўғри, тескари тушуниб юрган пайтларимизда, отамиз бечора ўзида содир бўлаётган ғалати ўзгаришларни сезиб, ўзини аллақандай адоват, ғараз, хусуматга ўхшаш ёқимсиз, жирканч бир нима ўраб-чирмаб олаётганини хис қилиб, бундан изтироб чеккан, қаттиқ қўрқувга тушган, бироқ ҳимояланишга ожизлик қилган. Бу ҳақда у бизга бир оғиз айтмаган, бу эса унинг дамдузлигига, хис-туйғуларини очиқ изҳор қилишга ҳам халал берган бўлса керак, эҳтимол. Умуман, бу нарса унинг табиатига ёт бўлган, у ҳеч қачон бундай қилмаган, энди эса, иш ўтган, бирон чора кўриш учун анча кеч эди. Энг ёмони, баҳтга қарши, ана шундай ноқобиллик отадан болаларга ҳам ўтган, шу сабабли улар томонидан ҳеч қандай арзигулик зарба ҳам берилмади. Ҳеч ким юрак ютиб, бунга журъат қилолмади. Биз воқеа-ходисаларни ўз ҳолига ташлаб қўйдик. Ҳа, отамиз ғалати ҳолатларни бошдан кечираётганди. Бироқ унда бундай ҳолатлар илгаритдан ҳам ҳар доим бўлиб келганми? – Йўқ, унинг ўзини тутиши, юриш-туриши жойида эди.

Аслида эса бу барча ғалати воқеалар энг аввало, муайян характерга хос хусусиятларнинг янги вазият билан юзма-юз келиши натижаси бўлиб туюлди. Отам кексайган, бироқ энг ёмони, уни ўттиз йил бирга яшаган аёли ташлаб кетган, унда бирон-бир ишга рағбат етишмаслиги, эҳтимол, шундан эди.

Ажралиш унга анча оғир бўлган, у ўзи бунга қатъян қарши турган, чунки биринчидан, онам билан доим бирга яшашни ҳоҳлаган, бошқа тарафдан эса, икки ўртада мустаҳкам ришталар ҳам мавжуд бўлган. Факат у маълум бир урф-одат, анъаналарнинг вақт ўтиши билан эскириб, таомилдан чиқишини етарлича англаб етмаган. Бугунги кунга хос пишиқ-пухта ҳаётний режалар, ният-мақсадлардан кескин фарқли ўлароқ, бундан бир неча ўн йиллар олдинги аҳду-паймонга маҳкам ёпишиб олиб, ичган онт-қасамини бузишни истамаган. Шунга кўра ҳам у ўзидан ўн беш ёш

## ЖАҲОН АДАБИЁТИ

кичик аёлига қараганда бутунлай бошқа бир авлодга мансуб бўлган. Аёл киши учун эса обрў ёки ваъда муҳим бўлмаган, балки қаерда бўлмасин, баҳтли ҳаёт кечириш мумкин бўлса, шунга қараб таваккал қилинганд. Онам уйни тарқ этгач, отамнинг бу кўнгилсизликка ботинан сабот билан чидаб, бардош беришдан бошқа чораси қолмаган.

Онам уйдан кетиб қолгандан сўнг, отам қандайдир хаёл сурадиган бўлиб, кундалик ишларга ҳам кўли бормай қолди. Гўё сўнгги имкониятдан ҳам маҳрум бўлгандек эди. Фарзандлари касби-кори бўйича доим иш билан банд эканлигини, шунинг учун уларнинг қўшимча юмушларга вақтлари йўқлигини билишига қарамасдан, ҳатточи боғдаги ишларни ҳам ташлаб қўйди. Шундай қилиб, отамиз ҳақиқатан ҳам барча нарсадан кўнгли совиб, халос бўлиб олди, унда илгариги ғайрат-шижоат, иштиёқ-интилиш, кунт-ҳафсаладан асар ҳам қолмади. Ҳаёти давомида етарли даражада меҳнат қилиб қўйганини, энди ишлаш навбати болаларники эканини очик-ойдин маълум қилди.

Ушбу баҳоналар ўйлаганимиздан кўра бошқа нарсалар билан боғлиқ бўлса-да, бизларни бир оз ранжитди, чунки бу камчиликларни бекорчиликдан келиб чиқсан деб ўйладик. Аслида эса бунинг бутунлай тескариси, бекорчиликнинг бош сабабчиси – камчиликлар эди. Зоро, майда-чуйда ишлар, вазифалар бошидан ошиб-тошиб ётарди, қарасаки, назоратни йўқотиб бораяпти, шунда ҳар қанақангি масъулиятдан воз кечиб қўяқолган.

Кунда қиладиган иши – помидорларни суғориш ўрнига, энди у вақтини уззукун пасъянс<sup>1</sup> ҳамда телевизор кўриш билан ўтказарди. Ўшанда оёққа туриб олиш учун елиб-югуриб юрган пайтларим, бу ёқда эса отамнинг зериктирадиган, жонга тегадиган бир хил қилиқлари, менга улар бориб турган бепарволик, лоқайдликдан бошқа нарса эмасдек туюларди. Пасъянс ва телевизор, ахир шуям иш бўлдими? – ўйлардим мен ва ўз эътиrozларимни яшириб ҳам ўтиrolмасдим. Отамни аврадим, ачитиб гапирдим, керак бўлса, ғиди-биди қилдим, аввалти куч-ғайратини йўқотиб қўйганини, ланжлигини юзига солдим, бироқ уни довдираш ва маъюс-маҳзунлик ҳолатидан халос қилиш йўлида зўр берган барча ҳаракатларим зор чиппакка чиқди. У жала ўртасида қолган ёлғиз отек, турган жойида тек тураверди, миқ ҳам этмади.

Брегенц қўл сахнидаги овоз ёзиш студиясида бир муддат тирикчилик деб техник бўлиб ишладим, ўшандаям ёзиб-чишиб юрдим. Шу боис уйда ҳам бир неча ой бўлишимга тўғри қелмагандами, билмадим, ота-онам хонадонидан анча узоқлашиб кетган бўлармидим. Шу зайлда орадан бир неча кун ўтгач, оиласиз бошига чексиз ғам-ғусса тушди. Ака-сингиллар бирин-кетин жой топиб, кўчиб кетиши-ю, дадамиз нафас олаётган ҳаво сийраклашиб қолгандек бўлди.

2000 йилдаги бизнинг аҳволи-рухиямиз тахминан ана шундай эди.

Хасталик нафақат отамнинг миясини кемириб борар, балки болалик хотирамда сақланиб қолган қиёфасига ҳам путур етказаётганди. Бутун болалик даврим мобайнида унинг ўғли бўлишдан фахрланиб келган бўлсам, энди эса уни кўпроқ ақли заиф одам деб хисоблардим.

Жак Деррида<sup>2</sup> айтган гап тўғрига ўхшайди:

*Ёзганда ҳамиша кечирим сўрашга тўғри келади.*

Хедвиг холамнинг айтишича, бир куни Эмил – отамнинг олти ака-укасидан энг каттаси – билан уни кўргани боришибди. Эмилнинг кўлида соч оладиган машинка билан лунги бўлган экан, лекин дадам соч олдирганми-йўқми, буниси холамнинг эсида йўқ. Вақт пешиндан оқкан

<sup>1</sup> Пасъянс – қарта билан фол очиш.

<sup>2</sup> Жак Деррида – француз файласуфи ва адабиёт назариётчisi (1930-2004).

пайт экан. Отамнинг хонасидаги қүшетка<sup>1</sup> устида томат қайласи юқи қолган ликобчани кўриб, Ҳедвиг холам ҳайрон бўлибди. Бир маҳал отамнинг қўлидан пиёла тушиб кетиб синибди, унинг ҳайрон бўлиб турганини кўрган холам, синиқларни йигиштириб олай деб, супурги қаердалигини сўрабди. У эса, ҳеч нима дея олмай термулиб қараб тураверибди, шу аснода тўсатдан кўзларида ёш пайдо бўлибди. Шунда холам ҳамма нарсани англаб етган экан.

Бу ҳақда улар ортиқ гаплашишмаган. Отам унсиз ўзи билан ўзи олишаверган. У ҳеч қандай тушунтиришга ҳам, қочишга ҳам уринмаган – то Лурд<sup>2</sup> зиёратига қадар. 1998 йилда опа-сингилларидан энг каттаси Мария, уни ҳамма Миля деб чақиришарди, укаси Эрих ва унинг хотини Валтрауд билан (отам аёли ва болаларини олиб, ҳеч қачон ҳеч қаёққа бормаган, чунки урушда гўё бутун дунёни кўриб бўлған эмиш) бу гал ҳайратланарли тарзда нисбатан узоқ сафарга отланган. Йўлда улар кечаси ва эрталаб ҳам ибодат қилиб боришган. Миля афтидан кўп юришга қийналган чоғи, ўшанда дадамга ҳазиллашиб:

– Сен мен учун ҳам юравер, мен эса сен учун ҳам фикрлайвераман, – деган экан.

\* \* \*

Энг ёмони, бизнинг вазиятни тушуммаганимиз бўлди. Шунинг учун отамизни наинки хотира заифлиги ва баҳона билан боғлиқ муаммолар, балки бошқа нарсалар кўпроқ қийнаётгани маълум бўлгач, ахволимиз бир оз яхши томонга ўзгаргандек кўринди. Кундалик ҳаёт ечиб бўлмас муаммоларни кўндаланг кўяркан, паришонхотирлик панд бериши турган гап эди. Отам барвақт туриб, чала-ярим, телба-тескари ёки устма-уст кийиниб олар, туш пайти совитилган пиццани идиш-пидиши билан канализация кувирига ташлаб юборар, пайпокларини эса... совиткичда сакларди. Даҳшатларнинг бутун кўлами аста-секин англашилаётган бўлса-да, лекин биз учун бир нарса, яъни дадамиз дардга сўз бермаётгани, балки деменциядан азоб чекаётгани равshan эди. Кўп йиллар давомида мана шу фикр хаёлимга ҳам келмаган, энди ўйласам, отам тўғрисидаги тасаввурим ушбу белги-ишора йўлига ғов бўлган экан. Бу қанчалик ғалати туюлмасин, мен бунга сирайм ишонмаган бўлардим.

Ҳақиқий ахволни англаб етиш барча учун енгиллик бахш этди. Энди ортда қолган йиллардаги чалкашликлар учун биз англай оладиган изоҳ бор эди, факат алам қиласидигани – вақт, мана шу ғалати ҳодисага қарши курашда бехуда кетган вақтга ичимиз ачириди, чунки бу вақтдан бизлар минг баробар маънилироқ фойдалана олишимиз мумкин ва лозим эди. Агар биз эс-хушлироқ, одатдагидан эътиборлироқ ва қизиқувчанроқ бўлганимизда эди, нафақат отамиз, балки ўзимиз ҳам бунақанги кўп қийинчиликларга дучор бўлмаган, энг муҳими, хушёроқ бўлиб, хасталик ҳақида кўпроқ қайгуриб, сўраб-суриштирган бўлардик.

Касалликнинг бошланиши ўзи билан буткул муваффақиятсизликлар, улкан йўқотишларга тўла кўрқинчли бир даврни бошлаб келди. Бу дадамизнинг ҳасби-ҳоли ҳамда бутун умри давомида муҳим саналган нарсаларнинг ғойиб бўлишига ҳам тааллуқлидир. Масалан, эллигинчи йилларда чиққан уч тезлиқда ҳаракатланадиган улов. Дадам мана шу уловда неча йиллар қор-ёмғир демай жамоа идорасига ишга қатнаган – у ерда йигирма олти ёшидан бошлаб котиб лавозимида меҳнат фаолиятини

<sup>1</sup> Қүшетка – юмшоқ узун курси.

<sup>2</sup> Лурд (Lourdes) – Франциянинг жанубий-ғарбида, Гав-де-По дарёси соҳилида жойлашган хушманзара шаҳар.

бошлаган. Яна бевосита урушдан кейин тушган белгача олинган сурати – унда вазни қирк килограммча чиқадиган йигитча акс этган. Падари бузрукворимиз уни онасининг фотосурати билан бирга ҳамёнида салкам олтмиш йил асраб келган. Мехр, кўнгил қўйган нарсалари мана энди йўқликка маҳкум эди.

Адриан исмли таниш қизга ушбу сурат ҳақида гапириб берган эдим. Дадам ўшандада ўн тўқизга тўлган, русларнинг госпиталидан эндинга озод бўлган пайти. У ерда ичбуруғ бўлиб қолиб, парвариш туфайли эмас, балки кўпроқ тасодиф туфайли ўлим ёқасидан қайтиб, аранг тузалиб чиқсан, соchlari калта қирқилган, тим қора чақнаб турган кўзларидаги ифодани сўз билан тасвирлаш қийин.

Волфуртга отланганимда, Адриан ўша суратдан нусха олиб кўйсанг-чи, деб қолди. 2004 йил эди. Берлиндан қайтишим билан, тушдан сўнг уйга келдим. Отам одатдагидек бу пайтда боғда Урсула ва Петер ҳузурида на-бирапарининг ўйинини томоша қилиб ўтиради. Фурсатдан фойдаланиб, унинг куртка ва шимларининг чўнтакларини кавлаб, галадонлар ва жавонларни ҳам, худди болалигимдагидек, тимирскилаб чиқдим, бироқ ҳеч нарса тополмадим. Ҳайрон бўлиб, Ҳелгага кўнғироқ қилсан, ҳамён анча йиллардан буён кўринмай қолган, эҳтимол, йўқолган бўлса керак, деди. Шунда ҳафсалам пир бўлиб, аччиғим чиқди, ўз вақтида эътибор бермаганимизга наинки ўзимдан, балки барчамидан ҳам хафа бўлиб кетдим.

Кечкурун отам билан ўтирган эдик, сурат ҳақида сўз очдим. У бўлса кутилмаганда аллақаёқдаги бўлмағур гапларни гапириб, Мисрда ва Грецияда бўлганни, у ёқларда шимларини ўғирлатиб кўйгани ҳақида ҳикоя кила кетди.

– Нима-нима? Қаерда? Қанақасига? – сўроққа тутдим уни қизишиб, бироқ қия тепаликлар оша нафақат фотосурат, балки унга қўшиб, ўзининг бутун ўтмишини ҳам “тушириб қолдиргани” менга шундоғам аён эди.

– Дада, нима, Мисрда бўлдим демокчимисан?

– Албатта, факат ўз ихтиёrim билан эмас, балки болаларни қишлоққа жўнатиш баҳонасида, билдингми.

– У ёқлар қалай экан, ёқдими? – сўрайман бўшашиб.

– Зерикарли экан, – дейди у елка қисиб. – У ерда мен ҳеч нарсани кўрмадим, ҳеч нимани сезмадим. Мен у ёқда ҳеч нарса билмайдиган, бекорчи ва оми одам эдим, холос.

*Болалигингиж қандай ўтган, дада?*

*Ҳм. Яхши, беозор ўтган. Бизда ҳамма нарса жўн, оддий бўлган, тур, сон ва таъсириж жиҳатдан ҳам.*

*Бу ҳақда тез-тез эслаб турасизми?*

*Кўп нарсаларни эслай оламан, лекин ҳаммасини ҳам биламан деёлмайман. Балки, барчасидан воз кечган бўлсан керак.*

*Отангиз ҳақида нималар дея оласиз?*

*Хозирда ҳеч нарса.*

*Отангиз бўлган-ку ахир, шундайми?*

*Ҳа, албатта.*

*У ҳаётингизда сиз учун ўта муҳим шахс бўлмаганми?*

*Бўлмаган дессан ҳам бўлади. Чунки унда муҳим фикрлар жуда оз бўлган. У жуда кам нарсага бош қотирган.*

*Онангиз-чи?*

*Онам! Ундан мен, аввало, камтарликни ўрганганман. Онам камтар, камсукум, илтифотли ва самимий аёл бўлган. Уни барча яхши кўрарди.*

Август исмли болалар ҳозир онда-сонда учрайди. Отамни эса, саксон

**ЖАҲОН АДАБИЁТИ**

беш йил мобайнида, демак, бир умр ота-онаси, ака-сингиллари, турмуш ўртоғи, ҳамкаслари шу ном билан, яъни Август деб чақиришган, факат мактабдошлари унга қисқача *Gustl*<sup>1</sup> деб мурожаат қилишган.

У 1926 йил 4 июля Форарльбергдаги<sup>2</sup> Райн водийсида жойлашган Волфрут қишлоғида, майда деҳқон (ворислик хуқуқи мавжудлиги туфайли у ерда катта ер эгалари бўлмаган) оиласида ўн фарзанднинг учинчиси бўлиб дунёга келди. Отамнинг ота-онаси учта сигир, мевазор боғ, асалари, экинзор, ўтлок, озрок ўрмондан иборат мол-мулкка ҳамда уч юз літр ароқ ишлаб чиқариш хуқуқига эга бўлган. Бироқ кўпболали оила учун бу билан тириклик ўтказиш қийин эди. Адолф Гайгер, Daett<sup>3</sup>, янги ташкил этилган электр энергия саноатида ходим бўлиб ишлар, велосипедда қўйи Райн водийси қишлоқлари бўйлаб физиллаб юриб, хонадонлардаги электр хисоблагичларнинг қанча ёзганини қайд этиш билан машғул бўлар, шу тариқа катта оиласида қўмаклашиб турарди.

Мабодо велосипед камерасига мих-пих кириб, тешилиб қолгудек бўлса, уловни уй олдида колдирап, болалардан биронтаси, кўпинча Август тешилган жойни тезда ямаб қўярди. Менинг ўзим ҳам деярли шундай қилардим, велосипедим камераси тешилиб қолса, уйимиз олдига олиб борардим, отам уни ямаб, созлаб қўяр эди. Отам ота-онаси қандай бўйсунган бўлса, буни қарангки, у энди болаларига ҳам худди шундай қулоқ солишга мажбур бўлаётганди. Болалари эса бутунлай бошқа бир олам учун туғилгандек, гўё ишнинг қўзини биладигандек эдилар.

Бобомни ҳисоб-китобга уста, лекин қобилияти ўргамиёна ва у қадар кучли, соғлом ҳам бўлмаган дейишади. Оиланинг қолган барча аъзолари унга қараганда чакқонрок ва кучлироқ бўлишган чамаси, бобом бечора болалари ва кампири олдида азбаройи уялиб қолмаслик учун ишлашдан кўра кўпроқ буйруқ беришни яхши кўрган экан. Шунинг учун ҳам у бирон-бир ишни қандай бажаришни тушунтириб ўтиргмаган, бунинг ўрнига фақат буйруқ бераверган, ўша ишни қандай қилса яхши бўлади, бу хақда бирорвнинг фикрига қулоқ ҳам солмаган.

Шундай қилиб, бобомнинг бутун хатти-ҳаракати, феъл-атвори хукмфармо бўлиб, ақлдан кўра кўпроқ куч ишлатишни маъқул кўрган. Шунга кўра, болаларнинг қочишига, чап беришга, қутулиб қолишга бўлган хатти-ҳаракатларининг ҳам чек-чегараси бўлган. Бироқ Миля билан Паулнинг айтишларича, баъзан бободан ўтиб қолгудек бўлса, унга тап тортмай гап қайтарган пайтлари ҳам бўлган. Ёши катта болалар иложи борича ундан узоқроқ юриш пайида бўлишган. Мисол учун, якшанба куни бўладиган ибодатга ундан уч дақиқа олдин ёки уч дақиқа кейин боришар, лекин зинҳор у билан бирга боришмаскан. Шунинг учунми, бобом ёш болаларга яхшироқ муносабатда бўлишга ҳаракат қилар, улар билан бирга “тулки-товуқ” ўйнап, уларни сайрларга олиб чиқарди. Бироқ шундай бўлса-да, улар бобомнинг шапалоқларини ҳам бот-бот эслаб туришади. Бир куни, 1937 йил бўлса керак, Шварцах сойидан ўтаётуб, бобом пойабзалини ечишга эринганидан ўн тўрт ёшли Эмилнинг елкасига миниб олган экан.

Бобомни қўп китоб ўқиган дейишади. Бироқ унинг бу хусусияти негадир болаларига “юқмаган.” Аксинча, бувимнинг фазилатлари “юқумлироқ”, бўлган экан. Отамнинг айтишича, Mam<sup>4</sup> бобомга қараганда ақллироқ, меҳрибон, мулойим, самимий, озғиндан келган, бироқ бицепс, яъни елка билан тирсакни ҳаракатлантирадиган мушаги яққол кўриниб турган кучли,

<sup>1</sup> Gustl – August (Август) исмининг эркалаб айтилиши.

<sup>2</sup> Форарльберг – Австриядаги тарихий вилоят, ўлка.

<sup>3</sup> Daett – (австр.) сўзлашув тилида “бува”, “бобо” дегани.

<sup>4</sup> Mam – (австр.) сўзлашув тилида “она”, “эна”, “буви” дегани.

чайир аёл бўлган. Отасининг Волфуртда темирчилик устахонаси бўлиб, у каштадўз бўлмасидан аввал, ака-укалари бўлмаганлиги сабабли темирчи отасига ёрдамчилик қилган. Устахона ҳов тепада, кўхна қаср ортидаги ўрмон ёқасида жойлашган, унда улкан чархпалак ҳам бўлган. Биринчи жаҳон урушидан олдин ва уруш пайтида ҳам юк машинаси Дорнбирндан материал олиб келиб ташлар, темирчининг беш нафар қизи мактабдан келгач, узун темирларни тик кўча бўйлаб устахонага ташишарди.

Бувим камгап, кўзга ташланишни ёқтиримайдиган аёл бўлган. Уни болалари чукур хурмат-эҳтиром билан тилга олишади, шу боис бўлса керак, оналари ҳақида кам гапиришади. Терезия Гайгерни ҳамқишлоқлари ўта меҳнаткаш аёл сифатида эслашади. Устахонада сандон ёнида туриб, лахча чўғ бўлган темирни болғалаб, унга ишлов берарди, бундан ташқари, экинтикин ишларига қарашар, ундан ортиб, ёш болаларига карап, уларнинг жиққа хўл бўлиб кетган йўргакларини ювар, бу ишларни битиргунича ўзи ҳам қора терга тушиб кетарди. Баъзида ниҳоятда чарчаб кетганидан канапега<sup>1</sup> бир зум чўзилгудек бўлса, мени беш дақиқадан сўнг уйғотиб қўйинглар, деркан. Болалар эса, уйғотишга кўзлари қиймай, онам дам овлосин, дейишаркан.

Мева теришга боргандарида, бувим иш бошлашдан олдин: “Худойим ишимизга барака берсин”, дея дуо қиларкан. Ирене – отамнинг кенжা синглиси далага борганида, ўша даврларни ҳамон эслаб туради. Айтишича, далада ишлаётган пайтларида каттакон мевақутига ёш болани ётқизиб қўйишаркан. Шу тариқа болалар мевақутида атак-чечак бўлишаркан. Ўша мевақутига бобомнинг исми-шарифи A.G. тарзида тамға қилиб ёзиб қўйилган. Бу ишни унинг темирчи қайнотаси бажарган. Бунака ишлар, яъни ҳарфлар ёки белгиларни куидириб, тамға босиши унинг ихтисосликларидан бири бўлган. Темирчининг бундай белги-тамғаларини ўша пайтларда Венгрия ёки Парижда ҳам учратиш мумкин бўлган, бироқ шунча меҳнатга қарамасдан, Аппенцел, Бодензее кўли оша Линдау, хаво очик бўлган пайтда ҳатто Фрийдриҳсхафен ҳам кўриниб турадиган тепалиқда у қашшоқлигича қолган.

Терезия Гайгер болаларига доим шундай деб тайинларкан: “Бемаҳалда юрманглар, уйга вақтли келинг, башарти кеч қолсаларингиз, мени уйғотиб юбормай, секин кириб ётинглар.”

Оиласда кун тартиби доим бир хил бўлиб, унга қатъий риоя қилинган. Болалар барвақт туришга одатланган, шундай бўлса-да, баъзида мактабга кеч қолмаслик учун ғизиллаб чопишларига ҳам тўғри келган. Пойабзаллар бир аҳволда, қишида ёғоч пошналарга қор ёпишиб қоловерганидан уни тез-тез қоқиб туриш керак бўлган. Кор эса сероб, айниқса авлиё Николай куни<sup>2</sup> арафасида гупиллаб ёғиб берар ва то баҳоргача эrimай, кўрпа бўлиб ётарди.

Нонуштада болаларга илиқ сут ва нон ботириб ейиш учун рибел<sup>3</sup> берилар, қаҳвани эса фақат бувим билан бобом ичишарди. Якшанба куни дастурхонга асал барча учун кўйилса, бобомга бошқа кунлари ҳам бериларди.

Азалдан болаларни қаттиққўллик билан тарбиялаб бўлмайди, улар қаттиққўлликда тутиб турилади, деган гап бор. Хонадонда сигирлар ҳам ўтлатишга олиб чиқилмас, балки молхонада боқиларди. Молларга қараш болаларнинг вазифаси бўлса, болаларни боқиш – ота-онанинг вазифаси эди.

<sup>1</sup> Канапе – эски урфдаги оддий, кичкина диван.

<sup>2</sup> Авлиё Николай куни – ҳалқ удумлари билан боғлиқ байрам, 6 декабрда нишонланади. Одатда байрам арафасида, 5 декабр оқшомида Қорробо болаларга совғалар улашади.

<sup>3</sup> Рибел – макка унидан тайёрланадиган таом.

Бугунги кун билан таққослаганда, болаларнинг овқатланиши ҳам ёмон ахволда эди. Уларга одатда сабзавот деярли берилмас, озгина гўшт, кўпроқ сут, нон ва ёй бериларди. Биринчи мева пишишини барча орзиқиб кутарди. Ҳатто болалар тонг пайти уйғонишиб, билдиримай секин ташқарига чиққан, илк ноклар пишиб, тагига тушмаганмикин деб пойлаган, башарти бир нима топволса, топган топалоқ деб, бир-бирларидан қизғанишган пайлар ҳам бўлган.

Ўша давр шарт-шароитлари нуқтаи назаридан олганда, болаликнинг ана шундай муҳтожлик ва қийинчилкларининг ҳам чек-чегараси бўлган, албатта. Бироқ энг ёмони, болаларга ота-оналар томонидан камроқ эътибор қаратиларди. Болалар сонининг ниҳоятда ошиб кетганлиги боис, талаб таклифдан анча устун турган. Ҳамма нарсани ўзаро бўлишишга ва баҳолиқудрат баҳам кўришга тўғри келарди.

Шунингдек, боланинг қўлидан иш келди дегунча, у рўзгорга ёрдамлашишга мажбур эди. Кичкинтолар ўзларидан кичикроқларга қарashi лозим эди. Қўшнидан қарзга олинган от эгасиникига ўтиб кетмаслиги учун юган сувлуғини қаттиқроқ тортишга тўғри келарди. Оғилдаги чўчқа учун болаларни болут дараҳтининг ёнғоқ – чўчқаёнғоқ териб қелишга қамишзор ботқоқликка жўнатишарди. Етти ўғилнинг ўрганчаси Йозефни бир куни эман дараҳтининг остида бехуш ётган холда топиб олишади. Маълум бўлишича, у ёнғоқ тераман деб, дараҳтдан йиқилиб тушган экан. Болалар охурдан мол емаган ортиқча ўт, поя, нишхўртларни териб олади. Улар аравачада Брегенцга – бозорга олма олиб боришади. Уйга қайтаётib, отам ва ундан бир ёш кичик Паул тентаклик қилиб, галмагалдан аравачага чиқиб ўтиради, навбатма-навбат “от” бўлиб, аравачани судрайди. Пошнасига нағал қоқилган ёғоч пойабзаллар овози тош йўлда тақиллаб эшитилади. Ўшанда кўчалар ҳам бутқул болалар ихтиёрида бўларди, дейиш мумкин.

Хуллас, бирон-бир иш билан банд бўлиш деган иборани сўзма-сўз том маънода тушуниш мумкин эди. Ўғил болаларнинг аравачани судраб келаётганини кўрган қизлар уларнинг устидан кулишган:

– Қаранглар, эшаклар турганда отга на ҳожат!

Иш ўғил ва қиз болалар ўртасида тақсимлаб берилган. Ўғил болалар эрталаб молхонага йўл олишса, қиз болалар соат бешда туриб, мактаб вақтигача далада ўтқ қилишарди.

Бир куни қаттиқ довул туриб, маккажўхоризорни ёппасига ётқизиб кетган. Болалар қўлларига сим ва қозикларни олиб, бутун кун бўйи ётиб қолган экинни турғизиш билан овора бўлган. Макка дони оиласига қундалик рибел пишириш учун жуда зарур эди.

Оиласига деярли ўзини ўзи таъминлар эди. Ун, нондан тортиб, то туз, қандгача ўзларидан чиқарди. Ўта зарур нарсаларнигина сотиб олишарди, холос. Ҳожат қоғози эски газетлардан кафтдек-кафтдек қилиб, қиркиб қўйиларди, бу ишни ҳам болалар бажаришарди. Ўт ёкишда тутантириқ учун ҳам қоғоз керак бўларди. Рўзгорда битта чўчқа, битта печка бўлиб, ахлатхонага деярли ҳеч қандай чиқмасди.

Отам ўзига қолса, бир умр жон деб мустақил яшаган бўларди, чунки бу унга ўз муҳрини босган дехқонча яшаш тарзининг бир қисми бўлиб, унда мудом сақланиб қолган, бу эса унинг хотини ҳамда истеъмол ва исрофгарчилик оламида ўсиб, улғайган фарзандларига ёқмасди. Бир нима бузилиб қолса, тузатиб, таъмирлаб, ундан яна фойдаланиш, эҳтиёжларни кондиришни бошқа кунга қолдириш ёки баъзи бир эҳтиёжлардан умуман гап очмаслик – ота-оналардаги бундайин дунёкараш бу ерларда завол топаётган маданиятлар сирасига киради.

Райн водийсидаги катта уйнинг ертўласида қозон бўларди. Болали-  
ЖАҲОН АДАБИЁТИ

гимда у ерда челякни түнкарволиб ёки бўлмасам, ғўла ё тўнгак устида ўтириб, катталарнинг ароқ тайёрлаш жараёнини кузатардим. Печкада оловнинг чирсиллаб ёнишини, суюқликнинг катта, қавариқ шишаларга қулқиллаб қуилишини, унинг қизиб кетган хона бўйлаб тараладиган хушбўй ҳидини, қоловерса, қаттиқ ишлаб, қора терга ботган ишчилардан анқийдиган бадбўй ҳидни ҳам яхши кўрардим. Фақат шугина эмас, балки ташқаридаги ўрада аста совистган қўйқа-тўпонлардан қишки аёзда дийдираб турган нок дарахтининг ялонғоч шохлари бўйлаб кўкка ўрлаётган буғ, тутунларни ҳам.

Отам ва унинг ака-сингиллари учун бу машғулот яна шуниси билан ҳам “фойдали” эдики, баҳонада қайнок сувгаям эга чиқишарди. Иссик сув катта қўшқулоқ орқали дархол устахонага етказилади, унинг ортидаги симтўр ичида товуқхона жойлашган. Буёғи энди худди ковбойлар ҳақидаги итальянча фильмдаги воқеаларга ўхшаб кетади: бир ёқда ароқ ҳидидан масти бўлган товуқларнинг қақағлаши, бошқа томонда эса қип-ялонғоч дехқон болаларининг илиқ сувда шўх-шодон чўмилишлари... ушбу манзара йилига қарийб ўн марта тақрорланарди. Қолган пайтларда эса барча ошхонада – хонадонда яккаю ягона бўлган тосда совук сувга ювинарди.

Отам болаликдан ўрганганд ҳаёт тарзига қаттиқ берилган бўлиб, улғайганда ҳам ҳамон ўша эски тосда ювинар, унга икки букилиб олган холда пишқириб, оҳ-оҳлаб, юзига шалоплатиб сув сепарди. Юваниб бўлгач, артинаётиб сочиқни кўрсаткич бармоғи билан қулоқларига чукур тиқиб, шунақаям кавлардики, кўриб туриб, раҳминг келиб кетарди. Булар – анъанавий тасодиф туфайли эсимда қолган, бамисоли ҳосили йиғиб олинган даладаги яккам-дуккам чўп, гиёҳлар сингари арзимас хотиралардир.

1938 йилда мамлакатда аншлюс<sup>1</sup> бошланди. Оила аъзолари қишлоқнинг ашаддий христиан социал-демократларидан саналар, бобом билан бувим ўз католикликларини фақат якшанба куни черковга бориб, ибодат қилишдангина иборат деб билмасдилар. Бунинг устига, оила янги сиёсий вазиятдан фойда кўзладиган шахсий иқтисодий манфаатларга ҳам эга эмас, майда қишлоқ ҳўжалиги ва бобомнинг янада ривожланиб бораётган электр энергия саноати соҳасида доимий ишлайтганлиги туфайли бўлажак инқирозларга қарши хийла мустаҳкам таъмин этилган эди. “Урушиш – шайтоннинг иши”, деркан доим бувим. Бобом эса, кутурган итдек ўзини у ёқ-бу ёққа ташлар, эндиликда нацистларга бюргермайстер бўлиб олган куёвига ноилож сизлаб мурожаат қилишга мажбур бўлган экан.

Оилада сиёсатга аҳамият берилмас, тамадди пайти барчанинг оғзида ош, ортиқча эзилиб ўтиришга вақт ҳам йўқ, қоринга тез-тез еб, ҳамма яна иш-ишига кетарди. Үшанда катта ўғил Эмилни гитлерчи ёшлар ташкилотига киришга таклиф қилишган, бироқ у Қизил Хоч жамиятига аъзоман деб, рози бўлмаган. Шунда унга, агар фикрини ўзгартирмаса, мактабдан “учирма” бўлиб кетишини айтиб, дўқ-пўписа қилишган. Пировард натижага шу бўлдики, Эмилга ўрта иқтисодий ўқув юртида ўқишига рухсат беришган, лекин оила ўшанда саккиз нафар бола учун бериладиган нафақадан маҳрум этилган. Деярли бошқа қийинчиликлар бўлмаган. Бинобарин, қўшнилар орасида тавқи лаънатга учраганлари ҳам бўлган. Масалан, улардан бирининг эшигига: *Бу оила немис ҳалқига қарши*, деган ёзув осиб қўйилган. Ўша пайтда Паул ўн бир ё ўн икки ёшларда бўлса керак, ушбу лавҳа олдида бир оз туриб қолган, у энг аввало, оила (*Familie*) сўзи бош харф ўрнига кичик f билан нотўғри ёзилганига ҳайрон бўлган. Кўшни уйда ёш келин-куёвлар яшаган. 2009 йил кўкламида ўша аёл тўқсон тўрт ёшида қариялар уйида вафот этгандан сўнг, отам унинг хонасига бориб

<sup>1</sup> Аншлюс (Anschluss) – 1938-1941 йй.да Австриянинг ҳам сиёсий, ҳам иқтисодий жиҳатдан Гитлер Германиясига қўшиб олиниши.

жойлашган эди. Қишлоқ жойларда одамларнинг таржимаи ҳоллари бир-бирлари билан ана шу тарзда боғланиб кетаркан.

Уруш бошланган пайтда отам ва унинг мактаб ёшидаги ака-сингиллари саккиз йиллик халқ мактабида ҳамда гимназияда ўқишишган. Уларнинг келгусида умумтаълим мактабларида ҳам ўқишишларига сабаб, биринчидан, ота-оналарининг нари борса, болалардан атиги биттасининг тирикчилигига ярайдиган майда қишлоқ хўжалигига муқобил равишда таълим олишларига ортиқ даражада хурмат-эътибор билан қараганликлари бўлса, бошқа тарафдан, ўсиб келаётган ёш авлоднинг истеъдод, қобилиятларини кўриб, бундан кувонишгани ҳам рост. Бундан ташқари, фарзандлар ўқимишли, билимли бўлса, оиласа ҳам фойдаси тегади, деган фикрни кўзда тутишган, чоғи. Учинчи ўғил Робертдан ташқари, ҳеч ким ўқимайман деб тихирлик килмаган. Фақат угина, ўқиб руҳоний бўламанми дея, гимназияни ташлаб кетган.

\* \* \*

1944 йилнинг февралида дадам фронтга кетиш муносабати билан ўқишини муддатидан олдин “тугаллаб”, ҳарбий хизматга чақирилди. У ҳали ҳаётий тажрибаси етарли бўлмаган оддий дехқон боласи, ўн етти ёшли гимназия ўқувчиси – Андрей Белий<sup>1</sup> ёзганидек – на бола ва на катта ёшли, на ҳарбий ва на фуқаро эди.

Меҳнат мажбуриятини ўтагандан сўнг, 1944 йилнинг ўрталарида уни вермахт қўшинлари сафиға юборишиди. Ундан уч ёш катта Эмил ва бир ёш кичик Паулнинг ҳам аҳволи худди шундай кечди. Уйдагилар энди сиёсий воқеаларни ноилож бир оз қизикиш билан кузата бошладилар, негаки, ҳарбийдагиларнинг ҳоли не кечдийкин? деган савол уларни мудом ташвишга соларди.

Эмилнинг омади бор экан. Тез орада у Африкада америкаликларга асир тушиб қолди ва урушнинг қолган кисмини Монтанада, қўшилмада тилмочлик қилиб ўтказди. Орадан бир оз вакт ўтиб, ундан хат келди, эсон-омон юргани маълум бўлди. Паул 1945 йилда Италияда янги зеландияликлар томонидан асир олинди. Бари деган жой яқинидаги лагерда юрган пайтида тўсик, ғовларнинг симидан игна ясад, свитерларнинг сўклилиб, ииртилиб кетган енгларидан шериллари – ҳарбий асирларга куёш жазирамасидан сақланиш учун шапкалар тўкиб берган. Ўзининг шунақа шапкасини урушдан кейин ҳам узоқ йиллар кийиб юрган.

Паул 1945 йилнинг ёзида уйга кириб келганида, эндиғина ўн еттига тўлган эди. Келиши ҳақида ҳеч кимга хабар бермаган; келиб, аввал учта сигир турган молхонага бош суккан, сўнг амакивачаси Рудолф ароқ тайёрлаб ўтирган хонага аста кириб борган. Рудолф орқа зина билан ундан олдин ошхонага чиқиб борса, у ерда бувим фарзанд доғида куйиб, куймаланиб юрган экан. Бир неча кун аввал ўнинчи фарзанд – ўғил бола туғилгач, киндиги бўйнига ўралиб қолиб, нобуд бўлган. Рудолф унга:

– Менга қара. Терез, бир аскар келиб, кўноқ бўлмоқчи, майлими? дебди.

Бувим бир зум тараддуланиб қолган, чунки уч ўғил йўқ бўлса-да, уй одамга тўла бўлган. Шунда эшик панасидан Паул чиқиб келади, кўз ёшларини тутолмай, ўзини онаси бағрига отади.

Дадамизнинг аҳволи ҳам бошида деярли яхши бўлган. Дастрлабки ҳарбий таълим даврида ўнг билагидан юкумли инфекция билан касалланиб, икки марта шифохонага тушиб чикади. Яраси тузалар-тузалмас, рождество байрамига ароқ опкеламан деб, уйга жўнаворади ва икки

<sup>1</sup> Андрей Белий – асл исм-шарифи Борис Николаевич Бугаев, рус шоири (1880-1934).

адвент<sup>1</sup> ҳафтасини Волфуртда ўтказади. 1945 йилнинг февралида, гарчи ҳайдовчилик гувоҳномаси бўлмаса-да, тўсатдан шаркий фронтга шоффер сифатида жўнатилиди. Юқори Силезияда кутилмаганда баҳтсиз ҳодисага учрайди. Музлаган тошйўлда бораётган отарава унга ҳадеганда йўл беравермайди, сигнал чалай деса, бузуқ, ишламайди, бунинг устига йўл сирпандик, тормоздан ҳам умид йўқ, шу аснода рулни туйқусдан пастга – тўғон томон буриб юборади, натижада машина қулаб, бир неча марта ағдарилиб кетади... Раҳбар ишингни ҳарбий судга ошираман дейди, у эса совуққонлик билан ҳайдовчилик гувоҳномаси йўқлигини, рулга ўтиришга ҳеч қандай ҳақ-хуқуқи бўлмагани ҳолда мажбур қилишганини маълум қиласди.

Нихоят, ҳаммаёқ алғов-далғов, аралаш-куралаш бўлиб кетгач, бир гурух австриялик юртдошлари билан биргаликда жанг майдонини ташлаб, америкаликлар томонга қочишади. Бироқ мўлжалдан адашиб, ғарб қолиб жанубга – Чехияга бориб қолишади ва у ерда руслар қўлига тушишади. Шу тариқа Австрия ҳудуди – Кампталда бир муддат бўлишларига тўғри келади.

Урушда дунёни кўриб бўлганман деганида, отам урушнинг ўзини эмас, балки унда кечган вақтни назарда тутган. Асириклида у ҳарбий ўлжаларни ортиш-тушириш билан машғул бўлган. Бир куни азбаройи оч колганидан шўрвадаги айнигар сүякни ғажиб қўйиб, дизентерияга дучор бўлади, қисқа вақт ичидаги қарийб қирқ килога озиб кетади. Шундан сўнг Братиславада, шаҳар чеккасидаги муваққат госпиталда ўтган тўрт ҳафта тўғрисида у менга лом-мим демаган. Отамнинг хикоялари кўпинча уни советлар (“ортиқ ҳеч нимага ярамаганим учун”) қўйиб юборишган кундан бошлинарди.

Бошқа ҳамюртлари билан бирга уни қизил аскар Ҳайнбург яқинидаги Словакия-Австрия чегарасига олиб келиб: “Хайр, омон бўлинг, австрияликлар!” деба хайр-хўшлашган экан. Ушбу сўзларни отам бугунги кунда ҳам баъзан, хаёлга чўмган пайтларида ғўлдираб кўярди.

Уйга – Форарльбергга қайтиш учун яна уч ҳафта вақт кетган. Буни тинкани қуриладиган “тўсиқлар оша ҳалпиллаш” деса ҳам бўлади. Ўшандан отамда на пул бўлган, на совет зонасидан америкаликлар худудига ўтиш учун зарур ҳужжат. Гувоҳнома олиш учун эса суратга тушишни хоҳламаган, чунки уни чиқаришга ўн тўрт кун кетаркан. Ўрт соғинчидан қалби ўртаниб,nihоят, чегарадан нолегал, яширинча ўтиш учун қулади фурсат пойлай бошлиайди.

У бит босиб кетганидан тоза ўринларда ётмас, гоҳ меҳмонхоналарнинг ертўласида, гоҳ дехқонларнинг пичан ғарамлари орасида ётиб юрарди. Ўрфар деган жойда олти кун қолиб кетгач, иттифоқо форарльбергликлар учраб қолиб, унга Қизил Ҳоч машинасининг ўринидиги остига яшириниб, Дунай орқали Линцга этиб олишига ёрдам беришади. У ерда америкаликлар кўмагида битдан холос бўлади. Линцда фотосуратни тез чиқарадиган сураткашга бориб, расмга тушади. Ана шу фотосуратни отам то йўқотиб қўймагунига қадар, салкам олтмиш йил ҳамёнида асраб-авайлаб, сақлаб келган.

Иннсбрукдан ўтгач, поездда биринчи марта волфуртликларни учратиб қолиб, улардан бир бурда нон сўрайди. Лаутераҳда поезддан тушиб, холавачасига дуч келади. Бироқ сочлари калта қилиб олингани, бунинг устига озиб-тўзиб кетганидан холавачаси аввалига уни танимайди. Ўзини танитгач, унга ҳамроҳ бўлиб, уйга бирга боришади.

Отамнинг узоқ айрилиқдан сўнгги ҳис-туйғуларини тасаввур қила ола-

<sup>1</sup> Адвент – рождество байрами олдидан келадиган ҳафталар.

ман. Ўзим ҳам Венадан қайтаётиб, Арльберг туннелидан ўтгач, темирйўл бекатларидағи лавҳаларни худди шеър каби ўқирканман, қалбим қувончга тўлади: *Ланген, Валд, Далаас, Брац, Бингс, Блуденц* ва ҳоказо.

Падаримиз сентябрь ойининг иккинчи ҳафтасида, 9 – санасида уйга кириб келди. Теварак-атроф сарғимтири тусга кирган, нок, олма теримидан олдинги, пичан-хашакнинг учинчи ўримига тушишга тайёргарлик кўрилаётган пайт эди. Октябр ойида эса, ҳеч нарса бўлмагандек, у яна мактаб партасида ўтирас, савдо академияси курсига киришга тайёрланарди.

Яна нималар қолдийкин-а, ҳеч нарса эсимдан чиқмадимикан?

Ўшанда ҳеч ким билмаган гап: ўн тўққиз ёшли бу йигитча энди дунёга ҳеч қачон қалбини очмасликка қарор қилган, унинг учун энди ҳаммаси бир умрга тамом бўлган эди. У ҳарбий шифохонада ётган пайтида, агар эсономон етиб борсан, бир умр уйдан ташқарига чиқмайман деб, касам ичган. Узок йўл босиб, ватанига қайтгандан сўнг, электротехникага ўқийман, деган режаси ҳам барбод бўлган. Воқелик туйғуларни ўзгартирган.

Яна бир нарса эсимда қолган. Болалик пайтларимда қачонки оиласизда таътил мавзуида сўз очилгудек бўлса, дадам нуқул бир гапни, яъни унга Волфуртнинг гўзаллиги етиб-ортишини, бошқа ҳеч қаёққа чиқишини хоҳламаслигини юз марталаб такрорлашдан чарчамасди. Тўғриси, ўшанда бундайин гаплар ғашимни келтирас, улар менга ланжликни очик-ойдин пардалаш каби сохта, қолаверса, қисман куруқ баҳонадан бошқа нарса эмасдек туюларди. Бироқ кейинчалик отамнинг бундай бош тортиш, бўйин товлашлари замирида кишибилмас жароҳатлар ётишини, улар ҳалихамон тугамаслигини ҳамда унинг феъл-атвори, юриш-туриши, қиёфаси табиатан қандай бўлса, ўшандай намоён бўлганини, буларнинг барчаси гўё ўзини ортиқ ҳавф-хатарларга қўймаслик йўлидаги ўзига хос чора-тадбирлар эканини тушуниб етдим. Хуллас, у Ватан дийдорига зор бўлишдек оғир дардга иккинчи бор мубтало бўлишни сира-сира истамасди.

Тақдирнинг ғалати ҳазилини қарангки, орадан кўп йиллар ўтиб, яна тағин шундай вазиятга тушиб ўтириби – ўз уйида эканини унтиб қўйганлиги сабабли у деярли ҳар куни уйимга кетаман дейишини қўймайди.

*Дада, қаранг, анови боғдаги деворчани кўряпсизми, уни ўз қўлларингиз билан қургансиз.*

*Тўғри, уни уйга олиб кетаман.*

*Йўқ, деворчани олиб кетолмайсиз!*

*Бундан осони борми.*

*Ахир, бунақа бўлмайди-да, дада!*

*Мен сенга ҳозир буни кўрсатаман.*

*Лекин дада! Ҳой, менга қаранг! Бунақаси кетмайди! Ундан кўра, менга тушунтириб берсангиз-чи, ўзинг уйда бўлатуриб, яна қандай қилиб уйга кетмоқчисиз?*

*Тушунмадим.*

*Мана қаранг, сиз ўзингиз уйдасиз ва яна уйга бормоқчиман дейсиз.*

*Одам агар уйда бўлса, унда ҳеч қандай уйга кетолмайди.*

*Гапинг моҳиятан тўғри.*

*Хўш?*

*Биласанми, бу нарсаларнинг сенга қизиги бўлса бордир, аммо менга мутлақо қизиги йўқ.*

Нихоят, аввалги умумий лаёқатсизлик, ёқимсиз хотиралар ортда қолди, чунки энди отамиз билан эҳтиётроқ бўлиб муомала қила бошлагандик, бундан ташқари кундалик ҳаёт бизни янгидан-янги, қутилмаган воқеа,

**ЖАҲОН АДАБИЁТИ**

ходисалар билан ўз измида ушлаб турарди. Биз энди орқага эмас, кўпроқ олдинга қарашга интилардик, негаки касаллик олдимизга ҳар доим янги талаблар кўярди. Бу борада ҳали янги, ёш ва тажрибасиз бўлсак ҳам, бунинг устига билим ва омилкорлик етишмаса-да, барибир ўз мавқеимизни сақлаб қолишга ҳаракат қиласардик.

Отам энди кўпроқ пиёда сайдрга чиқар, кўпинча бизга бурчакма-бурчак рўпарада турадиган акам Петерларникига (унинг уч кизи бор эди) борарди. Бора-бора бу сайдлар одатдагидан бошқачароқ мазмун касб эта бошлади; у баъзан ярим тунда чала-чулпа кийиниб, уйдан чиқиб кетарди. Гоҳида эса уни топиб бўлмас, чунки болалар хонасига кириб, ётиб олар, жавонларни тимирскилаб, бир нималарни излар, Вернернинг шими ўзига лойиқ келмаганидан таажжуғга тушарди. Ахийри, унинг хонаси эшигига *Август* деб ёзиб, бошқа хоналарни маҳкамлаб бекитиб кўйишимизга тўғри келди.

Кўпинча уйга боши қонаган ё бўлмасам, тиззалари бир нимага урилиб, кўкарган ҳолда кириб келарди. Кейин билсақ, туғилиб ўсган қадрдан уйига бораётуб, ўт босиб ётган тик тепаликдан йиқилиб тушган бўларди. Бир куни қизиқ бўлган. Ўша эски уйга бостириб борган-да, тўғри келиннинг олдига кириб, укаси Эриҳни сўраган. Болалик пайтларимдан биламан, лўқидонни тиркишча орқали кўрсаткич бармоқ билан аста суриб, эшикни осонгина очиш мумкин бўларди. Афтидан, отам ҳам шундай уннаб кўрган, қараса, механизм “ишламаган.” Бу ҳолат унда қандайдир шубҳа уйғотган бўлса керакки, эшикни бузиб кирган.

Сингленинг айтишича, телефон жирингласса, отам гўшакни кўтариб гаплашар, бирок орадан бир дақика ўтар-ўтмас, кимнинг нима деганини унугиб кўяркан. Уйда бирон нима йўқолгудек бўлса, доим бошқалар айбдор бўларди. Бу ҳақда гап очилса, у ҳеч нимани билмас ёки аччиғи чиқарди. Биз қидириб хуноб бўлган электр устараси кутилмаганда микротўлкини печь ичиди пайдо бўлиб қолди. Эшик калитини ҳадеб йўқотавергач, ойим энди уни аввалгидек шимига боғлаб ўтирумади, бу гал ўша ерга маҳкамлаб тикиб кўйди. Бу унга ёқмади шекилли, калитни силтаб-силтаб кўядиган бўлди.

Энг ёмони, битта фикрга ёпишиб оладиган, ўша фикр мудом миясидан чиқмайдиган бўлиб қолди. Уйимиз олдида қаттиқ шамолда қийшайиб қолган улкан қайнин дараҳти ўсаиди. Осмонда қора булут кўринди дегунча, қайнин навбатдаги довулга дош берадими ёки уй устига кулаб тушадими, деган савол кўндаланг туради. Мазкур “муҳим” масала отамиз томонидан кунига беш-ён мартараб ўртага ташланарди. Унинг миясини доим банд қилиб турадиган яна бир нарса – электр ҳисоблагич шчити бўлиб, унга савдоиларча ҳадеб қарайверарди. Магнитли қулфнинг очилиб, ёпилгандаги лаҳзалик шовқини ҳамон кулогимда қолган. Мабодо қишида уй сахардан бирданига музлаб кетса, билардикки, отам электр токини улайдиган ё узадиган асбобми, пультми, шу каби нарсаларни “ўйнаган” бўларди. Яна ким айбдор? Албатта, *бошқалар*.

Бобом электр бўйича инкассатор бўлиб ишлагани учунми, электр тоқидан ҳам доим тежаб-тергаб фойдаланишга интилган. Нонушта қилиб ўтирган пайтимизда ёруғ тушиб қолган бўлса, бобом чироқни шартта ўчириб, дерди: “Оғизларингни топволсаларинг керак.”

Ана шунақа гаплар.

Бобом хоналарга кўпроқ ёруғлик тушсин деб, деразаларнинг дарпардаларини ҳам бир томонга суриб кўярди. У жуда тежамкор одам бўлган, бу – болаларига ҳам тўла-тўқис ўтган ягона хусусияти эди.

Мана, энди отам ҳам электр токидан фойдаланиш “масаласи” билан шуғулланар, ҳозир унинг мияси ҳар куни бир хил нағма чаладиган шарманкага ўхшаб кетарди.

## ЖАҲОН АДАБИЁТИ

Аммо кунларнинг бирида уни бундай бемаъни фикрлар батамом тарк этди. Бу ҳодиса сирли эди, отам қиёфаси кутилмаганды “ижодий” тус ола бошлаганди.

Узок вакт фаромушхотирлик ва лаёқатсизлик билан ишимиз бўлган бўлса, энди хасталикнинг ўзи янги “кобилият”ларни келтириб чиқара бошлади. Ҳамиша ҳалол, тўғри одам бўлган отам баҳона топишда унчамунча истеъдодни ортда қолдириб кетадиган бўлди. Баҳонани шунаقا тез топардики, ҳатто сичқон ҳам ўз инини бунчалик тез тополмасди. Унинг гапириш услуби ўзгариб, бирданига, ўз-ўзидан орасталик, зеболик касб этди, буни мен ҳеч қачон пайқамаган эдим. Ниҳоят, унда яна шундай бир ҳайратланарли даражада шахсий уйғунлик, мантиқийлик содир бўлдики, буни кўриб, кулишни ҳам, ийғлашни ҳам билолмай қолдик.

– Ҳаво қандай ажойиб! – дедим мен, уй олдида турганимизда, Гебҳард тоғларига ва Брегенц сойи ортида кўздан ғойиб бўладиган минораларга назар ташлаб.

Отам теварак-атрофга бир қараб олди-да, сўз қотди:

– Уйдан туриб, об-ҳавонинг қандай бўлишини ҳеч адашмасдан айтиб беролардим, бу ердан эса йўқ. Уйда эмаслигим сабабли бунинг иложи бўлмай қолди шекилли.

– Вазият у ёқда қандай бўлса, бу ерда ҳам худди шундай, – дедим мен “хайрон бўлиб”, чунки уйимиз у туғилиб ўсган уй ёнида, тепалиқда жойлашган, ораси атиги эллик қадам эди.

– Ҳа, албатта. Ана кўрдингми, фарқини!

У бир зум ўйланиб турди-да, сўнг қўшиб қўйди:

– Бунинг устига доим кайфиятимни бузасизлар, ана шунинг ҳам таъсири билингапти.

Унинг истеъодининг янги “қирралари” айниқса, уйга кетаман деб ҳархаша қилган пайтлари янаем яққол намоён бўларди. 2004 йил бўлса керак, у тўсатдан ўз уйини танимай қолди. Бу шунақангидан тез бўлдики, ўзимиз ҳам англаёлмай қолдик. Йўғ-е, отамиз шундай жўн, оддий нарсанни, яъни ўз уйини ҳам унугиб қўядими, дея ҳайрон бўлиб, узок вакт тан олмай юрдик.

Бир куни у уйга кетаман деявериб, ҳол-жонимизга қўймай, безор қилиб юборди. Шунда синглим Ҳелга уни қўчага олиб чиқди-да, деди:

– Мана, сизнинг уйингиз!

– Йўқ, бу менинг уйим эмас, – жавоб қилди у.

– Үндай бўлса, қани айтинг-чи, сиз ўзи қаерда турасиз?

Отам кўча номини ва уй рақамини айтди.

Ҳелга унга кўча эшик ёнидаги уй рақами ёзилган лавҳани кўрсатиб, тантанавор деди:

– Хўш, унда манови нима?

Отам манзилни қайтадан ўқиди. Ҳелга:

– Энди нима дейсиз.

– Кимдир лавҳачани ўғирлаб келиб, бу ерга бураб, маҳкамлаб қўйган бўлса керак, – деди отам қуруқкина қилиб. Бу изоҳ қанчалик ғаройиб бўлиб туюлмасин, у ҳар қандай ишончлилик даражасидан холи эди.

– Нега энди кимдир бизнинг уй рақамимиз ёзилган лавҳачани ўғирлаб келиб, ўз уйига ўрнатиши керак экан? – сўради Ҳелга жаҳли чиқиб.

– Буни мен ҳам билолмадим. Одамлар ҳозир шунаقا-да, – деди у афсус билан, айни пайтда ўз далилининг эҳтимолдан узоклигига заррача ҳам шубҳа қолдирмай.

Бошқа бир гал, наҳотки ўз мебелингизни ҳам таниёлмасангиз? – деган саволимга шундай жавоб берди:

– Йўқ, йўқ, нега энди, танийман!

## ЖАҲОН АДАБИЁТИ

— Мен ҳам шуни айтмоқчиман-да, – дедим унга бир оз юқоридан қараб. Шунда ҳафсаласи пир бўлгандай деди:

— Менга қара, бу сен ўйлаганчалик осон иш эмас. Чунки бошқаларда ҳам шунака мебель бор. Ҳеч қачон аниқ билиб бўлмайди.

Ушбу жавоб ҳаддан ташқари мантиқий ва ўзига хос тарзда ишонарли эди, бундан чинакамига аччиғим чиқди. Бунақа бўлиши мумкин эмас ахир! Ҳамонки у шундай дейишга қодир экан, нима ҳам қилардим у билан баҳслашиб? Бундай нозик фарқ, тафовутларга ақли етадиган кимса ўз уйини ҳам бемалол таний олади, дейишга ҳаққим бор эди.

Бироқ адашган эдим!

Бошқа вазиятларда у унчалик ақли, мулоҳазали бўлиб туюлмас, барча тафсилотларга бошдан оёқ шубҳаомуз пухталиқ билан сарасоғ солса-да, пи-ровардида хона уни шунчаки лақиллатиш учун атайлаб шундай жиҳозланган, деган хулосага келарди. Бу ҳолат Жеймс Гарнер ва Эва-Мария Сен ижро-сидаги *36 Hours* (*36 соат*) номли триллерни ёдга солади. Ўша машҳур фильмда Жеймс Гарнер иттифоқчиларнинг ҳужум қилиши тўғрисидаги муҳим маълумотларга эга бўлган америка махфий хизмат зобити ролини ўйнаган. Нацистлар уни тузоққа тушириб, гиёҳванд мoddалар билан “ишлов” беради. Эртасига уйғонгач, унга уруш анча йиллар муқаддам ғалаба билан тугаганлигини, у шу вақт ичиди амнезиядан азоб чекканини, ҳозир эса америка ҳарбий шифохонасида ётиб даволанаётганини маълум қилишади. Алдов шу қадар пухта, усталик билан амалга оширилгандини, зобит бир неча кун олдин нацистлар билан бўлган тўқнашувда яралангани ҳам ҳисобга олинган, бироқ жароҳат орадан шунча йиллар ўтганига қарамасдан – ҳамон “тузалмаган” эди.

Бундай кўнгилсизликлар отамни ҳам йиллар оша таъқиб этиб келганга ўхшайди. Зотан, у ўз оила аъзоларининг ишонарли ва тушунарли гап-сўзларига нисбатан ҳам доимий шубҳа-гумонли муносабат билан яшаб келди. Ҳа: “Уйда ҳам худди шу ердагидек, факат бир озгина бошқача...”

\* \* \*

У хонада кўпинча ўзи ёлғиз ўтирас, гоҳ-гоҳ хўрсиниб қўярди. Ҳар гал кўзим тушганида, у худди кимдандир дили оғригандек кўринар, унинг қаровсиз, кимсасизлигидан даҳшатга тушардим. У ўзгарган эди, унинг маъюслиқ, ғамгинлик, руҳсизлик акс этган юз ифодаси эндиликда фаромушхотирлиқдан тушкунликка тушиш тўғрисида эмас, балки бутун олам юз ўғирган ёлғиз, кимсасиз, беватан, ғарип бир инсоннинг теран ҳис-туйғулари ҳақида сўйларди. Шунчаки жойни ўзгартириш балки бу дардга малҳам бўлар, деган ишонч билан уйғунлиқда эса шундай бир вазият юзага келдики, уни пат (дуранг) ҳолат деб аташ мумкин эди, ундан отам баъзан бир неча кун давомида ҳам халос бўлолмасди.

У уйга кетаман деганида, нияти аслида у тарқ этмоқчи бўлган жойга эмас, балки у ўзини бегона ва баҳтсиз ҳис қилаётган вазиятга қарши қаратилган бўларди. Демак, гап жой, макон тўғрисида эмас, балки хасталик, касаллик ҳақида борарди ва у бу хасталикни ўзи билан бирга ҳамма жойга, туғилиб ўсган уйига ҳам олиб борарди. Қадрдон уйи эса йироқ эмас, бир одим нарида, бироқ шунга қарамасдан, ҳамон этиб бўлмас маконлигича қолаверар, аслида эса вазият ундей эмас эди, чунки отам у ерга этиб боролмаган эмас, балки туғилиб ўсган қадрдон уйида бўлолмаганди, холос. Ўзини хавфсиз, хотиржам ҳис қилишининг имконсизлиги хасталик билан бирга унинг товон-товоронигача этиб борган эди. Хасталиги шу қадар эдики, касалликнинг жойни ҳис қилишга, идрок этишга таъсирини англашга ҳам қодир эмасди. Оиласи эса ватан соғинчи нима эканини шунчаки кузатиб туришдан бошқага ярамасди.

## ЖАҲОН АДАБИЁТИ

Албатта, унга барчамиз ич-ичимииздан ачинардик. Қани энди, ўз уйимдаман, деган ҳис-туйғуга қайтадан эга бўлса, дердик, шунга эришишини чин дилдан тилардик. Лекин бу маълум маънода касаллик уни тарк этади, чекинади деган гап эди – саратон хасталигига шундай бўлиши мумкин, бироқ афсуски, Алцхаймерда<sup>1</sup> эмас.

Орадан икки йил ўтгач, муйян енгиллик эспикини эсиб, ёмон ҳаво яхши бўлади, деган гапнинг нақадар тўғри эканлиги маълум бўлди. Уйга бораман деган истак замирида қанчалар теран инсонийлик туйғуси мужассам эканини шунда тушуниб етдим. Отам инсоният қилган ишни қилганди: англаб бўлмас жумбоқли, қўрқинчли ҳаётга қарши шифо, даво сифатида шундай бир жойни танлаган эдики, агар у ерга етиб борса, хавфсизлик, хотиржамликка эришган бўларди. Тасалли, таскин, қувонч баҳш этгувчи бу гўша отам учун уй бўлса, диндор уни *жсаннат* деб атайди.

Ўйда бир-бирига яқин инсонлар яшайди ва бир-бири билан тушунарли тилда гаплашишади. Рум шоири Овид сургунда юрган пайтида *қаердаки сенинг тилингни тушунишиса, ўша ер ватандир*, деб ёзган экан. Ушбу ҳикмат отам учун ҳам бирмунча ҳаётий маъно-мазмун касб этган бўлса ажаб эмас. Чунки одамларнинг юз ифодаларини англаш, уларнинг сухбат, гурунгларига қўшилишга бўлган зўр истак, уринишлари хадеб чиппакка чикавергач, у ўзини худди қувғиндагидек ҳис қила бошлаган. Барча гапираётганлар, ҳаттоқи туғишиган ака-сингиллари ва болалари ҳам унга ёт, бегона эдилар, негаки, уларнинг гап-сўзлари ваҳимали туюлар, дилига ғулгула соларди. Ва бу ер уй, бошпана, макон бўлолмаслиги ҳақидаги хulosса ўз-ўзидан равшан эди. Шундай бўлгач, отамнинг ўз уйи томон интилиши, у ерда ҳаёти илгаригидек яна изга тушиб кетишига ишониши мантиқан буткул тўғри эди.

– Мен манави ерда қўл ювдим, – деб қолди у бир куни. – Мумкинми迪 ишқилиб?

– Ҳа, бу ер ўз уйингиз, манови қўловгич ҳам сизники.

У менга ажабланиб қаради, сўнг хижолатомуз жилмайиб, деди:

– Ё тавба! Энди бу ҳарқалай эсимдан чиқмаса керак.

Бу – деменция эди. Янаям тўғрироғи: ҳаёт – ҳаёт яралган материя эди.

Алцхаймерга келсак, бу касалликда инсонларга хос бўлган хусусиятлар ҳамда ижтимоий ҳолат ва ҳодисалар худди лупадагидек ўз аксини топади. Барчамиз учун дунё, олам бир қараашда чалкаш ва чигал туюлади, бироқ агар унга синчковлик билан сарасоф соладиган бўлсак, соғ билан касал ўртасидаги фарқ энг аввало, ана шу чигаллик, чалкашликни сирт, юзада нечоғли ниқоблай олиш лаёқатидан иборат эканлигини қўрамиз. Ботинда эса боши-кети йўқ тартибсизлик ҳукм суради. Ҳаёлий тартибот ўртамиёна соғлом киши учун ҳам шунчаки ақл-идрок уйдирмасидир, холос.

Алцхаймер хасталиги биз, соғлом одамларга кундалик ҳаётга бас келиб, уни енгиб ўтиш учун қанчалик мураккаб қобилият эгаси бўлмоғимиз заруригини эслатиб туради. Шу билан бирга, Алцхаймер жамиятимиздаги мавжуд ҳолатнинг рамзи ҳамдир. Келажагимиз мавҳум, бор билимни эса ўлчаб, билиб бўлмайди, шундай экан, бетиним рўй бераётган ўзгаришлар, янгиликлар, янгича расм-русум, тартиботлар уларни билиш, тушуниш, ўрганиш, уларга мослашиш ва кўнишиш асносида талайгина муаммолар келтириб чиқариши, бинобарин, эртанги кунга ишонч эмас, хавотир уйғотиши табиий. Зотан, Алцхаймер – аср хасталигидир. Отам ҳаёти тасодиф туфайли мана шу ўзгаришдан дарак берадиган ҳодисага айлангани

<sup>1</sup> Алцхаймер (Alzheimer) – мия хасталиги, 1906 йилда немис шифокори Алоиз Алцхаймер томонидан аниқланган. Хотиранинг аста-секин сусайиб, ўйқолиб бориши касалликнинг дастлабки асосий белгиси ҳисобланади. Алцхаймер деменция (ақли заифлик)нинг кенг тарқалган шакли бўлиб, кўпроқ кекса кишиларда учрайди.

## ЖАҲОН АДАБИЁТИ

сир эмас. Унинг ҳаёти кўплаб мустаҳкам устунлар (оила, ватан, дин, сиёсий тузилмалар, мафкуралар, авлодларнинг жамиятда тутган ўрни ва ҳоказо) мавжуд бўлган бир даврда бошланиб, ғарб жамияти ана шундай таянч устунларнинг харобаларига ботган бир пайтда мана шу касалликка дучор бўлган. Онг-шууримга етиб бораёзган мазкур холосага таяниб, ўзимни отам билан деярли ҳамнафас, бир жон-бир тан ҳис эта бошладим.

Бироқ дастлаб бошқача фикрда эдим. Ўзи асли секин фикрлайдиган одамман. Отамнинг воқеликка бўлган алоқа-муносабатини сақлаб қолишга уриниб, хийла нокулай ахволга тушиб қолдим.

Бир куни у онаси кутаётганини айтиб қолди. Ундан беозоргина қилиб сўрадим:

- Онангиз неча ёшда?
- Ҳм, тахминан саксон бўлса керак.
- Ҳўш, сиз ўзингиз неччига кирдингиз?
- 1926 йилда туғилганман, демак –
- Унда сиз ҳам тахминан саксон ёшдасиз.
- Ҳм, биламан, биламан –
- Онангиз ўлиб кетган, – дейман афсусланиб.

У лабларини бир-бирига маҳкам босиб, бошини сарак-сарак қилди, сўнг чукур ўйга ботиб деди:

- Мен бўлсам, қўрқиб ўтирибман.

Инсондаги соғлом ақлни асраб қолиш учун шу йўсинда яна бир муддат курашдим. Бироқ бундай уринишларнинг бефойда эканини етарли даражада бошдан кечириб кўрганимдан сўнг, курашни бас қилдим. Буни қарангки, бас қилган ҳам ютқазмас экан, бу тез орада маълум бўлди. Ӯликми ё тирик? Бунинг фарқи йўқ эди. Отам марҳумларни бир қадар “тирилтириб”, шу тариқа ўз-ўзини ҳам ўлимга бирмунча яқинлаштирганига иқрор бўлиб, унинг азоб-изтиробларини янада чукурроқ тушуна бошладим.

Энди барчамиз бошқача ҳаёт сари юз тутган ва бу ҳаёт ўзимни ва ака-сингилларимни қанчалик ишончсизлик, шубҳа-гумон, хавф-хатарга солмасин, отамиз тақдирига тобора қизиқиши ҳамда муайян ҳамдардлик билан қарай бошлагандик. У пасъянс ва телевизор билан андармон бўлиб юрган пайлардан буён ўтган вақт ичиде деярли ҳеч нарсага қизиқиши билдиримай келган бўлсам-да, мени энди янгича бир қизиқувчанлик қамраб олганди, бунга сабаб шу эдики, ўз-ўзим ҳақимда ҳам ниманидир билиб олмоқчи бўлардим – бироқ у нима эди, буни ўзим ҳам билмасдим.

Отам билан кундалик мулоқот энди мени ортиқ ҳолдан тойдирмас, балки аксинча, менга илҳом ва рух бағишларди. Зиммамдаги руҳий юқ ҳамон оғир бўлишига қарамасдан, отамга нисбатан хис-туйғуларим ўзгариб борарди. Унинг шахсияти ҳам кўз ўнгимда қад ростлаб борар, у қария, фақат бир озгина ўзгарган қария эди, холос. Ажабо, ўзим ҳам ўзгара бошлагандим. Гўё хасталик барчамизга бир нима қилганга ўхшарди.

*Дада, энг яхши кўрган жойингиз қаер?*

*Бу ҳақда бир нима дейиш қийин. Энг яхши кўрган жойим, бу – кўча. Кўчада нима қиласиз?*

*Сайр қиламан, бир оз айланаман. Бироқ илгаригидек тобимдамасманда. Бундан ташқари, пойабзални ҳам тўғри киёлмайман.*

*Демак, сиз учун энг яхши жой – кўча, гарчи у ерда секин тузалсангиз ҳам, шундайми?*

*Ҳа. Ўзинг биласан-ку, бу ердан кўра...*

*Нима, бу ер сизга ёқмайдими?*

*Бу ерда нимаям қилардим? Биламан, кўча ҳар доим ҳам тўғри*

**ЖАҲОН АДАБИЁТИ**

бўлмайди, аммо қуп-қуруқ бўлса борми, ундан ёқимли жой йўқ. У ерда у ёқ-бу ёқни томоша қилишиим мумкин, бунинг ҳеч кимга огирى тушибайди.

Касаллик жуда секинлик билан бўлса-да, кучайиб борарди. Отам энди хавф-хатарни бир ўзи енголмас, бошқалар кўмагига муҳтож, бусиз аҳволи чатоқ эди.

Оиласи, болалари Оберфельддаги хонадондан кўчиб кетишган, шуннинг учун энди унга овқатни уйга опкеб беришарди. Кўп ўтмай, бошқа қобилиятлари ҳам йўқолгач, отамга “тез ёрдам” келиб, соатлаб қарайдиган бўлди. Бу дегани, эрталаб кимдир келиб, унга ўрнидан туришга ёрдамлашар, кечкурун яна кимдир келиб, ўрнига ётқизиб кетарди. Шукрки, у уйкуни яхши кўрар, кўп ухларди, лекин битта нарса, яъни у ўн икки соат давомида қаттиқ ухлармиди ёки – ёшлигида қишлоарда совуқ хонада ётиб юрган дехқон боласи эмасми, иссиқ ўринда шунчаки чўзилиб ётармиди, бу аниқ эмасди. Одатда “тез ёрдам” ёки уйдаги касалга қараш хизмати ходимлари ёки Петернинг хотини Ursula эрталаб тўққизга яқин унинг ётоқхонасига киришар, у эса, оқшом тўққизда чироқ ўчирилганига қарамасдан ҳамон ўринда кўрпага ўралиб ётган бўлар ва аёлларнинг ҳадик, кўркув аралаш овоз билан қилган мурожаатларига истар-истамас жавоб қайтарарди.

Отам деярли кун бўйи Петер билан Ursula олдида боғда бўлар ва қиз набиралари билан овунарди. Бироқ бу билан муаммо ҳал бўлмасди, шуннинг учун пешиндан кейин отамга қўшнимиз Лилиана қараб турадиган бўлди. Лилиана у билан бирга сайр қилас, иккови *Mensch aergere dich nicht*<sup>1</sup> ўйнашарди. Ursula ҳафтада бир ёки икки марта отамни қариялар уйига обориб келарди. Хуллас, вакт шу зайлда ўтиб борар, бундан барча деярли мамнун эди.

Ҳафта охирида Ҳелга мажбуриятни ўз зиммасига олар, Вернер эса уй ва боғдаги ишлар билан машғул бўларди. Ойим икковимиз галма-гал Венадан келиб, бир неча кун ёки ҳафта давомида уйда бўлардик, бошқалар эса дам оларди. Ҳар биримиз янги вазиятга ўз куч ва имкониятларимиздан келиб чиқиб ёндашардик – албатта, бошқа юмушларимиз ҳам етиб, ортарди. Бошида анча қийин бўлганига қарамасдан, оиласда бирдамлик, ахиллик ҳис-туйғуси мустаҳкамланиб борди. Отамнинг хасталиги оиласизни парокандалиқдан сақлаб қолди. Кемага тушганнинг жони бир деганларидек, қайғу, ғам барчамизни жисплаштириди.

Худди шу даврда ёзувчи сифатида ишларим юришиб кетди. Омад ўз-ўзидан, худди осмондан тушгандек, келақолди. Албагта, мени шу пайтгача ҳам адаб сифатида танишарди, нуқул мақташарди-ю, бироқ ёзганларимни деярли ҳеч ким ўқимасди. Энди эса эътибор қозонган эдим, менга бутун дунё мамлакатларидан таклифномалар келар, бунинг фойдаси билан бирга зарари ҳам бор эди – бунга энг аввало, вакт ажратишинг тўғри келарди. Илгари машҳурликни бунақа вақт олади деб, тасаввур қилмаган эдим, энди эса бундан қочиб қутуломасдим. *Агар об-ҳаво яхши бўлса, пичан ўриши керак*, отам балки шундай деган бўларди. – Бироқ ҳозир унинг мен билан неча пуллик иши бор, машҳур бўлдим нима-ю, бўлмадим нима, унга қизиғи йўқ эди.

Ўқишини тугатганимдан сўнг, отамга ёзувчи бўлмоқчиман, дея ниятимни айтгандим, у менга қараб илжайиб, шундай деган эди:

– Буруннин ковлаб ўтириб ҳам шеър ёзса бўлади.

Аниқ эсимда бор, ўша куни унинг устахонасида, лок ва бўёклар тахланган токча олдида тургандик. Бунақангидан гапларни айтишнинг ўзига хос хадисини олганиданми, ундан хафа бўлиб ўтирмадим. Кўзларини қисиб,

<sup>1</sup> Mensch... – шахмат-шашка сингари стол (тахта) устида ўйналадиган оммавий ўйин тури.

билганингни қил, дуо қилавераман, аммо ишингга бир нима деёлмайман, деганди ўшанда.

2006 йил баҳорида муттасил ижодий сафарда бўлдим. Волфуртга ҳафта охирларида гина келолдим, холос. Гоҳида ўзимни ишқий муҳаббат, оила ва қасб-кор ўртасида омонат ҳис қилар, баъзан униси ё буниси ортиқча туюлиб кетарди. Мен на кўчманчиларча ҳаёт тарзига ва на вақтни изчил ташкил этишга кўниккандим. Масъулиятни зиммага олишга-ку, куч-кувватим етмасди, мен ўзимни ҳамиша тусмоллаб иш қиласидиган паришонхотир одам деб ҳисоблаб келардим. Бу ёги қандоқ бўлди. *Биз ўз ҳаётимизни бир қолип (шакл)га согланимиз сайин, ҳаёт бу қолини бузид ташлайверади.*

Ниҳоят, 2006 йил ёз бошларига келиб, ўз қасбий мажбуриятларимни деярли бажариб бўлдим. Велосипедимни қисмларга ажратдим-да, юкларимни ойимнинг машинасига ортдим. Мюнхен орқали Волфуртга олти соат деганда етиб келдим. Йўлда бошим бир оз оғриб қолди. Отамнинг саксон йиллик таваллуди арафаси эди.

Анчадан буён одам яшамаган уй ҳиди ўтириб қолган ишчи кийимимни эгнимга илдим-да, деразадан сакраб тушиб, уйимиз яқинидаги тепаликдан ўрмонда ўсадиган майда кулупнай ва хўжағат териб келдим. Олча уздим, хоналарни кўздан кечириб, нарсаларни жойладим. Кечкурун отам мени кўриб:

– Эҳ-а, кебсан-да мени кўргани, ҳалиям тирикми-йўқми деб.

У ташки кўринишдан ҳали ҳам туппа-тузук одам эди. Кўчада юрса борми, ҳеч ким уни “анақа” деб ўйламасди. Дуч келган одамга очилиб-сочилиб муомала қилар, қисқа гап-сўз орасида ҳазил-пичингни ҳам канда қилмас, буни кўрган одамлар, э, ҳалиям ўша-ўша муттаҳамлиги қолмабди-да, деб кўйишарди. Гап маълум бир масалага бориб тақалғач, кўпроқ паст-баланд тафсилотлар талаб этилган пайтлардагина унинг ожизлиги билиниб қоларди.

Мана, ҳозир у уй олдидаги девор устига рўмолчасини ёзиб олиб ўтирган кўйи, сокин кўчага разм солиб, бирон-бир “вокеа” рўй беришини сабртоқат билан кутарди. Йўқ, йўқ, у уччалик катта нарса талаб қилмасди. Бор-йўғи кўчадан машина-пашина ўтиб қолса, қўл силкиб кўяр, башарти бирорта аёл велосипед миниб кетаётган бўлса, унга караб:

– Салом, гўзал хоним, – деб кўярди, холос.

Шундай, бу гаплар мутлақо шубҳадан холи эди.

Шу яқин-атрофда жойлашган қишлоқ черковининг қўнғироқлари бонг чалди. Онам яқин келиб, отам шимининг чап чўнтағидан бир нечта Grissini<sup>1</sup> топиб олди. Яхши эмас, бунақада шиминг чўнтағи увоққа тўлиб кетади, деди. Отам бўлса:

– Улар соқол олишимда керак бўлади.

– Улар билан соқол олиб бўлмайди, Август.

Бир оз ўйланиб туриб, деди:

– Үндай бўлса, уларни боққа олиб бориб, ерга суқиб қўяман. Кўкариб, ажойиб бир нима ўсиб чиқса ажабмас.

Бу гаплар энди шубҳали эди.

У ўрнидан турди, жиддий бир киёфада виқор билан рўмолчасини олиб, буқлади-да, уй ортига – айвонга қараб йўл олди. Кетидан бордим. Биз кунботар томонга, Бодензее тарафга жимгина қараб турдик, кўл узра ботаётган қуёшнинг заррин нурлари жилваланар, гўё бугун сира кеч бўлмаётандек туюларди. Ҳув юқорида, тоғ томонда, Гебхард черкови устида пардек енгил булувлар сузиб юрар, осмон кўм-кўй эди. Олислдан А

<sup>1</sup> Grissini (итал.) – ундан тайёрланадиган ингичка, курук, қаламдан сал узунрок, қирсиллаб ейиладиган анъанавий маҳсулот (палочки).

14 – Райн водийсидаги автобан шовқини эшитилиб турар, қайин япроқлари майин шабадада охиста шитирларди.

Биз турган жойдан отам туғилиб ўсган уй орқасидаги ям-яшил дараҳтларга бурканган мевазор боғ кўзга ташланар, гўё дараҳтлар-у асалари уяси ҳам худи отам икковимизнинг болалик давримиздагидек – деярли ўзгармаганди.

- Эртага саксон ёшга тўласиз, – дедим унга бехосдан.
- Менми? – сўради у ишонқирамай.
- Ха, сиз. Саксонга кирасиз, дада.
- Мен эмас, сен бўлсанг керак, – деди у кулги аралаш жаҳл билан.
- Мен ўттиз саккизга кираман, дада, сиз эса саксонга.
- Мен эмас, – такрорлади у мазахомуз оҳангда, – хойнаҳой сен бўлсанг керак.

Шу тариқа бир оз тортишдик. Сўнг ундан, одам саксон ёшда ўзини қандай хис қиласди? – деб сўрадим. У эса:

– Нима десамикин, жа унчаликмас.

Орадан икки соат ўтди. Яна хўжағат териб келдим, сўнг отамни жойига ётқиздим. Ўзим ҳам узок йўл юриб, қаттиқ чарчаган эканман, донг қотиб ухлаб қолибман.

Эрталаб барвақт туриб, отамни таваллуд айёми билан қутладим. У табригимни бажонидил қабул қилиб, миннатдорчилик билдириди. Каравот четида иштончанг ўтиаркан, унга отаси шу ёшга етмай ўтиб кетганини эслатдим, шунда у менга ҳайрон бўлиб қаради, сўнг синиқ жилмайди. Бироқ нимага жилмайди, бунинг маъносини англаёлмадим. Таваллудни қавмлар черқовида нишонлашимизни айтгандим, у қайси черковдалигини сўради.

- Ўзимизнинг Волфуртдаги черковда, – дедим. У эса тўлқинланиб:
- Волфуртда қачон бўлган бўлсам, ҳар доим маза қилганман ва бу ерда мен таниган одам борки, барчаси билан яхши муносабатдаман.

\* \* \*

Кун жуда тинч ўтди, сешанба эди. Туғилган кунни нишонлаш жума кунига белгиланди. Эсимда, онам мевали пирог пиширган, қўшни аёл эса йўл-йўлакай чипта опкелган, Оберфельдгассе бугун Августнинг табассумисиз хира тортиб қолади-ёв, дея ҳазиллашган эди. Бундан хурсанд бўлиб кетдим, негаки, отам табиатининг умуман бус-бутунлигига ишончим комил эмас, касаллик унинг шахсиятига ҳам аллақачон дахл қилган, деб ўйлардим.

Кечкурун Ҳелга билан Вернер келишди. Пирог тановул қилиб, вино ичдик. Сўнг Вернер иккаламиз футбол бўйича жаҳон чемпионатининг ярим финал ўйинларини томоша қилдик. Отам ҳам биз билан бирга ўтиарар, лекин – Германия билан Италия ўргасидаги – тактик жиҳатдан кескин, бироқ яққол ўзгаришлар сезилмаётган ўйин уни мутлақо қизиқтирмаётгандек эди, бунинг устига ора-сира:

- Ўзи ким билан ким ўйнайти? Волфуртнинг рақиби ким? – дея тинмай сўрар, мен унга:

– Кеннелбах, – деявериб чарчадим. Отам эса, буни гўё ўзи ҳам биладигандек, ранжиган оҳангда:

- Ўйинни ҳам шунақа ўйнайдими? – деб кўярди.
- Фабио Гроссо биринчи голни уриб, хисобни очгач, отам:
- Шошма, шошма, ахир бу волфуртлик эмас-ку, – деди ҳайрон бўлиб.

Бунга Вернер икковимиз қотиб-қотиб кулгандик. Ҳақиқатан ҳам ўша лаҳзалар ўйиннинг авж нуқталари эди. Бошқаси эса аллақачон ёдимиздан кўтарилиб кетган.

## ЖАҲОН АДАБИЁТИ

\* \* \*

Отамнинг элликка кирган куни ҳам яхши эсимда қолган. Ўшанда мен саккиз ёшда эдим. Вернер иккаламиз деразадан пастда – айвонда уймалашиб юрган меҳмонларни қизиқиб кузатганимиз. Ўша кун отам деярли ўттиз йилдан сўнг чекишни ташлаган кун сифатида ҳам ёдимизда қолган эди.

Брегенц осмони узра кетма-кет пиротехник ракеталар отилганди – 1976 йилнинг 4 июлида Америка мустақиллигининг 200 йиллик байрами ҳам нишонланаётган эди. Теварак-атрофда яшаётган америкаликлар қўшимча ракеталар отишиб, байрамга файз киритган. Биз болалар тасавуримизда эса буларнинг барчаси гўё отамиз шарафига бўлаётгандек эди. Унинг ёш касдошлари ўшанда бирин-кетин деразадан бассейнга қараб сакрашган.

\* \* \*

Ўзининг саксон йиллик таваллуди тантанасида отам турнақатор бўлиб турган қутловчиларнинг қўлларини иккала қўли билан бир-бир маҳкам кисиб, уларнинг ҳар бирига “омон бўлинг, соғ бўлинг” дейа эзгу тилаклар тилаб, миннатдорчилик билдирганди. У бу томошадан ғоят лаззатланган, йигилганларда баҳт-омаднинг фақат бурч қисмигагина дахлдор одамдек эмас, балки ҳалиям тетик ва хушёр киши сифатида таассурот қолдирганди. Отам раҳбарлик фаолиятининг сўнгги йилида бургомистрга ўзи иш ўргатган эди. Ҳозир у бургомистрдан камроқ гапиришини, яххиси, бирон-бир қўшиқни куйлаб беришини сўраганида, кўпчилик кулиб юборди.

Ака-сингилларим отам ҳаёти ҳақида ҳикоя қилувчи “қўргазмали такдимот” тайёрлашган эди, экранда ана шу лавҳалар намойиш этила бошланди. Лахзалик фотосуратлар ҳозир унинг ўзида қандай таассурот қолдираётганикин, буни билолмадим. Меҳмонларнинг “эҳ”, “оҳ!” дейишилари, дам-бадам кулишлари унга ҳам таъсир қилган кўриниади. Бир маҳал экранда темирчи бобоси чарм пешбанд таққан ва елкасида оғир болға кўтариб олган ҳолда кўринди, шунда ўзининг ожизлиги эсига тушиб кетдими:

– Мен бўлсан ортиқ ҳеч нимага ярамайман, – деб юборди. – Э Худо, ана бўлмаса – барибири – хайрон қоладиган жойи йўқ, – қўшиб қўйди у.

Оппок девор саҳнида эллигинчи йилларнинг бошларида олинган оиласий фотосуратлар пайдо бўлди, ана, Адолф ва Терезия Гайгер оиласидаги тўққиз нафар болалар куршовида туришибди, улардан бири – Эмма орадан кўп ўтмай, кўричаги ёрилиб кетиб, нобуд бўлганди. Қизиқ, бобо ва бувиларимиз зоҳиран ўша пайтлардаёқ қарилек остонасига қадам кўйган кўринишади, ундан десам, бувим яна кирқ йил умр кўрган, ташқи кўриниши ҳам деярли ўзгармаган, соchlари кулранг, юзини чукур ажинлар босган, ишлайвериб, ҳолдан тойган, кичкинагина аёл эди.

Хуллас, бутун оила аъзолари – ўтмиш давр одамлари-ю бир пайтлар грифелни<sup>1</sup> ертюла бўсағасида – чунки бўсаға қумтошдан бўлиб, унда тошқалам осон чархланарди – ўтирволиб учқирлаган дехқон болалари, хаёлий фантазиядан кўра кўпроқ амалиётга мойил, ўта ихтирочи ва ўта яшовчан, яшашга қобил, улдабуро қон-қариндошлар, барчаси жамулжам эди. – Фақат биргина Йозеф йўқ, у оиласий магнетизмдан мосуво бўлиб, жаҳонгашталикни ихтиёр қилган, эллигинчи йилларнинг охирида АҚШга кўчиб бориб, у ерда электр токи билан ишлайдиган консерва очкич ихтиро қилган ва шу тариқа ўз орзусига эришган эди.

Мен отамнинг ака-укаларидан, опа-сингилларидан мабодо бирортангизда унинг ҳарбий асирилкдан озод бўлгандан сўнг тушган суратининг

<sup>1</sup> Грифел – тошқалам, тоштахтага ёзадиган қалам.

нусхаси йўқми, деб сўрадим. Гап қайси расм ҳақида кетаётганини дарҳол фаҳмлаб, барчаси оппок сочли бошларини сарак-сарак қилишиди. Саксон ёшдан ошиб кетган Миля айтдики, у замонлар бошқа эди, у даврларда суратдан ҳозиргидек хоҳлаганча нусха олишнинг имкони бўлмаган.

Паул ўзининг урушдан қайтиб келгани ва ўша пайтдаги ахвол ҳақида сўзлаб берди. Ҳаммаёк вайрон, аралаш-қуралаш, мевали боғларни жала урган, далаларда дараҳтлар айқаш-уйқаш бўлиб ётар, ишга яроқли эр-какларнинг аксарияти фронтда, рўзгор ташвиши-ю мол-ҳол, барчаси аёллар зиммасида бўлган. Уруш тугаганда Роберт тўқиз яшар бола экан, айтишича, бир куни далада ишлаб турганларида тўсатдан ҳаво айниб, шунақанги қучли шамол келибдики, аранг битта дараҳтга ёпишволишга улгурган, сўнг оёқлари остига қаттиқ дўл ёғиб берибди. Ўшанда акаопалари уйга олиб кетишаётган пичан ортилган араванинг афдарилиб кетишига сал қолган экан. Меваларни дўл уриб кетганидан ўша йили баъзи бир дараҳтлар куздаёқ гуллай бошлаган.

Отам буларнинг барчасини унуган, ортиқ эслаёлмайди. Хотиралар энди табиатига кўчган, биргина табиати қолган, холос. Тажрибалар эса хамон таъсир кўрсатишда давом этарди.

\* \* \*

Бу йил, аввалги ёз фаслларида бўлганидек, ёзнинг бир неча ҳафтасини туғилиб ўсган уйимда ўтказдим. Шунда отам билан орамиздаги масофа тобора қисқариб бораётганини, касаллик сабабли анчадан бери кутилган алокा-муносабатларнинг йўқолиш хавфи ҳам барҳам топганини сездим. Бунинг ўрнига биз бир-биrimiz билан шундайин табиий, холисона ва беғараз бир тарзда дўстлашиб олдик, бунинг учун биз хасталик ва хотира йўқотишдан – шахсан ўзим фаромушхотирликдан – миннатдор бўлмоғимиз керак эди. Ўртамиздаги барча келишмовчиликлар ортда қолди. Энди бундай фурсат ҳеч қачон қайтиб келмайди, деб ўйлардим.

Ўшанда Иннсбрукда яшаётган турмуш ўртоғим Катарина ҳам Волфуртда бир неча кун бўлди. Бир куни биз отамни бирга сайд қилишга кўндиридик, у истар-истамас бизга ҳамроҳлик қилди. Йўлда бораётиб, гарчи ҳали Оберфельддан бир қадам ҳам ташқарига чиқмаган бўлсак-да, унинг ҳадеб орқага қайтамиз деявериши бир оз асабимга тегди, чунки ҳаво ажойиб, гўзал оқшом, у билан жон деб дарё сохилигача пиёда сайд қилмоқчи бўлиб турувдик.

Яна Оберфельдга қараб бурилгандик, кўз ўнгимизда қишлоқ намоён бўлди. Отам енгил тин олди, хурсанд бўлиб, қишлоқ манзарасини мақтай кетди.

– Бу ерга сайд қилгани олдин ҳам келиб туармидинг? – сўради у мендан. – Кўпчилик бу ерларга қишлоқ манзарасини томоша қилиш учунгина келади.

Бу гап менга ғалати туюлди.

– Мен бу ерга, – дедим отамга қараб, – манзара учун келмайман, чунки бу ерда катта бўлганман.

Уни ҳайрон қолдирдим, шекилли, афтини бужмайтириб:

– Эҳ-а, шундайми, – деёлди, холос.

Шунда ундан сўрадим:

– Дада, биласизми, мен ўзи кимман?

Бу саволдан бир оз довдираб, Катаринага ўгирилди-да, мен томонга кўли билан ишора қиларкан, ўзича ҳазиллашган бўлди:

– Қара, бунинг нимаси қизиқ экан.

## ЖАҲОН АДАБИЁТИ

*Дада, ҳаётингиздаги энг баҳтли дам қачон бўлган?  
Болалар ёши бўлган пайт.  
Ўзингиз ва ака-сингилларингизни айтяпсизми?  
Йўқ, ўз болаларим демоқчиман.*

Нацизм олиб борган сиёsat оқибатида диний ва фуқаролик урф-одат, анъаналарининг қадрсизланиши урушдан сўнг ана шу қадриятларнинг билвосита сохталашувига олиб келди. Паулнинг айтишича, ўша даврда тақводорлик, сохта соддадиллик, панд-насиҳат ва меҳнатдан бўлак ҳеч нима бўлмаган. Бундай вазият, айниқса, ёшлар учун даҳшат ва ҳалокатдан бошқа нарса эмасди.

Отам ўзининг аниқ ният ва максадларига эга бўлгани учун ҳам мушкул вазиятдан чиқиб кета олган, унинг учун энг муҳими, қайғу-аламлардан қочиб, қувонч-шодлик сари интилиш бўлган. Волфуртга қайтиб келгач, хақиқий ҳаёт тўғрисидаги ўз тасаввурига таяниб, иш юритди, айни чоғда хавфсизлик, хотиржамлик ва барқарорлик хис-туйғуларидан қалби мунавар бўлди. Албатта, уни тасодифий хушхабарлар, янгиликлар кутиб олмаган, имкониятлар ҳам деярли бўлмаган. Чунки имкониятларга эга чиқиш учун энг аввало, ишонч керак бўларди, отамда агар урушдан олдин ишонч бўлган бўлса, энди у йўқ эди. Айтишади-ку: *Erfahrung bildet Narbengewebe*<sup>1</sup>.

Тинч, сокин ва дахлсиз ҳаётга бўлган эҳтиёж уни хотиржам хизматдаги турмуш ва турли хил қишлоқ уюшмалари сари етаклади. У қишлоқ футбол клубининг таъсис этувчи аъзоларидан бири бўлиб, ўзи жамоада ўнг ярим химоячи эди. Боз устига театрда гурухга бошчилик қилас, у ерда Нестройнинг<sup>2</sup> “Дайди”сини саҳналаштиришганди. Бундан ташқари, аксарият хотин-қизлардан ташкил топган черков хорига ҳам қатнар, қўшиқ айтарди. Аслида у хотин зотига қизиқмас, унинг учун у экзотик феномен эди, холос. Аёл деганда у энг аввало, онани, ўз онасини кўз олдига келтирас, унинг номини муқаддас биларди.

Эҳтимол, у ўз эркаклигини исботлашга эҳтиёж сезмагандир, ким билади. Балки у ўзининг мустақиллигига кўпроқ аҳамият бергандир. Ўша даврларда қиз боланинг бўса, ўпич бериши бугунгидек оддий ҳол бўлмаган.

Отам Форарльберг ўлка хукумати идорасида бензин тақсимоти бўйича масъул мутахассис вазифасида бир неча йил ишлагач, 1952 йилдан Волфурт қишлоқ жамоасида мирза сифатида фаолият юрита бошлаган. Жамоа идорасида олтмишинчи йилларнинг ўрталарига қадар ҳам котиба лавозими бўлмаган. Отамнинг ишхонаси қишлоқ мактабининг биринчи қаватидаги синф хонасида жойлашганди. Хона ниҳоятда кенг бўлиб, қадимий мебеллар билан жиҳозланган, деразалари эса пардасиз эди.

Ёз ойларида у чарм шим кийволиб, ўзи *Kneiper* деб атайдиган шиппакда, ёзув машинкасини иккала қўли билан чиқиллатиб ёзиб ўтирас, машинканинг “чик-чик” и кенг, деярли бўм-бўш хонада жаранглаб чиқар, агар дераза очик бўлса, овоз то кўчага қадар эшитилиб турас, кўчадан ўтган-кетганлар: “Август ёзяпти”, деб кўйишарди.

Бургенланддан<sup>3</sup> Форарльберрга келиб қолган бир муаллима қиз бўларди. Уни *Теруши* деб чақиришаркан. Шу қиз дадамга ёкиб қолган. Бироқ Теруш никоҳсиз туғилган бола бўлгани боис, бобом бунга қарши бўлган, отам эса тақдирга тан берган. – Афсуски, бу тугал хикоя эмас, отамнинг ака-укалари, опа-сингиллари бу ҳақда деярли ҳеч нима билишмайди, ўзим ҳам тортиниб ундан сўролмаганман. Шунинг учун билганимча айтиб ўтипман.

<sup>1</sup> Erfahrung bildet Narbengewebe – сўзма-сўз таржимаси: Тажриба чандиклардан иборат.

<sup>2</sup> Нестрой, Йоҳанн – австриялик драматург (1801-1862).

<sup>3</sup> Бургенланд – Австриядаги тарихий ўлка, вилоят.

Аммо отамнинг худди шу даврда, яъни эллигинчи йилларнинг охирида ота-онасининг мевазор боғи юқорисидаги тепалиқда уй қура бошлага-ни аниқ. Иморат қуриш учун жой бобом томонидан берилган, “чунки у ерда гиёҳ ҳам ўсмаган”. Шу пайтдан бошлаб, отам қўли бўшади дегунча, қурилишга қараб чопган. У ерга черков яқин бўлган, кўнғироқ садолари доим эшитилиб турган.

Шотландиялик актёр, продюсер Роберт Харрисон ўзининг “Үлим салтанати” номли китобида гарб фалсафасидаги тафаккурга оид қадими бир анъана хақида ёзди. Унга кўра, нарсалар тўғрисидаги билим маълум бир ишни бажаришнинг дастлабки муҳим шарти хисобланаркан. Худди шунга ўхшаб, кимки уй қурмоқчи бўлса, уни қуришдан олдин уйнинг нима эканини билиши керак. – Отам ҳам уйни шунчаки тахминан, умумий тарзда билган, ҳамма нарсанинг режасини ўзи тузган, ичи ғовак гиштни ҳам ўзи қўйган, электр монтаж ишларини ўзи бажарган, ўзи сувоқ қилган. Сувоқ ишларини яхши кўрардим, деганди у. Бунақа нарсалардан яхши хабардор бўлган, бу соҳада ўзини худди *уйдагидек* ҳис қилган.

Ниҳоят, тез орада боғ узра янги иморат қад ростлаган. Бу ердан ўнг томонда Швейцария тоғлари, ярим ўнг тарафда Аппенцелл, тўғрида эса қишлоқ ва Брегенц, чапда Гебҳард тоғи ҳамда кўк бағрига санчилган ме-зана ва миноралар кўзга ташланарди. Хуллас, теварак-атроф манзараси бу жойга ўзгача жозиба бағишилаган. Орадан кўп йиллар ўтиб, менинг “уйни нега бундай солгансиз?” деган саволимга отам, уй қуёшга эмас, балки Гебҳард тоғига қаратиб қурилган, дея жавоб берганди.

\* \* \*

1963 йилда, ўттиз етти ёшида отам ниҳоят, уйланишга қарор қилиб, Санкт Пёлтенлик ўша ёш муаллима билан никоҳдан ўтган. Қизнинг от-аси темирйўлда ўтёқар бўлиб ишлаган, урушда ҳалок бўлган. Онаси эса Йббсдаги болалар уйида тарбиячи бўлган, у ер-бу ерда тикувчилик ҳам қилган. Онаси қайтадан яна турмушга чикқач, киз Форарльбергга – бо-босиникига келади, шу ерда муаллимликка ўқыйди. Биринчи иш жойи: Волфуртдаги саккиз йиллик фолксшуле – эски мактаб эди.

Шу тариқа онам қишлоқдан яна олис бир қишлоққа келган ва ўзининг фикрича, хатога йўл қўйган. *Оила қураётганда ақл қалталиқ қилдими, энди бошга тушганни кўз кўради.* Бундай амалий никоҳшунослик ил-мидан ота-онам анча узок эди. Уларнинг аввало, уйда ўрнак бўладиган, ўргатадиган ҳеч кими бўлмаган, қолаверса, турмуш тўғрисидаги тасав-вурлари ўтакетган соддалик, бутқул бехабарлик асосига қурилган бўлиб, юзага келадиган арзимас қўшимча ҳолат, вазиятларни, масалан дейлик, эр хотинни ёки хотин эрни “ўзгартиришга” қодир эмаслигини хисобга олишмаган. Шундай, *характер иродага қарагандо ҳам кучлироқдир.*

Шунга кўра, улар катта хатога йўл қўйишган. Лев Толстойнинг “Анна Каренина” асарида шундай ҳолат билан боғлиқ ажойиб бир фикр келти-рилади: умр йўлдош танлаш масаласини ёшларнинг ўзига ҳавола қилиш ўқлоғлиқ тўппончани беш яшар болаларга мос ўйинчок, дейишдек гап. Бу кекса князъ хотиннинг фикри эди.

Бахт тўғрисидаги икки хил тасаввур бир-бири билан тўқнаш келса, нима бўлади, бу ҳақда ўйлаб кўриш тўйдан олдин ота-онамнинг хаёлига ҳам келмаган. Албагта, бўлиши мумкин бўлган бахтни яратишга икковлон ҳам ўзига яраша ҳисса қўшган. Бироқ пировард натижада ана шу улушлар бахтнинг турлича, қарама-қарши қўринишларига мансуб эканлиги маълум бўлади. Охир-оқибат ҳар иккиси ҳам ўзича бахтсиз бўлиб қолаверди.

## ЖАҲОН АДАБИЁТИ

Уларнинг бир-биридан кутган орзу, умидлари саробга айланди, ваҳоланки, бир-бирига ўзаро ишонч билдиришнинг ўзига хос йўллари ҳам тубдан бошқача эди. Аввало, туғилган йиллари ва оиласавий келиб чиқишлари ўртасида енгиг бўлмас маданий узилиш бор эди. Отам катта дехқон оиласидан бўлса, онам ташландик пролетар хонадонидан эди, униси урушдан олдинги даврда, буниси эса урушдан кейинги йилларда социаллашган, отам уруш ҳамда асирилик азобини тортган бўлса, онам қашшоқлик ва “жонажон ватан бўйлаб” хроникал фильм романтикасини кўрган, хуллас, турлича қадриятлар, турли хил орзу, умидлар, турлича ҳиссий оламлар... отам оддийлик ва пишиқ-пухталикни ёқтиурса, онам ҳиссиёт ва самимийлик, меҳрибонликни яхши кўрган, унисига дилкашлик, одамохунлик манзур бўлса, буниси таълимни маъқул кўрган. – Отам маданий ҳаётга яроқсиз эканлигини ошкор қилиб кўяверган. Унинг ҳақида баъзан шундай гапларни ҳам эшитиш мумкин эди: “Август кечада (театрда) биринчи пардадаёқ пинакка кетган.”

Бу – ҳаётий орзулардан тортиб, то уйланиш ва болалар туғилишига оид тилаклар ўртасидаги ҳақиқий номутаносиблиқ эди. Бошқа пайтда эса биргаликдаги ушбу ҳаёт, турмуш кун сайин ўзгача тус ола бошлади, бу бамисоли Бобил минорасида туриб, зўр бериб бир-бирини ишонтиришга уринаётган, ҳар бири ўз тилида гапириб: сен мени тушунмаяпсан! – деяётган икки кишининг ҳолатини эслатарди.

Мен отамдан онамга уйланишининг сабабини сўраганимда, у ойимни нихоятда яхши кўрганини ва унга бошпана бермоқчи бўлганини айтганди. Шу ўринда яна унинг ўша машхур мавзуси кун тартибига чиқади: уй, макон, бошпана, хавфсизлик ва хотиржамлик. Мазкур тушунчалар унинг кўз ўнгига фавқулодда аҳамиятга эга эди. Ишқ-муҳаббат яхши, бироқ ўз жойини топа билиш ундан ҳам яхши, деб ўйлаган бўлса керак-да, боёкиш.

Онам эса хавфсизлик ва хотиржамлик эмас, балки рағбат излаган. Унинг қалби ҳамиша дунёга очик, ўзи янгиликка уч бўлган. Пуллари йўқлигидан бечоралар тўй саёхатига ҳам боришолмаган. Отам тўй саёхатинигина эмас, бунинг ўрнига шунчаки сайдрга чиқишни ҳам рад этгач, онам ундан қаттиқ хафа бўлган. Отамга қолса, Волфуртдан кенгроқ ва гўзалроқ гўша йўқ эди оламда.

“Ҳаттоқи ўрмонга оддий сайдрга бормаганмиз-а!”, ёзғирарди ойим ўша кунларни эслаб. Ҳақиқатан ҳам ушбу рад этиш шонли сахифа бўлолмасди. Отам ҳатто бир кунгина бўлса ҳам ўз одатларига қарши боришни истамас, кундалик чоп-чопдан иборат ҳаётига халақит берадиган нимаики нарса бўлса, хоҳ шанба кунги кичкинагина сайд бўлсин, хоҳ бошқа, ҳаммасидан воз кечарди. Унинг ҳаётий режаси: эгри-буғри эмас, балки тўппа-тўғри чизикдан иборат эди.

Барбод бўлган никоҳ ҳақида ёзиш... эски гапни кўзғашдек туюлади. Маълум муддат улар бир-бири билан муроса қилиб, дил хотиржамлигига эришгандек бўлишди. Албатта, улар ҳеч қачон жанжаллашиб, соч юлишмаган, бинобарин, болалар дунёга келгач, мавжуд барча кескинликларга қарамасдан ўзаро муносабатда бир қадар мувозанат юзага келган. Оилада бирин-кетин фарзандлар туғилиб, онам ўзини нихоятда баҳтиёр ҳис этган, отам ҳам ўз оталик ролини муваффақият билан бажаришга, пировардида яхши таассурот қолдиришга ҳаракат қилган. Ҳақиқатан ҳам болалар ота-онанинг баҳти эди. Бироқ оила, никоҳ ишқий муносабатлар бобида ортиқ умид қилиб бўлмайдиган ҳолатда эди. Табиатан турлича бўлган ҳис-туйғулар эр-хотинга ҳам бирин-кетин панд берган бўлса керакки, улар бир-бирига нисбатан ўзаро муомалада бора-бора ўта қайсар, ўжар бўлиб қолишган. Ахвол шундай бўлгач, ортиқ тортишиб ўтиришга ёки бири бошқасига ён беришга-да ҳожат қолмаган.

## ЖАҲОН АДАБИЁТИ

Тепалик устидаги ана шу катта уйда ҳаёт аввалига бир маромда кечгән; биз бинойидек оила сифатида баразалла ҳаракат қылғанмиз. Кунига бир неча соат мусиқа билан шуғулланар, түшкі овқатдан сүңг ярим соат Canasta<sup>1</sup> ўйнардик. Тушлик олдидан болалар черков майдони ёнига чопиб боришар, у ерда ишхонадан уйга – тушликка келаётган дадамизни кутиб олишарди. Шунда бутун қишлоқ қандайдир ёкимли, самимий ва меҳрибон бўлиб кўринар, боғлар ва кўчалар бўйлаб таомнинг ёкимли хиди анқирди, чунки соат ўн иккита деярли барча хонадонлар тушлик қилишарди. Отам болалардан бирини велосипеднинг орқа томонидаги юқ қўядиган жойига, бошқасини олдига ўтқазар, колган болалар эса улов ортидан зир югуришарди. Шанба кунлари пешиндан кейин отам бизни футбол майдонига олиб борар, якшанбада сайрга олиб чиқарди. Брегенцдаги етимхонадан Тони деган бола ҳар гал келиб, бутун таътилни биз билан бирга ўтказарди. Сабзавот, полиз экинлари ва қулупнай экиладиган томорқамиз бўлиб, уларга отамнинг ўзи қарар, лимонялпиз ва қорағатдан қиёмлар қиласарди. Бир куни ойим кўлга чўмилишга боргандан тўрт нафар болага кўз-кулоқ бўлиш бир ўзимга қийин бўляпти, деб кейинги гал дадамни ҳам бирга боришга қистаган эди, у шартта уйимизга бассейн куриб берди. Бассейнни гараж томига ўрнатиб, уни осма кўприк ёрдамида балкон билан туташтиришдек таваккал режага кўл урганининг ўзиёқ катта гап эди.

Отам ёшим улуғ деб, оилада ҳеч қачон ўзини бошлиқ ёки хўжайин қилиб кўрсатмас, аксинча, уни безовта қилмасалар, шунга хурсанд бўларди. Унинг табиатида қаттиқкўлликдан асар ҳам йўқ эди. Онам яна ишлай бошлаганига қарамасдан, уй-рўзғор ишларида ёрдам бермагани чатоқ эди, холос. Ҳақ ва ҳақиқат ҳаққи, оилада эр қиладиган иш бор, хотин қиладиган иш бор, дерди у. Унинг фикрича, супур-сиدير, йиғиштириш аёлларнинг иши, боғ бундан мустасно, шницель<sup>2</sup> тўқмоқлаш эмас, болғалаш эркакларнинг юмуши эди.

Уйимиз ҳар хил курилишлар сабабли улкан бунёдкорлик майдонига айланганди. Отам боғ ёки уйдаги шароитларни янада яхшилаш йўлида тинмай бош қотирарди. Қўшимча хоналар керакми? Қани энди, зиён қилмасди. – Марҳамат.

Онам дунёга талпингани боис, ёзда асосан Бодензее билан Брегенцвалд ўртасида жойлашишни маъқул кўрган германиялик ва нидерландиялик дам олувчиларга хоналарни ижарага бера бошлади. Отам чордоқни ҳам куриб битиргач, йиллик ижара турувчилар, ойимнинг муаллим ҳамкасабалари, ёш-яланлар кириб келди.

1977 йилда онам учун дунё юз очди. Германиядан Пех<sup>3</sup> деган исми жисмига монанд, қоп-қора сочли, доим қора кийиниб юрадиган ижарачи келиб, бизникида яшай бошлади. Асли қасби нима, ҳеч ким билмайди, лекин ўзи самимий, ажойиб йигит эди. Биз болалар кўпинча унинг Ovomaltine<sup>4</sup>сини билдирамай еб қўярдик. Диний сабоқларга эски суратли журналларни олиб боришимиз лозим бўлган пайтларда бошқалар телекўрсатувлар дастури чоп этилган ҳамда *Stadt Gottes* каби нашрларни кўтариб борса, мен *Stern* ёки *Spiegel* сингари расмли журналларни оборардим, чунки уларни ёш ижарачимиз ўқиб чиқиб, зинапоя остига ташлаб юборарди. Бир куни Пех чордоқдан тушиб келиб, тезда кетишим керак, аммо ижарага тўлагани пулим йўқ, радио билан ошхона плитаси сизларга, деб қолди. Отам рози бўлди. Ижарачи кетди. Орадан бир-икки кун ўтгач, полициядан одам ке-

<sup>1</sup> Canasta – Жанубий Америкадан келиб чиққан қарта ўйинининг бир тури.

<sup>2</sup> Шницель – япроқ-япроқ қилиб кесиб, ёғоч тўқмоқча билан тўқмоқлаш пишириладиган котлет.

<sup>3</sup> Пех (Pech) – смола, сақч, қора мум, қатрон, шунингдек, мұваффақиятсизлик, омадсизлик маъноларини ҳам билдиради (*нем.*).

<sup>4</sup> Ovomaltine – мини-форматда тайёрланадиган шоколад тури.

## ЖАҲОН АДАБИЁТИ

либ, уни сўради. Нимаймиш, RAF<sup>1</sup> аъзоси сифатида шубҳа остига олинган эмиш. Биз билмаймиз, у йўқ, кетган дедик.

Худди шу пайтда 2 июн харакати<sup>2</sup> аъзолари томонидан пайпоқ ишлаб чиқарувчи фабрикант Палмерс ўғирлаб кетилган – телефонда гаплашган шахснинг форарльберглик эканини акцентидан пайқаб қолишган. Овоз эгасини аниқлаш мақсадида маълум телефон рақами газетада берилди. Мен тўқиз ёшда эдим, қизиқиб ўша рақамни яширинча бир неча марта териб кўрдим, ҳар гал терганимда пароль менга сирли ва кулгили туюлаверди, қанча уринмай, гап нимадалигини тушунолмадим. Кейинчалик телефон қилган абонентнинг волфуртлик ёш йигит эканлиги маълум бўлди, ана кўринг томошани. Ойим уни мактабда ўқитган экан, жуда яхши болайди, деди.

Ижарабимиз Пехнинг бир неча йил дом-дараги чиқмай кетди. Биз болалар барча қидираётган террорчи уйимизда яшаганидан ва унинг шоколадини билдирамай еб юрганимиздан ўзимизда йўқ хурсанд эдик, Волфурт RAFнинг маҳфий маркази бўлса керак, деб ўйлардик. Кунлардан бир кун кутилмаганда уйимизга Пехнинг ўзи кириб келди, уни кўриб бир оз хижолат бўлдик. Отам уни полиция суриштирганини айтганди, у бепарво кўл силтади. Айтишича, уни тезда топволишган ва тез кўйворишган, бу 1977 йилги жазавалардан бири эди. Отам буни эшитиб, енгил тин олди, менинг эса бир оз ҳафсалам пир бўлди.

Болалигим ҳам аста-секин ўз ниҳоясига етиб борарди. Дадам шу пайтгача – ташаббус кўрсатиши лозим бўлган давргача яхши ва баҳтли ота эди. Энди эса вояга етаётган болалари билан иши йўқ, ахир у ўсиб келаётган фарзандларини бир нимага қизиқтириши, руҳлантириши керак эди-ку. Бироқ бошқаларни ўйлаш унинг табиатига ёт эди. Яхшиси, ортга чекиниб, қишлоқдаги одатий тирикчилик ташвишларига кўмилиб юраверарди.

Эшитганим бор, грек тилида “ватан” ва “одат” сўзлари маъно жиҳатидан бир-бирига яқин экан.

Телефон жирингласа ҳам, отам кимир этмасди. Бирор ундан бир нима сўрашини тасаввур ҳам қилолмасди. “Бу аниқ менга эмас”, дерди у. Почтанини ҳам кутмасди. Нега кутади? Ахир уни қизиқтирадиган ҳеч нима олиб келмаса.

Бора-бора отам билан ўртамиизда бир-биrimizни боғлайдиган ҳеч нарса қолмаганини ҳис эта бошладим. Бироқ ёшлиқ ғурури билан ота ихтиёрига қарши боришининг имкони бўлмагач (у ҳеч қачон бирорвга хўжайнинлик қилишни истамаган), бунинг ўрнини боса оладиган йўл топдим – отамнинг жоҳиллигига, нодонлигига қарши исён кўтардим; одатда, ота-она назоратида ё бир нима етишмайди, ё бир нима кўпайиб кетиб, ортиқчалик қилиб қолади. Мен унинг лоқайдлигини юзига солдим. У бу “айблов”га қўшилмади, бундан жаҳлим чиқди, мен уни тушунолмадим ва шунинг учун ҳам муроса қилишга кучим етмади. Ниҳоят, овора бўлиб ўтириш бефойда дедим-да, уни “рўйхат”дан ўчирдим. Чунки ўзимнинг муаммоларим ҳам етиб ортарди. Бу тўғрику-я, аммо айни чоғда баҳонаям эди, негаки энди ёшимга мос равишда қизиқишиларим ҳам ўзгариб қолганди. Не тонг, ўшанда отам билан орамиздаги келишмовчиликлар келгусида бир қадар қискариб қолар, деб умид ҳам қилолмасдим. Зоро, отам энди мен учун унчалик муҳим бўлмай қолган, менга энди барибир эди.

Мен фақат бир нарсани – ундаги ўзим ёшлигимдан гувоҳ бўлган кенг фикрлиликни, унинг бошқалар тўғрисида енгилтаклиқ ёки ичиқоралик билан сўз юритмаслигини тобора катталашиб бораётган масофадан туриб бўлса-да, қадрлар эдим.

<sup>1</sup> RAF (Royal Air Force) – Буюк Британия Ҳарбий-Ҳаво кучлари (ингл.).

<sup>2</sup> 1970 йилларда Берлинда фаол иш олиб борган террорчи ташкилот.

Отам энди кўп вақтини ертўлада – ўз устахонасида ўтказарди. У ерда у бир нималарни ўйлаб топар ёки бўлмасам кун бўйи паришон бир алпозда чексиз ўй-хәёлларга берилиб ўтиради. Бошқача қилиб айтганда, у ерда у ўз ҳаётини ташқи воқеа, ходисалардан “сақлай” оларди. Устахона унинг учун том маънода бошпана ва табиий ватанга айланганди. У ердаги ишлардан эса ҳали-хануз ҳайратга тушаман. Етмишинчи йилларда у ертўланинг пастаккина шифтига каттакон, кенг тахтани ёғоч мих билан маҳкамлаб, тахтага ёш болалар учун мўлжалланган озиқ-овқат сақланадиган шиша банка қопқоқларини пастдан банка тушадиган қилиб чиройли, батартиб бир тарзда бураб ўрнатган. Рўзгорда керак бўладиган нимаики майда-чуйда нарса бўлса, ҳаммасини саралаб, тур-турига ажратиб, ўнлаб банкаларга жойлаган-да, уларни шипга яқол қўзга ташланадиган қилиб “осиб” чиқкан. Ана энди кимга нима керак бўлса, етўлага тушиб, излаган нарсанини қийналмай дарров топиб оладиган бўлган.

Оиламизда гоҳида шундай савол-жавоблар ҳам бўлиб турарди:

- Дадам каерда, кўрмадингми?
- Устахонасида бўлса керак.
- У ерда нима қилаётганикин?
- Яна тагин бўлмагур нарсаларни ўйлаб топаётгандир-да.

Ўша пайтларни эсласам, шунга ўхшаш гап-сўзлар тез-тез бўлиб турарди. Биз, уйдагилар отамнинг паришонхотирлиги боис ўз “устачилик”лари билан (ертўлада пармалаш дастгоҳи ишга тушса, телевизор экрани хиралашар ёки доимий тарак-турук болаларнинг дарс тайёрлашига, ўқиш-ёзишига халакит берарди) оиламиз ҳаётига раҳна солмаса дердик. Ўзим ҳам отамнинг касаллик сабабли фаромушхотирликка берилишига ва бунинг оқибатида ҳаётимга путур етказишини хоҳламасдим. Очифини айтганда, у хасталик бошланган пайтда ҳам Робинзон Крузога ўшаб автоном ҳаёт кечиришда давом этарди – оила унинг учун (саҳна ортидаги) денгиз, шамол, ўрмон ва эчкилар ҳамда *my man Friday* (садик хизматкор) эди.

*Робинзон Крузо* отам ўз ҳаётида ўқиб чиқкан бирдан-бир, ягона роман эди. Жаҳон адабиётининг у қадар машхур бўлмаган ушбу романида муҳаббат эмас, балки ўз ҳақ-хуқуқини химоя қилиш ғояси асосий мотив қилиб олингани учун ҳам уни қайта-қайта ўқиб чиқкан. Ўзининг биринчи автомобили – 1934 йилда чиқкан, томи кўтариб, қайтариб кўйиладиган Cabrio енгил машинасини отам *Робинзон* дея эъзозларди. Уни 1955 йилда, уйланмасдан анча илгари сотиб олган, ўша йили шу машинада дўстлари билан икки ёки уч кунга жанубий Тиролга<sup>1</sup> бориб келган эди.

*Немис тилидан  
Мирзаали АКБАРОВ таржимаси*

(Давоми бор)

<sup>1</sup> Австриядаги тарихий ўлка, вилоят (тарж.).



## Ҳалима АХМЕДОВА

### БАСИР

(Барча ганимларим ва дўстларимга бағишилайман)

Кўнглимнинг хилватида  
ганимлар майсага,  
дўстлар нурга айланадилар  
Қизгалдоқ қонини симирган саҳар –  
Уфқлар ортидан, беради садо  
Ва бу садо сари борар эмаклаб –  
Вақтнинг қамчисидан эзилган дунё...  
Сувлар тамишанади гўё томгандек  
Гулобий ҳисларнинг таъмини...  
Осмон юпатмайди, юпатолмайди,  
Кўкраги дардларга тўлган заминни  
Кўрятман қафассиз булбулни  
Зулматдан ажралған ёғдуни,  
Булбул овозини йўқотиб бўлган  
Ёѓду танимайди энди орзуни  
Шудгроларда шеър битаётган  
Энг зўр шоир ёмғирни алдаб –  
Олиб кетар камалаклар юртига қуёши...  
Алдашини севади жуда ҳам қаттиқ –  
Юраклар ўрнида ўсаётган тоши...  
Чориги йиртилган Исо масеҳининг  
Ёмғирга айлангиси келади,  
Шамолга айлангиси келади.  
Аммо ёқасига қадалган ина  
Нафис истагини ташлайди йиртиб...  
Йиртилган истаклар соябонида  
Қўлларида бўртган қонталаш  
томирлар билан  
Ўтган ва ўтмаган кунларини кўриб.  
Ўтиради бир чол,  
юзида бужмайган табассум.  
Угоҳо шамолни сўқади,  
гоҳо ёмғирни...  
Сўнг эса негадир йиғлайди юм-юм.  
Мен бу кўз ёшларни танийман.  
Ғамни танигандек,  
қайгуни танигандек...  
Улар Ҳобилни ўлдирган Қобилнинг  
Хиёнатидан йиғлаган Одам Атонинг  
Кўз ёшлари каби жуда ҳам аччиқ...  
Аччиқ йиғи ҳиди кезар ҳавода  
Чарх эса айланар,  
айланади боз  
Мунгайиб учётган қушлар

ЖАҲОН АДАБИЁТИ

кўксидан

Биз ҳайдаб юборган ишқ берар овоз.  
 Шунда умидсизлик умиди яна  
 Оғирлик қилади руҳ ила танга  
 Бизга қуёш бўлиб кўринар шунда  
 Бўрилар кўзидиа ёнган аланга.  
 Шунда сўнгги чақасини санаётган гадо,  
 Эртанинг чўнтағида қолган ризқидан  
     умидини узади.

Шайтоннинг макрига учган Момо Ҳавво  
     жаннат дараҳтидан олма узгандек...

Нелардир узилиб бораверади.  
     тириклик томиридан...

Ҳар куни кўраман фалаж ўғлини  
     Елкасида кўтариб юрган аёлни  
 Унинг кўзларида сузар хазонлар.  
 Лаблари қирор остида қолган гунчадек  
     пичирлайди ненидир маҳзун.

Баъзан ўғилчаси харҳаша қилар:  
 Баландроқ кўтариңг, кўрай худони...  
 Булутларнинг бир четини кемираётган нур  
 Осмоннинг кўксига кетади сингиб  
 Кўпаяр, кўпаяр,  
     Кўпаяверар

Аёлнинг кўзидиа сувган хазонлар...  
 Осмоннинг ишқио замин ҳажеридан  
     ногоҳ совуб кетар юрагим  
 Яшагим келади шаббодаларнинг –  
 Урик гули тўла хаёлларидаи  
 Фалакка қовушиб кетсан бўлмасми-  
 Биби Робиянинг хушибўй рўмолларидаи...  
 Яна вужудимнинг қаеридаидир  
     боши кутаради.

Сўнгсиз таҳликалар жсанги басма-бас  
 Шодлик уругини излаётган Ҳаёт.  
 Қўшигин кўйлашига етмайди нафас...  
 Зилол тасаввурим лойлатган гамнинг –  
 Согинч тонгларини ёпган булутнинг –  
 Ва яна толъе эшигидаги қулфнинг –  
 Оғирлигин ҳис қиламан мудом жсонимда...  
 Ва яна кезаман ўзимни ўзим –  
 Дарчалар ортида қолган тун каби.  
 Гоҳо кўзларимга қонсираб кирап  
 Мавхум хотиранинг беором қалби...  
 Ҳайратим қариди, нафратим сўнди.  
 Номсиз фалсафада изгийман танҳо.  
 Яшаи нелигини билганим сари –  
 Кўксимда дийдоринг мавжланар, худо...  
 Карман, зеро  
     қулогим тўлган шавқингга

Басирман, нигоҳим дийдорингдан маст  
 Шунча ишқим билан жунуним билан –  
 Чўмолилар сурраб кетаётган  
     Бир хасдирман хас...

Қачондир Аюб чаимасининг бўйига  
     Умид ниҳолини эккан эдим мен  
 Бахтили бўласан, деб айтганда онам  
 Орзу каишасини тиккан эдим мен...  
 Бунга анча бўлди...  
     Жуда кўп бўлди.

**ЖАҲОН АДАБИЁТИ**

Билдим у ниҳолни қуритганин  
 гам,  
 Ва яна билдимки, Аюб эмасман.  
 Қайсиdir кўнгилда чириди каитам...  
 Ҳозир эса самони орзулаетган  
 дарахтлар кўзига қарайман.  
 Улар нақадар соф,  
 нақадар тоза  
 Балки дунёдаги  
 барча гўдаклар –  
 Нигоҳи дарахтлар кўзидан олган андоza  
 Мен шубҳага тўла  
 нигоҳлардан безорман  
 Безорман ҳасадга тўла кўзлардан.  
 Улар ҳар куни оёғим, қўлларим  
 изини ҳидлаб –  
 Нимадир, нимадир ахтарар мендан...  
 Улар билмайдилар ҳар кун ботишин –  
 Юрагим қонига чўмилиб офтоб...  
 Яна билмайдилар телба ишқ учун  
 Фақат Ҳақнинг ўзи бершиин жавоб...  
 “Қаттиқ севганимисиз, зўр севганимисиз?”  
 Бир қизча сўрайди кўзи тўла чўғ.  
 Ва яна дейдик: шеърларингизда –  
 Севги билан дарддан бошқа нарса йўқ...  
 Севганимни мўйқуми уни билмайман,  
 Севги бу кўзи кўр- уйсиз дарбадар  
 Аммо бир олов бор дил илдизизда –  
 Ловуллайди ўтим билан баробар...  
 Балки шу оловдир менинг қисматим  
 Тупроқ, ҳаво, дарё мени кечирсин  
 Үзимдан бош олиб кетган дамларим.  
 Шу жунунда худо мени кечирсин...  
 Юксакка қарайман умидми излаб  
 Булутлар кўзиди кўтиради май  
 Тириклик қадамин товуши баланд –  
 Телбанинг маъносиз қаҳ-қаҳасидай  
 Кетаман...

Яна ҳам олисга кетишум керак.  
 Писта олмайсизми? -сўрап ногаҳон  
 Йўлнинг четидаги пистачи хотин  
 Мен уни танийман қомати букик  
 Дунёнинг жавобсиз сўроқларидаи  
 Нигоҳлари бўм-бўш, кўзлари бўм-бўши  
 Чақилган пистанинг пўчоқларидаи...  
 Унинг кўзларини негадир тўлдиргим келади  
 Балки юлдуга,  
 балки энг чиройли шодликка....  
 Аммо уни қизиқтирмас на шодлик, на юлдуз.  
 Мен эса кетишум керак,  
 Жуда ҳам олисга,  
 кўнглимнинг хилватига,  
 Худога яқинроқ жойига...  
 Токи йироқ бўлай, жуда ҳам йироқ  
 Тунлар талвасаси,  
 кун миннатидан  
 Шунда ғанимлар майсага,  
 Дўстлар нурга айланадилар...  
 Кўнглимнинг хилватида.

## Горькийдан икки таржима

Машхур рус ёзувчиси Максим Горький 1868 йил 16 март куни Россиянинг Нижний Новгород шаҳрида дунёга келди. Бу йил адаб таваллудига 156 йил тўлди. Рус ёзувчиси Максим Горькийни эслаш, унинг адабий қарашларидан кўчирмалар олиши, “Она” романни тўғрисида сурункали иншолар ёзиши бугун урфдан қолди. Ўтган асрда ҳамманинг меъдасига текканмиди бу ёзувчи? Умуман, эслаб-хотирлашга, асарларини ўқишига арзимайдиган бир тасодифий-ўткинчи ёзувчими Горький? Аввалига муқоваси эскириб кетган, XX асрнинг 50-йилларида ўзбек тилида босилган “Ҳикоя ва эртаклари”га кўзим тушиди. Кейин шу китоб таъсирида “Италия ҳақида эртаклар” туркуми, биографик қиссалари, “Клим Самгиннинг ҳаёти” ва бошقا асарларини эслаб кетдим: ҳар ҳолда бу тоифа асарларнинг бугун ҳам ўқувчи бордир. Горькийнинг адабиёт тарихида қоладиган, ўқишига арзидиган асарлари йўқ эмасдир. У ўз даврининг сиёсий мафкуравийлашган таржиб-ташвиқ адабиётининг қурбони бўлган шунчаки бир ёзувчи эмасдир. Горький талант эгасидир... Ўлаб-ўлаб охири, баҳарҳол, Максим Горький учун бундай аврагич-суюнчиқ гапларга зарурат йўқ деган ўйга келдим. Адабнинг асарлари суюнчиқ; ижодкорни ёзган асарлари яшатади, яшнатади, қоралайди-оқлади; сүйдиради-куйдиради-нафратлантиради. Иккинчидан, бу ҳодиса ўқувчига, дидга, талқинга, талқинчига, таржиб-ташвиқ ва бошқа бир дунё омилларга боғлиқ. Чўлтон XX асрнинг 30-йилларида “Она”ни таржима қилди; “Катта мактаб эгаси”, “Устоднинг хислатлари” номли иккита мақола ёзди. Таржимани ўз хоҳиши билан қилганми, мақолаларни мажбуран ёзганми – буниси қоронгу. Аммо Чўлтон лафзи қозогзга муҳрлангани ҳам, унинг матбуотдаги охирги чиқишларидан бири бўлган ўша мақолани “аждаҳо комида” туриб битгани ва “Кеча ва кундуз” романига таъсирини эътироф этгани ҳам факт. Ҳар икки мақолада илиқ, самимий фикрлар бор. Чўлтон ёзади: “Наср тилини тарашилашини мен бошлаб Горькийдан ўргандим”; “Горький – шоир. Унинг асарларида фақат бир насрчи (романчи) кўринмайди, ҳар ер - ҳар ердан нозик шоир келиб чиқади... Горький ҳар қандай табиат манзарасини жонлантириб, унга жон киритиб, уни кўз олдимизга шундоққина келиб тўхтайдиган қилиб оладир...”.

Мабодо 30-йилларда Горький шахсияти “шўро ёзувчиси”, ижодиётидан “шўро адабиёти” сунъий равшида ясаб олинган бўлса, бу адабни холис суйгандар, ўз ихтиёри билан асарларини ўқиганлар, дил амрига кўра асарларини таржима қилганлар бормиди ё йўқмиди? Бундай саволлар бежиз пайдо бўлмади. XX асрнинг 20-йилларида матбуотда нисбатан эркинлик мавжуд эди. Ижод аҳлининг, жумладан, ўзбек адабларининг умрбоқий асарлари, одамнинг кўнглига яқин дардли шеърлар айнан ўша ўйларда майдонга келди. Бу фикрга эътироф бўлмаса керак. Ҳудди ўша давр матбуотида – “Маориф ва ўқитувчи” журналининг 1927 йил 7-8, 1928 йил 5-6-сонларида М.Горькийнинг “Қизиқликлар” ҳамда “Туннел” номли ҳикоялари таржимасини кўриб қолдим. Биринчи ҳикоя таржимони – “Й.Омон”. Номи озгина таниши. Биз Йўлдош Омоннинг Фарғона газеталари таҳририятларида таржимон бўлиб шилаганидан хабаримиз бор. Бошқа тафсилотлар маълум эмас. Иккинчиси “Остон”. Бу имзо ёнида “Масков” сўзи турибди. Бунинг кимлигини аниqlашга имкон бўлмади. Қайсиdir ёзувчининг ўткинчи имзосидир, балки. Эҳтимол, ўша замонда Москвада таҳсил олаётган талабалардан биридир. Хуллас, билолмадик.

Билганим шуки, ҳар икки ҳикоя ҳам ўқишига арзигуликдир; кўнгилга бир ойдинлик олиб киради. “Қизиқликлар”да баён қилинган машҳур шахслар-

ЖАҲОН АДАБИЁТИ


нинг гайрииҳтиёрий ҳаракатлари, галати қилиқлари - бу қизиқ ҳодисалар одамни кулдиради, ўйлантиради.

“Туннел” ер билан мулоқотга киришган, ернинг бағрини ўйиб шилаган, ернинг жони хусусида қайгураётган ва охир-оқибат инсоннинг куч-қудратига ишонган одамнинг ҳаяжонли бир ҳикоясиdir. Горький воқелик ичига ўлим ҳодисасини қўшади ва ҳикоянинг жонли, табиий ва реалистик чиқишига, бадиий жиҳатдан тишиқ бўлишига эришади. Ровий – Павел ҳикоя охирида отасининг васиятига кўра ерости йўли қазилиб бўлингани хабарини айтади. Ҳикоя шу билан якун топади. Бунда инсон ва табиат ўртасидаги кураши ва айни пайтда одамнинг ерга меҳр-муҳаббати ҳам баён қилинган.

Таҳлил ва талқин жараённада кўп фикр айтиши мумкин, албатта. Бироқ бу ўринда ҳикояларни ортиқча изоҳлаб, шарҳлаб, тушиунтириб ўтирумасдан муҳтарам ўқувчилар учун ҳар икковини қайта нашрга тайёрладим. Имлоси ҳам ўшандай қолди. Булар Максим Горькийнинг ўзбек тилида босилган китобларида учрамади. Ҳатто рус тилидаги нашрларида ҳам камёбга ўшиш кўринди. Уқиб баҳолаши ўқувчига ҳавола.

Қолаверса, Жалолиддин Сафоев таржимасида М.Горькийнинг бир қатор адабий-бадиий хотиралари ҳам ҳукмингизга ҳавола этиляптики, мазкур қатралардаги ҳаёт ва жамиятга муносабат, адабнинг ижтимоий воқеликларига бўлган танқидий қарашлари мазкур ёзувчи ҳақидаги тасаввурларимизни янада бойшишига хизмат қилаоди деб ўйлаймиз...

Баҳодир КАРИМ



## Максим ГОРЬКИЙ ҚИЗИҚЛИКЛАР

Бу кун ман Тарвитский кўпргутида кичкинагина, сариқ сочли, ялтироқ пойпоқ кийган бир хотинни кўрдим. Үнинг юзи қиз боланикидеқ, ҳали тамом етмаган (етилмаган маъносида – Б.К.) эди. Кўкимтил қўлқоп кийган елка ва қўл билан панжарани ушлаб, худди Нева дарёсига иргиб тушишга тайёрланғандек ўзининг кичкина қизғимтил тилчасини оғзидан чиқариб, ойга қараб чўзмакда эди. Осмоннинг эски ва айёр тулкиси қора тутундек булат орқасидан чиқди. Бу кун ой жуда тўлған эди. Ул маст бўлиб юрадиган одамнинг тумшуғидек қалин ва қизғимтил эди. Хотин ойни энг қаттиқ ва – мен айтсан – жиноий тус билан пўписалар эди.

Бу воқеа бир вақтлар мени кўп ишғол қилған ва кўп қизиқликларни эсимга туширган эди. Одамлар ёлғиз бўлғанда уларга қараб юришни ва уларнинг ақлсиз ҳаракатларини таъқиб этишни суръ эдим. Бундоқ ҳаракатларни бўлса ақлсизлик демасдан бўлмайди.

Мен гўдаклигимдан бери инглиз масхарабози Мирондолни эсимда тутаман. Бир кун бўш ва қаронғи ўйинхонадан ўтиб туриб, у ойнанинг олдида тўхтади, бошидан қалпоғини кўтариб, ўз аксига таъзим билан букулуб салом қилди. Ўйинхонада хеч ким йўқ эди. Мен беркиниб ўтирган эдим. У мени кўрмади, кўра олмади. Бу нима қилиқ? Ўйлаб туриб тушундим – масхарабоз.

ЖАҲОН АДАБИЁТИ

Бунинг устига ўзи инглиз. Қизиқлик унинг гўшт ва қонига сингиб кетган.

Лекин ман Чеховни кўрдим. У боғда офтобнинг шуъласини телпаги ичига солиб, уни шу ҳолда шуъла билан бошига кийиб олишга уринар эди. Ҳаракатининг муваффакиятсизлиги, офтоб шуъласини овлашдан ҳеч нарса чиқара олмағани унинг аччиғини келтирди. Унинг бети тиришиб қаронғиланар эди. Охири ғазаб билан телпагини кийди, оёғи остида ётган итни бир тепди. Осмонга эгри ва аччиқланиб қаради-да, уйига кириб кетди. Мени кўрганида оғзининг бир бурчаги билан кулди ва:

— Салом алайкум, Балмонтнинг “Офтоб ўлан иси беради” деган нарсасини ўқидингизми? Аҳмоклик, Русияда офтоб Қозон собунининг исини, бу ер ва Кримда татарлар терининг исини беради, — деди.

Ул йўғон қизил карандашни кичкина шишағанинг оғзига тиқишига қийналиб уринади. Бу эса ҳикмат табиат қонунини енгишга очиқ интилиш эди.

Л.Н.Толстой бир куни эчкимарнинг олдиға келиб, секингина:

— Яхшимисан? — деди.

Эчкимар Диюлбир йўлидағи бир чакалакзорда, тош устида исиниб ётган эди. Толстой унинг олдидаги кўлини белбоғига тиқиб, теваракка гумонсираган бир назар ташлаб, улуг инсон яна эчкимарга қараб:

— Мени сўрасанг, ҳеч яхши эмасман, — деди.

Кимё профессори Тиховинский ошхонада ўтириб мис лаълига тушган аксидан сўради:

— Ҳа ўртоқ, юрибсанми?

Бир жавоб олмаганидан кейин профессор оғир бир уфлади. Ва қошини жийириб, бетини тириштириб, ўзининг лаълдаги аксини артиб ташлашга киришиди.

А. Владимирский этигини олдиға қўйиб, унга қараб:

— Қани, юр-чи, юролмайсанми, ҳа, юролмайсанми?, — деди. Кейин ўзи такаббурлик билан натижа чиқарди:

— Билдингми, мен бўлмасам, сен ҳеч қаерга боролмайсан!

— Нима қиляпсиз, Фёдор? — деб уйига кириб туриб сўрадим.

— Мана, этигим эскириб кетибди. Эндиғи этиклар ёмон бўлиб қолган, — деди.

Бир кун менинг меҳмонхона қўшнум, Варонеж мулкдори бутунлай хүшёр бўлгани ҳолда адашиб меним хужрамга кириб қолди. Мен кўрпамда ётган эдим. У ҳам тамом кийинган эмас эди. Чироғлар ўчирилған эди. Кўрпамни сал кўтаргач, қўшнимнинг оріқ, кулимсираган юзини кўрдим. Ул ўз-ўзига сўзлашмакда эди.

— Ким бу? — деди.

— Мен таксир, бу сизнинг уйингиз эмас.

— А, афв этинг.

— Буюринг! — деган эдим, у тўхтади. Теварагига қаради. Мўйлабини тузатиб, ойна олдиға келиб, гурунглай бошлади:

— Мен адашдим-м-м-м . Бу қандай воқеа бўлди-и-и-и-и , — деди. Ва секингина оёқ учida юруб уйдан чиқиб кетди.

Хотинлар ҳам кийинган чоқда ёки бирор муваффакиятдан кейин ўзлари билан сўзлашадилар. Аммо ман бир кун ўқиган бир хотинни кўрдим. У ёлғизликда шоколад емоқда ва ҳар конфетини емасдан илгари гапирав эди:

— Мен сени еб қўяман.

Кейин сўради:

— Ҳа едимми?

Иккинчи конфетини яна:

— Мен сени еб қўяман, ҳа едимми? — деб такрор қилар эди. Беш минутгача шу ҳол давом этди. Юзи виқорли хотиннинг икки кўзлари ҳам тиззаси устидаги қутида бўлған шоколадга тикилган эди.

## ЖАҲОН АДАБИЁТИ

Театрнинг залида чиройликкина қора сочли бир хотин ўйин бошланишидан кеч қолиб, ойна олдида сочини тарагани холда қаттиқ ва таъсири тувш билин:

— Ҳа шунинг учун ўлуш керакми? — деди. Залда мендан бошқа ҳеч ким йўқ эди. У ҳам мени кўрган эмасди. Кўрганида бундай ўринсиз бир гапни гапирмас эди. Бизнинг Русияда мундай қизиқликлар жуда кўп, мен уларни кўп учратдим.

Й.Омон  
“Маориф ва ўқитгувчи” журнали,  
1927 йил. №7-8

## ТУНЕЛ

Асрлик қорлар билан бекилган тоғларнинг чуқур рамкасида, кўм-кўк ва жим-жит кўл милдирайди; боқчаларнинг коронфиланған тевараклари азаматли қатловлар билан сувга энганда тоғдан туриб оқ уйлар сувга қарайлар. У уйлар оқ қанддан ясалган бўлсалар керак. Бутун атроф ёш боланинг тинчгина мароҳатли уйқусига ўхшайди.

Тонг чоғи тоғлардан юмшоқлик билан чечакларнинг ҳидлари сочилади. Уларни ҳар томонга ёлғиз қуёш тўзитади. Дараҳтлар япроғи, кўкат ва ўтларнинг таналарида шабнам ялтирайди. Йўлнинг сарғилт тасмалари тоғнинг жим-жит адирига ташланған. Йўлларга тўшалган тошлар кишининг кўл билан тутиб кўргиси келадиган юмшоқ баҳмалга ўхшайди.

Кичкинагина тошлар тўпламининг ёнида кўнғиздек, қора кўкрагида медал(нишон) таққан, кулумсираган ва юмшоқ юзли бир ишчи ўлтиради. Пўлат тирсакларини тизига кўйиб, бошини озроқ кўтариб палут дарахти (каштан) тагида соялаб турган йўловчиларга қараб сўйлайди:

— Бу медал, хоним афанди, — Силон тоғи ичидан ўтказилган йўлда қилган хизматларим учун... — ва кўзларини кўкрагига тушириб, медал доналарига қараб илжайди:

— Ишнинг ҳаммаси ҳам севмаганча оғирдир. Қачон севдинг, бу сени уйғотиб ҳаракатга солади ва осонлашади. Ҳар холда қийин эди.

У қуёшға қаради, илжайиб, табассум қилди, тўймасдан кўлларини юқори чўзизб силкинди ва қора кўзлари ялтираб ёнди:

— Ҳатто баъзан қўрқинчли эди. Ер ҳар нарсани сезади. Шундай эмасми? Биз тоғни ёриб ернинг ичига кирганда, у бизни қаҳр билан учратди. Куюкли дам билан нафас олғанда юраги шувв этиб кетгач, боши оғриб, суяклари қақшай бошлади. Бу ҳодиса кўплар томонидан синалган! Кейин бизга қараб тошлар отди ва устимизга қайноқ сувлар кўйди. Бу жуда ҳаяжонли бир ҳол эди. Ўт олдидағи кичкина тешикча билан сув қизилланди. Шу чоғ отам менга шундай деди:

“Ерни биз яраладик, кўрасан, у ўзининг қонлари билан барчамизни қизидиради, кўйдиради!”

Албатта, булар бари хаёл. Бироқ шу сўзларни чуқурлатиб қазилган ернинг ичиди, нафас қайтарадиган қоронфиликда, ийфи қилиб шарақлаган сув, тошга тегиб шариллаган темирларнинг ўртасида эшитсанг, хаёлий деган нарсани унутасан.

Хоним афанди, ўша чоғларда шуларнинг барчаси хаёлий эди, биз инсонларни шунча кичкина, аммо юқорини буровлаб тешганимиз тоғ кўккача юксалган, буюк ва ҳайбатли... Уни тушуниб билмак учун кўрмак керак!

Тонг отиб қуёш кўтарилганда, тоғнинг ичига кириб кавлаган ишланма (сунъий) ғоримизни ва қуёшнинг ер ёнбошидан чиқадирған кишилардан қандай таъсиirlаниб қарашини кўрмак керак.

Тоғнинг кулранг юзи, машиналар ва унда чукурлашган, басишининг қаронғиланған товушлари ва акс-садолари ихтиёrsиз қаҳқаҳанинг ўзи!

У қўллариға назар солиб, ихчам кийимларидағи медалини тўғирлаб, секингина нафас олиб қўйди:

– Одам ишлай олади, – ифтихор билан сўзини давом эттиради, – кичкина бўлған инсон ишлашни истаса, эгадиган кучдир. Ишонингиз, бора-бора ўша кичкина одам бутун истаганларини ишлай олади. Менинг отам илгарилари бунга ишонмас эди:

“Тоғнинг бир томонидан тешиб иккинчи томонига ўтиш, ерни тоғнинг девори қилиб қўйган тангрига қаршилиқдир. Ўша чокда ҳазрати Марямининг (русларнинг “она худо”си) биз билан бирга эмаслигини кўрасиз”, дер эди отам.

Отам хато сўйлади. Ҳазрати Марям кимни суйса, шунинг билан бирга. Мен сизларга гапириб турганимдек отам ҳам анча вақт ўйланиб турди. Негаким у тоғдан ҳам кучли нарса борлигини сезди. Бироқ байрам кунлари келиб қолди. Вино шицалари қатарлатиб терилган усталда ўтириб менга ва ўтирганларга ўғит бера бошлади:

– “Тангри болалари”, – бу сўз унинг суйган гапларидан эди. Чунки у хайрли ва диндор бир киши эди - Тангри ўғуллари, ер билан бундай курашиб мумкин эмас. У жароҳатлари учун биздан “хун” талаб қиласи ва енгилмайди. Ўзингиз кўрдингиз: биз тоғни тешиб, юрагига бориб етганимизда, у бизни куйдиради, ўтлар сочади, чунки ернинг юраги ўтлидир. Буни ҳамма билади. Ерни ёриш унинг наслларига қўмак қилишдир. Бу эса мамнұйдир. Биз унинг юзи ва шаклинигина бузамиз, қарангиз, тоғнинг ичига борган сайн ҳаво иссиқ ва димиқкан...”

Тинглагувчилардан бири икки қўлининг бармоқлари билан мўйлабларини силаб, илжайиб кулади.

– Шундай ўйлаган бир у эмас эди. Ҳақиқатан бу сўз тўғри. Тоғ ичидағи йўл борган сайн иссиқ ва шу қадар киши димиқарлик.

Қайноқ булоқлар кучли сувратда устимизга тушади. У чўмулганда қўйған сувдек қўйилди. Иккитамиз эсдан кетиб қолди. Кўп кишиларимиз кечаси казармада баъзи ҳаяжонларда розилик тилашдилар, инграшдилар ва жойларидан сакраб туришдилар:

– Гапим ёғонми? – кўзларини катта катта очиб ва тупурукларини ютиб отам гапирди – Шундай эмасми? – деди у.

Сўнгра у ҳеч туролмайдиган каби бўлиб ётиб қолди. Ҳоли оғир эди. Ўз қисматини билан кишидек шикоятсиз уч ҳафтадан кўбрак курашди.

Бир кеча менга деди:

– “Менинг ишим томом бўлди, Павел, ишларингни йиғиштириб ва уйга қайтғил. Ҳазрати Марям мададкоринг бўлсин!”

Ундан сўнг нафас қайтариб, кўзларини юмаб анча вақт жим қолди. Бир оздан кейин ҳаяжон ва шошилиш билан оёғига турди, сингирлари тақирилаб кетди. Кўлимдан ушлаб ўзига тортди ва деди:

– Ўғлим Павел, биласанми? Булар бари тамом бўлади. Биз ва бошқа томондан келадиганлар бир-биrimизни тоғ ичида кўрамиз ва учрашамиз, сен бунга ишонасанми?

– Ишондим, – дедим мен.

– Балли ўғлим! Шундай бўлиши керак. Ҳар ишни дин бўйинча ва ҳазрати Марямининг дуоси ва тангрининг розилиги билан бажариш керак. Халқ тоғнинг нариги томонига ўтса, менинг гўримга бор. “Ота, тоғнинг корнини ёриб, ичидан йўл солиб иккинчи томонга ўтдилар, де. Токи мен ҳам билайнин”.

Мен сўзига унадим ва васиятига амал қилишга ваъда бердим. Шу сўзларни сўйлагандан беш кун кейин вафот қилди. Ўлганидан икки кун бурун мен ва бошқаларга тоғ ичидағи қазма йўлда ишлаган жойига

## ЖАҲОН АДАБИЁТИ

кўмишни васият қилган эди. Бу ҳам хўшлашиш ҳолати эди, деб ўйлайман.

Биз ва бошқа томондан юрадиганлар отам ўлгандан ўн уч хафта ўтгач, тоғ ичида учрашдиқ, бу кун унутилмас кунлардан эди, хоним афанди! Биз ернинг тагида, қоронғи ғорда бизга томон келадиганларнинг товушларини эшитдик. Биз кичкина кишиларнинг барчамизни босишга қодир ернинг тагида!

Биз бу шовқун овозларни кўп мартабалар эшитдик. Кун сайин тушунилиб, ойдинлашиб кета берди. Голибларнинг суюнчли полвонлиқлари бизни жойлаб (эгаллаб – Б.К.) олди; биз ажиналардек буйруқ берилишига қарамасдан ишлар эдик. Тўғрисини айтганда, бу иш жуда яхши эди. Куёшли кунларда рақс-ўйнаш эди. Биз ҳаммамиз ёш болалардек меҳрибон ва ҳурматли бўлдик.

Уҳ, сиз ҳам ернинг тагида кишиларни сабрсизлик билан учратишни билсангиз эди”.

Ишчи бутунлай ўзини йўқотиб, уни тинглагувчига яқинлашди ва чуқур, самимий қўзларини унинг кўзларига қаратиб севинч ва юмшоқлик билан сўзга бошлади:

– Маъдан қаловлари бузилди, бирдан қизил олов машъала ялтирай бошлади ва кенгдор кора, устига кўз ёшлари қуийлған севинчли юзи кўринди. Яна машъала ва юзлар. Севинч ва енгиш овозлари...

Бу кун ҳаётимнинг энг яхши кунлари эди. Ўша кунларни эслайман. Йўқ, мен текин ишламадим. Сизга айтаман, хоним афанди, меним ишим муқаддас бир иш эди.

Уша ўтган кунлар барчаси гўзал бир қисса эди. Биз азаматли ерни у кун ўпдик! Ер ўша кундан бошлаб менга яқин ва тушунарли бўла бошлади. Мен уни гўё хотин каби севдим.

Ўликнинг гапира олмаслигини билсан ҳам, яна отамнинг гўрига бордим. Биз учун меҳнат қилган ёши улуғ кишини ҳурмат қилиш керак, шундай эмасми?

Мен отамнинг гўрига бордим. Ерни оёғим билан тепиб, отам нима деган бўлса, шуни дедим:

– Ота, тоғни тешиб ўтдилар. Инсонлар ғолиб келдилар, тунел ишланиб бўлди, ота!

*Остон МАСКОВ  
1928 й. “Маориф ва ўқитувчи”  
журнали, №5-6*

## ЧЕХОВ ҲУЗУРИДА ЎҚИТУВЧИ

Кунларнинг бирида А.П.Чехов мени Кучук-Кой қишлоғидаги уйига таклиф қилди. Бу ерда ёзувчининг озгина ери ва икки қаватли, мўъжаз уйи бор эди. Ўзининг “имение”сини кўрсатар экан, хаяжон билан гапира кетди:

– Агар пулим кўп бўлганда эди, мен худди шу ерда касалманд қишлоқ ўқитувчилари учун сиҳатгоҳ ташкил қилган бўлур эдим. Биласизми, шундай бир ёруғ бино – жудаям ёруғ ва каттакон деразали, баланд шифтли бино қуардим. Мен бунёд қилган ушбу сиҳатгоҳнинг жуда ажойиб кутубхонаси, ҳар хил мусиқа асбоблари, асаларичилиги, полиз-сабзавот экинлари экадиган томоркаси ва мевали боғи бўларди. Бу масканда агрономлик ва метеорология бўйича маъruzалар ўқилар эди. Чунки, ўқитувчи ҳамма нарсани билиши керак, ҳа, азизим ҳамма нарсани!

ЖАҲОН АДАБИЁТИ

У бирдан жим бўлиб қолди. Гапларига алоҳида ҳаяжон ва маъно бағишловчи ёқимли жилмайиш билан мен томонга ўгрилиб, охиста йўталиб қўйди.

– Менинг ҳаёлпарастлигимни эшитиш сиз учун зерикарли бўлса кераг-ов? Бироқ, мен бу ҳақда гапиришни хуш кўраман. Рус қишлоғига яхши тарбия кўрган, ақлли, билимли ўқитувчи қанчалик зарур эканлигини билсангиз эди! Бизнинг Россияда маориф ишига алоҳида шарт-шароит яратиш керак. Бу ишга тезроқ киришишимиз зарур. Биз бир нарсани яхши тушуниб олишимиз шарт: ҳалқи кенг билимларга эга бўлмаса, давлат худди яхши пишмаган хом ғиштлардан ёмон терилган бино сингари қулайди!

– Ўқитувчи ўз ишини жондан севгувчи артист, рассом, санъаткор бўлиши лозим. Бизда эса ўқитувчи бу – қора ишчи, ёмон таълим олган савияси паст одам. Унинг учун қишлоққа бориб болаларни ўқитиши бамисли сургунга бориши билан баробар. Чунки, ўқитувчи бир бурда нонини йўқотиб қўйишдан қўрқиб қолган, оч-яланғоч ва жамият томонидан унтутилган инсонга айланган. Аслида ўқитувчи қишлоқнинг биринчи одами бўлиши лозим эди. У дехқоннинг ҳар қандай саволига жавоб бера оладиган, одамлар ундаги билимнинг кучини хис килиб, ўқитувчига хурматга лойиқ инсонга қарагандек қараши ва эъзозлаши зарур. Бизда эса: урядник, бой дўкондор, поп, даҳа полицияси бошлиғи, мактабнинг ҳомийси, вайси, оқсокол, мактаб инспектори – барча-барча ўқитувчига дўқ уради, бакириб иш буюради, ишига аралашади, уни камситиб таҳқирлайди, унга хўжайинлик қиласди.

– Ҳалқни тарбиялашга сафарбар қилинган, тушунаяпсизми, айнан ҳалқни тарбиялашга, инсонга арзимаган чой-чака тўлаш ўта ақлсизликдир. Ўқитувчининг эски-туски жулдур кийимда юришига, чала-вайрон мактабда заҳ ва совуқдан қалтираб туришига, ўттиз ёшга етмасдан сил, ревматизм, ларингит касалликларини орттириб олишига сира-сира йўл қўйиб бўлмайди. Ахир бундай ҳолат биз учун, давлат учун шармандалик-ку! Бизнинг ўқитувчилар саккиз-тўққиз ой худди тарки дунё қилган зоҳидларга ўхшаб кун кечиришади: ёлғизликда, кўнгилхушликларсиз, китобларсиз зеҳни паст одамга айланиб қолади. Мабодо бирор ўртоғини суҳбатга чорласа, дарров уни ишончни йўқотганликда, шубҳали шахсликда айблашади. “Шубҳали шахс” – айёр одамлар аҳмоқларни қўрқитиши учун ўйлаб топган нақадар бемаъни сўз!

– Буларнинг барчаси жуда катта ва сермашақат иш қилаётган одамнинг устидан кулиш, уни беаёв таҳқирлашдир. Биласизми, ўқитувчими кўрганимда унинг тортичоқлигидан, журъатсизлигидан, ноchor кийим-кечагидан, ўта қашшоқлигидан, майиб-мажруҳлигидан нокулай аҳволга тушиб, уялиб кетаман ва бундай ҳолга қайсиdir маънода ўзимни айбордor хис қиласман!

У чуқур сукутга кетди ва бирордан сўнг ўйчан аҳволда қўлинни силкиб, изтироб билан шундай деди:

– Бизнинг Россия ана шундай бемаъни ва қўпол мамлакат.

## ҲАР КИМ ЎЗ ТИЛИДА ГАПИРИШИ КЕРАК

Чехов бўяб-бежалмаган гўзал оддийликни, ҳақиқийликни ёқтирас ва одамларни соддалаштирадиган ўзига хос услугга эга эди.

Кунларнинг бирида хонани ўткир атир-упаларнинг анвойи ҳидига ва ипак матодан тикилган куйлакларининг шитирлашига тўлдириб ниҳоятда серҳашам кийинган уч нафар кибор хоним ёзувчи ҳузурига келишди. Антон Павловичнинг рўпарасидан жой олиб, ўзларини сиёsatга қаттиқ қизиқадиган қилиб қўрсатиб, ёзувчига “савол”лар берса бошлашди.

**ЖАҲОН АДАБИЁТИ**

– Антон Павлович! Сиз қандай ўйлайсиз, уруш нима билан тугайди?

Антон Павлович йўталиб олгач, бироз ўйланиб, юмшоқ оҳангда, аммо жиддий овозда жавоб берди:

– Афтидан, тинчлик билан...

– Ҳа,ҳа, албатта! Лекин ким ғолиб чиқади? Юнонларми ёки турклар?

– Назаримда ким кучли бўлса ўша ғалаба қиласди.

– Сизнингча ким кучли? – чуғурлашиб бараварига сўрашди хонимлар.

– Кимки тўйиб овқатланаётган ва билимли бўлса, ўша кучли...

– Оҳ, қандай донолик! – деб хитоб қилди хонимлардан бири.

– Сиз кимни кўпроқ яхши кўрасиз - грекларими ёки туркларни? – деди шоша-пиша хоним.

Антон Павлович хонимга қараб қулимсираб, мулойим ва назокат билан жавоб қайтарди:

– Мен мармеладни яхши кўраман...сиз ҳам яхши кўрасизми?

– Жуда, жуда! – хаяжонланиб жавоб қайтарди кибор хоним.

– У шундай муаттар хид таратадики! – киборона тасдиқлади бошқаси.

Уччовлари ҳам мармелад бўйича ажойиб эрудицияларини намойиш қилиб, ўзаро қизғин баҳсга киришишди. Хонимлар ўзлари ва аклидрокларини қийнамасдан мармелад ҳақида сұхбатлашаётганларидан ва ўзларини шу пайтгача ўйлантирмаган, қизиқтирмаган турклару юнонлар мавзусига жуда жиддий қизиқувчан қилиб кўрсатишдек оғир вазифадан халос бўлгандаридан хурсанд эканликлари юзларидан яққол кўриниб турарди.

Улар кета туриб Антон Павловичга:

– Биз сизга мармелад жўнатамиз, – деб ваъда беришди.

Кибор хонимлар жўнаб кетишганидан сўнг:

– Сиз ажойиб сұхбат қурдингиз, – дедим.

Антон Павлович секин қулиб:

– Ҳар бир одам ўз тилида гапириши керак..., – деди.

## ПРОКУРОР

Бошқа бир сафар ёзувчи хузурида ёш, келишган ўртоқ прокурорга дуч келдим. У Чехов қаршисида ўтириб олиб, жингалак сочли бошини силкита-силкита дадил гапиради.

– Антон Павлович, сиз “Ёвуз ниятли одам” ҳикоянгиз билан менинг олдимга жуда қийин савол қўясиз. Агар, Денис Григорьевда ёвуз ният борлиги ва онгли равишда ҳаракат қилаётганлигига ишонсан, жамият манфаатлари талабидан қелиб чиқиб, мен уни қамоққа олишим керак бўлади. Бироқ, у ёввойи одам, ўз қилмишининг жиноят эканлигини сезмайди, мен унга ачинаман! Лекин, мабодо мен унга ачиниб ёки онгсизларча ҳаракат қилаётган субъектга қарагандек муносабатда бўлсан, борингки қалбимда раҳм-шафқат ҳам уйғонди дейлик, аммо мен бу билан Денис яна жиноят йўлига кирмайди, темир йўл рельси гайкасини бураб поездлар ҳалокатини ўюштирмайди, деб жамиятимизга кафолат бера олмайман! Мана сизга жумбок! Бундай ҳолда нима қилишимиз керак?

У ўзини орқага ташлаб жим бўлиб қолди ва синовчан қўзлари билан Антон Павловичга тикилди. Прокурорнинг эгнидаги мундир яп-янги бўлиб, тутмалари одил суд жонкуярининг ўзини дўст қилиб кўрсатаётган ҳиссиз ва совуқ қўзларидек ялтирок ва маъносиз эди.

– Мабодо мен судья бўлганимда, – деб жиддий овозда гап бошлади Антон Павлович, – мен Денисни оқлар эдим...

– Нимага асосланиб?

– Мен унга шундай дердим: “Денис, сен ҳали онгли жиноятчи бўлиб пишиб етилмадинг, бор ва пишиб етил!”.

Хукуқшунос хохолаб кулиб юборди ва шу ондаёқ жиддий ҳамда тантанавор оҳангда давом этди:

– Йўқ, Антон Павлович, сиз қўйган саволга фақат мен қўриқлашга сафарбар қилинган жамият ва унинг ҳаёти, мулки манфаатлари доирасида жавоб бериш мумкин. Ҳа, тонмайман, Денис ёввойи, лекин шундай бўлса-да, у жиноятчи, мана сизга ҳакиқат!

– Сизга граммафон ёқадими? – тўсатдан мулойим навозиш билан сўради Антон Павлович.

– О, жуда, жуда! Ажойиб ихтиро! – жонланиб жавоб берди ёш прокурор.

– Граммафонга менинг асло тоқатим йўқ! – хомушлик билан тан олди ёзувчи.

– Нимага?

– Шунинг учунки, граммафон қўшиқ таратади-ю, аммо ҳеч нарсани хис қилмайди. Ва граммафон ёмон чизилган расм монанд ўлик, туйғусиз... Сиз фотография билан шуғулланасизми?

Юрист фотографиянинг қизғин ишқибози бўлиб чиқди. У Антон Павлович ниҳоятда назокат билан шаъма қилган “ажойиб ихтиро” – граммафонга ўхшашлигини унутиб, фотография ҳақида тўлқинланиб гапира кетди. Шу дақиқаларда мундир остидан ҳаётда ҳозирча ўзини овдаги кучуквачча каби тутаётган аломат бир одам намоён бўлди.

Еш прокурорни кузатиб, Антон Павлович саркашлик билан шундай деди:

– Ана шундай думбул, шафқатсиз, инсоний туйғулардан маҳрум кимса одил судлов курсисида ўтириб, одамлар тақдирини ҳал қилмоқда.

Бирордан кейин қўшиб кўйди:

– Прокурор тушмагур балиқни қармокқа илинтиришни жуда яхши кўтар экан. Айниқса майда балиқни!

*Рус тилидан  
Жалолиддин САФОЕВ  
таржимаси*



Теодор ДРАЙЗЕР

## САРМОЯДОР

Роман<sup>1</sup>

ХХ БОБ

Мана шундай узил-кесил ва муқаррар дил изхоридан кейин Каупервуд ва Эйлин, табиийки, яна кўпроқ яқинлашишлари керак эди. Диний тарбия олганига қарамай, Эйлин ўз эҳтирослари билан кураша олмасди. Кўпчилик томонидан эътироф этилган диний қарапшлар ва тушунчалар унинг учун ўзини тутиб туришига асос бўлолмасди. Кейинги тўқиз ё ўн йил ичида унинг тасаввурнида аста-секин ошиқ йигит қиёфаси юзага келмоқда эди. Бу кучли, чиройли, соғдил, омадли, кўзлари тиник ва юзларидан қон томган ва айни вақтда сезгир, эпчил, ҳаётни Эйлиннинг ўзидан кам севмайдиган одам бўлиши керак. Кўплаб йигитлар унга қармоқ ташлаб кўришди. Унинг орзусидаги йигитга энг кўп тўғри келгани авлиё Тимофеј черковидаги Давид ота эди, аммо у руҳоний бўлиб, уйланмаслик онти билан чандиб ташланганди. Гарчи бир-бирларининг туйғулари ўртасида сир бўлиб қолмаган бўлса-да, улар ҳеч қачон бир оғиз гаплашиб кўрмаган эдилар. Кейин Фрэнк Каупервуд пайдо бўлди, у тез-тез учрашувлар ва сухбатлар туфайли аста-секин қизнинг орзуидаги энг олий ошиқ рамзига айланди. Сайёра куёшга интилгандай, киз унга томон талпинарди.

Агар айни вақтда қарама-қарши кучлар ҳаракатга келгудек бўлса, ким билсин, охири нима билан тугарди буларнинг бари. Гоҳо шундай бўладики, бундай туйғулар ва муносабатлар тубдан бир-бири билан кесишади. Ҳар қандай феъл-атвор қайсиdir даражада юмшайди, ўзгаради, аммо унга таъсири ўтказадиган кучлар жуда ҳам катта бўлиши керак. Кўпинча кўркув қудратли тутиб турувчи асосга айланади, бу диний ва ахлоқий тасаввурлардан келиб чиққан кўркув бўлмаса ҳам, моддий зарар олдидағи кўркув бўлиши мумкин; аммо бойлик ва жамиятдаги мавқе, одатда, уни йўққа чиқаради. Пул бўлса, чангальда шўрава деганлари аслида шу бўлади!

Эйлин ҳеч нарсадан кўркмасди. Каупервуд на ахлоқий, на диний мулоҳазалар билан хисоблашишга ўрганган. У қизга қарап экан, бир нарсани ўйларди: қандай қилиб одамларни алдаб, обрўйига путур етказмасдан қиз билан ишқий лаззатлар сурса. У Эйлинни бутун борлиғи билан севарди.

Иш юзасидан у Батлерларнида тез-тез бўлиб турар ва ҳар гал Эйлинни кўрарди. Қиз билан изҳори дил қилишгандан кейин биринчи бор келганида, Эйлин сездирмайгина унинг олдига келди, кўлини қисиб кўйди ва қайнок лаблари билан ўпид олди. Кейинги галда, Фрэнк кетишга чоғланиб турганида қиз бирдан дарпарда ортидан чиқиб келди.

– Севгилим!

Қизнинг овози майин ва илтижоли эди. Каупервуд ўгирилди ва эҳтиёт бўл дегандай унинг отаси хонаси томон ишора килди.

<sup>1</sup> Давоми. Боши ўтган сонларда.

Аммо Эйлин қўлларини йигит томон чўзганча жойидан қимир этмай тураверди; Фрэнк шошиб унга яқинлашди. Қизнинг қўллари бирдан унинг бўйнига чирмалди.

– Шунағанги сен билан бўлгим келаяптики!

– Мен ҳам! Ҳаммасини ўзим тўғрилайман. Ҳозир ўй-хаёлимда фақат шу!

Йигит қизнинг кучоғидан бўшанди-да, чиқиб кетди, қиз эса дераза олдига югуриб бориб, унинг ортидан қарай бошлади. Фрэнк шу яқин-атрофда турганидан яёв кетиб борарди ва Эйлин анчагача унинг кенг елкалари, самбитдай қад-қоматидан кўзини узолмади. Унинг тез-тез, шахдам одимлашини кўринг! Мана буни ҳақиқий эркак деса бўлади! Унинг Фрэнки! Қиз уни ўзиники деб биларди энди! Дераза олдидан кетиб, Эйлин рояль олдига чўкди ва то тушлик бўлгунга қадар қандайдир куйларни ўйчан чалиб ўтириди.

Чапдаст ва маблағдан қисилмаган Фрэнк Каупервуд учун қийин аҳволдан чиқиши катта меҳнат талаб қилмасди. Ёшлигига, у турли “ёғлик жойлар” кетидан чопиб юрганида ва кейинчалик ҳам, уйланганидан сўнг саховатнинг тор йўлидан бурилиб кетган ҳоллар кўп учарарди, у бузуклик йўлида фойдаланадиган барча айёриклар ва ғайриқонуний йўлларни миридан-сиригача ўрганди. Ўша вактда ярим миллион аҳолиси бўлган Филадельфия шаҳрида ошиқ-маъшуқларни кизикувчан нигоҳлардан яширишга тайёр иккинчи даражали меҳмонхоналар анчагина эди. Яна у ерда маълум пулга учрашув ўтказишга рухсат берадиган кўриниши ҳашаматли ҳовлилар ҳам бор эди. Янги ҳаёт туғилишидан сақлаб қолувчи воситаларга келганда, Каупервуд улар ҳақида аллақачондан бери биларди. Эҳтиёткорлик ва хушёрлик унинг шиори эди. Бошқача бўлиши мумкин ҳам эмасди, зоро, Каупервуд тезда таникли ва бообру шахсга айланганди. Эйлин эса эҳтироси уни қаёққа олиб кетаётганини англаб етмасди, англаганда ҳам элас-элас; бу майлнинг чегараси қаердалигидан у бехабар эди. Эйлин мұхаббатга ташна эди, у эркалашларини, паҳ-паҳлаб яхши кўришларини хоҳларди – ундан у ёғи билан унинг иши йўқ эди. Унинг ўйлари сичқонга ўҳшарди: коронгу бурчакдаги индан бошини чиқарди-да, ҳар қанака товушдан кўркиб, қайта лип этиб инига кириб кетади. Каупервуд билан боғлиқ ҳамма нарса унга гўзал кўринарди. У ҳали йигитнинг ўзи хоҳлаганидек севишига ишонганича йўқ; аммо ўша кун келади! Эйлин унинг хотини шаънини поймол қиласётганини тушунмасди, негадир унга бундай эмасдек туюларди. Борди-ю, Фрэнк уни, Эйлинни ҳам севса, миссис Каупервуд нима йўқотади?

Бебошлик ва эҳтиросдан келиб чиқувчи бундай ўз-ўзини алдашни нима деса бўлади? Биз ҳар қадамда унга дуч келамиз. Эҳтиросни тийиб бўлмайди, табиатда кичкина одамзот борлиғидан ташқарида содир бўладиган ҳамма нарса шундан гувоҳлик берадики, табиат унга нисбатан бефарқ экан. Эҳтирос туфайли берилган жазоларни биласиз: қамоқлар, касалликлар, хонавайронликлар ва касодгарчиликлар, аммо шу нарсани ҳам биласизки, булар ҳаммаси инсон шахсиятининг азалий интилишларига таъсир қилмайди. Наҳотки унинг учун максадга етишишга интилевчи шахснинг тутқич бермас хоҳиш-иродаси ва кудратидан бошқа қонунлар бўлмаса? Борди-ю, шундай бўлса, тўғри-да, аллақачон буни каттаю кичик ҳамма билиши керак эди! Биз ўшанда барибир олдингидай иш тутган бўлар эдик, аммо жиллақурса илохнинг бандалар ишига аралашуви ҳақидаги ярамас рўйларни ўзимиздан соқит қилар эдик. Халқ сўзи – Ҳақ сўзи.

Шундай қилиб, улар ниҳоят, учрашдилар, юзма-юз ўтириб, ажойиб соатларни бирга ўтказа бошлашди. Эйлинда авж олган эҳтирос алангаси шундай учрашувлар билан боғлиқ кўркув ва катта таваккални унтишга мажбур киларди. Унинг уйидаги хеч ким кўрмаган тасодифий бир дақиқалик учрашувлардан кейин улар шаҳар ташқарисида хуфёна кўришувларга ўтишиди. Каупервуд боши айланиб, барча ишини ташлаб кўядиган одамлар таифасидан эмасди. У тўсатдан бостириб келган эҳтирос ҳақида қанча кўп ўйлагани сайин

## ЖАҲОН АДАБИЁТИ

бу эҳтиросни ишларга, унинг оқилона мушоҳадалариға ёриб киришига йўл қўймаслик қарори шунчалик қатъийлашиб бораради. Йдора иши ундан эрталаб соат тўқиздан тушки учгача қаттиқ кўз-қулоқ бўлиб туришни тақозо этарди. Аммо у ишга берилиб кетиб, одатда, у ерда соат беш яримгача кум-тош бўлиб ўтиради. Бунга эҳтиёж бўлмагани сабабидан унинг ҳафтада икки марта уч яримдан беш ярим ёки олтигача бўлмаслиги ҳадеганда кўзга ташланавермасди. Эйлиннинг ҳар куни тўрт яримдан беш ё олтигача ёлгиз ўзи бир жуфт тўриқ йўргада сайр қилиши ёки отаси унинг учун Балтимордаги таникли аспжаллобдан сотиб олиб берган отда юриши одат тусига кирганди. Каупервуд ҳам кўпинча арава ва отда сайр қилгани боис уларнинг бир-бирига узоқ шахар ташқарисида, Уиссаҳикон дарёси бўйида ёки Скайкилд йўлида учрашув тайинлашлари қулай эди. Яқинда барпо этилган боғда мудроқ ўрмондагидан қолишмайдиган хилват бурчаклар бор эди. Тўғри, йўлкаларда ҳар доим танишибилишлардан битта-яримтасини учратиш мумкин эди, аммо ростга ўхшаган ёлғон баҳона топиш қийин эмасди! Дарвоқе, бунга ҳожат ҳам қолмасди: бундай тасодифий учрашув ҳеч кимда шубҳа уйғотмасди.

Бу ишқ достони аввалига ана шундай бошланди – ошиқона алжираш, ўзаро қасамёллар, жиддий, ҳал қилувчи қадам ҳақида лом-мим демаслик ва қўшимчасига яшил либосга бурканәётган дараҳтзор тагларида отда маза қилиб айланиш. Янги эҳтирос Каупервудда у шу пайтгача билмаган ҳаёт қувончини уйғотди. У Фронт-Стритга бориб, Лилианни кўриб юрганларида, ундан суюклироқ аёл йўқ эди дунёда ва ўшанду у ўзини беҳад баҳтиёр ҳисобларди, бироқ ўша вақтдан буён ўн ийлча вақт ўтган бўлиб, булар бари унутилиб кетганди. Никоҳдан кейин у ҳеч қанақа эҳтиросга берилмаган, ҳеч қанақангি узоқ алоқада бўлмаган эди, бирданига ҳе йўқ-бе йўқ ишбилармонлиқдаги ажойиб ютуқлар қуюни ичида – Эйлин, қалби ҳам, жисми ҳам ёш, эҳтиросли орзуларга тўла қиз пайдо бўлди! Фрэнк ҳар қадамда шуни кўриб турардики, шунчалик дали-гули бўлишига қарамай, йигит чарх уриб юрган ҳисоб-китобли ва багритош дунё ҳақида қиз ҳеч нарса билмайди. Отаси унга кўнгли хоҳлаган нарсани олиб берарди, онаси ва укалари, айниқса, онаси уни кўп эркалатарди, синглиси уни ер-кўкка ишонмасди. Эйлиннинг кўлидан бирон ёмон иш келиши мумкинлигини ҳеч ким хаёлига ҳам келтирмасди. Нима бўлгандা ҳам у ғоят ақлли ва ҳаётда ҳаммадан ўзиб кетиш иштиёқи билан тўлиб-тошганди. Модомики, олдинда баҳтли ҳаёт эшиги очилаётган ва тез орада уни ҳар жиҳатдан ўзига мосу хос ва ёқимли йигит билан аҳд-паймонли никоҳ кутаётган экан, тақиқ ҳақида ўлашига на ҳожат?

– Тurmушга чиққанингда, Эйлин, бизнинг ҳаётимиз бошқача бўлиб кетади, – дерди унга ҳар гал онаси. – Бутун уйни, албатта, таъмирлаб, қайта тиклаймиз, балки ундан олдинрок қилармиз буни. Мен ўзим Эддини тезлайман, истамаса, ўзим киришаман. Бу ёғидан хотиржам бўл.

– Шу ишларга ҳозирдан киришилса яхши бўларди, – жавоб берарди Эйлин.

Батлер одатдаги қўпол эркалатиш билан қизининг елкасига қоқиб қўярди-да:

– Хўш, топдингми уни? – деб сўрарди.

Ёки:

– Қалай, деразанг тагига келиб, ивиришиб юрмаяптими?

Агар қизи: “Йўқ”, – деб жавоб берса, чол бундай дерди:

– Парво қилма, топасан ҳали, куйинма, бундан баттарлари ҳам бўлади! Аммо сен билан ажрашишим осон бўлмайди, қизим! Ота уйида хоҳлаганча яшашинг мумкин, аммо эсингда бўлсин: ихтиёргинг ўзинг билан, ҳар дақиқада бизникига қайтиб келавер.

Эйлин унинг пичингларига эътибор қилмасди. У отасини севарди, аммо у айтган гаплар унинг меъдасига тегиб кетганди. Худонинг берган куни шу, гарчи бирдек ёқимли бўлса-да, бир-биридан фарқ қилмасди бу кунлар.

Аммо фусункор баҳор кунларида яшил либосга бурканәётган дараҳтлар

## ЖАҲОН АДАБИЁТИ

остида у нечоғли эҳтирос ила Каупервуднинг эркалашларидан маству мустағриқ бўлмасди! У йигитга ўзини бутунлай баҳшида этиш онлари яқин қолганини билмасди, зеро, ҳозир йигит уни фақат ширин сўзлар билан эркалаб, ўз муҳаббатини изҳор қилмоқда эди. Ҳар лаҳзада йигитни шубҳалар қамраб бораради. У ўзига эрк бергани сайин бу нарса унга табиийдек туюлмоқда эди, бироқ жўмардлигига бориб, барибири бир куни у Эйлинга уларнинг эҳтирослари нимага олиб бориши мумкинлигини рўйирост айтди. Қиз шунга розими? Нима қилаётганини у тушунадими? Дафъатанига Эйлин чўчиб тушди ва ўйланиб қолди. У ўзининг қора амазонкаси ва заррин соchlари узра наридан-бери суриб қўйилган шляпасида қалта хивчин билан оёғига урганча Фрэнкнинг олдида тураркан, унинг сўзлари ҳақида ўйларди. Нима қилаётганингни ўзинг биласанми, деб сўради йигит. Булар бари уларни нимага олиб боришини ўйлаяптими? Қиз уни чиндан ҳам севадими? Улар отларини қалин бутазорда, катта йўлдан ва шўхоқар анхордан йигирма қадамча нарида қолдиришди, қиз отлар яхши боғланганми, йўқлигини кўришга интилаётгандек бўлиб, энди Фрэнкнинг олдида турарди. Бироқ қизнинг кўзлари отда-ю, хаёли бошқа ёқларда эди. У Каупервуд ҳақида, костюм унга қанчалик ярашгани ҳақида ва бу дақиқалар нечоғли гўзаллиги ҳақида ўйлар эди. Унинг чавқар оти нақадар ажойиб-а! Яқинда кулоқ очган япроқ уларнинг бошлари узра ҳарир яшиллик билан чирмашиб кетган. Чор атроф ўрмон эди, аммо у иккаласига гўё яшил тангачалар қадаб тикилган парда ортидан кўриниб тургандек эди. Кулранг тишларни аллақачон юпқа тўс қоплай бошлабди, бурилиб оқаётган ариқ тинимсиз шалдирарди, дараҳтларда илк баҳор күшлари чуғур-чуғур қиласарди.

– Азизим, – деди Каупервуд, – нималар бўлаётганини биласанми ўзи? Мен билан учрашиб нима қилаётганингни ҳеч ўйлаб кўрдингми?

– Ҳа десам ҳам бўлади!

Қиз оёғига хивчин билан уриб қўйди-да, ерга қаради, кейин кўзларини кўтарди ва япроқлар орасидан мовий осмонга қарай бошлади.

– Менга қара, жонгинам!

– Қарамайман!

– Қара деяпман сенга, кабутарим, сенга бир гап айтмоқчиман!

– Мени қийнама, Фрэнк! Қарай олмайман.

– Йўқ, қарайсан, қарашинг керак!

– Йўқ дедим-ку, йўқ!

Йигит унинг қўлларини ўз қўлларига олди, қиз ортга чекинди, бироқ ўша заҳоти яна унга яқин келди.

– Қани, энди кўзларимга қара-чи.

– Йўқ, қарай олмайман!

– Қара дедим, Эйлин!

– Йўқ, кўлимдан келмайди! Мени тинч қўй! Нима сўрасанг, ҳамма саволингга жавоб бераман, аммо ўзингга қарашга мажбур қилма мени.

Фрэнк аста унинг юзидан силади. Кейин қўлини қизнинг елкасига қўйди ва қиз унга бошини эгди.

– Қувончим менинг, қандай гўзалсан! – деди йигит ниҳоят. – Сендан воз кечишига кучим етмайди. Нима қилишим лозимлигини билардим, сен ҳам, эҳтимол, биларсан. Аммо мен иложисизман! Сен менини бўлишинг керак. Барибири ҳам, агар буни билиб қолишса, икковимизга ҳам яхши бўлмайди. Сен гапимни тушуняпсанми?

– Ҳа.

– Укаларинг билан таниш эмасман, лекин кўринишларидан чакки одамларга ўхшамайди. Улар сени жуда яхши кўришади.

– Кўрганда қандоқ!

Фрэнкнинг сўнгти сўзлари қизнинг хиёл иззат- нафсига тегиб кетди.

– Бу ерда нима бўлаётганини билиб қолишсами, менинг қуним битди дея-

## ЖАҲОН АДАБИЁТИ

вер. Нима деб ўйлайсан, агар улар билиб қолишиса, нима қилган... хуллас, агар бориб-бориб бир нима бўлиб қолса?

Кизнинг нафис юзига тикилганча Фрэнк жимиб қолди.

— Лекин ҳеч нарса бўлмайди! Фақат жудаям ҳаддан ошиб кетмаслигимиз керак.

— Эйлин!

— Сенга қарамайман дедимми, қарамайман! Овора бўлмай кўя қол! Ундай қилолмайман.

— Эйлин! Жиддий гапирайсанми?

— Билмайман. Мендан ҳеч нарса сўрама, Фрэнк!

— Наҳотки шу билан тўхтатиб кўя қолмаслигимизни тушунмасанг? Йўқ, сен тушуниб турибсан! Бу охири эмас. Агар борди-ю...

Бир текис, хотиржам оҳангда йигит унга тақиқланган учрашувлар йўсинини тушунтира бошлади.

— Ишимиз тескари кетиб, сиримиз фош бўлганда ҳам сен қўрқмасанг бўлаверади. Ҳар нарса бўлиши мумкин. Шунда, албатта, бизга яхши бўлмайди. Миссис Каупервуд ҳеч қачон ажрашишимизга розилик билдиримайди – икки дунёда ҳам! Борди-ю, ҳаммаси мен ўйлагандай кетса, борди-ю, бир миллион доллар ишлаб тополсам, мен ҳозироқ ҳамма ишимни йиғиштириб қўйган бўлардим. Бир умр ишлаш ниятим йўқ зинҳор. Ҳар доим ўттиз беш ёшимда ҳаммасига нукта кўйишни ўйлаб келганман. Бу вактга келиб, бисотимда тузуккина пул бўлади. Кейин саёҳат қилишни бошлайман. Бироқ яна бир неча йил сабр қилишимга тўғри келади. Агар сен эркин бўлганингда... агар ота-онангтирик бўлмаганида (шуниси қизиқки, бу кинояли шамаларни эшлитиб туриб ҳам Эйлин пинагини бўзмади), бошқа гап эди.

Фрэнк жимиб қолди. Эйлин ҳамон оёғи остидан шалдираб оқаётган ариққа ўйчан тикилиб турарди, хаёли эса узокларда – денгизда, улар иккаласини қирғоқ томон олиб кетаётган яхтада эди, қирғоқда эса қандайдир номаълум сарой қад кўтариб турибди, унда Эйлин ва Фрэнкдан бошқа ҳеч ким бўлмайди. Унинг ярим юмуқ кўзлари олдидан мана шу баҳтли дунё сузиб ўтмоқда эди; худди сеҳрлангандай, у Каупервуднинг сўзларини зеҳнига жойларди.

— Ўлай агар, бошқа йўлни кўрмаяпман! Аммо мен севаман! – У қизни ўзига қаратди. – Мен сени севаман, севаман!

— Ҳа, ҳа! – ҳаяжондан титраб жавоб берарди Эйлин. – Мен ҳам сени севаман! Мен ҳеч кимдан қўрқмайман.

— Ўнинчи кўчада уй ижара олдим, – деди йигит сукунти бузиб, улар эгарга ўтиришганда. – У ҳали жиҳозланмаган, аммо гап бунда эмас. Мен бир хотинни мўлжаллаб қўйганман, уйга қараб туради.

– Ким экан у?

– Галати бева хотин, эллик ёшларда. Ақсли, жуда ёқимли, кўпни қўрган. Мен уни эълондан топдим. Ҳаммаси тахт бўлгандан кейин унинг олдига борасанда, шу уйни кўрасан. У билан кўп илакишиб қолишингга тўғри келмайди. Гоҳ-гоҳда, розимисан?

Ийитнинг саволига жавоб бермай, Эйлин хаёлга толганча кетиб борарди. Ишнинг кўзини билади, ўз мақсади сари оғишмай ҳаракат қиласади!

– Борасанми? Ҳеч нарсадан хавотир олма. У билан бемалол танишишинг мумкин. Унга тўла ишонса бўлади. Борасанми унинг олдига, Эйлин?

– Ҳаммаси тайёр бўлгандан кейин айтарсан, – деди қиз охири.

## XXI БОБ

Эҳтирос инжиқликари! Ҳийла-найранглар! Густохликлар! Ишқ меҳробига қилинган қурбонликлар!

Жудаям кўп вақт ўтмади, Каупервуд айтган, ишқий сирни пинҳон тутишга

**ЖАҲОН АДАБИЁТИ**

мўлжалланган бошпана тайёр бўлган эди. Уйга афтидан яқинда оғир жудоликка учраган бир бева хотин қарап эди. Эйлин тез-тез у ерда бўла бошлади. Мана шундай вазиятда ва ана шундай ҳолатда уни маъшуғи ихтиёрига бутунлай баҳшида бўлишга унатиш катта меҳнат талаб этмасди, зеро, кизгинанинг бўронли, сўкир ҳиссиятга ортиқ қаршилик кўрсатишга мадори қолмаганди. Унинг гунохини қайсиdir даражада севги ювиб турарди ва ҳақиқатан ҳам унга ёруғ дунёда мана шу одамдан бошқа ҳеч ким керак эмас эди. Унинг барча ўйорзулари, унинг барча ҳис-туйгулари бир шу одамга қарашли эди. Унинг кўз олдида келажак манзаралари намоён бўла бошлади, ўшанда Эйлин ва Фрэнк қандайдир тарзда абадул-абад бир жон-бир танга айланади. Ўттиз беш ёшга тўлганида йигитнинг бисотидаги маблағ бир миллион доллар бўлганида миссис Каупервуд ўлмайди ёки Фрэнк хотинини ташлаб, Эйлиннинг олдига кетиб қолмайди, деб ким кафолат бера олади? Ҳаммаси бир амаллаб йўлга тушиб кетади. Табиатнинг ўзи унга шу одамни олдиндан ато этиб қўйган. Эйлин унга сўзсиз ишонади. Фрэнк, сенга ўзим қарайман ва сенга шамолни ҳам раво кўрмайман деганида, қиз унинг гаплари ростлигига қилча шубҳа қилмаганди. Эйлиннинг гунохига ўхшаган гуноҳ ҳакида руҳонийлар кўпинча зиёратгоҳларда эшитадилар.

Шуниси эътиборга сазоворки, насронийлар олами қандайдир мантикий найранг йўли билан шундай хulosага келган: аввалига анъанавий парвариш ва сўнгра никоҳ билан покланган муҳаббатдан бошқа муҳаббат – бекор. “Битта умр – битта муҳаббат! – насронийликнинг гояси ана шу ва у бутун дунёни мана шу тангу тор қафас ичига қамашга муттасил ҳаракат қилиб келади. Бундай тасаввур мажусийликка ёт эди. Қадимги дунёда талоқ учун қандайдир алоҳида сабабни қидириш керак эмас эди. Ибтидоий жамоа тузумида эса жинсларнинг қовушиши, афтидан, зурёд қолдириш учун зарур муддатнигина кўзда тутган. Энг янги замон оиласи, шубҳасиз, ўзаро майл ва яқинликка асосланади. Аммо бундан охир-окибатда у қадар баҳтли ва омадли бўлмаган ҳар қандай муҳаббатни қоралаш керак, деган маъно келиб чиқмайди. Ҳаётни қандайдир коидалар билан чегаралаб бўлмайди ва одамлар бунга зинҳор-базинҳор ҳаракат қилмасликлари керак. Бир умр толели аҳд-паймон қилиш ёр бўлган одамлар ўзларини қутласинлар ва ўз баҳтларига муносиб бўлишга ҳаракат қилсинлар. Тақдир бундай баҳт билан сарафroz этмаганлар эса, гарчи жамият уларни гаровга олингандар, деб эълон қилса-да, барибири ҳайриҳоҳлик кўрсатишга арзидилар. Бундан ташқари, мулоҳаза ва назарияларимизга боғлиқ бўлмаган холда табиатнинг асосий қонунлари ўз кучида қолаверади. Бир турдаги заралар бир-бирига қараб тортилаверади. Феъл-атвор ва мижоздаги ўзгаришлар ўзлари билан, албатта, ўзаро муносабатдаги ўзгаришларни ҳам олиб келади. Тўғри, баъзиларини ақидапарастлик ушлаб қолса, баъзиларини кўркув тўхтатиб қолади. Аммо ўзларида табиат овози баралла янграйдиган одамлар ҳам топилади ва улар учун на ақидапарастлик бор ва на кўркув. Жамият даҳшат ичида қўлларини осмонга кўтариади. Бироқ асрлар оша Елена, Мессалина, Дюбарри, Поападур, Ментенан ва Нелл Гвин сингари аёллар пайдо бўлади, улар эркак ва аёл ўртасидаги муносабатларда илгари йўл қўйилганига қараганда каттароқ хуррият томон олиб борувчи йўлни кўрсатадилар.

Каупервуд ва Эйлин бир-бирига ҳаддан ташқари қаттиқ илакишиб қолган эди. Эйлинни яқиндан билиб, Каупервуд шунга амин бўладики, у, биргалиқда яшаса, қолган умрини баҳтли қила оладиган ягона аёл. Эйлин қанчалик ёш, оққўнгил, умидларга тўла бўлса, шунчалик жасоратли ҳам эди. Улар биринчи марта бир-бирига интилган ондан буён ўтган шу ойларда Фрэнк уни хотини билан солиштиргани-солиштирган эди. Унинг хотини билан кечирган ҳаётидан коникмаётганлиги илгари элас-элас билинган бўлса, энди тобора яққолроқ кўзга ташланмоқда эди. Тўғри, фарзандлари ўша-ўша унга кувонч бағишлар ва уйи ҳам қулинг ўргулсин эди. Сўлғин, озғин Лилиан ҳамон

## ЖАҲОН АДАБИЁТИ

хуснини йўқотмаганди. Сўнгги йилларда озми-қўпми ундан мамнун эди, бироқ энди ундаги норозилик тўхтовсиз ортиб бормоқда эди. Унинг хотини Эйлинга сира ўхшамасди: Эйлиндаги тароват, кувноқлик, шарттакиликларга нисбатан нафратдан унда асар ҳам йўқ эди. Гарчи Каупервуд одатда фойт ройиш эр хисобланса-да, энди у бўлар-бўлмасга жаҳли чиқадиган бўлиб қолганди. Ҳаммаси Лилияннинг ташки кўринишига боғлиқ саволлардан бошланарди: ҳар куни ишлатиладиган “нима учун”лар аёлнинг дилини оғритмай ва жонига тегмай қолмайди. Нима учун у ўзига кўйлаги рангидаги лолагули шляпа олмаган? Нима учун у қўп вактини ташқарида эмас, ичкарида ўтказади? Унга очик ҳавода юриш фойдали бўлиши мумкин, нима учун у ё унисини, ё бунисини қилмайди? Эри ўзининг хулқ-атворини яхши биларди, деб бўлмасди-ю, бироқ Лилиан ҳаммасини кўриб турарди, бу саволларнинг тагида не маънолар ётганини фаҳмлаб, дили оғрир эди.

– Нега ҳадеб менга “нима учун”, “нима сабабдан” деб савол бераверасан? – сўради бир куни у хафа бўлиб. – Бу одатни қаердан ортдирдинг? Сен мени олдингидай севмай кўйгансан, бор гап шу, мен буни жуда яхши биламан.

Хотинининг бирдан аланг олишидан ҳайрон бўлиб, Каупервуд ўзини курси суюнчиғига ташлади. Бунга сабаб, афтидан, Эйлин ҳақидаги гаплар эмас, балки унинг навбатдаги танбеҳи эди; аммо ҳақиқатдан ҳам шундайлигига ўзи ишонмаётганди. Лилияннинг тоқатини тоқ қилиб юборганидан хиёл виждони азбланиб, хотинидан кечирим сўради.

– Майли, кўявер! – жавоб берди хотини. – Менга заррача таъсири қилгани йўқ. Аммо энди мендан совий бошлаганингни билиб турибман. Сенинг доим ишларинг бошингдан ошиб-тошиб ётади! Бир лаҳза бўлсин, иш ҳақида ўйламай туролмайсан.

Каупервуд енгил нафас олди. Ҳайрият, хотини ҳеч нарсани сезмабди!

Эйлин билан апоқ-чапоқ бўла боргани сайин у хотиним хиёнатимни сезиб қолмадимикан, деган фикрдан камроқ чўчидиган бўлиб қолганди. Гоҳо юзага келган ахвол-оқибати нималарга олиб келиши мумкинлигини хаёлида чўтга соларкан, у балки шундай бўлгани ҳам яхшидир, деган хulosага келарди. Лилиан ўз ҳукуки учун жон олиб-жон бериб курашадиган шаддод хотинлар тоифасидан эмасди. Унинг феълини билганидан, Фрэнк гоҳо хотинини улар оиласиб ҳаётидаги узилишга бошида хавфсираганидек, қаттиқ қаршилик кўрсатмаса керак, деб ўйларди. Аввал у ажрашаман дейиши ҳам истисно эмасди. Эҳтирос ва бахтга ташналиқ уни одатдагидек одамларча мулоҳаза юритгани ҳам кўймаётганди.

Йўқ, дерди у ўзига ўзи, энди ҳамма гап унинг эмас, Батлерларнинг оиласида қолган. Эдвард Мэлия Батлер билан унинг ўртасида фойт мустаҳкам сармоядорлик алоқаси ўрнатилган. Каупервуд билан маслаҳатлашмай қария ўзи эгаси бўлган кўпсонли қимматбаҳо қоғозлар билан биронта ҳам битим тузмасди. Батлер Пенсильвания кўмир компанияси, “Делавер Гудзон” канали, “Морис-Эссекс” канали ва Ридинг темир йўли каби корхоналарнинг байчиси эди. Филадельфия темир йўллари касб этган аҳамиятни англаб, у ундаги мавжуд қимматли қоғозни иложи борича фойдаси билан сотишга ва шу тарика тўплланган маблағни маҳаллий изларга сарфлашга қарор қилди. Молленхауэр ва Симпсон ҳам шундай қилишаётганидан у бехабар эди, маҳаллий ишларни шулардан бошқа ким ҳам яхши тушунарди? Каупервуд каби у конкали темир йўллар акцияларининг катта миқдорини ўзида жамлаб, у пировардида лоақал Молленхауэр ва Симпсон билан ҳамкорлик қилишга эришаман, деб ўйлаганди. Ўшанда тегишли идоралар орқали бирлашган темир йўллар учун фойдали конунларни ишга солиш қийин бўлмайди. Улар янги излар ётқизиш ва куриб бўлингандарни давом этдиришга рухсат оладилар. Батлернинг қимматли қоғозлари билан муомаласи, шунингдек, шаҳар конкали темир йўллар акцияларининг тасодифий боғламларини сотиб олиш айнан Каупервуд вазифасига

кирар эди. Ўғиллари Оуэн ва Кэлем орқали Батлер ўша вақтда аллақачон янги излар ётқизиш ва бунинг учун зарурый рухсат бериш устида жон күйдирмоқда эди; қонунчилик йиғилишининг унга керакли резолюциясини қабул қилишга эришишини истаб, у акциялар боғламлари ва нақд пулларни аямай тарқата бошлади. Лекин бу иш осон эмасди, чунки юзага келган ҳолатдан олиш мумкин бўлган фойда кўпларга, шу жумладан, Каупервудга кундай равшан эди; бу ерда катта пул ишлаш манбанин кўриб, у, албатта ўз фойдаси ғамини ерди, чунки у сотиб олган акциялардан факат бир қисмигина Батлер, Молленхауэр ва бошқа мижозлар кўлига тушганди. Бошқача айтганда, ўзидан кўра кўпроқ Батлер ёки бошқа биронтасига фойда келтиришга ҳаракат қиласади.

Жорж Стинернинг аслида панада қолишини истаган Стробик, Уайкрофт ва Хармон номидан унинг хузурига олиб келган таклифи Каупервудга жозибадор туюлгани сабаби шунда. Стинернинг режаси шундан иборат эдики, Каупервудга шаҳар ғазнасида йилига икки фоиз ҳисоб-китобидан ёки, агар у воситачиликлардан воз кечса, ҳатто бегараз (эҳтиёткорлик Стинердан воситачи орқали иш кўришни тақозо этарди) кредит очиб кўйисин. Бу пулларга Каупервуд Шимолий Пенсильвания компаниясидан Фронт-Стрит бўйлаб ўтувчи, катта даромад келтирмайдиган ва унча катта бўлмаган масофа – бир ярим миль – туфайли унча юқори баҳоланмайдиган, шунингдек, ундан фойдаланишга берилган рухсатнинг қиска муддатлиги сабабли конка изини сотиб олиши керак эди. Товон сифатида ишни моҳирлик билан бажаргани учун Каупервуд анча мўмай наф олар эди – барча акцияларнинг йигирма фоизи. Стробик ва Уайкрофт назорат боғламини сотиб олиш мумкин бўлган жойда факат шошилинч ҳаракат қилиш кераклигини билишарди. Шундан кейин бу режа қуидагиларни кўзда тутар эди: шаҳар ғазнасидан олинган пуллардан лицензияни узайтириш ва изнинг ўзини давом этдириш учун фойдаланилади; кейин ўз банкларидан бирига кўйиладиган акцияларнинг катта боғлами чиқарилади: шу тариқа бирмунча муддатдан кейин шаҳар унда банд бўлган маблагни қайтариб олади, улар эса из келтирган фойдан чўнтакка урадилар. Агар акцияларнинг афери барча иштирокчилар ўртасида хомталаш бўлиб кетишини ҳисобга олмаса, Каупервуд учун бу режа озми-кўп даражада маъқул келарди ва барча югар-югурулари-ю, тўккан терлари учун унга нисбатан кичик улушгина тегар эди.

Аммо Каупервуд оғзидағи ошни олдириб кўядиган анойилардан эмасди. Бу вактга келиб эса унда алоҳида ишбилармонлик ахлоқи, сармоядорлик ахлоқи пишиб етилмоқда эди. У агар юлғиҷликнинг ёки пул ишлашнинг бундай йўли ўғирлик деб аталадиган бўлсагина, ўғирликка йўл қўйиб бўлмайди деб ҳисоблар эди. Бу нооқилона, хатарли, бинобарин – аҳмоқона йўл эди. Пулларни кўлга киритиш ёки пул ишлаб топиш шубҳа ва ҳақоратларга сабаб бўлиши мумкин эди. Каупервуднинг тасаввурида одоб сал бўлмаса иқлимга боғлиқ равишда вазият туфайли ўз кўринишини ўзгартиради. Филадельфияда қейинчалик ғазнага қайтариш шарти билан шаҳар пулларидан ғазначи беғараз фойдалана оладиган анъана илдиз отганди (албатта, маҳаллий сиёсатчилар доирасида, бутун шаҳар аҳолиси доирасида эмас). Ғазна ва ғазначи бу ерда асалга тўла инни ва атрофида пул ортириш илинжида эркак асаларилар, яъни аферистлар ва сиёсий арбоблар айланиб юрган она асаларига ўхшарди. Стинер билан тузилган битимнинг бирдан-бир ноҳуш томони шунда эдики, на Батлер, на Молленхауэр, на Симпсон, яъни Стинер ва Стробикнинг ҳақиқий бошлиғи бу битим ҳақида ҳеч нарса билмас эдилар. Стинернинг ўзи, шунингдек, унинг ортида турган шахслар ўзларининг шахсий манфатларида Каупервуд орқали ҳаракат қиласади. Бундан дарак топган ёруғ дунё буюклари дарғазаб бўлишлари мумкин. Борди-ю, у Стинер билан ёки маҳаллий соҳалардан бошқа биронтаси билан бундай фойдали ишлар олиб боришдан бош тортгудек бўлса, у факат ўзига- ўзи зарар келтиради, зеро,

## ЖАҲОН АДАБИЁТИ

уни дарҳол бошқа банкир ёки маклер билан алмаштиришади. Бундан ташқари эса Батлер, Молленхауэр ва Симпсон бунинг ҳидини олишади, деб тахмин қилишга ҳеч қандай асос йўқ эди.

Шу ерда яна шуни айтиш жоизки, тасодифан Ўн еттинчи ва Ўн тўққизинчи кўчаларнинг конка изидан ўтиб қолган Каупервуд уни ғоят мафтункор иншоот деб ҳисоблади, факат зарурй маблағ топилса бас. Аввалига бу изнинг нархи, эълон қилинганидек, беш минг доллар эди, бироқ кейинроқ, уни қайта жихозлаш мақсадида икки юз эллик минг долларга акцияларнинг кўшимча туркумлари чиқарилган эди ва энди компания фоизларни тўлашда жиддий қийинчилкларни бошдан кечирмоқда эди. Акцияларнинг катта қисми майда эгалар орасида хомталаш бўлиб кетганди ва назорат боғламини эгаллаш ҳамда бошқарув раиси бўлиб сайланиш учун барибир Каупервудга камида икки юз эллик минг доллар талаб этиларди. Лекин бу изга қўл уриб, у акцияларни бутунлайича ўз ихтиёри билан тасарруф эта оларди, масалан, уларни олиши мумкин бўлган жуда катта миқдордаги пулга вақтингча отасининг банкига қўя олар, кейин янги акциялар чиқара олар, улар ёрдамида маҳаллий қонунчилик йиғилиши аъзоларини сотиб ола олар ва шу тариқа ё янги омадли харидлар воситасида, ёки бошқа компаниялар билан битим тузиш йўли билан ишни кенгайтира оларди. “Сотиб олиш” ибораси бу ўринда ишбилармонлик соф америкача маънода қўлланмоқда, зоро, штат қонун чиқарувчи йиғилиши тўғрисидаги тушунчани “пора” сўзи билан чатиштириб юбормайдиган одамнинг ўзи йўқ эди. Гаррисбергдаги сармоядорлар доиралари вакили Тэрисис Рэлихон паст бўйли, қораҷадан келган ирландиялик бўлиб, башанг кийимларию назокатли ҳаракатлари билан гердайиб юради, – бир вақтлар у беш миллион долларлик заёмни жойлаштириш ҳақидаги иш бўйича Каупервуднинг олдига келганди, шу одам штат пойттахтида пулсиз ёки пул эквивалентисиз, яъни қимматли қофозларсиз ҳеч нарсага эришиб бўлмайди деб ишонтирганди. Овозини олиш ёки қўллаб-қувватлашига эришиш учун қонунчилик йиғилишининг ҳар бир кўп ёки оз даражадаги обрўли аъзосининг “томогини ёғлаш” керак бўлади. Ирландиялик шу нарсага ишора қилдики, борди-ю, Каупервуд бирон ҳийла ишлатишга мажбур бўлиб қолса, Рэлихен у билан гап сотишдан хурсанд бўлади. Каупервуд Ўн еттинчи ва Ўн тўққизинчи кўчаларнинг конка изини сотиб олиш режасини қайта-қайта ўйлаб кўрган бўлсада, аммо бу ишга узил-кесил киришишга ботинаолмаётганди. Унинг кўплаб бошқа имкониятлари йўқ эмас эди, аммо васваса кучли эди, у тинимсиз мана шу масала устида бош қотиради.

Шимолий Пенсильвания изи билан боғлиқ ишлар учун Стинер таклиф қилган кредит Ўн еттинчи ва Ўн тўққизинчи кўчалардаги из билан боғлиқ найрангни янада рўёблироқ қиласр эди. Каупервуд бу вақтда шаҳар ғазнаси манфаатларини кўзлаб шаҳар заёми облигациялари қийматини муттасил кузатиб борарди: биржада қиймати тушиб кета бошлаган йирик боғламлар, уларни харид қиласр ва қиймати кўтарила бошлагани ҳамон жуда эҳтиёткорлик билан уларни сотар эди. Бу барча амаллар учун унга ўз бисотида озмунча нақд пул бўлиши зарур бўлмасди. У ҳар доим ишқилиб биржада касодгарчилик бўлмасин-да, деб хавотирланарди, зоро, бу ундаги барча мавжуд бойликларнинг инқизозига олиб келган бўлурди ва, устига-устақ, ундан яна қарзларни қоплаш ҳам талаб этиларди. Тўғри, ўшанда ҳеч қандай бўрон кўринмаётганди, Каупервуд ҳалокатдан омон қолишга умид боғларди, аммо барибир ўз маблағларини бекорга совурмоқчи эмасди. Энди кўп нарсалар ўзгариб кетганди. Борди-ю, у шаҳар маблағларидан бир юз эллик минг доллар олиб, уни Ўн еттинчи ва Ўн тўққизинчи изларга сарфласа, бу унинг маблағни совуришини англатмасди, зоро, Стинернинг янги таклифи унинг бошқа ишларни юргизиш учун катта кредитларни деб хазинабонга мурожаат қилишишга имкон түғдиради. Бироқ, борди-ю, бирон касофат юз берса-чи?... Начора, бошга тушганини кўз кўрап дейдилар-ку!

## ЖАҲОН АДАБИЁТИ

— Фрэнк, — деди бир куни Стинер (улар аллақачондан бери бир-бирининг отини айтиб чакирадиган бўлишганди), унинг олдига соат тўртдан кейин кирганида — бу вактда идорада иш куни тугай деб қолган бўларди, — Стробикнинг айтишича, Шимолий Пенсиљвания изи иши деярли тайёрлаб қўйилган ва биз ишга киришаверсак бўлади. Биз акцияларнинг назорат боғлами Колтон деган одамнинг кўлида эканини аниқладик. Айка Колтон эмас, балки Фердинанд Колтон. Қизиқ исми шариф, шундай эмасми?

Семириб қолган Стинер оккўнгиллик билан мийифида жилмайиб қўйди. У тасодифан шаҳар хазинабони бўлиб қолганидан бўён унинг ҳаётида катта ўзгаришлар содир бўлди. Бу лавозимга ишга ўтиб, у яхши кийина бошлади ва унинг бутун борлигидан шунчалик олийжаноблик, шунчалик ўзига ишонч ёғилар эдики, агар ўзига ташқаридан қараганда борми, у, ҳойнаҳоӣ, янги либосида ўзини таниёлмаган бўларди. Унинг митти кўзлари ўйноклашдан тўхтаганди, доимий хурсандлик ўрнини бегам хотиржамлик эгаллаганди. Йўгон оёғига у энг юмшоқ чарм туфли кийиб олганди; тўла гавдаси ва сержир сонлари аъло сифатда тикилган кулранг-жигарранг костюми тагидан лорсиллаб турарди; учли оқ ёқа ва жигарранг галстук унга алоҳида зеб бағишларди. Залворли тилла занжир ялтираб турган дум-думалоқ корни узра кенг кўкраги уни янада барваста кўрсатарди, оппок енг учидай ийрик ёқут кўзли катта-катта тилла тўғноғич ялт-юлт қиласарди. Унинг аъзойи бадани қандайдир қизғиши ва семиз эди. Қисқача қилиб айтганда, турмушнинг хузур-ҳаловатини кўриб яшаётган одам экани яққол кўриниб турарди.

Тўққизинчи кўчадаги икки қаватли ёғоч уйдан у оиласи билан Спринг-Гарден-стритдаги анча кенг тош уйга кўчиб ўтди. Унинг хотини бошқа маҳаллий сиёсатчиларнинг хотинлари билан танишиб олганди. Болалари ўрта мактабда ўқир эдилар, бу бир вактлар унинг учун ушалмас орзу эди. Энди шаҳарнинг турли қисмларида унинг ўн тўртта ё ўн бешта арzon томорқалари бор бўлиб, улар вақти келиб қимматли кўчмас мулк бўлиб колиши аниқ эди. Жанубий Филадельфия металлургия жамияти ва “Америка мол ва чўчқа гўштлари” компаниясининг овоза қилинмаган хиссадори ҳам эди — фақат қофоздагина мавжуд бу икки муассасанинг бутун фаолияти шундан иборат эдики, улар шаҳардан пудратлар олиб, уларни ортиқча савол бермай, буйруқларини лаббай деб бажарадиган қувиш устахоналари ва гўшт дўконларининг камсуқум эгаларига ишониб топширап эдилар.

— Ҳа, ғалати исм экан, — унинг гапига қўшилди Каупервуд. — Хўш, демак, у акциялар эгаси денг? Мен ҳар доим бу из ўзини қопламаса керак, деб ўйлардим: у ҳаддан ташқари қисқа. Уни Кенсингтон маҳалласи томонга учмиль давом этдириш керак бўлади.

— Мутлақо тўғри, — маъкуллади Стинер.

— Колтон акциялари учун қанча сўрганини Стробик сизга айтмадими?

— Олтмиш саккиз доллардан бўлса кераг-ов.

— Яъни, жорий қиймати бўйича. Нима ҳам дердик, унинг иштаҳаси чакки эмас-а? Бу нарх билан, Жорж, ҳозир айтаман, — у хаёлан Колтоннинг кўлидаги акциялар қийматини хомчўт қилиб чиқди, — фақат унинг боғлами учун бир юз йигирма минг доллар атрофида. Бу ҳали ҳаммаси эмас. Яна ҳакам Китчен бор, Жозеф Зиммермен бор, сенатор Доновэн ҳам бор. — Каупервуд Пенсиљвания сенати аъзосини назарда тутаётганди. — Умуман, бу иш сизга арзонга тушмайди. Яна изни ўзлаштиришга қанча сарфлаш керак бўлади! Менимча, бу ҳаддан ташқари кўп зарар келтиради!

Каупервуд бу изни Ўн еттинчи ва Ўн тўққизинчи кўчаларнинг восвосли изи билан қўшиб юбориш хамирдан кил сүфургандек осон иш экани ҳакида ўйлади ва бирпас сукут сақлаб сўради:

— Айтинг-чи, Жорж, нега сиз барча усулларингизни Стробик, Уайкрофт ва Хармон орқали ўтказаяпсиз? Наҳотки яна бир қанча иштироқчиларни

**ЖАҲОН АДАБИЁТИ**

жалб этмай, бу ишни иккаламиз эплай олмасак? Менимча, бу сиз учун анча фойдали бўлар эди!

– Албатта, албатта! – деди Стинер ва унинг думалоқ кўзлари сухбатдошига қандайдир ночор мўлтайиб тикилди. Каупервуд унда яхши таассурот қолдирганди ва у ҳар доим у билан факат ишбилармон сифатида эмас, балки инсон сифатида яқинлашишини ният қиласр эди. – Мен бу ҳақда аллақачон ўйлай бошлаганман. Аммо улар, Фрэнк, мендан кўра бундай ишларда кўпроқ тажрибага эга, ахир улар бу билан қачондан бери шуғулланиб келишашапти. Мен эса ҳозирча буларни яхши билмайман.

Гарчи юзи ўша-ўша бефарқлигича қолаверган бўлса-да, Каупервуд ичидаги кулиб кўйди.

– Тушунтилинг уларга, Жорж! – давом этди у дўстона, сирли оҳангда. – Биз иккаламиз улар билганчалик биламиш ҳам, қиласр ҳам. Мана кўрасиз, бу ишни керак бўлса улардан ўтказиб уddeлаймиз. Мен нима деётганимни биламан. Жиллакурмаса сизни қизиқтираётган конкали усулни олинг. Биз иккаламиз уни Уайкрофт, Стробик ва Хармон иштирокидан яхшироқ ўтказамиз. Улар жудаям ақлли одамлар эмас. Пулни улар эмас, сиз киритасиз. Уларнинг иши мана шу бутун корхонани қонунчилик йигини ва муниципалитет орқали судраб борищдан иборат, холос. Шундай бўлса-да, қонунчилик йиғилишида улар ҳеч кимдан, масалан, мендан кўпроқ нарсага эриша олмайдилар. Ҳаммаси Рэлихон билан келишувга боғлиқ, бунга эса маълум миқдордаги пулни ассигнация қилиш керак, холос. Шаҳар кенгашига келганда эса, Филадельфияда бир Стробиккина у ерда кунда-шундалардан эмас.

Каупервуд биронта йўл устидан назоратни ўз қўлига олиб, Батлер билан музокаралар олиб боришга ва унинг ҳамкорлик қилишига умид боғлаган эди. Бу, ҳар ҳолда Стробик ва шерикларини тинчлантирган бўлар эди.

– Мен Шимолий Пенсильванияга нисбатан ниятларингизни ўзгартилинг деб айта олмайман. Бу, ҳар ҳолда, ноқулай бўлар эди. Аммо бошқа йўллари ҳам йўқ эмас-ку. Эҳтимол, келажакда биз сиз билан биргаликда қандайдир иш қилармиз! Бу сизга жуда фойдали бўлар эди, менга ҳам! Шаҳар заёмида биз ёмон ишлаб олмадик, буни сиз инкор этмасангиз керак.

Улар чиндан ҳам дурустгина ишлаб олган эдилар. “Юҳо”ларга теккан чўталлар ҳақида гапирмаганда ҳам Стинернинг ўзи янги уйи, ер майдони, банкдаги ҳисоби, яхши энгил-боши, олдингидан бошқа дунёкарашлари учун Каупервуднинг шаҳар заёми сертификатларини муваффакиятли айлантирганидан миннатдор бўлиши керак. Биз тасвирлаётган вақтга келиб, ҳар бири икки юз минг долларлик облигацияларнинг тўрут туркуми чиқариб бўлинган эди; Каупервуднинг бу облигациялар билан айланмаси тахминан уч миллион долларга етар эди, чунки у уларни гоҳ сотиб, гоҳ сотиб олиб, кўттар-тушир ўйинини ўйнарди – бу заём кийматига боғлиқ бўлар эди. Стинер энди жуда бўлмаганда бир юз эллик доллардан мингтасига эга эди.

– Мен шаҳарда битта изни биламан, уни озгина куч сарфлаб, ғоят даромадли изга айлантирса бўлади, – ўйчан давом этди Каупервуд. – У жудаям қиска, худди Пенсильвания изига ўхшаш, кичик бир худудга хизмат кўрсатади. Шу тариқа, биз бошқа кўплаб жойларда хизмат қиладиган идораларни таъминлашда тежаб қолган бўлардик. Қискаси, катта маблағ айланмасида ҳар доим фойда келтирадиган иш топиш мумкин.

У жимиб қолди ва келажак унга нималар ваъда қилаётгани ҳақида ўй сурар экан, ўзининг қўлинг ўргулсин қилиб жихозланган, лакка бўялган ёғоч қопламали кабинети деразасидан ташқарига қарай бошлади. Дераза илгари туар-жой бўлган, энди эса идора жойлашган бинонинг орқа ҳовлисига қараб очиларди. Ҳовлида унда-мунда ўсиб ётган сийрак майсалар кўзга ташланарди. Уйнинг қизил девори ва кўхна гишт тўсик нимаси биландир Каупервудга уларнинг Нью-Маркет-стритдаги тоғаси Сенека келиб турадиган уйни эслатарди.

## ЖАҲОН АДАБИЁТИ

Тоғасининг ёнида қора танли хизматкори ҳам бўларди. Деразага қарап экан, Каупервуд тоғасини худди олдида ўзи тургандек хис этарди.

– Биз икковимиз, – жиддий тусда деди Стинер, қармоқни чўқилаб, – шу изни қўлга олсак, нима бўлади? Молиявий жиҳатдан, ўйлайманки, мен бу амални таъминлар эдим. Сизнинг чўтингизда бизга қанча пул керак бўлади?

Каупервуд яна пинҳона жилмайиб қўйди.

– Ҳозир сизга анигини айтолмайман, – жавоб берди у, бироз сукут сақлаб. – Мен бу масалани миридан-сиригача ўрганишим керак. Ҳамма бало шундаки, мен бусиз ҳам шаҳар ғазнаси маблағларидан талай пул олиб қўйганман. Ўзингиз билгандек, бўйнимда шаҳар заёми муомалалари учун берилган икки юз минг доллар турибди. Бундай комбинация яна икки юз, уч юз минг долларни талаб этган бўлар эди. Агар ахвол мана бунақа бўлмаганида...

У англаб бўлмас биржа ваҳималари ҳақида, Америка учун хос бўлган, мамлакатдаги умумий аҳволдан кўра америкаликларнинг ўз феъл-атворлари билан боғлиқ жазавалар ҳақида ўйларди.

– Борди-ю, Шимолий Пенсильвания изи билан боғлиқ иш аллақачон битган бўлгандан эди...

У иягини артди ва сийрак, майн мўйловини силади.

– Мендан ортиқ суриштирманг, Жорж, – деди у охири, сухбатдошининг гап қайси из ҳақида кетаётгани устида бош қотираётганини кўриб, – Бирорвга чурқ этиб оғиз оча кўрманг! Мен аввало ҳаммасини яхшилаб текшираман, кейин эса сиз билан икковимиз гаплашамиз. Менимча, бу масала билан кейинроқ, Шимолий Пенсильвания изи билан иш ўнгланиб кетганда шуғулланганимиз тузук. Ҳозир шунақсанги ишларим кўпки, бош қашигани қўлим тегмайди. Ҳозирча оғиз очмай туринг, кейин бир гап бўлар...

У стол узра энгашди ва Стинер ўрнидан турди.

– Сиз ҳаракат қилиш вақти келди деб айтишинингиз билан, Фрэнк, мен сизга керакли миқдорда кредит очаман! – деди у, Каупервуднинг бу ишга киришишга унчалик хоҳиши йўклигидан, унинг, яъни Стинернинг қўллаб-қувватлаши ёки бошқа ҳар қандай фойдали ўйинни писанд этмаётганидан ҳайратда қолиб. Бу истеъдодли, чапдаст Каупервуд орқасидан иккаласи бойиб олса, нима қилибди?

– Сиз Стайерсни хабардор килиб қўйинг, у сизга чек келтириб беради. Биз имилламасдан ҳаракат қилишимиз кераклигини Стробик кўриб қўйсин.

– Бу ишга киришаман, Жорж, – ишонтириб деди Каупервуд. – Ҳаммаси жойида бўлади. Менга ишонаверинг.

Шимини тўғрилаб, Стинер йўғон оёқларини ўйнатди ва Каупервудга қўлини узатди. Янги фикр устида чуқур ўйга толганча у кўчага чиқди. Агар Каупервуд билан риссоладагидай тил топиша олса, бойлик унинг чўнтағида эканига шубҳа йўқ: бу одам омадлилар ичида мингтадан биттаси ва олий даражада эҳтиёткор. Унинг янги уйи, ажойиб идораси, ортиб бораётган обрўси ва у Батлер ва бошқалар билан биргаликда ҳаётга татбиқ этган оқилона режала-ри – барча-барчаси Стинерга чинакамига хузур бағишлиамокда эди. Кўнкали темир йўлнинг яна бир изи! Улар бунга ҳам, Шимолий Пенсильвания изига ҳам эгалик қиласидилар! Агар иш шундай кетаверса, у, Жорж Стинер, ҳаёт суғуртаси ва кўчмас мулк савдоси бўйича аянчли агент магнатга айланади, ха, ха, хақиқий магнат бўлади! Шундай орзуларга кўмилганча у фуқаролик бурчи ва ижтимоий ахлоқ деган тушунчалар ҳам борлигини унугиб, қўчадан кетиб борарди.

## XXII БОБ

Кейинги бир ярим йил ичида Каупервуд Стинерга, Стробикка, Батлерга, штат хазинабони Ван-Нострендга, Пенсильвания сенати аъзоси. Гаррисбергдаги “сармоядорлар давраси вакили” деб айтилган Рэлихенга ва бу жаноблар

**ЖАҲОН АДАБИЁТИ**

дўстона муносабатлар ўрнатган турли банкларга кўплаб хуфиявий хизматлар кўрсатди. Стинер, Стробик, Уайкрофт, Хармон ва албатта, унинг ўзининг манфаатлари йўлида у Шимолий Пенсильвания ишини бароридан келтириди, шундан кейин шу йўл барча акцияларининг бешинчи қисми эгасига айланди. Стинер билан биргаликда у Ўн еттинчи ва Ўн тўққизинчи кўчалар конкали изларнинг акцияларини сотиб олди ва яна бай ҳисобидан у билан фонд биржасида ўйин бошлаб юборди.

1871 йил ёзида, Каупервуд ўттиз тўртларга кирганда унинг банкирлик идораси икки миллион долларга баҳоланар эди, шундан сал бўлмаса яrim миллион унга тегишли эди ва унинг олдида очилаётган истиқболга қараб мулоҳаза қилинса, у тез орада ҳар қандай америка боёни билан рақобат қила олар эди. Уз хазинабони Стинер тимсолида шаҳар беш юз минг долларга яқин миқдорда унинг қўювчиси эди. Ўз хазинабони Ван-Ностренд тимсолида штат унга икки юз минг долларни ишониб топшириб қўйганди. Боуд эллик минг долларга конкали темир йўллар акцияларини харид қилганди. Рэлихен ҳам худди шунча миқдорда харид қилганди. Сиёсий арбоблар ва улар гумаштларининг бутун бир галаси унда ўз пулларини саклар эдилар. Эдвард Мэлия Батлернинг онкол ҳисоби бир юз эллик минг долларга етганди. Каупервуднинг турли банкларга унинг бойликларидан қайсилари гаровда эканлигига боғлиқ бўлган қарзи етти юздан саккиз юз минг доллар ўргасида тебраниб туарди. Кумушранг тўр ичидаги ўргимчакка ўхшаб, унинг ҳар бир ипини ўзи эшиб, ўзи йигирган эди. Ажойиб ишибилармонлик алоқалари тармоқларининг қоқ марказида туаркан, Каупервуд атрофида содир бўлаётган барча воқеаларни зийраклик билан кузатар эди.

Унинг ҳаммадан кўра кўпроқ иштиёқ билан берилган эзгу иши конкали темир йўллар, биринчи галда Ўн еттинчи ва Ўн тўққизинчи кўчалардаги излар акцияларини айлантириш бўлиб, улар устидан ўрнатилган назорат аслида унинг қўлида эди. Стинер Каупервуднинг банкирлик идорасига очган бўнакли кредит шарофати билан шу излар акциялари айниқса паст баҳоланаётган вақтда у ўзи ва Стинер учун барча акцияларнинг эллик бир фоизини сотиб олишга муваффак бўлди ва энди йўлдан ўз билгича фойдаланаверса бўларди. Бунинг учун у фоят “ўзига хос” усулларга мурожаат қилишига тўғри келди, уларни сармоядорлар орасида ана шундай аташарди, бироқ у акцияларни унинг ўзи белгилаган нархлар бўйича сотиб олди. Аввалига у агентлари орқали компанияга қатор даъволар билан чиқди, гўё унга тегишли фоизлар тўланмаганидан юзага келган заарни тўлашни талаб қилди. Ўзини бошқа киши қилиб кўрсатган одамнинг қўлидаги унча катта бўлмаган боғлам, тафтишни белгилаш тўғрисида суд олдида расмий илтимоснома билан нутқ қилиш, тафтишнинг компания ишлари бўйича ҳомий таъсис этиш керакми ёки йўқлигини белгилаши, бу компания акциялари қийматдан уч, беш, етти ва ўн банд қуйини таклиф эта бошлаган биржада ҳар тарафдан бирданига хужум бошлаш – бу барча амаллар йиғилиб, юраклари ёрилган хиссадорларни ўз қоғозларини бозорга ташлашга мажбур қилганди. Банклар шундай тўхтамга келишди, конканинг бу изи фоят таваккалли иш ва шу боис компаниядан қарзни узишни талаб қилганлар. Ота Каупервуд ишлаган банк ўз вақтида йўлнинг асосий хиссадорларидан бирига қарз берган эди ва ҳозир ҳам у пулни қайтаришни талаб қиларди. Кейин – яна ўша ўзини бошқа киши қилиб кўрсатган шахс орқали – энг йирик хиссадорлар билан музокаралар бошлаб юборганди: гўё, юзига кирқ доллар ҳисобидан ўз акцияларини сотиб, юзага келган ахволдан кутулиб чиқиш имкони берилар эмиш. Уларда бу барча фалокатлар қаердан ёғилаётганини аниқлашнинг сира иложи йўқлиги сабаб, гарчи бунда заррача ҳақиқат бўлмаса-да, улар йўл ташландиқ ҳолда ётиби деб тасаввур қилишган. Ундан кутилган авло! Каупервуд ва Стинерда пуллар таҳт эди ва улар акцияларнинг эллик бир фоизи эгаси бўлиб олишганди. Бироқ Шимолий Пенсильвания изи ишидаги каби

Каупервуд майда акционерлардан сотиб олиш мумкин бўлган ҳамма нарсани енг ичидаги сотиб олгани боис акционерларнинг эллик бир фоизига тенг назорат боғлами амалда унинг кўлида бўлиб қолди, Стинер эса яна йигирма беш фоиз сохиби хисобланарди.

Бу Каупервудга наша қилди, зеро, у энди ўзининг бир пайтдаги орзузи ушалиши учун имкон пайдо бўлганини кўрди, айнан: бу изни Шимолий Пенсильвания изи билан кўшиб юбориб, шу йўлни қайта ташкил этиш, ҳар бир эски йўлга учтадан акция чиқариш, назорат боғламидан ташқари уларнинг барчасини сотиши, кейин тўплантган пуллар ёрдамида конкали Темир йўлларнинг бошқа компанияларига байчи бўлиб кириш, янги сотиб олинган қоғозлар нархини ошириш ва пировардида уларни шу шиширилган нархларда сотиши. Қисқача қилиб айтганда, Каупервуд кейинчалик бошқа, америка хўжалигининг янада муҳимроқ соҳаларини ўз кўлига олган ва ўзлари бойиб олиш мақсадида охир-оқибат уни ўзига бутунлай буйсундиролган дастлабки дангалчи олиб-сотарлардан бири эди.

Бир қанча изларнинг бу биринчи кўшилишига келганда, Каупервуднинг режаси кўйидагилардан иборат эди: икки компаниянинг бундан кейинги кўшилиши хақида миши-миши тарқатиш, қонун чиқарувчи органларда изларни давом эттиришга рухсат олиш учун югур-югурлар килиш, жозибадор реклама проспектлари, кейинрок эса йиллик ҳисоботлар чоп этиш, ва натижада ҳар куни тобора ортиб бораётган захиралари унга имкон берар даражада фонд биржасидаги акциялар нархини кўтариб юбориш. Бу ишларнинг қийинчилиги шундан иборат эдики, акцияларнинг шундай катта қисмини тарқатиш ва сотишига (ярим миллиондан ортиқроқ микдорга) имкон берувчи шароитлар яратиш учун, боз устига бу акцияларнинг ярим миллионини ўзида қолдириш нияти билан ҳаддан ташқари катта микдордаги маблағга эга бўлиш зарур эди. Бундай ҳолларда биржада сохта харидларни амалга ошириш, бу билан сохта талаб келтириб чиқариш етарли эмасди. Акциялар нархларини бундай сунъий тарзда кўтариб-туширишлар оммани адаштиради ва акцияларнинг катта қисмини сотишига имкон беради, уларни узил-кесил тақсимот қилиш учун яна анчагача улар қийматини сақлаб туришга тўғри келади. Борди-ю, айтайлик, айни вақтда бўлганидек, Каупервуд беш минг акция сотди, беш мингни эса ўзида олиб қолди, у сотган акциялар қийматини муайян даражада сақлаб туриш учун унинг озмунча уриниб- chiraniшига тўғри келмасди, зеро, акс ҳолда унинг кўлида қолган акцияларнинг ҳам нархи тушиб кетар эди. Деярли ҳар доим қилиб келинганидек, агар у ўз акцияларини банкка қўйганида, улардан олган пуллардан эса бошқа битимларда фойдаланганда эди, унинг акциялари қиймати кескин тушиб кетган ҳолда, банк ўз манфаатларини ҳимоя қилиб, қўшимча таъминотни ёки ҳатто қарзни тўла узишни талаб қиласди. Бу эса унинг найранги чиппакка чиққани ва унинг ўзига бўйрон таҳдид солаётганини англатарди. Ҳозир Каупервуд шахар заёми чиқариш билан боғлиқ ғоят мураккаб компанияни ўтказганди, заём қиймати тинимсиз кўтарилиб-тушиб турарди, аммо айни вақтда бу кўтарилиб-тушишлар унинг учун янада мақбулроқ эди, зеро, пировардида у бундан пул ишлаб қолмоқда эди.

Ташабbus ҳар қанча мафтункор бўлмасин, янги оғир юк икки баравар зийракликни талаб этарди. Акцияларни баланд нархда сотиб, у шахар газнасидан олган қарз (ссуда)ни қайтара оларди. Зийраклик натижасидаги унинг ўз акциялари, ҳатто мавҳум келажакдан ва чаққон тузилган проспектлар ва ҳисоботлардан фойда ундириш уқувлари устига ёзib кўйилган қиймат бўйича баҳоланади ёки ундан оз-моз камроқ бўлади. Унинг бисотида бошқа конкали Темир йўллар бутун тизимнинг молиявий раҳбарлигини ўз кўлига олиб олиши ва ўшанда миллионер бўлиши истисно эмас. Каупервуднинг узокни кўра билишига ва бу одамнинг фавқулодда ақлидан гувоҳлик берувчи айёrona

## ЖАҲОН АДАБИЁТИ

тўқималаридан бири шундан иборат эдики, мавжуд изларни узайтириш ёки янги тармоклар ётқизиш баробарида у ҳар доим мустақил ташаббуслар яратар эди. Дейлик, икки-уч миль узунликдаги изларга эга бўла туриб ва уни ўшандай масофага ва ўша кўчада давом эттиришни истаб, Каупервуд бу янги қисмни мавжуд акционерлик жамиятига ҳавола этмасди, балки конкали йўлнинг мана шу кўшимча икки-уч милини назорат қила оладиган янги компания ташкил этар эди. Бу ташаббусни у маълум миқдордаги маблаг билан таъминларди, бунга акциялар ва облигациялар чиқарарди, бу унга бетўхтов янги из ётқизишга киришишга ва уни тезда ишга туширишга имкон берарди. Бу ишни ниҳоясига етказгач, у турдош фаолиятини дастлабки компанияга кўшиб юборарди, бунда акциялар ва облигацияларнинг янги туркумини чиқарар, улар билан олдиндан кенг олди-сотди бозорини таъминлар эди. Ҳатто унга ишлайдиган оғайнилари ҳам унинг фаолиятидаги барча хилма-хил найрангларини билмасдилар ва унинг буйруқларини кўр-кўронга бажарап эдилар, холос. Баъзан Жозеф ташвиш ичида Эдвардга бундай дерди:

– Ҳа! Фрэнк билмасдан бир ишни қилмаса керак, ҳар ҳолда.

Бошқа томондан, Каупервуд унинг барча жорий мажбуриятлари ўз вақтида ва ҳатто муддатидан олдин тўлаб борилишини диққат билан кузатиб борарди, чунки у ўзининг тўлов қобилияти барқарорлигини ҳаммага кўрсатиб кўйиш муҳим деб биларди. Яхши обрў ва барқарор мавқедан қимматлироқ нарса йўқ. Унинг узоқни кўра билиши, эҳтиёткорлиги ва аниклиги банкирлик уйлар раҳбарларига мойдай ёқар ва уларда энг тўғри фикрлайдиган ва зийрак ишбильармонлардан бирига бўлган ҳурмат ошгандан-ошиб борарди.

Барибир ҳам кўза кунда эмас, кунида синади, дейдилар. 1871 йилнинг ёзига келиб, Каупервуднинг захиралари, гарчи унинг ахволини ҳалокатли даражага келтирадиган бўлмаса-да, яхшигина хомталаш бўлиб кетганди. Ҳар доим унга ҳамроҳлик қилиб келган муваффакият таъсири остида у ўзининг молиявий найранглари устида камроқ бош қотирадиган бўлиб қолди. Аста-секин ўзининг барча ўйлари рўёбга чиқишига заррача шубҳа қилмай кўйган Фрэнк отасини ҳам конкали темир йўллар олди-сотдисида иштирок этишга унатди. Учинчи миллий банк маблағларидан фойдаланиб, ота Каупервуд ўғлини қисман молия билан таъминлаши, у пулга қаттиқ муҳтожлик сезганида унга кредит очиши керак эди. Аввалига кекса жентльмен бироз ғижинди ва шубҳа билдириди, бироқ вақт ўта борган сари ва унга фойдадан бошқа ҳеч нарса келмагани боис, у дадилланди ва ўзини анча тетик ҳис қила бошлади.

– Фрэнк, – деб сўрарди у баъзан ўғлига кўзойнаги устидан караганча, – чув тушиб қолишдан кўркмайсанми? Кейинги вақтларда жуда катта миқдордаги пулларни ўзлаштириб юбордик.

– Агар захираларни ҳисобга олса, илгаригилардан кўп эмас. Катта ишларни кенг кредитсиз қилиб бўлмайди. Буни сиз мендан кўра яхшироқ биласиз.

– Бу тўғрику-я, аммо... Масалан, Грин ва Каутс изларини олайлик, тағин бу иш бошингга бало бўлмасин, эҳтиёт бўл.

– Ҳеч нарса бўлмайди. Мен бу компания ишларининг ахволи билан жуда яхши танишман. Унинг акциялари эртами, кечми кўтарилиши керак. Уларни мен ўзим кўтараман. Агар керак бўлса, бу йўлни бошқа изларимга қўшиб юборишим ҳам мумкин.

Ота Каупервуд ҳайрон бўлиб ўғлига қаради. Дунё ҳали бундай дадил, кўрқмас найрангбозни кўрмаган!

– Мендан ташвиш қилманг, ота! Борди-ю, қўрқадиган бўлсангиз, яхшиси, мен олган қарзларни тўлаб кўйишимни талаб қилинг. Акцияларимга ҳар қандай банкир менга пул бериб туради. Мен шунчаки фойда сизнинг банкингизга келиб тушса дейман, холос.

Генри Каупервуд таслим бўлди. Бундай ишларга у ҳеч қанақангি эътиroz билдира олмас эди. Унинг банки Фрэнкка катта-катта кредитлар берарди, аммо

нимада бўлганда ҳам бошқа банкларчалик катта бўлмасди. Унинг ўғли фаолиятларига сарфланган пулларга келсак, агар вазият қалтислашиб қолгудек бўлса, Фрэнк уни олдиндан огоҳлантиришга вайда берганди. Фрэнкнинг укалари ҳам ҳар доим унинг фармойишларига қараб иш тутар эдилар ва энди уларнинг манфаатлари унинг ўз манфаатлари билан узвий боғлиқ эди.

Кундан-кунга бойиб борар экан, Каупервуд янада дориламонроқ ҳаёт кечира бошлаганди. Филадельфиялик қадимги буюм ишқибозлари унинг бадий мойилликлари ва ортиб бораётган бойлиги хусусида эшишиб, усти-устига унга мебель, дарпардалар, гиламлар, санъат асарлари ва сувратларни – аввало американники, кейинроқ эса мутлақо хорижий санъаткорлар асарларини таклиф эта бошлашганди. Унинг ўз уйида бўлгани каби, отасининг уйида ҳам чиройли буюмлар ҳали унчалик кўп эмасди, бунинг устига Ўнинчи кўчадаги уй ҳам бор эди, шуни у иложи борича яхши безатишни хоҳларди. Эйлин ҳар доим ота-онаси уйидаги камчиликлардан зорлангани-зорланган эди. Гарчи қизнинг ўзи яхши англамаса-да, нафис буюмларга муҳаббат унинг ажралмас хусусияти эди. Улар хуфёна учрашиб турадиган жой шинам ва дабдабали жиҳозланган бўлиши керак. Бунга улар иккови ҳам қаттиқ аҳд қилгандилар. Шундай қилиб, аста-секин уй ҳақиқий хазинага айланди: бу ердаги айрим хоналар Фрэнкнинг ховлисидағига караганда янада нафисроқ мебеллар билан тўлдириб ташланганди. У ерда ўрта аср черков ризалари, гиламлари ва дарпардаларининг ноёб нусхаларини тўплай бошлади. Қирол Георг даври усулидаги мебелни сотиб олди – бу Чиппендель, Шератон ва Хеплуайт усуллари бирикмаси бўлиб, итальян ренессанси ва Людовик Ўн тўртингчи таъсири остида бирмунча ўзгаришларга дуч келган. У чинни, ҳайкалтарошлиқ, юонон гулдонларининг ажойиб намуналари, фил суюгидан япон усталари ясаган ҳайратомуз ўймакорлик асарлари билан танишди. Санъат асарларини четдан олиб келишга ихтисослаштирилган “Кейбл ва Грэй” фирмасининг ёш ҳамсоҳиби Флетчер Грэй бир гал келиб, Каупервудга XIV аср дарпардасини таклиф этди. Қадимги буюмлар ишининг чинакам ишқибози ўзининг босик ва шу билан бирга нафосат оламига нисбатан оташин муҳаббати или Каупервудни ҳаш-паш дегунча авраб ташлади.

– Зангари чиннининг бир муайян рангини яратишида элликта даврдан нусха оладилар, мистер Каупервуд! – ҳикоя қилди Грэй. – Биз гиламнинг камида етти мактаби ва даврини биламиз – форс, арман, араб, фламанд, замонавий поляқ, венгер ва хоказо. Борди-ю, сиз қачонлардир бу ишга қизиқиб қолгудек бўлсангиз, мен сизга гиламлар мажмуасини тўлиқ сотиб олишингизни астойдил маслаҳат берардим, айтмоқчиманки, ё маълум бир даврга тегишлигини ёки барча даврларга мансублигини олинг. Қарант, қанақа гўзал улар! Айрим тўпламларни ўз қўзим билан кўрганман, бошқалари ҳақида эса китоб-журналлардан ўқиганман.

– Мени гапларингизга ишонтириш унча қийин эмас, – жавоб берди Каупервуд. – Санъат вақти келиб мени хонавайрон қиласди. Ўзим унга нисбатан бефарқ одамман, сиз эса Элсуорт ва Гордон Стрейк билан, – у рангтасвирилнинг ашаддий муҳлиси бўлмиш таниш бир йигитчани назоратда тутаётганди, – мени гангитиб қўйдингиз. Стрейкнинг фикрига қойил қолиш керак. У менинг дарҳол турли мактаб ва даврларга хос дурдона намуналарни тўплай бошлашимни таклиф қиласяпти ва йирик санъаткорларининг асарлари вақт ўтиши билан қимматлашиб боришини ўқтираяпти, яъни ҳозир бир неча юз минг долларга олган нарсам кейинчалик миллионлаб долларга баҳоланади. Аммо у менга америка расомлари билан шуғулланмаслигимни маслаҳат бераяпти.

– Гарчи рақибни макташ менга фойда келтирмаса-да, у ҳақ! – деди Грэй. – Фақат бу ишларга катта пул керак.

– Унчалик катта эмас. Кейин, қолаверса, бирданига тўлаш ҳам шарт эмас. Бундайояни амалга ошириш учун йиллар талаб этилади. Стрейк айтадики, агар биронта яхшироқ нарса топилгудек бўлса, кейинчалик уларни алмашти-

## ЖАҲОН АДАБИЁТИ

риш учун турли мактабларнинг ажойиб намуналарини ҳозир ҳам топса бўлади.

Каупервуд ташқаридан хотиржам кўринганига қарамай, унинг юраги ҳар доим ниманидир қидирап эди. Аввалига у фақат бойликаю аёллар гўзаллигига интиларди. Энди у санъатнинг ўзини деб уни севиб қолганди ва бу тонг осмонидаги илк ёғдулар эди. У аёл гўзаллиги ҳаётдаги барча энг ажойиб нарсалар билан куршалган бўлиши кераклигини ва чинакам гўзаллик учун фақат биргина муносиб восита – чинакам санъат эканини англай бошлаганди. Бу ёш вужудидан тароват ёғилиб турадиган Эйлин Батлер бўлиб, унда илгари унга бу қадар хос бўлмаган нафосатга шайдоликни уйғотган эди. Феъл-авторларнинг ўзаро ҳамкорлиги натижасида юзага келадиган энг нозик хилларни таърифлашнинг иложи йўқ, зеро, бизни ҳайратга соладиган нарса бизга кай даражада таъсир қилишини ҳеч ким билмайди. Каупервуд ва Эйлин ўртасида юзага келганга ўхшаш муҳаббат тоза сув солинган стаканга тушган бир томчи тиниқ бўёқ ёки тўғрироғи, энг мураккаб кимёвий биримага қўшилган номаълум кимёвий модда кабидир.

Қисқача айтганда, ёш бўлишига қарамай, Эйлин Батлер, шубҳасиз, кучли шахс эди. Унинг қарийб гўрларча нафсонияти уйдаги кўримсиз муҳитга қарши ўзига хос исён эди. Шуни унутмаслик керакки, Батлер оиласида дунёга келиб, у кўп йиллар давомида бир вақтнинг ўзида уларнинг ҳаётга нисбатан ибтидоий-ғайрибадиий боёнларча қараашларининг ҳам сохибаси, ҳам қурбони бўлиб келди, энди эса Каупервуд билан танишиш шарофати илиа Эйлин ҳаётнинг инсонга бойлиқ ва олий ижтимоий рутба инъом этмиш шундай мўъжизалардан воқиф бўлдики, булар унинг етти ухлаб тушига кирмаганди. Айниқса, Фрэнк Каупервудга хотин бўлгач, келажакдаги дунёвий муваффақиятлар унинг сира кўз ўнгидан кетмасди! Узоқ висол онларида қизнинг олдида ўзини намоён этган унинг ёрқин ва чақноқ ақлини айтмайсизми! Фрэнкнинг аниқ ва тиниқ дил изҳорлари ва йўл-йўриклиарини тинглар экан, қиз унинг ақлига қайта-қайта оғаринлар ўқириди! Сармоядорлик фаолияти, санъат, ижтимоий мавқега таалукли унинг орзу ва режалари улуглиги-чи! Энг асосийси, ха, энг асосийси қиз уники эди, ха, қиз уники эди! Шундай дамлар бўлардики, ҳаяжон ва баҳтдан Эйлин нақ эсини йўқотарди.

Барibir ҳам Филадельфияда отасини ҳамма собиқ ахлатчи (эски танишлари уни “тўнгқўнғиз” дерди) деб билиши, қизнинг рўзғорларидаги тўпорилик ва вахшийлик билан олиб борган бехуда саъй-ҳаракатлари, унга барқарор обрў ва олий рутбанинг “эхроми” бўлиб кўринувчи данғиллама ҳовли-жойлар олиш имконсизлиги булар барчаси унинг ёш қалбига ота уйидаги муҳитга нисбатан сўндириб бўлмас адоват уйғотди. У ердаги ҳаёт билан Каупервудлар уйидаги ҳаёт бир-биридан осмон билан ерча фарқ қиласиди. Қиз отасини севарди, аммо ота деган ҳам шунчалик жоҳил бўладими! Шундай бўлса-да, мана бу фавқулодда одам, унинг маҳбуби уни севишга жазм этибди, ҳатто унда ўзининг бўлаjak хотинини кўришга азму карор қилибди! Э Худо, ишқилиб, шу баҳтими кўп кўрмагин-да! Аввалига у Каупервудлар орқали жамоатчилик погонасида ундан баланд турувчи дунёвий ёшлар, хусусан, эркаклар билан танишишга умид боғларди, – уларни қизнинг хусни таважжуҳи ва бой меросхўрлик рутбаси ўзига тортиши керак. Аммо бу умид ўзини окламади. Фрэнкнинг бадиийликка мойиллиги ва унинг тобора ортиб бораётган бойлигига қарамай, Каупервуд ва унинг ўзи ҳам олий жамиятнинг мавҳум доирасига ёриб кирмаган. Ҳалиги юзаки ва айтиши мумкинки, уларга кўрсатилган дастлабки эътиборни ҳисобга олмаганда, моҳиятан улар бундан ҳали жуда ҳам узоқ эдилар.

Шундай бўлса-да, Эйлиннинг юраги Каупервуд унинг ҳозирги аҳволдан чиқиб кетиш йўлини топишда ёрдам беражагини ва уни ажойиб истиқбол билан таъминлаяжагани сезиз турарди. Бу одам ҳатто унинг ўзи орзу қилишга ботинолмаган юксакликкача кўтарилади, қизнинг бунга ишончи комил. Гарчи ноаниқ, элас-элас кўриниб турган бўлса-да, унда Эйлин хаёл қилганидан

## ЖАҲОН АДАБИЁТИ

кўпроқ нарсаларни ваъда этувчи буюк истеъдодлар яшириниб ётибди. Қиз дабдабани ва жамиятда рутбали бўлишни жонидан яхши кўрарди. Нима ҳам дерди, агар у йигитга тегиб олса, шулар бари амалга ошади. Тўғри, уларнинг йўлида бир қараганда ўтиб бўлмасдек кўринувчи тўсиқлар бор эди, аммо уларнинг иккови ҳам мақсад сари интилган одамлар-ку. Улар бир ўрмондаги икки шер, улар бир-бириники бўлиб олишган. Қизнинг ҳом, чала етилган ва чала ифода этилган ўй-орзулари ўзининг кучи ва ҳаддан ташқари тўғрилиги билан йигитнинг мардона интилишларидан қолишмасди.

— Менимча, дадажоним қандай яшаши билмайди, холос, — деди бир куни у Каупервудга. — Бунда унинг айби йўқ, бундоқ қараганда, унинг бунга дахли ҳам йўқ. Буни унинг ўзи ҳам тушунади, менга қўйиб берса, ҳаммасини жой-жойига қўйишим мумкинлигини ҳам тушунади. Уни эски уйимиздан сугуриб чиқишга неча йиллардан бери уринаман! Бошқа жойга қўчиб ўтишимиз зарурлигини у тушунади. Бироқ, бу билан ҳам бир нарса ўзгаришига кўзим етмайди.

Қиз жимиб қолди ва унга тўғри бокувчи, тиник ва жасур нигоҳини Фрэнкка тикди. Фрэнк қизнинг жиддий чехрасини, фариштамонанд, хушбичим қиёфасини севарди.

— Кўп куйинаверма, жонгинам, — жавоб берди йигит, — вакти-соати билан ҳаммаси жойига тушиб кетади. Мана бу чалкашликлардан қандай чиқиб кетишини мен ҳали ҳам билмайман, аммо афтидан, Лилианг очишини айтган маъкул, шундан сўнг бундан кейинги ҳаракат режасини пухта ўйлаб олиш керак бўлади. Менинг уларни яхшилаб таъминлашга қурбим етади ва агар Лилиян мен билан тинчгина ажрашиб кетса, сира ҳайрон бўлмасдим. Унинг фийбат ва миш-мишларга асло тоқати йўқ, бунга ишонсанм бўлади.

Лилианнинг болаларча муҳаббатини ҳисобга олиб, Фрэнк булар барчасига соф амалий ва албатта, эркакча нұқтаи назардан қаради.

Эйлин унга савол назари билан қараб кўйди. Унда якин одамнинг ғамига ҳамдард бўлиш қобилияти йўқ эмасди, аммо айни ҳолда у ҳар қанақанги ҳамдардликни ортиқча деб биларди. Лилиян ҳеч қачон унга дўст кўзи билан қарамаган, улар ҳаётга мутлақо бошқа-бошқа томондан туриб қарашарди. Миссис Каупервуд қиз бола деган ҳам шунақа калондимоғ ва ўзига бино қўйган бўладими деса, Эйлин Лилианнинг нима учун бу қадар ланж эканини сира тушунолмасди. У ҳаётни отда сайр қилиш, извоща айланиш, ўйнаб-кулиш учун яратилган, деб билади. Яна бурнини кўтариб, бирорларни калака қилишига, пичинг отишларига, тантрик қилишига бало борми! Бу аёлга қарасанг, кўнглинг айниб кетади: Каупервуддай ёш, қадамидан ўт чақнайдиган одамнинг хотини, —майли, ундан беш ёш катталигини ва икки боланинг онаси эканини айтмай ҳам қўя қолайлик, — ўзини шундай тутадики, гўё унинг учун ишқий кечинмалар ҳам, ҳис-ҳаяжонлар ҳам ва ҳаёт қувончлари ҳам — ҳаммаси бир пулдай. Ҳа, Лилиян Фрэнкнинг тенги эмас, Ҳа, Фрэнкка ёш хотин, у, яъни Эйлин керак, тақдир уларни бир-бирига қўшиши керак. О, ўшанда улар қанақанги зўр яшаши масди дейсиз!

— Оҳ, Фрэнк, қанийди ҳаммаси изга тушиб кета қолса! — дам-бадам дерди қиз. — Нима дейсан, шунга умид қилсак бўладими ё йўқми?

— Умид қилсак бўладими дейсанми? Бўлганда қандоқ! Буни факат вақт ҳал қиласди. Менимча, агар мен Лилианг яхшилик билан айтсан, унинг ўзи ҳам мен билан туришни хоҳламай қолса керак. Аммо сен қўзингга қараб юр, ўзингни эҳтиёт қил! Борди-ю, отанг ё укаларинг мендан гумонсираб қолгудек бўлишсами, шаҳарда катта ғалва кўтарилади, балки бундан ҳам баттари бўлиши мумкин. Улар ё мени тил тортирмай ўлдиришади, ё бутунлай хона-вайрон қилишади. Айт-чи, ҳар бир қадамингни ўлчаб босоласанми?

— Бир лаҳза ҳам эсдан чиқармайман буни. Агар бир гап бўлгудек бўлса, мен ҳаммасини инкор этаман. Улар ҳеч нарса исбот қилишолмайди. Эртами, кечми, барibir мен ҳамиша сенини бўлиб қоламан-ку!

## ЖАҲОН АДАБИЁТИ

Суҳбат Ўнинчи кўчадаги уйда бўлиб ўтганди. Телбаларча севиб қолган Эйлин меҳрибонлик билан Фрэнкнинг юзини силаб қўйди.

– Сен учун қўлимдан келган ҳамма нарсани қиласман, севгилим, – деди киз.  
– Сен учун ўлимга тайёрман. Ох, сени шунчалик севаманки!

– Бўпти, жонгинам, бундан кўрқмасанг ҳам бўлади. Ўлмайсан. Факат кўзингга қараб юрсанг бўлгани.

## XXIII БОБ

Каупервуд билан Эйлиннинг бир неча йиллик хуфёна учрашувларидан кейин ниҳоят бўрон қўзғалди. Бу висол онлари давомида уларнинг бир-бирларига бўлган мойилликлари ва тушунчалари заифлашиш у ёқда турсин, балки яна ҳам мустаҳкамланди. Ҳаво очиқ кундаги момақалдирок сингари оғат бирданига ёпирилиб келди, у инсон хоҳиш-иродаси ва орзу-ниятларига умуман боғлиқ эмасди. Аввалига бу бор-йўғи бир ёнғин эди, бунинг устига у Филадельфиядан узокда содир бўлганди – 1871 йил 17 октябрдаги машҳур Чикаго ёнғинида шаҳар, тўғрироғи, унинг кенг савдо маркази куйиб кулга айланмоқда ва бу фалокат кўз очиб-юмгунча Америка сармоядорлик дунёсида, гарчи узок давом этмаган бўлса-да, аммо юракни ларзага солгулик ваҳимага сабаб бўлганди. Шанбада бошланган ёнғин бир он ҳам сусаймади, то чоршанбагача давом этди, банклар, савдо корхоналари, бандаргоҳлар, темир йўл омборхоналари ва бутун-бутун аҳоли яшайдиган маҳаллаларнинг кулини кўкка совурди. Табиийки, суғурта компаниялари энг кўп зарар кўрди, кўп ўтмай уларнинг кўпчилиги тўловларни тўхтатиб қўйди. Бунинг оқибатида заарларнинг барча оғирлиги Чикаго билан иш олиб борган ўзга шаҳарларнинг саноатчилари ва улгуржи савдогарлари, шунингдек, Чикаго тижоратчилари зиммасига тушди. Кўп йиллардан бўён мана мен деган идоралар ва дангиллама ҳовли-жойларнинг эгалари ёки ижарадорлари бўлиб келган Шарқий штатларнинг қўплаб сармоядорлари ҳам зарар кўрдилар, улар билан Чикаго ўшандаёқ қитъядаги ҳар қандай шаҳар билан бас бойлаша олар эди. Чикаго билан қатнов узилиб қолди, Нью-Йоркдаги Уолл-стрит ҳам, Филадельфиядаги учинчи кўча ва Бостондаги Стейт-стрит ҳам дастлабки хабарларданоқ ахволнинг жиддийлигини сезиб қолишиди. Шанба ва яканшанбада биринчи хабарлар биржга ёпилгандан кейин келган эди. Бироқ душанбада янгиликлар узлуксиз оқиб кела бошлади. Ўша заҳоти темир йўл, давлат, шаҳарларнинг акциялари ва облигациялари, бошқача айтганда, барча тур ва даражадаги бойликларнинг эгалари нақд пул ишлаб қолиши ниятида уларни бозорга ташлай бошладилар. Банклар, табиийки, қарз (ссуда)ларни тўлашни талаб қила бошлишди ва натижада жамғарма биржасида ваҳима юзага келди, бу кўлам жиҳатидан бундан икки йил бурун Нью-Йоркда содир бўлган “Қора жума”дан қолишиасди.

Ёнғин ҳакидаги хабар келганида на Каупервуд, на унинг отаси шаҳарда эдилар. Бир қанча банк арбоблари билан биргаликда улар шаҳар чеккасидаги кўнкали темир йўл изини кўздан кечиришга йўл олган эдилар. Улар кабриолетларда бўлажак изнинг каттагина қисмини ёқалаб ўтдилар ва якшанба куни кеч оқшомда Филадельфияга қайтиб келишгач, рўзномачи болакайларнинг қичқириб айтган сўзларини эшитиб қолдилар:

– Тезкор нашр! Тезкор нашр! Чикаго ёнғини ҳакида тафсилотлар!

– Тезкор нашр! Тезкор нашр! Чикаго ўт ичида! Тезкор нашр!

Қичқириқлар давомли, мудхиш, юракни ларзага солиб жарангларди. Бу мунгли оқшом гира-ширасида шаҳар гўё якшанбадан кейин таваллою тазарру ҳолатига тушиб қолгандек эди, хавода ва дараҳт шоҳларида эса ёзнинг умри тугаётгани сезиларди, улар мудхиш оғатдан дарак бериб, юракларни увиштирмоқда эди.

– Ҳой бола! – қичқириқни эшитиб, Каупервуд, кўлтиғида бир даста рўзнома

билан бурчакдан чиқып келгандардың болани чакирди. – Нима гап? Чикаго ёнаяптыми?

Отаси ва бошқа ишбилиармонлар билан маъноли кўз уриштириб, у қўлини рўзномага узатди, сарлавҳалар узра кўз югуртириди-да, лахзадаёқ оғат кўламини чамалади.

“Чикаго ўт ичида!

Кечадан бўён олов шаҳарнинг савдо кисмида тўхтоворсиз авж олмоқда. Банклар, савдо ва жамоат бинолари кулга айланди. Бевосита телеграф алоқаси бугун кундуз соат учдан бўён узилиб колган. Офатнинг тез орада тугашига хеч қандай умид йўқ”.

— Иш, афтидан, жиддийга ўхшайди, — хотиржам деди Каупервуд ҳамроҳларига караб, унинг кўз ва овозида қандайдир муздек ва амрона оҳанг бор эди.

Бироздан кейин у отасининг кулогига шивирлади:

—Агар банклар ва биржада идоралари бир ёқадан бош чиқарып ҳаракат қылмаса, бу зүр ваҳимага сабаб бўлади.

Үүз қарзларини тез ва аниқ күйүн олдига келтирди. Отасининг банкига унинг конкали темир йүйл изларининг юз минг долларлик акциялари күйилган, улар устидан олтмиш фоиз олинган, унда мавжуд эллик минг долларлик шаҳар за-ёми сертификатлари устидан етмиш фоиз олинган. Бу маблағлар билан биржа муомалалари олиб бориш учун қария Каупервуд унга қирқ минг доллардан ортиқроқ накд пул берганди. “Дрексель ва К” банкирлик уйи Фрэнк дафтарлари бўйича унга юз минг доллар микдорга кредит очган; улар, албатта, қарзларни дархол тўлаб кўйишни талаб қилиб чиқишиди, уларнинг юрагида ногаҳоний муруватт ҳисси жўш уриб кетишига ҳеч ким ишонмайди. “Жей Кук” компанияси ҳам унга бир юз минг долларлик кредит берган. Уларнинг тўловни талаб қилишларига шубҳа йўқ. Кичикроқ тўртта банк ва учта биржа идорасидан ҳам эллик доллардан ҳаммаси бўлиб минг доллар қарз олган. Шаҳар ғазнасининг унинг ишларидаги иштироки беш юз минг долларрга яқин микдорни ташкил этарди ва борди-ю, бу сир очилгудек бўлса, жанжал чиқиши муқаррар; штат ғазначиси ҳам унинг идорасига икки юз минг доллар кирилган. Яна юздан то беш ва ўн минг доллар микдорга юзлаб майда ҳисоблар бор. Биржа ваҳимаси кўйилмаларни талаб қилиш ва қарз (ссуда)ларни тўлаб кўйиш билангина чекланиб қолмай, кимматли қофозлар нархига ҳам қақшатқич зарба бўлиб тушади. Бу маблагларини у қандай айлантиrsин? Мана гап қаерда! Сал арzonроққа со-тиш йўлини топмаса бўлмайди, зеро, акс ҳолда бу унинг бор бойлигини ютиб юборади ва у муқаррар хонавайрон бўлади.

У юзага келган ҳолатнинг бугун даҳшатини хаёлида тез чамалаб чиқди ва дўйстлари билан хайр-хўш қилди, улар ҳам олдиндаги қийинчиликлардан чукур ўйга толганча уй-уйларига тарқалишиди.

— Сиз уйга бораверинг, ота, мен эса бир қанча телеграммалар жўнатишим керак (у вақтда ҳали телефон ихтиро қилинмаганди). Мен дарров қайтаман ва биргаликда ахволни муҳокама қиласиз. Иш чатоқ! Ҳеч кимга чурқ этманг, аввал ўзимиз гаплашиб оламиз. Ҳаракат режасини ишлаб чиқишимиз зарур.

Ота Каупервуд саросима ва ташвишли ҳолда соқолини қаший бошлади. Борди-ю, ўғли касодга учраса, унинг ахволи не кечиши устида қаттиқ ўйга толганди, чунки ўглининг ишларига у боши билан шўнгигб кетганди. Кўркувдан қариянинг юзи кув оқарганди, зеро, ўглининг истакларига рози бўлиб, у кера- гидан ортиқ дараражада таваккал қилиб юборганди. Борди-ю, банк талаби бўйича Фрэнк бир юз эллик минг долларлик қарз(ссуда)ни эртагаёқ тўлаб қўйишга кучи етмаса, бутун жавобгарлик, бутун шармандалик ота зиммасига тушади.

Уз навбатида Фрэнк вазиятни ҳар томонлама, жиддий ўйламоқда эди, вазият эса шахар газначиси ва унинг бир ўзи, албатта, биржадаги қоғозлар қийматини сақлаб турга олмаслиги муносабати билан янада мураккаблашиб борарди. Унга ёрдам кўлини чўзаман деганларнинг ўзлари қийин ахволга тушиб қолмоқда эди-

ЖАҲОН АДАБИЁТИ

лар. Шароит борган сари ўта ноқулай тус олмоқда эди. “Дрексель” компанияси сўнгти вақтда темир йўл акциялари нархини кўтариб, улар устидан йирик-йирик қарз(ссуда)лар олмоқда эди. “Жей-Кук” компанияси Шимолий тинч океани темир йўлини молия билан таъминлаб, бошқаларни бу йирик трансконтинентал из қурилишида иштирок этишга қўймаслик учун жон-жаҳди билан ҳаракат қиларди. Ўз-ўзидан равшанки, энди уларнинг ўzlари фоят қалтис аҳволга тушиб қолишганди. Дастребки ташвишли хабарданоқ улар энг ишончи хукумат облигациялари ва шунга ўхшаган кимматли қофозларни сотишга киришади – ишқилиб, олиб-сотарликда аскотадиган ўзларининг бошқа қофозларини сақлаб қолишса бўлгани. “Айиклар” мўмай пулнинг дарров хидини оладилар ва ҳеч нарсага қарамай ҳамма нарсани сотиб, нархларни туширишдан тоймайдилар. Фрэнк уларга таъсир қила олмайди. Бу ҳолда ўз оёғига ўзи болта уриши ҳеч гап эмас, унинг учун энг асосий нарса – вақтдан ютиш. Оҳ, қани энди унинг ихтиёрида уч кун, бир ҳафта, ўн кун вақт бўлслайди, оғат, шубҳасиз, бир четдан ўтиб кетган бўларди.

Ҳаммадан ҳам у Стинер унинг ишига қўшган ярим миллион доллардан ташвишда эди. Кузги сайловлар яқинлашиб келарди. Гарчи Стинер ўз лавозимида икки муддат бўлган эса-да, унинг номзоди учинчи марта қўйилмоқда эди. Шаҳар ғазнасида фош этилган сунистъемолликлар фоят жиддий оқибатларга олиб келиши мумкин эди. Стинернинг хизмат фаолияти ниҳоясига етган, унинг ўзи судланувчилар курсисига ўтириши ҳеч гап эмасди. Республикачилар партияси учун эса бу нарса сайловда мағлубиятни англатарди. Каупервуд ҳам четда қола олмасди, бу ботқокка у жуда чуқур ботиб қолганди. Борди-ю, жала қуйиб бергудай бўлса, у республикачилар партияси раҳнамолари олдида жавоб бериши керак бўларди. Қаттиқ бир сиқувга олинса, у сўзсиз касодга учрайди, шунда конкали темир йўлга бош қўшишга ҳаракат қилганигина (бу сиёсий ишбилармонлар ўzlари учун тишларининг кавагида асраб келаётган “қўриқхона”лар эди) эмас, балки буни шаҳар ғазнасидан олган ноконуний қарз (ссуда) ёрдамида қылгани, бунинг учун уларга сайловда мағлубият хавф солаётгани ҳам фош бўлар эди. Бундай ишларга улар панжга орасидан қарашмайди. Бу пулга йилига икки фоиздан тўлаганман (кўпчилик шартномаларга эҳтиёт юзасидан у шу бандни киритган эди) ёки факат Стинернинг агенти сифатида ҳаракат қилганман, деган даъволари унга ёрдам бермасди. Тушунмаган одамлар бу даъволарга ишониши мумкиндири, бироқ тажрибали сиёсатчиларга панд бериш ҳар кимнинг ҳам қўлидан келавермайди. Кўравериб, уларнинг жуда кўзлари пишиб кетган.

Каупервуднинг бутунлай тушкунликка тушиб кетмаганига бир нарсагина сабаб бўлмоқда эди: унинг шаҳардаги сиёсий раҳнамолар қандай қуроллантиришларини у яхши билар эди. Қанақанг олий мансабни эгалламасин, уларнинг ҳар бири мана бу оғир дақиқаларда ҳовурдан тушади, зеро, уларнинг барчаси, энг қўйи лавозимдагилардан тортиб, энг юкорисигача шаҳар тақдим этган имтиёзлардан ўзи учун фойда ундириб олади. Батлер, Молленхауэр ва Симпсон пудратдан мўмайгина пуллар ишлаб олганини Каупервуд биларди, пуллар гўё қонунийдек бўлиб кўринса-да, катта-катта миқдорларда “ўzlари” орасидагина тақсимланарди, у пулларни шаҳар ер солиги, сув солиги ва ҳоказо соликлар кўринишида ундириб олиниб, мана шу учлик ва бир канча бошқа шахслар тавсия этган банкларга ўтказилар эди. Пулларни ўз пўлат сандиқларида сақлаб, банклар шаҳарга хизмат кўрсатаётгандай бўлар эди; шу боис улар мана шу қўйилмалар бўйича фоизлар тўлашмасди, балки уларни айлантиради эдилар, шунда ўз-ўзидан савол келиб чиқади: кимнинг манфаатига? Даққионусдан колган учликдан норози бўлишга Каупервудда ҳеч канака асос йўқ эди, бу одамлар у билан ёмон муомала қилишмасди, аммо нима учун шаҳарнинг барча даромадларидан фойдаланишда улар ўзларини яккаҳоким деб ҳисоблайдилар? У на Молленхауэрни, на Симпсонни шахсан биларди, аммо Батлер каби улар

## ЖАҲОН АДАБИЁТИ

ҳам шаҳар заёми чиқаришдаги унинг найрангларидан озмунча чўтал ишлаб олмаган эдилар. Яна ўша Батлер унга жуда қаттиқ суяниб қолган эди. Борди-ю, иш бутунлай чаппасига кетгудек бўлса, у, Каупервуд, Батлерга ўз қарталарини очади, ахволнинг чатоқлигини кўрган Батлер эса унга ёрдам қўлини чўзади. Агар у биргина Стнернинг ёрдамида ишни овоза қиласдан ўнглашнинг хеч иложини тополмаса, ана шундай йўл тутишни кўнглига маҳкам тугиб қўйди.

Харакат режасини пухталар экан, энг аввал Стнернинг уйига боришим ва ундан уч юз-тўрт юз минг доллар қўшимча карз (ссуда) сўрашим керак, деб ўйлади у. Стнер ҳар доим “лаббай” деб турар эди, айни ҳолда эса у, албатта, унинг ғазнасидаги ярим миллион долларлик камомадни ошкор қиласлик нечоғли муҳимлигини тушунарди. Ундан кейин иложи борича яна кўпроқ пул топиш керак бўлади. Аммо қаердан топади? Банкларнинг ва акционерлик компанияларининг директорлари, йирик биржачилар ва бошқа ишбилармон одамлар билан музокараларга киришишига тўғри келади. У Батлерга бериши керак бўлган ҳалиги юз минг долларга келганда эса кекса пудратчи ҳар қалай, бу пулни тўла деб қисталанг қиласмай туришга рози бўлади.

Каупервуд уйга ошиқди, осто наданоқ аравани қўшишини буорди ва Стнернинг хузурига йўл олди.

Жўрттага қилгандай, Стнер шаҳарда йўқ экан – ўрдак отиб, балиқ овлагани у дўстлари билан Чизапик бухтасига кетган экан; у яна бир неча кундан кейин келар экан. Ҳозир эса у бир чоғроқ шаҳар яқинидаги ботқоқзорда кезиб юради. Каупервуд шу шаҳарчага энг яқин жойлашган телеграф масканига шошилинч хабар йўллади ва янада ишончлироқ бўлиши учун Стнернинг зудлик билан қайтишини илтимос қилиб, ўша округдаги яна бир қанча жойга телеграф юборди. Шунга қарамай, у Стнернинг вактида етиб келишига мутлако кўзи етмаётган ва бундан кейин нима қилишини билмаётганди. Кимдан ва қаердан бўлмасин, унга ёрдам, сўзсиз ёрдам керак эди.

Бирдан унинг хаёлида умид учқуни милт этди. Батлер, Молленхауэр ва Симпсон – конкали темир йўлларнинг энг йирик хиссадорлари. Биржадаги нархни кўтариш ва шу билан ўз манфаатларини чеклаш учун улар бир ёқадан бош чиқармоқлари керак. Улар “Дрексель ва К”, “Кук” сингари йирик банклар билан музокарага киришилари ва уларни бозорни тутиб туришга ундашлари мумкин. Акцияларни биргаликда харид қилиб, улар нарх-навога ҳам таъсир ўтказа оладилар: ана шундай ёрдам билан у ўзининг қимматли қофозлари ишини ўнглаб олишга имкон берадиган нархда сотишга муваффак бўлади, боз устига, нархни тушириб, дурустгина пул ишлаб олиши ҳам эҳтимолдан холи эмас. Бу ажойиб, амалда кўллашга муносиб гоя эди ва унинг бирдан-бир заиф жойи –унинг амалга оширилишига тўла ишончнинг йўқлиги эди.

У дарҳол Батлер хузурига боришига азму қарор қилди, ўзининг ва Стнернинг сирини очишига тўғри келишини ўйлаб, афсус-надомат чекди. Аммо илож қанча! Каупервуд аравага ўтириди-да, Батлер хузурига елиб кетди.

Бу вактда кекса пудратчи дастурхон устида ўтиради. Рўзномачиларнинг тезкор нашр чиққани ҳақидаги қичқириқлари унинг қулогига етиб келмаганди ва Чикагодаги улкан ёнғин ҳақида ҳам ҳали хеч нарса билмасди.

Хизматкор Каупервуд келганини хабар қилганда, Батлер ўрнидан турди ва хушнуд жилмайганча унга пешвоз чиқди.

– Марҳамат, марҳамат, ўлтирисинлар. Нима истайдилар: чойми ё қаҳвами?

– Ташаккур, – жавоб берди Каупервуд. – Мен бугун жуда шошиб турибман. Сиз билан бир неча дакиқа сухбатлашиб олишим керак, кейин яна борадиган жойларим бор. Кўп вактингизни олмоқчи эмасман.

– Нима ҳам дердик, модомики шундай экан, мен хизматингизга шайман.

Шундай деб Батлер ёқасига тақилган салфеткани кўйгани ошхонага қайтди. Столда ўтирган Эйлин ҳам Каупервудни овозидан таниди-да, сергак тортди. У билан қандай кўришса бўлади? Бандай кутилмаган соатда уни отаси хузурига

## ЖАҲОН АДАБИЁТИ

келишга нима мажбур этдийкин? Столдан бирдан туриб кетиш унинг учун нокулав эди, аммо Каупервуд кетгунча у билан бир-икки оғиз гаплашиб олиш ниятида эди. Хотини түғрисида ва яна бошқа кўплаб нарсалар түғрисида ўйлагани каби Каупервуд хозир ҳам, бошлари узра оғат ёғилай деб турган бир паллада Эйлин ҳақида ўйларди. Агар у оғатдан кутулиб қоломаса, у билан боғлик бўлган ҳаммага жуда оғир бўлади. Булар бари нимага олиб келишини Фрэнк айтига олмасди, чунки булат энди-энди уфқни қоплаб келаётганди. Ўзини ғоят хотиржам тутган кўйи Каупервуд хозиргина ахвол устида бош котиргани-котирган эди. Ўнинг жиддий чехрасида ҳам қилча ўзгариш сезилмаётганди. Фақат кўзлари одатдагидан совуқ, кучли чакнарди.

— Хўш, қулогим сизда, — деди Батлер қайтиб келиб. Унинг чехрасидан тақдири ва ёруғ оламдан тўла мамнунлик акс этиб турарди. — Не воеа юз берди? Ишқилиб, жиддийроқ нарса эмасми? Бугунги куннинг яхшилигини қаранг!

— Айтарли жиддий нарса юз бермагандир, деб умид қиламан ўзим ҳам, — жавоб берди Каупервуд. — Аммо сиз билан гаплашиб олмасам бўлмайди барibir. Юкорига, кабинетингизга чиксак қалай бўларкин?

— Мен ҳам шуни айтмоқчи бўлиб турувдим, — хозиржавоблик билан деди Батлер. — Бунинг устига сигарам ҳам ўша ёқда қолган экан.

Улар зина томон юриб кетишиди, Батлер олдинда, Каупервуд унинг изидан келарди; кекса пудратчи юкорига кўтарила бошлаганда шойи кўйлагини шитирлатиб, ошхонадан Эйлин чиқиб келди. Бошининг олди ва орқасидан тепага қараб тараалган сочи қоқ миясига турмакланган бўлиб, жимжимадор заррин тож ҳосил қилганди. Юзи ял-ял ёнар, яланғоч кўл ва елкалари қора кўйлаги тагидан оппок бўлиб кўринарди. Қиз бирон кор-ҳол бўлганини дарҳол сезди.

— Ҳа, мистер Каупервуд, қалайсиз? — деди қиз унга қўлини узатиб, бу орада отаси ҳамон зинадан кўтарилимоқда эди.

Икки оғизгина гаплашиб олиш учун у Фрэнкни ушлаб қолишга ҳаракат килди ва атрофдагилар эътиборини тортмаслик учун ўзини бемалол тутди.

— Нима бўлди, азизим? — шивирлаб сўради қиз, отаси юкорига чиқиб олганда. — Кўринишинг жуда ташвишли?

— Кўрқадиган ҳеч нарса бўлганий йўқ, жоним, — жавоб берди йигит. — Чикаго ёнаяти, эртага бу ерда кўз кўриб, қулоқ эшитмаган тўполон кўтарилади. Мен отанг билан гаплашиб олишим керак.

Қиз ҳамдардлик ва кўркув билан “оҳ!” деёлди, холос, Каупервуд эса қўлини бўшатиб, унинг отаси ортидан кетди. Унинг тирсагидан яна бир кисиб кўйиб, Эйлин меҳмонхона бўлмага ўтди. У ерда ўтириб олди-да, хаёлга толди, зоро, ҳеч қачон Каупервуднинг юзида бу қадар жиддий ва совуқ ифодани кўрмаган эди. Унинг хотиржам чехраси ҳам, совуқ бокувчи кўзлари ҳам мумдан ишланган ҳайкални эслатарди, ичига чуқур ботган кўзлари тик, ифодасиз бокарди... Чикаго ёнмоқда! Бунинг унга нима дахли бор экан? Фрэнкнинг айби нимада? У кизни сира ишларига аралашгани йўл қўймасди: Эйлин уларни миссис Каупервудчалик англарди, холос. Шундай бўлишига қарамай, унинг вужудини кўркув қамради. Булар барининг Фрэнкка дахли бордек кўринмоқда эди. Фрэнк билан эса у, ўзининг ўйлашиб, бир жону бир тан.

Мумтоз адиларни айтмаганда, адабиёт бизга хушторларнинг биргина хисси ҳақида тасаввур беради: маккора, ишратпараст, у асосан эркакларни домига илинтиришдан лаззат оларди. Ахлоқ масалалари бўйича замонавий китобчаларнинг муаллифлари ва журналистлар жон-жаҳдлари билан ўша ғояни кўллаб-қувватлайдилар. Худонинг ўзи ҳаёт устидан назоратни тайин қилиб кўйган, шекилли, нозирларни эса ўта эскиликтарастлар тайинлаганлар. Бундан ташқари, совукконларча хисобдонлик билан ҳеч қанақанги умумийликка эга бўлмаган ишқий алоқалар бўлади. Жуда кўп ҳолларда эса ғамза ва макр аёллар учун ёт туйғулар хисобланади. Юрак хиссига бўйсунувчи ва чин дилдан севувчи оддий аёл риёкорлик қилмайди, у ўш чақалоққа ўхшаган

## ЖАҲОН АДАБИЁТИ

бўлади; у ҳар доим жонини фидо қилишга тайёр ва иложи борича ўзидан кўпроқ нарса беришга интилади. Севги ҳар қанча чўзилмасин, у факат шундай иш тутади. Хис ўзгариши мумкин ва шунда “дўзах азобининг оғир-енгили бўлмайди”, аммо барибир ҳам маъшуқалар фидойиликлари, ўзини ошиғига бутунлай топширишга тайёриликлари ва меҳрибонона гамхўрликлари билан ажралиб турадилар. Конуний никоҳ очқўзлигига қарши кўйилган бундай муносабатлар эр-хотинлик илдизига қақшатқич зарба бериб келган. Хоҳ эркак ё аёл бўлсин, инсон бегаразлиқ ва фидойиликнинг бундай зуҳурлари олдида таъзим қилмасдан, тасанинолар айтмасдан иложи йўқ. Бу зуҳурлар олий ҳаётий ҳавасларга тенг, санъат чўққиси, яъни улуғвор рух билан ҳамсоядир, ажойиб суврат, гўзал бино, нафис ҳайкал, жимжимадор каштагул аввало шуниси билан ажралиб туради, бу шундай улуғворликки, ўзини сахийлик билан чексиз равишда инъом этиш, ўзидан нафосат ёғдусини таратиш қобилиятига эга. Эйлин руҳий ҳолатининг ғайри оддийлиги ҳам ана шунда эди.

Батлер ортидан юқорига кўтарилар экан, Каупервуд юзага келган вазиятнинг барча тафсилотларини қайта-қайта хаёлидан ўтказарди.

– Қани, марҳамат қилиб, ўтиринг! Бирон нарса ичасизми? Э-ҳа, сиз ичмайсиз-ку: эсимда, эсимда! Ҳеч бўлмаса, сигаретдан олинг! Хўш, бугун нега бунақа машқингиз пастроқ?

Дераза оша аҳолиси қалин маҳаллалар томонидан бўғиқ қичқириқлар қулоққа чалинарди: “Тезкор нашр! Тезкор нашр! Чикагодаги ёнғин тафсилотлари! Бутун шаҳар олов ичида!”

– Ана шундан машқим паст, – қичқириқларга қулоқ солгач, жавоб берди Каупервуд. – Янгиликдан хабарингиз борми?

– Йўқ. Рўзномачилар нима деб қичқиришаяпти?

– Чикагода катта ёнғин бўлибди.

– Э-ҳа-а! – деди Батлер бу воқеанинг аҳамиятини ўзича ҳамон англамай.

– Шаҳарнинг бутун ишбилармонлар қисми ўт ичида, мистер Батлер, – маъюс давом этди Каупервуд, – ва эртадан колмай бизнинг бу ерда молиявий ғалвалар бошланади. Мен сиз билан худди шу хусусда гаплашгани келдим. Маблағларни сарфлаш бўйича ишларимиз қай ахволда? Сиз ҳаммасини бир ёқлик қилганимисиз?

Каупервуднинг юзидағи ифодадан Батлер қандайдир ҳалокатли нарса со-дир бўлганини бирдан Англади. Кенг чарм оромкурсида ўзини орқага ташлаб, каттакон кўлини кўтарди-да, оғзи ва иягини тўсади. Томирлари йўғон-йўғон бармоқлари, кенг ва суяқдор бурни узра, бароқ кошлари остидан унинг катта-катта кўзлари чакнор эди. Калта қилиб олинган оппоқ сочи тиканакдай бошини бир текис коплаган.

– Ҳали шунақа дeng! – деди у. – Демак, сиз эртага бизда ҳам бўрон қўзғалади деб ўйлайсизми? Ўзингизнинг ишларингиз қандай?

– Агар бизнинг сармоядор козирларимиз совуққонликни сақлаб, ваҳимага тушмасалар, менинг ишларим озми-кўпми жойида бўлади. Эртага, ҳатто бугун ҳам бизга кўплаб ақли расо одамлар керак бўлади. Ахир биз чинакам биржа ваҳимаси арафасида турибмиз. Сиз ҳақиқат кўзига тик қарашингиз керак, мистер Батлер. Бу ваҳима узоққа чўзилмайди, аммо шу қисқа муддат ичида ҳам озмунча оғатлар содир бўлмайди. Эртага, биржা очилишининг дастлабки дақиқалариданоқ қимматли қоғозлар нархи ўн ёки ўн беш банд пастга тушиб кетади. Банклар қарз (ссуда)ларни тўлашни талаб қила бошлийдилар ва факат дастлабки келишувгина уларни бундай қилишдан тўхтатиб қола олади. Аммо битта ҳам киши бир ўзи уларга таъсир кўрсатишга қодир эмас. Бу ерда одамлар гурухининг бир ёқадан бош чиқариб ҳаракат қилиши зарур. Сиз мистер Симпсон ва мистер Молленхауэр билан биргаликда банк раҳбарларини бирлашишга ва бозорни ушлаб туришга кўндириб, бунга эришишингиз мумкин. Барча конкали темир йўллар хавф остида қолди. Агар қиймат сақлаб турил-

## ЖАҲОН АДАБИЁТИ

маса, уларнинг акциялари хатарли даражада пастга тушиб кетади. Сизнинг бу йўлларга катта-катта миқдорда пул сарфлаганингизни биламан. Шундай ўйга келдимки, балки сиз, Молленхауэр ва яна бир қанча кишилар ўз чорангизни кўришни хоҳлайсизлар. Акс ҳолда, яшириб ўтирмайман, менинг ишим ҳам чатоқ бўлади. Бир ўзим эплашим учун менинг кучим етмайди.

У Батлерга Стинер борасидаги ҳақиқатни қандай очсан экан деб боши котмоқда эди..

– Ҳм-м, яхши бўлмабди, – ўйчан ҳолда тишининг орасидан деди қария.

У ўзининг ишлари ҳақида ўйлаётганди. Вахима унга ҳам, албатта, фойда келтирмайди, аммо ахвол у айтганчалик чатоқ эмасди. Бўхронликдан қўрқмаса ҳам бўлади. Тўғри, у маълум, аммо унча жиiddий бўлмаган заарлар кўради, бу ишларни тартибга солиб олишдан олдин рўй беради. У эса ҳеч нарса йўқотишни хоҳламасди.

– Қандай қилиб сиз бундай қийин ахволга тушиб қолдингиз? – қизиқсинди у. Нима учун Каупервуд конкали темир йўллар компанияларининг касодга учрашидан бунчалик қўрқаяпти – уни шу қизиқтиради. – Ёки бу ишларга маблағ сарфлаганмисиз?

Каупервуд икки ўт орасида қолди – ёлғонласинми ё тўғрисини айтсинми? Ҳе, йўқ, ёлғонлаш ўта хатарли эди. Борди-ю, Батлер унга хамдардлик билдири-маса ва уни қўллаб-куватламаса, у касодга учраши мумкин ва ўшанда ҳақиқат барибир юзага чиқарди.

– Мен сиздан ҳеч нарсани яширмоқчи эмасман, мистер Батлер, – деди у қариянинг хайриҳоҳона муносабатига умид қилиб ва Батлерга мойдай ёқадиган журъатли ва дадил нигоҳ билан қараб.

Батлер гоҳо Каупервуддан ўз ўғилларидан кам фахрланмасди. Бундан ташқари, у ёш банкир айнан унинг, Батлернинг шарофати билан анча илгари-лаб олганини ҳис этарди.

– Шуни айтишим керакки, мен анчадан бери конкали темир йўллар акцияларини харид қилиб келаман, тўғри, фақат ўзим учун эмас. Балки ҳозир сизга очиб солмоқчи бўлган гапларни айтмай турганим маъқулмиди, аммо шундай қилмаслик, сизга ва мени бундан сақлаб қолмоқчи бўлган бошқа шахсларга зарар келтираман. Ўз-ўзидан маълумки, сиз кузда бўлиб ўтадиган сайловларнинг қандай тугашидан манфаатдорсиз. Мен Стинер ва унинг дўстларидан аллакимлар учун кўп акциялар сотиб олганини сизга очиқ айтмоқчиман! Бу харидлар учун маблағлар ҳар доим шаҳар ғазнасидан келар эди деб айттолмайман, аммо кўп ҳолларда бу, ҳар ҳолда, шундай бўлган эди. Менинг касодга учрашим Стинерга ҳам, республикачилар партиясига ҳам ва сизнинг фойдангизга ҳам салбий таъсир этишини тушунаман. Тўғри мистер Стинер бундай ўйинга бош қўшишни бир ўзи ўйлаб топмаган ва мен бу ерда бошқалардан кўра кўпроқ балогардон бўлишимга тўғри келади, аммо булар бари ўз-ўзидан бошқа ишлардан келиб чиққан. Сизга маълумки, мен Стинернинг таклифи билан шаҳар заёми чиқариб тарқатдим ва мана шу жараёндан кейин унинг дўстларидан биттаси менга уларнинг маблағини конкали темир йўл қурилишига ташлашимни таклиф қилиб қолди. Ўшандан буён мен улар учун мана шу ишни муттасил давом эттириб келаяпман. Мен шахсан Стинердан йилига икки фоиздан катта-катта миқдорларда пул қарз олдим. Бемалол айта оламан: аввалига барча битимлар айнан шу тариқа қопланар эди ва мен зинҳор ўз айбимни бошқалар гарданига юкламоқчи эмасман. Масъулият менинг зиммамга келиб тушади ва мен жавоб беришга тайёрман, аммо борди-ю, мен хонавайрон бўлсам, Стинернинг номи иснодга қолади ва бу бутун шаҳар бошқармасида хатарли ифодасини топади. Равшанки, мен касодга учраши истамайман, бунга ҳеч қанака асос ҳам йўқ. Агар вахима хавфи бўлмагандা, bemalol айта олар эдимки, менинг ишларим ҳали ҳеч қачон бунчалик яхши бўлмаганди. Бироқ қўмак олмасам мен бўронга бардош бера олмайман ва сиз менга шундай ёрдам кўрсата оласизми – шуни

## ЖАҲОН АДАБИЁТИ

бильмоқчиман. Агар яхши чиқиб олсам, сизга сўз бераман, пулларни шаҳар газнасига тезроқ қайтариш учун барча чораларни кўраман. Афсуски, мистер Стинер ҳозир шаҳарда эмас, бўлмаса сўзларимни тасдиқлатиш учун мен уни сизнинг қошингизга келтирган бўлардим.

Стинерни ўзи билан олиб келиш нияти ҳақида гапирав экан, Каупервуд ҳеч бир истихоласиз ёлғонламоқда эди: қисмларга бўлиб-бўлиб ва унга қулаи муддатларда пулларни шаҳар газнасига қайтармоқчи ҳам эмасди. Аммо бу ваъдаларнинг барчаси вижданан ва ишончли садо бераётганди.

– Стинер сизнинг ишингизга қанча пул қўйди? – қизиқсинди Батлер. Қутилмаганда ишнинг бундай тус олиши уни бироз эсанкиратиб қўйганди. Бу барча ҳангомалар Каупервуд ва Стинерни улар учун фойдасиз бўлган вазиятта солганди.

– Беш юз доллар атрофида, – жавоб берди Каупервуд.

Кария ором курсида гавдасини тўғрилади.

– Наҳотки шунча кўп бўлса? – беихтиёр нидо солди у.

– Ҳа, тахминан... балки бироз оздир ё кўпdir, мен анигини билмайман.

Кекса пудратчи Каупервуднинг унга баён қилган гапларини ғамгин ва жиддий тусда тинглади, айни вақтда бу республикачилар партияси манфаатларига ва унинг шаҳар бошқармаси билан шахсий шартномаларига қандай таъсир қилишини ўйларди. Каупервуд унга хайриҳолик билан гапиради, аммо у ҳозир ҳикоя қилган иш шубҳали ва ғоят нопок кўринмоқда эди. Батлер сусткаш, ўйчи одам эди, бироқ борди-ю, у бирон масала устида ўйлай бошласа, уни охиригача ўйларди: Филадельфия конкали темир йўлларига у дурустгина маблағни – камида саккиз юз минг долларни сарфлаган эди; Молленхаурники, хойнаҳоӣ, ундан ҳам қўпроқdir. Бу ишга сенатор Симпсон қанча сарфлаган, у билмасди. Аммо Каупервуд ўз вактида унга сенатор ҳам бундай акцияларнинг йирик-йирик боғламлари эгаси саналишини гапиранди. Каупервудда бўлгани каби, улардаги бу қофозларнинг катта қисми турли банкларга қўйилган, улар устидан олинган пуллар эса бошқа иншоотларга сарфланганди. Ссудаларни тўлаб қўйиш талаби уларга ҳаргиз яхшилиқдан дарак бермасди, аммо барибир бу учлиқдан биронтасининг иши бу қадар ачинарли ҳолатда эмасди. Борди-ю, ўз-ўзини ҳимоя этишнинг дарҳол чоралари кўрилгудек бўлса, гарчи озрок зарар ҳисобига бўлса ҳам улар ортиқча ташвиш-тадораксиз ўзларини ўнглаб олар эдилар.

Агар Каупервуд унга Стинернинг бу ишга етмиш беш ёки юз минг доллар қўйганини хабар қилганида, Батлер бу ишга бунчалик аҳамият бермаган бўларди. Буни бир амаллаб тўғрилаш мумкин эди. Аммо беш юз минг!..

– Катта пул! – деди Батлер Стинернинг фавқулодда жасоратига қойил қолиб, аммо уни ҳали Каупервуднинг оқилона найранглари билан боғламаган холда. – Бу ерда мияни яхшигина ишлатиб кўриш керак. Борди-ю, эртага вахима бошланиб кетса, биз бир дақиқа ҳам йўқотмаслигимиз керак. Бизнинг бозорни тутиб туришимиздан сизларга кўп фойда келадими?

– Жуда кўп, – жавоб берди Каупервуд, – ҳолбуки менинг бошқа йўллар билан ҳам пул топишимга тўғри келади. Айтганча, менда сизнинг юз минг доллар қўйилмангиз бор. Нима дейсиз, якин орада улар сизга керак бўлмайдими?

– Эҳтимол.

– Истисно эмаски, менга бу пуллар жуда керак, аммо уларни ўзим учун жиддий заарсиз сизга тезда қайтара олмайман, – деди Каупервуд. – Бу ҳали бутун занжирдаги кўплаб ҳалқалардан биттаси. Борди-ю, сиз, сенатор Симпсон ва Молленхаур бир ёқадан бош чиқарсангиз, – акцияларнинг асосий миқдори сизларнинг қўлларингизда-ку, – ва мистер Дрексель ва мистер Кукка таъсир ўтказсангиз, мухитни бир мунча мўътадиллаштиришга муваффақ бўлар эдингиз. Мен вазиятдан аъло даражада чиқиб оламан, чунки ҳали-вери мендан қарзни тўлаб қўйишимни талаб этишмайди, борди-ю, биржада қиймат ҳаддан

## ЖАҲОН АДАБИЁТИ

ташқари тушиб кетмаса ҳеч ким мендан буни талаб қилмайди. Акс ҳолда эса менинг барча қофозларим қадрсизланади-да, мен бунга бардош беролмайман.

Кария Батлер ўрнидан турди.

— Иш жиддий, — деди у. — Стинер билан алоқа қилмаслигингиз керак эди. Қайси томондан олиб қарама, булар бариси хийла хунук кўринади. Жирканч, жирканч ҳангома, — совуқ қўшиб қўйди у. — Шундай бўлса-да, мен қўлимдан келган ҳамма ишни қиласман. Кўп ваъда қилмайман-у, аммо мен сизга ҳар доим яхши муносабатда бўлиб келганман ва сизни мусибатда қолдирмоқчи эмасман, жуда ҳам нохуш гаплар! Яна бир гап эсингизда бўлсинки, шахримиздаги ишларни ёлғиз ўзим ҳал этмайман!

Шу сўзларни айтиб, Батлер, сирасини айтганда, Каупервуд уни манфаатлари ва муниципалитетдаги сайловлар хатар остида қолаётганидан огоҳ этиб, жуда тўғри иш қилди, деб ўйлади, ҳолбуки бошқа жиҳатдан у ўз жонини ҳам кутқариб қолмоқда эди. Нима бўлганда ҳам Батлер унинг учун кўлидан келган ҳамма ишни қилишга азму қарор этди.

— Содир бўлаётган воқеаларни яхшилаб ўрганиб олгунимча Стинер ва шаҳар ғазнаси билан боғлиқ ишларни бир-икки кун овоза қилмай туришнинг иложи бўлармикан? — эҳтиёткорлик билан сўради Каупервуд.

— Айтотмайман, — жавоб берди Батлер. — ҳолбуки мен ўзимга боғлиқ ҳамма ишни қиласман. Аммо сиз хотиржам бўлишингиз мумкин: бу гаплар узоққа бормайди, бу ҳам сизнинг ишингиз ўнгидан келишига аскотиб қолади.

Борди-ю, Каупервуд барибири ҳам касодга учрагудек бўлса, у Стинер содир этган жиноят оқибатларидан қандай қутилиб чиқади, энди у шунинг устида бош қотиради.

— Оуэн! — чакирди у эшикни очиб ва зина панжараси оша эгилиб.

— Лаббай, ота?

— Дэнга айт, аравага отни қўшиб, эшик тагида кутиб турсин. Ўзинг ҳам кийин, мен билан борасан.

— Хўп бўлади, ота.

Батлер хонага қайтиб келди.

— Ана, холос! Арзимаган сабаб билан бўлган ғавғо, шундай эмасми? Чика-года ёнгин, бу ерда, Филадельфияда эса ташвишлардан сира бошим чиқмайди менинг! Бай-бай-бай!..

Каупервуд туриб, эшик томон йўналди.

— Сизга йўл бўлсин?

— Уйга, кўришишим керак бўлган бир нечта одам келадиган эди уйимга. Аммо йўқ демасангиз, сал туриб яна кираман олдингизга.

— Ҳа, ҳа, албатта, — жавоб берди Батлер, — менимча, ўн иккига қолмай уйда бўлсан керак. Бўпти, яхши боринг! Дарвоқе, биз ҳали яна кўришамиз. Нималарни билишга улгурган бўлсан, ҳаммасини сизга сўзлаб бераман.

У нимагадир ўз кабинетига қайтди ва Каупервуд зинадан ўзи тушди. Дарвоза олдида турган Эйлин уни имлаб чақирди.

— Қўрқадиган ҳеч гап бўлмагандир, азизим? — ташвиш билан сўради қиз йигитнинг кўзларига боқиб, бугун бу кўзлар қандайдир тантанавор ва жиддий эди.

Хозир ишқий гап сотишлар вақти эмасди ва Каупервуд буни ҳис этиб турарди.

— Йўқ, — деярли совуқ жавоб берди у, — қўрқадиган ҳеч гап йўқ деса бўлади.

— Фақат, қара Фрэнк, ишларингни деб мени узоқ эсдан чиқариб қўйма! Эсдан чиқармайсанми? Ростданми? Сени шундай севаманки!

— Йўқ, йўқ, эсдан чиқармайман! — жавоб берди йигит жиддий ва тез, ҳолбуки сўзининг охангидан унинг хаёллари узоқларда кезаётгани билиниб турарди.

— Ўзинг биласан-ку! Сени мен эсдан чиқарап эканманми? — У қиздан бўса олмоқчи бўлди, бироқ қандайдир шитирлаган овоздан у қўрқиб кетди. — Тўхта!

Каупервуд эшик томон йўналди ва Эйлин уни ишқ ва ҳамдардлик тўла нигоҳлари билан кузатиб қолди.

Унинг Фрэнки бошига қандайдир мусибат тушса нима бўлади? Дунёда баҳтсизликлар озмунчами? Унда нима қилади Эйлин? Қизни мана шу фикр ҳаммадан кўп қийнар эди. Унинг қўлидан нима келади, севгилисига қандай ёрдам бера олади? Бугун Фрэнкнинг рангига қараб бўлмасди – бўздай оқариб кетган, бирам хоргинки...

## XXIV БОБ

Каупервуд тушиб қолган вазиятни тўғри ёритиш учун ўша вақтдаги Филадельфияда республикачилар партияси билан Жорж Стинер, Генри Молленхауэр, сенатор Марк Симпсон ва бошқалар ўртасидаги муносабатлар ҳақида бир неча оғиз сўз айтишимизга тўғри келади. Олдин кўрганимиздек, Каупервуд билан одатдаги ишбилармонлик манфаатлари юзасидан боғлиқлиги устига яна унга дўстлардай суюниб қолганди. Стинер Каупервуднинг қўлида сўқир курол бўлиб хизмат қиласиди. Молленхауэр ва сенатор Симпсон шаҳар ишларига таъсир кўрсатишда Батлер билан бекорга ракобат қилмасди. Симпсон штатнинг қонун чиқарувчи ийғилишида республикачилар партияси вакили бўлар эди, бу партия зарурат туғилганда шаҳар бошқармасидан маҳаллий сайлов қонунларини ўзгартиришни, шаҳар муассасалари низомларини қайта кўриб чиқиши, сиёсий ташкилотлар ва алоҳида шахслар фаолиятини тадқиқ этишни талаб қила олар эди. Қатор-қатор бообрў рўзномалар, хиссадорлик жамиятлари, банклар Симпсоннинг хизматига шай эдилар. Басавлат ва ҳурматли одам бўлмиш Молленхауэр Филадельфия немислари, бир қанча американлик хонадонлар ва талай йирик акционерлик жамиятлари вакили эди. Учалалари ҳам кучли, эпчил ва сиёсий майдонда уларга дуч келган ҳар қандай ракибни бир чўқишида қочирадиган одамлар эди. Кейинги иккови Батлернинг ирландлар, айрим маҳаллий партия раҳбарлари ва фахрли католиклар орасидаги обрўйига озмунча орқа қилмас эди. Католикларнинг Батлерга ишонганлари шунчаликки, уни бамисоли руҳий отадек кўрар эдилар. Ўз навбатида Батлер ўз муҳлисларини ҳомийлик, эътибор ва муттасил дуойи хайрлар билан сийлаб турарди. Бу ғамхўрликларга мукофат тарзида шаҳар Молленхауэр ва Симпсон воситасида унга йўлларга тўшаш, кўприклар ва сувайирғичлар қуриш, канализация ётқизишга йирик-йирик пудратлар ҳавола этарди. Бирок бу пудратларни фақатгина унинг ўзи таниқли арбоби бўлган ва уни, таъбир жоиз бўлса, боқиб турган республикачилар партияси ишлари бадастир ва бехато олиб борилиши шарти билан олиш мумкин эди. Бошқа жиҳатдан, нима учун у Молленхауэр ёки Симпсонга қараганда (ахир Стинер унинг шотири эмас-ку) кўпроқ жон куйдириши керак экан? Хизмат юзасидан ғазначи асосан Молленхауэрга буйсунарди.

Ўғли билан кабриолетга чиқиб ўтирар экан, содир бўлган воқеалардан қаттиқ ташвишланган Батлер шулар ҳақида ўйлар эди.

– Ҳозиргина Каупервуд олдимга келиб кетган эди, – деди у Оуэнга. Оуэн сўнгги вақтларда молия ишларини аъло даражада тушунадиган бўлиб қолганди, сиёсий ва ижтимоий масалаларда эса, гарчи у қадар кучли шахс бўлмаса-да, отасига қараганда кўпроқ хушёрлик кўрсатар эди. – Жуда кийин ақволга тушиб қолдим деяпти? Гапимни эшитаяпсанми? – қўшиб қўйди у, қулоғига: “Тезкор нашр”, Тезкор нашр!” қичқириқлари чалинганди. – Чикаго ўт ичида. Эртага биржада тўс-тўполон кўтарилади. Бизнинг темир йўл акцияларимиз турли банкларга кўйилган. Кулокни динг тутмоқ керак, акс ҳолда биздан ссудаларни тўлашини талаб этишлари мумкин. Эртага биринчи ишмиз бундай бўлмаслиги ғамини ейиш, вассалом. Каупервудда менинг юз минг долларим бор, у эса бу пулни олмай туринг деяпти, бундан ташқари эса, айтишига қараганда, ишга Стинер кўйган пуллар ҳам унда эмиш.

## ЖАҲОН АДАБИЁТИ

– Стинер? – ҳайрон бўлди Оуэн. – Нима, у биржани ўйинчоқ деб ўйлаяптими? – Оуэннинг қулоғига Стинер ва унинг яқинлари ҳақидаги мишишлар етиб келганди, аммо у бунга кўпда эътибор бермаган ва отасига ҳам бир оғиз гап айтиб улгурмаганди. – Каупервудда унинг пуллари кўп эканми?

Батлер ҳадеганда жавоб бермади.

– Оз эмас, – деди у ниҳоят. – тўғрисини айтсам, ҳаддан ташқари кўп: беш юз минг атрофида, агар бу ошкор бўлиб қолгудек бўлса, жуда катта ғалва кўтарилади.

– Ўх-хў! – деб юборди ҳайратдан Оуэн. – Беш юз минг доллар! Ё алҳазар! Наҳотки Стинер ярим миллион долларни ўмарган бўлса? Вижданан айтадиган бўлсақ, шундай ишга унинг ақли етганига ишонмаган бўлардим. Беш юз минг! Бу маълум бўлиб қолса, жанжал кўтарилиши аниқ!

– Ҳай-ҳай, сал ўпкангни бос! – жавобан деди Батлер, бу қандай рўй бериши мумкинлигини ўзича ёрқинроқ тасаввур ҳосил қилишга уриниб. – Биз барча тафсилотларни билмаймиз. Эҳтимол, Стинер аввалига бунча кўп пул олмоқчи бўлмагандир. Ҳали бари изга тушиб кетар. Пул турли иншоотларга қўйилган. Каупервуд ҳали касодга учраганича йўқ. Пуллар ҳам ҳеч қаёққа гумдан бўлмаган. Энди уни қандай кутқаришни ҳал этмоқ керак. Шу пайтгача унинг бирон марта ёлғон гапирганини кўрмаганмиз, агар бу сафар ҳам рост айтаётган бўлса, у кутулиб чика олади, ишқилиб, шаҳар темир йўллари акциялари эртага эрталаб хомталаш бўлиб кетмаса бўлгани. Мен ҳозир Молленхауэр ва Симпсон билан учрашаман. Улар ҳам шу қоғозлардан манфаатдор. Каупервуд мендан улар билан гаплашишни илтимос қилди; улар бозорни ушлаб туришлари учун мен банкларга таъсир кўрсатишга муваффак бўларман. Борди-ю, эртага қийматни тутиб туриш учун биржада бу акцияларни ҳарид қила бошласак, биз ўз пулларимизни мустаҳкамлаб оламиз, деб ўйлаяпти у.

Оуэн Каупервуд ҳакида нимани билса, ҳаммасини тез хаёлидан ўтказди. Унинг фикрича, Каупервуднинг боплаб таъзирини бериб қўйиш керак. Булар бари унинг иши, Стинернинг эмас, бунга Оуэн шак-шубҳа қилмасди. У фактат бир нарсадан ҳайрон эди – отасининг ўзи буни кўрмаяпти ва Каупервуддан жаҳли чиқмаяпти.

– Сизга бир гапни айтмоқчиман, ота, – бироз сукутдан сўнг хиёл санъаткорларга ҳос оҳангда деди Оуэн. – Каупервуд Стинердан олган пулига акцияларни сотиб олган ва ботқоққа ботиб қолган. Ёнгин бўлмаганда, у сувдан куруқ чиқкан бўларди, аммо ҳозир сиз, Молленхауэр, Симпсон ва бошқалар уни ботқоқдан тортиб чиқаришларини истаяпти. У ажойиб бола, мен билан ҳам муомаласи яхши, аммо сиз унинг айтганига юрадиган бўлсангиз, бу сизнинг ғирт телбалигингизни билдиради. Бусиз ҳам у керагидан кўпроғини қўлга киритиб бўлган. Яқинда эшитиб қолдим, Фронт-стрит изи ва Грин ва Коутс изининг қатта қисми унга қаараркан, бу ҳам етмагандай, Стинер билан биргалиқда у Ўн еттинчи ва Ўн тўққизинчи кўчаларнинг эгалари ҳам саналаркан. Каупервуднинг ҳар икки ҳолда ҳам ўзи учун акцияларнинг назорат боғламини яшириб қўйганига ишонгим келмаяпти. Стинер пиёда дона, холос, Каупервуд уни истаган мақомига солиб ўйнаяпти.

Ҳасад ва нафратдан Оуэннинг кўзлари чақнаб кетди. Каупервуд боплаб жазоланиши керак: унинг иншоотини тўғри келган нархга сотиб, ўзини эса конкали темир йўллар акционерларидан ҳайдаб юбориш керак. Оуэн қачонлардан буён бу ишда етакчилик қилишга интиқ эди.

– Кўрмайсанми, – мужмал жавоб берди Батлер, – мен доим бу йигитнинг ақлига тан бериб келардим, аммо унинг бунаقا туллак эканини хаёлимга келтирмагандим. Ҳаммасини жуда ўрни-ўрнига қўйиб бажарган. Сен ҳам, кўриб турибман, анойилардан эмассан, шундайми? Хўш, ҳали ҳаммасини яхшилаб чўтга солиб кўриш керак. Балки бу ишни бир ёқлик қилиб олармиз. Бу ерда бир фоят жиддий ҳолат бор. Биз энг аввало Республикачилар партияси ҳакида эсл-

## ЖАҲОН АДАБИЁТИ

шимиз керак. Бизнинг муваффақиятимиз, ўзинг биласан, унинг муваффақияти билан чамбарчас боғлиқ. – У жим бўлиб қолди ва ўғлига қаради. – Борди-ю, Каупервуд касодга учраса ва пуллар ғазнага қайтарилмаса... – Қария тўсатдан бошлаган гапини ўзи бўлди. – Бу можарода мени факат Стинер ва шахар ғазнаси безовта қиласди. Борди-ю, биз ҳеч қандай чора кўрмасак, республикачилар партияси қузги сайловларда ёмон ахволга тушиб қолади, унга қўшилиб бизнинг бир қанча пурдатларимиз ҳам учиб кетиши мумкин. Ноябрда сайловлар бўлишини унутма! Ўй-хаёлимда бир гап: ундан мана бу юз минг долларни олсаммикин ё олмасаммикин? Қарзларни тўлаш учун эрталаб менга озмунча пул керак бўлмайди.

Кишининг табиати ҳам ғалати бўларкан: ахволининг нечоғлик оғирлигини Батлер энди-энди ўзича чамалай бошлаганди. Унга ўз эҳтиёжларини сўзамоллик билан баён этган Каупервуд борлигида у йигитнинг шахсияти ва унга бўлган хурмати таъсирига азбаройи берилиб кетганидан ҳатто бу воқеа унинг манфаатларига дахл қилишини дурустроқ суриштирамбди ҳам. Факат эндинга, оқшомги тоза ҳавода ўзининг такаббурона фикрларидан маст ва Каупервудни аяб ўтириш керакмаслигини зўр бериб уқдираётган Оуэн билан сухбатлашар экан, Батлер воқеаларга хушёр қарай бошлаган ва барча тафсилотлар озми, кўпми даражада унинг кўз ўнгига тўғри гавдаланган эди. У Каупервуднинг республикачилар партияси обрўйига жиддий зарар келтирганини ва шахар ғазнасини, бунга қўшиб Батлернинг ҳам манфаатларини ҳавф остида қолдирганини тан олишга мажбур бўлди. Шундай бўлса-да, қария уни яхши қўрар ва уни қисмат домига ташлаб қўйиш ниятида эмасди. Каупервудни – тўғри, шунақаси республикачилар партияси ва ўзининг ишларини ҳам кутқариб қолиш учун у ҳозир Молленхауэр ва Симпсоннинг олдига отланди. Аммо барибир ҳам бу қандай шармандалик! Ёш бўла туриб уни бундай ғаламисликлар қиласди, деб ким ўйлаганди! Батлер ғазабланар, депсинар эди. Шунақа қаллобликка ҳам борадими, киши? Шундай бўлса-да, Батлернинг хали ҳам ундан кўнгли қолмаган эди; агар уни кутқариб қолиш мумкин бўлса, Каупервуд учун қандайдир чоралар кўриши кераклигини хис этарди. Ҳатто унинг илтимосини адо этиши ҳам истисно эмасди ва борди-ю, бошқалар ҳам йигитга хайриҳоҳлик билдиргудек бўлишса, сўнгги дақиқагача ўзининг юз минг долларни тўғрисида чурқ этиб оғиз очмайди.

– Тўғрисини айтсан, ота, – сукутдан сўнг деди Оуэн, – нима учун Молленхауэр ва Симпсондан кўра сиз кўпроқ ташвишланишингиз кераклигини тушунмайман. Борди-ю, учвларингиз Каупервуднинг кутилиб чиқишига ёрдам бермоқчи бўлсаларингиз, ўзларингиз биласизлар; аммо, ўлай агар, бу сизларга нима учун керак, сира тушунмайман! Албатта, агар бу ҳангома сайловгача юзага чиқиб қолса, яхшиликка олиб келмайди, аммо ўшангача бу ҳақда оғиз очмай туриш мумкин эмасми? Сизнинг конкали темир йўлга сарфлаган пулларингиз мана шу сайловдан муҳимроқ-ку. Борди-ю, сиз конкани қўлга киритиш йўлини топсангиз, сайлов борасида ортиқ ташвишланишингизга ҳожат қолмаган бўларди. Маслаҳатим: борди-ю, акциялар нархи қаттиқ тушиб кетса, банкларнинг даъволарини қондириш учун эртага эрталабданоқ ўзингизнинг юз минг долларингизни талаб қилинг. Бу Каупервуднинг касодга учрашига сабаб бўлади, аммо сизга заррача зарари тегмайди. Сиз биржага борасиз-да, унинг акцияларини сотиб оласиз; борди-ю, шундай таклиф билан унинг ўзи олдингизга югуриб келгудек бўлса, мен сира ажабланмаган бўлардим. Сиз, Молленхауэр ва Симпсонга уқдиришингиз керак, улар Стинерни қўрқитишин, Каупервудга бошқа бир доллар ҳам қарз бермайман деб талаб қилишсин. Агар сиз шу ишни қилмасангиз, у яна Стинер ёнига чопади-да, ундан яна пул олади. Стинер жуда хаддидан ошиб кетибди. Балки, Каупервуд ўз улушини сотишни истамаётгандир, бу унинг иши, аммо у қарийб жарга кулаб бўлди, шунда сиз биржада унинг акцияларини хоҳлаганча сотиб ола оласиз. Мен шахсан унинг

## ЖАҲОН АДАБИЁТИ

акциялари сотилиб кетади деб ўйлайман. Бироқ мана шу Стинернинг беш юз минг доллари деб қонингизни қайнатишингизга ҳожат йўқ. Ҳеч ким уни Каупервудга қарз бер деб мажбур қилмаган. Ўзи билган йўл билан қутулиб чиқаверсин. Тўғри, партияга зарба бўлиб тушиши мумкин, аммо ҳозир муҳими бу эмас. Сиз Молленхауэр билан рўзномаларга босим кўрсатинг, улар сайлов тугагунча жим туришсин.

— Ўпкангни бос, ўглим, ўпкангни бос! – деди ўғлига кекса пурратчи ва яна хаёлга чўмди.

## XXV БОБ

Батлер каби Генри Молленхауэр ҳам шаҳарнинг янги қисмларидан бири, кутубхонанинг шинам ва чиройли биносидан сал нарида Брод-стритда яшар эди. Унинг усти кенг-ковул ва ўша даврдаги янги пайдо бўлган бойлар яшайдиган тураржой хилидан эди – сариқ ғишт ва оқ тош қопланган тўрт қаватли бино ҳар қанака услубдан холи бўлса-да, кўрганнинг кўзи кувонадиган даражада кўркам эди. Кенг зинадан кенгбар пешайвонга чиқиларди, пешайвоннинг ўргасида залворли ўймакор эшик савлат тўкиб турарди, эшикнинг иккала томонида энсиз деразалар бўлиб, улар оч-мовий рангга бўялган, ғоят нафис ўйма гуллар билан ороланганди. Бу уйдаги барча йигирмата хонанинг фарши ҳам, деворлари ҳам ўша вакълардаги энг қимматбаҳо ёғочлардан ишланган эди. Биринчи қаватда катта танобий хона, улкан меҳмонхона ва эман қопламали, ҳажми камида ўттиз фут квадрат келадиган ошхона жойлашганди; иккинчи қаватда – хўжайнинг учала қизига топширилган рояль турган хона, хотинининг пардоҳонаси бор эди, гуслхона ва унча катта бўлмаган қишики боғ шунга туташ эди.

Молленхауэрни ғоят бообру одам деб ҳисоблар эдилар ва ўзи ҳам шундай деб биларди. Сармоядорлик ва сиёсий ишларда у фавқулодда зийракликка эга эди. Гарчанд у немис, тўғрироғи, немислардан келиб чиқсан американлик бўлса-да, ташки кўриниши мутлако американлик эди, бўлганда ҳам салобатли американлик эди. Унинг совуқ кўзларида ўткир ақл чакнаб турарди. Бўйи баланд, тўладан келган гавдаси хушкомат эди. Тоғдек кўкси ва кенг елкаларига чиройли ўрнашган боши у ёқ-бу ёққа ҳаракат қилганида гоҳ думалоқ, гоҳ чўзинчоқ бўлиб кўринарди. Ўйноклаган манглайи жонли, синчков, тик боқувчи кўзлари узра қоядай осилиб турарди. Бурни, оғзи, ияги, шунингдек, семиз ва силлиқ юзи – хуллас, Молленхауэрнинг бутун иирик, маънодор, келишган юзи бу одам барча тўсиқларга нимани кўндаланг қўйишни исташи ва уддалашидан дарак берарди. Эдвард Мэлия Батлер билан Молленхауэрни қалин дўстлик ришталари боғлаб турарди, – бу дўстлик икки ишбилармон ўртасидаги ўзига хос дўстлик эди, албатта, Марк Симпсонни эса у тахминан бир шер иккинчисини хурмат қилганчалик даражада хурмат қиласди. У ўткир истеъодининг қадрига етар ва агар ўйин ҳалол кетадиган бўлса, ҳалол ўйнашга ҳар доим тайёр турарди. Акс холда унинг гайирилиги чегара билмасди.

Якшанба оқшомида Молленхауэр на Эдвард Батлерни, на унинг ўғлини кутганди. Филадельфиянинг барча бойлигининг уч қисмини эгаллаган бу одам ўз кутубхонасида ўтириб, китоб ўқир ва қизларидан бири роялда чалаётган куйини тинглар эди. Хотини ва икки қизи черковга кетишганди. У хонанишин одам эди. Якшанба оқшоми сиёsatчилар оламида умуман турли-туман кенгашлар учун хосиятли вақт бўлганидан, Молленхауэр республикачилар партиясидаги таникли ҳамкарабаларидан битта-яримтаси келиб қолар деган хаёлда эди. Шу боис қария Батлернинг ўғли билан келганини хабар қилганда, у ҳатто суюниб кетди.

— Қандай шамол учирди?! – дея Батлерга пешвоз чикиб, у қўлини чўзди.  
– Жудаям хурсандман, жудаям хурсандман! Оуэн ҳам келдими? Ишларинг қалай, Оуэн? Ичимликдан нима келтирайлик, йигитлар, қайси сигаретдан

**ЖАҲОН АДАБИЁТИ**

чекасизлар? Бошламасига бир қадаҳдан ичмоқ керак. Жон! – мурожаат қилди у хизматкорга. – Ўткирроқ бир нарса келтир-чи!.. Мен ўтириб Каролинанинг қандай чалишини тинглаётгандим. Аммо сизларни кўриб уялди, шекилли, қизалоғим.

У оромкурсини Батлерга сурib кўйди ва Оуэнга столнинг нариги томонидаги жойни кўрсатди. Бир дақиқа ўтмаёқ хизматкор виски, эски шароб шишалари ва турли нав сигарет кутичалари териб кўйилган нафис кумуш баркашни кўтариб келди. Оуэн шароб ва чекищдан ўзини тийган янги турдаги ишбильармонлардан эди. Отаси ундан ҳам, бундан ҳам жуда оз-оздан тотинар эди.

– Уйингиз файзли экан! – деди Батлер, ҳадеганда ўзининг келгани сабаби ҳақида сўз очмай. – Якшанба оқшомида ҳам сизни нега ҳеч қаёқка чиқмайди деса, гап бу ёқда экан-да? Шахарда нима янгиликлар?

– Билишимча, айтарли ҳеч гап йўқ, – хотиржам жавоб берди Молленхауэр. – Ҳаммаси силлиқ кетаяпти. Лекин сиз негадир сал ташвишли кўринасизми?

– Ҳа, бироз, – жавоб берди Батлер, содали конъякни охиригача ичиб. – Ташвишли хабар. Сиз ҳали оқшом рўзномаларини ўқимадингизми?

– Йўқ, ўқимадим. – Шундай деб Молленхауэр оромкурсида гавдасини тўғрилади. – Бугун оқшом сонлари чиқдими ўзи? Нима бўлибди, хўш?

– Чикагодаги ёнгинни айтмаса, ҳеч нима бўлмаган. Эртага эрталаб жамгарма биржамиизда катта тўполон чиқадиганга ўхшаб турибди.

– Нималар деяпсиз! Мен бўлсан ҳеч нарса эшитганим йўқ. Демак, оқшом рўзномалари чиқибида-да?... Хўш, хўш.. Нима, ёнгин катта эканми?

– Айтишларича, бутун шаҳар ўт ичиди эмиш, – деди Оуэн, машҳур сиёсий арбобнинг юзидағи ифодани диққат билан кузатар экан.

– Ҳа.. Буни янгилик деса бўлади! Рўзномага одам юбориш керак. Жон! – чақирди у хизматкорни ва у келгач, деди: – Бирон жойдан рўзнома топиб кел. Нега сиз буни биздаги ишларга таъсир ўтказади деб ҳисоблайсиз? – Батлерга мурожаат қилди у, хизматкор кетгач.

– Биласизми, битта гап бор, у ҳақида мен энг сўнгги дақиқагача ҳеч нарса билмаган эдим. Бизнинг жондан азиз Стинеримиз, эҳтимол, ўз ғазнасидаги пулларни тузук-куруқ билмас ҳам экан, агар баъзилар тахмин қилганидек иш чаппасига айланиб кетмаса, – хотиржам тушунтириди Батлерга. – Бундай ҳодиса эса, ўзингиз билгандек, сайловлар олдидан фойдали таассурот пайдо қилиши амри маҳол, – қўшиб кўйди у ва ақлли мовий кўзларини унга худди шундай қаттиқ тикилиб жавоб қайтарган Молленхауэрга қадади.

– Буни қаердан билдингиз? – совуқ оҳангда сўради Молленхауэр. – Наҳотки, у билиб туриб исрофга йўл қўйган бўлса? Ҳўш, қанча олибди – буни ҳам биларсиз?

– Анча катта “соққа”, – ўша-ўша хотиржам жавоб берди Батлер. – Менинг тушунишимча, беш юз минг доллар атрофида. Ҳали буниси холва. Аммо бундан кейин иш канака тус олади, номаълум.

– Беш юз минг! – ҳайрат билан деди Молленхауэр ўзини кўлга олишга ҳаракат қилиб. – Бўлиши мумкин эмас! Пулни у қачондан ола бошлаган экан? Уни қаерга гумдон қилибди?

– У беш юз минг долларча пулни Учинчи кўчадаги Каупервудга ссуда қилиб бериди, шаҳар заёмини сотган йигит бор-ку, ўшанга. Мана шу пулга улар шахсий манфаатларида турли фирибгарликлар қилишга киришиб кетишибди. Асосан конкали темир йўллар акцияларини сотиб олишган.

Конкали йўллар ҳақида гап кетгани ҳамон Молленхауэрнинг юзи пир-пир уча бошлади.

– Каупервуднинг фикрича, бу ёнгин эртага биржада ваҳима келтириб чиқаради ва у кучли қувватловчиси бўлмаса, банк балога қолишидан қўрқиб турибди. Борди-ю, у касодга учраса, шаҳар ғазнасида беш юз минг долларлик камомад борлиги маълум бўлади, унинг ўрнини ҳеч нарса билан тўлдириб

## ЖАҲОН АДАБИЁТИ

бўлмайди. Стинер шаҳарда эмас, Каупервуд эса уни қўллаш йўлини топинг, деб олдимга илтимос билан келди. Айтишим керакки, бир вақтлар у мен учун баъзи топшириқларни бажарган эди ва шунинг учун энди мени ёрдамга келади деб умид қилибди, яъни сиз билан сенаторни йирик банкларга таъсир ўтказишга кўндиришимни, шу тариқа эртага биржада қимматли қофозлар нархини тутиб туришимизни ўтнибди. Акс ҳолда Каупервуд касодга учрар экан, унинг фикрича, албатта, жанжал кўтарилиб, сайловда бизга зарар келтириши мумкин экан, назаримда, у бу ерда хеч қанақа ўйин қилмаяпти, балки иложи борича ўзини қутқариш ва менга, ёки тўғрирофи, бизга панд бермаслик учун шунчаки ўзини ўтга-чўққа ураяпти.

Батлер жим бўлиб қолди. Маккор ва ичимдагини топ Молленхауэр бу қутилмаган хабар унга паشا чаққанчалик ҳам таъсир қилмагандек ҳатто қилт этмади. Бирок у ҳар доим Стинернинг заррача сармоядорлик ёки ташкилотчилик қобилияти йўқлигига амин бўлганидан бунга қаттиқ қизиқиб қолди. Демак, унинг гумаштаси ғазна маблағларидан унга билдиримай фойдаланган ва энди унга суд олдида жавоб бериш хавфи таҳдид солмоқда! Молленхауэр Каупервудни орқаваротдан, бир вақтлар заёмлар муомаласини олиб боришга таклиф этилган одам деб билар эди. Мана шу ишда Молленхауэр унча-мунча ишлаб ҳам олган эди. Бу банклар Стинерни лақиллатгани кўриниб турибди ва ундан олган пулга Конкали Темир йўллар акцияларини сотиб олган! Бинобарин, унда ва Стинерда бу қофозлардан бир талайи бўлиши керак – Молленхауэрни қаттиқ қизиқтириб қолган жойи мана шу эди.

– Беш юз минг доллар! – тақрорлади у Батлер ўз ҳикоясини тугатганида. – Ҳа-я, каттагина пул! Агар фақат бозорни тутиб туришнинг ўзи Каупервудни сақлаб қола оладиган бўлса, биз унга хўп деган бўлардик, аммо жиддий вахима келиб чиқадиган бўлса, бундай усул натижасиз қолади. Борди-ю, бу йигит маблағдан қаттиқ сикилиб қолган бўлса-ю, биржада нархлар кескин тушиб кета бошласа, уни қутқариш учун яна қатор кўшимча тадбирлар ўтказиш керак бўлади. Мен буни тажрибамдан биламан. Унинг қанча қарзи борлигини билмайсизларми мабодо?

– Йўқ, билмайман, – жавоб берди Батлер.

– Гапингизга қараганда, у сиздан пул сўрамаган-а?

– То унинг аҳволи бир ёқли бўлмагунча мен ундан ўзимнинг юз мингимни олмасам бўлади, шуни истаяпти.

– Стинер ростдан ҳам шаҳарда йўқми? – сўради табиатан хеч кимга ишонмайдиган Молленхауэр.

– Каупервуд шундай деди. Текшириш учун одам юборишимиз мумкин.

Молленхауэр эса вазиятдан оқилона чиқиб кетиш ҳақида бош қотираарди. Қимматли қофозлар нархини тутиб туриш – бу, агар шу тариқа Каупервудни, у билан бирга хизинабон ва республикачилар партиясининг бир қисмини сақлаб колса бўладиган энг яхши йўл, албатта. Стинер беш юз минг долларни ғазнага қайтаришга мажбур бўлади, бунинг учун акцияларни сотишга тўғри келади, бас, шундай экан, уларни Молленхауэр сотиб олса, нима қиласди? Аммо бунда, афтидан, Батлернинг манфаатларини ҳам ҳисобга олиш керак бўлади. Хўш, сирасини айтганда, у нимани талаб қилиши мумкин?

Батлер билан шундан кейинги сұхбатдан Молленхауэр аниқладики, борди-ю, Каупервуд беш юз минг доллар пул топса, бўлди, у ўша камомад ўрнини тўлдиришга тайёр. Конкали Темир излардаги унинг улушлари бора-сида ҳозирча улар сұхбатлашишгани йўқ. Аммо бу йўл билан Каупервудни қутқариш мумкинлигига қандай ишонса бўлади? Ҳатто шундай холатда ҳам унда беш юз минг доллар тўплаш ва уни Стинерга қайтариш хоҳиши ва имконияти бўлади-ку? У ҳозир нақд пулга муҳтоҷ эди, бироқ муқаррар вахима яқинлашиб келаётган айни дамда унга ким беради шунча пулни? Қандай таъминотни у таклиф эта олади? Бошқа томондан, агар яхшигина қисти-бастига

## ЖАҲОН АДАБИЁТИ

олинса, улар икковини – у ва Стinerни – ўзларининг темир йўл акцияларини сувтекинга беришга мажбур қилиш ҳеч гап эмасди. Борди-ю, Молленхауэр бу акцияларни ололса, кузги сайловда унинг партияси енгиди чиқадими ё мағлуб бўладими, унга нима? Дарвоқе, Оуэн сингари у ҳам мағлубиятни четлаб ўтса бўлади, деб хисоблади. Тўғрироғи, олдинги йиллардан ибрат олиб, галабани сотиб олиш мумкин. Борди-ю, Каупервуднинг хонавайронлиги туфайли Стiner қарздор бўлиб қолса, унинг қарзини сайловдаги галабасигача яшириб туриш мумкин бўлади. Дарвоқе, унинг миясидан бир фикр ялт этиб ўтди, Стinerни Каупервудга қўшимча ёрдам беришдан воз кечдириш учун уни чўчтиб қўйиш, кейин эса унинг конкали темир йўллар акциялари ва шу билан бирга бошқа эгаларнинг акциялари нархини кескин тушириб юбориш янада маъкулроқ бўларди. Батлер ва Симпсон ҳам бундан мустасно эмас. Филадельфияда бу излар вақти келиб бойиб кетишининг энг асосий манбаларидан бири бўлиб қолади. Аммо ҳозир ўзини биринчи галда олдинда турган сайловда партияни куткаришдан бошқа ғами йўқдай қилиб кўрсатиши керак.

– Мен, албатта, масалани сенатор учун ҳал қилолмайман, – ўйчан гап бошлиди Молленхауэр, – унинг нуқтаи назари қандай бўлишини ҳам билмайман. Аммо борди-ю, бу қандайдир фойда келтирадиган бўлса, қимматли қофозлар нархини тутиб туриш учун мен шахсан қўлимдан келган ҳар қандай ишни қилишга тайёрман. Лоакал банклар мендан ҳам қарзни тўлаб қўйишни талааб қилишлари мумкинлиги учун шундай қилишга тайёрман. Аммо ҳозир биз энг аввало, борди-ю, Каупервуд барибир қасодга учрайдиган бўлса, сайлов тугагунча овоза қиласлик чорасини кўрмоғимиз лозим. Чунки, бозорни тутиб туришдаги саъй-ҳаракатларимиз муваффақият қозонишига биз тўла амин эмасмиз.

– Заррача ҳам! – тумшайиб тасдиқлади Батлер.

Оуэн ўзича Каупервуд тамом бўлди, деган хаёлда эди. Бироқ шу топ эшик қўнғироғи жиринглаб қолди. Рўзномага кетган хизматкор ўрнидаги оқсоч сенатор Симпсон келганини хабар қилди.

– Касал тузалгиси келса, табиб ўз оёғи билан келади! – деб юборди Молленхауэр. – Айтинг, кирсин! Ҳозир унинг фикрини биламиз.

– Мен сизларни холи қолдирсам, нима дейсизлар? – отасига мурожаат қилди Оуэн. – Мисс Каролинанинг олдига бораман-да, менга биронта қўшиқ айтиб беришини илтимос қиласман. Сизни кутиб турман, ота, – қўшиб қўйди у.

Молленхауэр “маъқул” дегандай унга жилмайиб қўйди ва Оуэн чиқиб кетди, эшиқда у сенатор Симпсонга тўқнаш келди.

Дунёга талайгина истеъоддли шахсларни берган Пенсильванияда ҳали ҳеч қачон сенатор Симпсондан қизиқарлироқ одам гуллаб-яшнамаган. Ҳозир уни илиқ қарши олган Батлер ва Молленхауэрга қарши ўлароқ унинг ташқи кўриниши камсуқумроқ эди: бўйи унча баланд эмас – беш футу тўққиз дюйм, Молленхауэрнинг бўйи эса олти футга етарди, Батлерники – беш футу ўн бир дюйм, юзи хўмрайган ва ияги тик тушган – анави иккаласининг юзлари қўймага ўхшарди, зилдай жағлари олдинга туртиб чиққанди. Нигоҳи ҳам Батлерга ўхшаб, у қадар очиқ, Молленхауэрга ўхшаб, у қадар кибрли боқмасди. Аммо қўзларидан ақл ёғиларди. Ичига чуқур ботган, тубсиз қўзлари ғалати кўринарди; улар коронғу бурчакда ўлжасини маккорлик билан пойлаб турган мушукнинг қўзларини эслатарди. Хурпайган қалин қора сочи унинг ясси, оппоқ пешонасига тушиб турар, юзи эса соғлиги ёмон одамлардай, кўкиштобрангпар эди. Ташқаридан шундай кўрингани билан бу одамда ўзига хос, ўжар, фавқулодда бир куч яширин эдики, унинг ёрдамида у одамларни ўзига бўйсундириб оларди, – бойиб кетишига ваъдалар бериб, бирорвлар нафсини ҳакалак оттирадиган айёр ҳам, унга фириб бермокчи бўлгандарни жазолашда шафқат билмас бағритош ҳам эди. Симпсон шундай бичимдаги кўплаб одамлар сингари камгап, қўллари ориқ, муздай, сирпанчик ва жилмайиши ҳам

## ЖАҲОН АДАБИЁТИ

ланж бўлса-да, кўзларидаги маънодорлик унинг ташки кўринишидаги барча камчиликларни босиб кетарди.

— Хайрли оқшом, Марк, сизни кўрганимдан хурсандман, — қарши олди уни Батлер.

— Салом, Эдвард, — паст овозда алик олди меҳмон.

— Қани, азизим сенатор, шунча ёшга кирсангиз ҳам кирчиллама йигитдайсиз. Сизга нимадан қуяйлик, буюрсинлар!

— Йўқ, Генри, ҳеч нарса ичмайман, — жавоб берди Симпсон. — Йўл-йўлакай шундоқ бир кириб ўттай дегандим. Хотиним шу яқин-атрофда, Кэвеноуницида, ҳали у ёққа ҳам боришим керак.

— Кошки жуда вақтида келганингизни билсангиз, сенатор, — гап бошлиди Молленхауэр, меҳмон ўтиргандан кейин ўрнига чўкар экан. — Биз сиз билан кўришмаган вақтдан бери юзага келган сиёсий маънодаги кичик бир кийинчилик ҳақида ҳозиргина Батлер сўзлаб турганди. Чикагода катта ёнгин рўй берганини, ҳойнаҳой, эшитгандирсиз?

— Ҳа, менга бу ҳақда ҳозиргина Кэвеноу айтди. Иш анча жиддийга ўхшаб кўринаяпти. Эртага эрталаб қимматли қоғозлар нархи кескин тушиб кетиши турган гап.

— Мен ҳам шундай деб биламан, — тасдиқлади Молленхауэр.

— Мана оқшом рўзномаси ҳам келди! — деди Батлер қўлида рўзнома билан кириб келган хизматкорни кўриб.

Молленхауэр рўзномани олди-да, стол устига ёйди. Бу Америкадаги энг тезкор нашрлардан бири эди; йирик-йирик ҳарфлар билан терилган сарлавҳалар кеча оқшом “кўллар” шахрида бошланган ёнгин соат сайин кенгроқ ёйилиб бораётгани ҳақида хабар берарди.

— Даҳшат, — деди Симпсон. — Чикагога ичим ачиб кетаяпти. У ерда кўп дўстларим бор. Худо хоҳласа, аслида бу ерда ёзганларидаи қўрқинчли бўлмаса керакдир.

Симпсон хамма жойда ва ҳар қандай ҳолда ўзини бир поғона юқори тутарди.

— Батлер менга ҳозир айтган нарса, — давом этди Молленхауэр, — кайсиadir даражада мана шу мусибатга боғлиқ. Ўзингиз биласиз, ҳазинабонларимизнинг йилига икки фоиздан шаҳар пулларини қарзга бериш одати бор...

— Нима қилиби? — сўради Симпсон.

— Гап бундай, мистер Стинер, аниқланишича, Учинчи кўчадаги ёш Каупервудга шаҳар маблағларидан катта-катта қарзлар бериб турган, — бу ўша заёмларимизни сотиш билан шуғулланган йигит.

— Нималар деяпсиз? — деди Симпсон таажжубга тушгандек. — Кўп қарз берибдими унга?

Батлер ва Молленхауэр каби сенаторнинг ўзи ҳам турли банкларга кўйилмалар кўринишида тақдим этилган ўша манбадан фойдасига қарз (ссуда)-лар олиб, дурустгина бойиб олганди.

— Стинер унга беш юз минг долларга яқин қарз берганмиш, борди-ю, Каупервуд хатарга бардош беролмаса, Стинерда шунча миқдордаги камомад борлиги маълум бўлиб қолади; ўзингиз билгандек, бундай гаплар сайловчиларда анча ноҳуш таассурот пайдо қиласи. Каупервуд мистер Батлерга юз минг доллар бериши керак ва бугун музокара килгани уникига келган эди. Мистер Батлер орқали у биздан қутулиб чиқишига ёрдам сўрабди. Акс ҳолда, — Молленхауэр кўли билан маънодор ишора килди, — у касодга учрайди.

Симпсон ингичка кўли билан иягини силаб қўйди.

— Ярим миллион долларни нима қилишибди улар? — сўради у.

— Бу учарлар четдан унча-мунча ишлаб олишибди, —мийигида кулиб деди Батлер. — Афтидан, улар конкали темир йўллар акцияларини сотиб олишган, — кўшиб қўйди у, каттакон бошмалдоғини жилемининг ўмизига тиқиб.

Молленхауэр ва Симпсон заҳархандалик билан жилмайиб қўйишиди.

## ЖАҲОН АДАБИЁТИ

– Шунақа денг, – деди Молленхауэр.

Сенатор Симпсон сукут сақларди, фақат юзидағи ифода фикрининг қаттық ишләётганидан гувохлик беріб турарди. Айниңса, яқынлашиб келаётган бўхрон олдидан сиёсатчилар ва ишбилиармонлар гурухига бундай илтимос билан мурожаат қилиш нечоғли бемаъни экани ҳакида ўйлаётганди у ҳам. Тўғри, хаёлидан нимадир лип этиб ўтди, дурустгина йўли бор: у, Батлер ва Молленхауэр бир ёқадан бош чиқарадилар ва Каупервудни кўллаб-кўлтиқлайдилар, бунинг эвазига у конкали темир йўллар акцияларининг барини уларга топширади. Бундай ҳолда, ҳарқалай, бу гап тўғрисида лом-мим демаслика газна билан қелишиб олишади, аммо, бошқа томондан, қанақа кафолат бор, биринчидан, Каупервуд ўз акцияларидан ажралиб қолишини истайдими? Ва, иккинчидан, Батлер ва Молленхауэр у, яъни Симпсон билан бу битимни кўллайдиларми? Батлер, ўз-ўзидан маълумки, бу ерга Каупервуд учун бир оғиз сўзини аямаслика келганди. Молленхауэрга келсақ, у ҳар доим у билан зимдан ракобатчилик қилиб келади. Гарчи улар сиёсий майдонда ҳамкорлик қилишса-да, аммо сармоядорлик мақсадлари иккаласида ҳам тубдан фарқ қиласади. Дарвоҷе, Батлер ва Молленхауэрда ҳам бўлмагани каби уларда ҳам умумий сармоядорлик манфаатлари йўқ эди. Қолаверса, Каупервуд у айтганчалик содда-тўйл эмас. Бу ишдаги унинг айбини Стинернинг айби билан асло солиштириб бўлмасди: ахир қарз берувчи Каупервуд эмас, Стинер-ку. У ми-ясиға келган оқилона ечимни ҳамкасабаларига айтса бўлармикан? Ўзига-ўзи шу саволни берди-ю, ўша заҳоти бир тўхтамга келди – йўқ, бўлмайди. Бундай ҳамкорлик қилишда Молленхауэрга ишониб бўлмайди – у илоннинг ёғини ялаган. Тўғри, имкониятларга гап йўқ, аммо хатар ҳам кичик эмас. Ундан бир ўзи ҳаракат қилгани маъқул. Ҳозирча эса Стинердан беш юз минг долларни қайтариши учун Каупервудга тазиқ ўтказишина талаб қиладилар. Борди-ю, бундан бир нима чиқмаса, унда партия манфаати йўлида Стинерни қурбон қилишга тўғри келади. Каупервудга келсақ, унинг иши ҳолати ҳақидаги бундай аниқ маълумотнинг борлиги асли бошқа киши бўлган шахс ёрдамида биржада мўмайгина пул ишлаб олишга тўла имконият беради. Улар аввалига Каупервуд тушиб қолган ночор аҳвол ҳакида мишишлар тарқатадилар, кейин эса унга ўз акцияларини сотишни таклиф этишади – сувтекинга, албатта. Йўқ, Каупервуд Батлерга бемаврид мурожаат қилганди.

– Мен сизларга бир гап айтаман, – тилга кирди сенатор узоқ жим турганидан кейин. – Мен, маълумки, Каупервудга жуда ачинаман ва конкали темир йўллар акцияларини сотиб олгани учун унга таъна қилиш фикридан йирокман, чунки ўша вактда шунга имкони бўлган; аммо мен, тўғриси, унга нима билан ёрдам беришни билмаяпман, тағин мана бунақа қалтис паллада. Стинерни билмадим-у, жентльменлар, аммо мен ҳозир минг истаганим билан бошқалар учун ўзимни оловга ташлашга ҳаким йўқ. Энг аввало биз химмат камаримизни ечишимиз учун партияга таҳдид solaётган хатар шунчалик катталигини ҳал қилиб олишимиз керак.

Нақд пул сарфлаш устида гап кетгани ҳамон Молленхауэрнинг юзи тундлашади.

– Мен ҳам мистер Каупервудга жўяли ёрдам кўрсатолмасам керак, ҳойнаҳой, – хўрсиниб деди у.

– Жин урсин! – деди Батлер ва унга хос ҳазилкашлик билан қўшиб қўйди: – Истасам-истамасам ундан юз минг долларимни олишимга тўғри келади, шекилли! Эртанги кунни шундан бошлайман.

Бу сафар на Симпсон, на Молленхауэрнинг юзида илгари бўлар-бўлмасга пайдо бўлаверадиган заҳархандалиқдан асар ҳам кўринмади. Улар сир бой бермай савлат тўкиб ўтиришарди.

– Шаҳар газнасидан олинган пулларга келсақ, – давом этди Симпсон, барчалари сал ўзини босиб олгач, – бу ишни яхшилаб ўйлаб олишимизга

## ЖАҲОН АДАБИЁТИ

тўғри келади. Борди-ю, мистер Каупервуд касодга учраса ва ғазна шунча пулни йўқотиб ўтиrsa, биз жуда ҳам оғир ахволга тушиб қоламиз. Каупервуд ўзи биринчи галда konkанинг қайси изларига қизиқиб қолганди? – сўради у шунчаки омади гапдай.

– Тўғриси, билмайман, – жавоб берди Батлер, Молленхауэрникига кетишаётганда Оуэн унга айтган гапни очишга эҳтиёж сезмай.

– Борди-ю, биз Каупервуд касодга учрагунча Стинердан камомадни ундира олмасак, кейинчалик барибир катта кўнгилсизликлар бўлиши мукаррар, – деди Молленхауэр. – Бошқа томондан, agar Каупервуд ундан зарарни ундиришни кутаётганимизни тушунса, у, эҳтимол, зудлик билан дўконини ёпди. Шу боис бу ерда дурустроқ бир иш қилиш мумкин эмас. Бундан ташқари, борди-ю, Эдвард Каупервуд билан ўз ишини тугатгунига қадар бирон чора кўрадиган бўлсак, дўстимизга нисбатан яхши иш қилмаган бўламиз.

У Батлернинг Каупервудга берган замонини назарда тутаётганди.

– Тушунарли, тушунарли, – ўткир сиёсий зийракликка эга Симпсон устамонлик билан тасдиқлади.

– Хотиржам бўлинглар, юз мингимни мен эртагаёқ қайтариб оламан! – деди Батлер.

– Агар хавотирларимиз тўғри бўлиб чиқса, – деди Симпсон, – назаримда, мусибатни сайлов охиригача яшириб туришимиз учун бор кучимизни ишга солишимиз керак бўлади. Рўзномаларни мажбурлаб тинчтиш мумкин. Аммо мен бир нарсани таклиф этардим, – қўшимча қилди у, Каупервуд чакқонлик билан сотиб олган конка акцияларини эслаб, – шаҳар фазнасида юзага келган вазиятни ҳисобга олиб, бошқа ҳеч кимга қарз бермасликка огоҳлантириш лозим. Бўлмаса азамат Каупервуд ундан яна пул талаб қиласди. Унга таъсир ўтказиш учун, Генри, сизнинг сўзларингиз мутлақо кифоя қиласди.

– Бўпти, мен у билан гаплашаман, – қовоғини уйиб жавоб берди Молленхауэр.

– Менимча эса, улар қўлларидан келганча чиранаверсиялар, – ноаниқ жавоб берди Батлер, жамоатчилик манфаатларининг мана бу етук посбонларидан ёрдам сўраб Каупервуд хато қилганини эсларкан. Каупервуднинг Батлер ва бошқа сармоядорлар мана бундай оғир дамларда мени қўллаб-кувватлайди, деб қилган умидлари пучга чиқди.

Батлер билан хайрлашиб, Каупервуд одатдаги ғайрати ила унга ёрдам кўрсатиши мумкин бўлган бошқа шахсларни қидира бошлади. У миссис Стинердан эридан дарак топилади демагунча зудлик билан унга хабар беришини илтимос қилди. “Дрексель ва К” банкирлик уйидан Уолтер Лини, “Жей Кук ва К” фирмасидан Эвери Стоунни ва Жирард миллый банки президенти Дэвисонни қидириб топиб, Каупервуд мана бу воқеалар борасидаги уларнинг нуқтаи назарини билмоқчи, шунингдек, ўзининг барча кўчар ва кўчмас мулки устидан чиқарилган заём хусусида музокара қилиб олмоқчи эди.

– Мен ҳеч нарса деёлмайман сизга, Фрэнк, – яккаш тақрорларди Уолтер Ли, – эртага нималар бўлишини билиб ўтирибманми? Ишларингизни тартибга солаётганингиз жуда яхши. Бу зарур нарсада сизни қўллаб-кувватлашга тайёрман. Аммо, борди-ю, хўжайнилар маълум тоифадаги қарзларни тўлашни талаб этиш зарур десалар, начора, биз бунга бўйсунишга мажбурмиз. Иложи борича вазиятни юмшатиш учун мен бор кучимни ишга соламан. Аммо, борди-ю, Чикаго ростдан ҳам ер юзидан супуриб ташланган бўлса, суғурта компаниялари ёки уларнинг бир қисми, ҳар ҳолда, чирпирак бўлиб кетади, унда эса... факат маҳкам бўлинг! Ўз қарздорларингиздан пулларни қайтаришларини ўзингиз талаб қиласиз деб ўйлайман?

– Шундан бошқа иложи қолмагандан.

– Нима ҳам дердик, бунга бизда ҳам худди шундай қарайдилар!

Улар бир-бирларининг қўлларини сиқиб қўйдилар. Бу иккала одам бир-

бирини хурмат қиласынан жаңынан көрді. Ли ҳаракатлари туғма нозик, дунёвий одам эди, бу унинг чинакам соғлом ақл ва бой ҳаёттый тажрибага эга бўлишига халақит бермасди.

— Сизга бир гап айтаман, Фрэнк, — кўшумча қилди у хайрлашаётуб. — Конкали темир йўллар борасида қуюшқондан чиқиб кетганингизни анчадан бери ўйлаб юрардим. Борди-ю, сиз акцияларни тутиб турса олсангиз, бу, албатта, жуда зўр бўлар эди, аммо ҳозиргидек бунақа оғир дамларда улар туфайли ўтдай куйиб қолиш мумкин. Сиз мана шу қофозларда ва яна шаҳар заёми облигацияларида хаддан ташқари тез “пул ишлаш”га ўрганиб қолгансиз.

У кекса шериги кўзига тик қараб қўйди ва иккаласи ҳам жилмайди. Стоун, Дэвисон ва бошқалар билан ҳам тахминан шундай сұхбат бўлиб ўтди. Каупервуднинг келишигача бостириб келаётган фалокат ҳақидаги миш-мислар уларнинг қулоғига етиб бўлганди. Биронта ҳам одам эртанги кун нима олиб келишини комил ишонч билан айта олмасди. Аммо хайрли бўлишига умид камроқ эди.

Каупервуд яна Батлерникига кириб ўтишга аҳд қилди, зеро, унинг Молленхаузер ва Симпсон билан кўришганига шубҳа қилмасди. Каупервудга нима дейишини миясида обдон пишишиб олган Батлер уни анча хушнуд кутиб олди.

— Э-ха, келдингизми! — деди у, Фрэнкка кўзи тушиши ҳамон.

— Ҳа, мистер Батлер.

— Айтиб қўя қолай, уринишларим ҳеч қандай самара бермади. Ҳеч нарса чиқмаси керак деб қўрқаман, — аста гап бошлади у. — Сиз менга қийин вазифа бердингиз. Молленхаузер бозорни ўз манфаати йўлида тутиб туриш ниятида, шекилли, ўйлашимча, у шундай қиласи ҳам. Симпсоннинг ҳам шундай манфаатлари бор ва уларни химоя қилмоқчи. Мен эса, албатта, ўзим учун сотиб оламан.

Фикрини бир жойга тўплаб олиши учун бўлса керак, у тин олди.

— Мен ҳозирча уларни йирик сармоядорлардан биронтаси билан кенгашиб олишга унатолганимча йўқ, — давом этди у сўзларни чертиб-чертуб. — Улар сабр қилиб, эртага ахвол не кечишини қўришмоқчи. Аммо барибир ҳам сизнинг ўрнингизда бўлганимда, рухимни туширмаган бўлардим. Борди-ю, ишлар бутунлай чаппасига оладиган бўлса, улар, эҳтимол, фикрларини ўзгартиришса керак. Мен Стинер ҳақида бор гапни айтиб беришга мажбур бўлдим. Жирканч гап, аммо улар сизнинг тегирмондан бутун чиқиб ҳамма иш жойига тушиб кетишига умид қилаяптилар. Мен ҳам шунга умидворман. Менинг сиздаги қўйилмамга келсак, нима ҳам дердик, сабр таги – раҳмон. Агар иш имёндан келса, мен уни олмайман. Келинг, яхшиси бу тўғрида эртага гаплашайлик. Айтишганча, сизнинг ўрнингизда бўлганимда, Стинердан яна пул олишга уринмаган бўлардим. Бу ёқдагиларнинг даҳмазаси ўзи етиб-ортиб турибди-ку.

Бу одамлардан ҳеч қандай ёрдам кутиб бўлмаслиги Каупервудга кундай равшан бўлди. Уни ҳаяжонга солган ягона нарса – Стинер ҳақида эслаш бўлди. Наҳотки улар Стинер билан аллақачон тил топишиб, уни огоҳлантиришга улгуришган? Бундай ҳолда Батлерникига келиб, у тўғри иш қилмабди, аммо бошқа томондан, борди-ю, эртага у касодга учраса, бундан бошқа қандай йўл тута олар эди у? Ҳеч бўлмаганда бу жаноблар унинг ахволини тушунишади-ку. Уни узил-кесил бурчакка тикиб қўйишганида, у яна Батлерга мурожаат қиласди ва ўшанда унга ёрдам беришадими, йўқми, ихтиёр уларнинг ўзида бўларди-ку! Борди-ю, улар ёрдам беришдан бош тортиб, у сингудек бўлса, республикачилар партияси эса сайловда мағлубиятга учраса, улар ўзларидан бошқа ҳеч кимни айборд тута олмайдилар. Энди улардан олдинроқ ҳаракат килиб, Стинерни биринчи бўлиб қўриши муҳим, ҳар ҳолда ўзини балога гирифтор қилмасликка унинг ақли етса керак.

— Ҳозир ахволим жуда ҳам аянчли тус олган, мистер Батлер, – дабдуруустдан деди у. – аммо барибир ҳам ўзимни ўнглаб оларман, деб ўйлайман. Ҳар ҳолда,

## ЖАҲОН АДАБИЁТИ

умидимни узганимча йўқ. Сизларни бозовта қилганимдан жуда афсусдаман. Сиз, азизларнинг, менга ёрдам беришингизни ва бу қўлимииздан келади, дейишларингизни кутган эдим, аммо бўлмаганга бўлишма дейдилар. Ўзим бир иложини қиласман. Бундан ташқари, сиз иложи борича қўйилмангизни менда қолдирасиз, деб умид қиласман.

Йигит тез чиқиб кетди ва Батлер ўйланиб қолди. “Ақлингга қойил, йигит, – ичиди деди у. – Унга қаттиқ ачинаман. Аммо тегирмондан бутун чиқса, ажаб эмас”.

Каупервуд уйига ошиқаётганди; отаси ҳали ётмаган ва ўйга толганча маъюс ўтиради. Улар чин дилдан, самимий сұхбатлашиши: ота ва ўғил бир-бирини бир оғиз гапдан тушунишарди. Фрэнк отасини яхши кўрарди. Унинг юзага қалқиб чиқишига тинимсиз уринишларини қўллаб-кувватлар ва болалигида уни қанчалик эркалаб ва паҳ-паҳлаб катта қилганларини бир дақиқа унутмасди. У учинчи миллий банкда Юнион-стритнинг унча қимматли бўлмаган акциялари таъминотига олган кредитни, агар биржада нарх ҳалокатли даражада тушиб кетса, тўлаб қутилиш мумкин деса бўлади. Қандай қилиб бўлмасин, у мана шу ссудани қайтариши керак. Аммо конкали темир йўлларга отаси сарфлаган қўйилмалар нима бўлади? Улар ўзининг пуллари ўсиши баробарида ортиб борар ва умумий миқдори икки юз минг долларга етганди, бу пулларни қандай сақлаб қолиш керак? Акциялар аллақачон қўйиб бўлинганди, улар устидан олинган кредитлар эса бошқа мақсадларда сарфланиб кетганди. Бу ссудалар олинган банкларга кўшимча таъминотлар киритилиши зарур эди. Қаёққа қараманг, ссуда, ссуда, ташвишларга на чек, на чегара бор! Фақат Стинерни унга яна икки юз ёки уч юз минг доллар беришга қўндирилсан! Аммо эҳтимол тутилган молиявий қийинчиликлар олдида бу жинояткорлик ҳисобланарди. Энди ҳаммаси эртангига кунга боғлиқ бўлиб қолганди.

9 октябрь, душанба ҳам келди, кун булатли ва рутубатли эди. Тонг ёришиши билан Каупервуд турди-да, соқолини олди, кийинди ва яшилтоб айвондан отасининг қошига йўл олди. Қария тун бўйи мижжа қоқмаганидан аллақачон оёқда эди. Оппоқ соч-соқоллари тўзғиб кетган, чакка соқоллари бугун у қадар кўркам кўринмаётганди. Кўзлари ҳорғин боқар, юзининг қони қочганди. Унинг қаттиқ изтироб чекканини ўғил дарров пайқади. Ота мўъжазгина силлиқ ёзув столидан кўзларини кўтарди; бу столни Элсуорт унга деб аллақаердан топиб келганди, унда ўтирганча ота Каупервуд ҳозир ўзининг актив ва пассивларини тартиб билан ҳисоб-китоб қиласди. Фрэнкнинг бадани жимиirlab кетди. Отасини ташвишли кўрганида у ҳар доим ичидан қиринди ўтарди, ҳозир эса унга ёрдам беришдан ожиз. Улар иккаласи мана бу янги уйларни куришаётганда, қария учун ташвишли ва ғамли кунлар абадий ортда қолганига ишончи комил бўлганди унинг.

– Ҳисоб-китобларми? – одатдагидек ҳазиломуз сўради у, отасига иложи борича далда беришга ҳаракат қилиб.

– Захираларимни ҳисоблаяпман, нима қилишим кераклигини билмоқчиман, башартики... – У кўзининг қири билан ўғлига қараб қўйди ва Фрэнк жилмайди.

– Ташвиш қилманг, отажон! Мен сизга айтганман: ҳаммасини шундай тузганманки, Батлер ва унинг шериклари бозорни тутиб туришга мажбур бўлишади. Мен Райверс, Таргул ва Гарри Элтингидин биржада қофозларимни сотища ёрдамлашиб юборишларини илтимос қилдим – ахир улар энг яхши маклерлар-ку. Улар жуда эҳтиёткорлик билан ҳаракат қиласдилар. Мен буни Эд ёки Жога топширолмасдим, чунки унда ҳамма менга нима бўлганини дарҳол билиб қоларди. Мана бу йигитлар эса шундай таассурот туғдирадиларки, гўё қимматли қофозлар нархини тушираяптилар, аммо айни вактда унинг ҳаддан ташқари тушиб кетишига йўл қўймаяптилар. Мен биржага шунча акция ташлашим керакки, токи уларни қийматдан ўн банд паст сотиб, беш юз минг доллар ундириб олай. Эҳтимол, қофозлар нархи тушмас. Ҳозир бир нарса деб

## ЖАҲОН АДАБИЁТИ

бўлмайди. Ахир нарх дегани чексиз тушиб кетавермайди-ку! Қанийди, йирик суғурта жамиятлари нима қилиш ниятида эканликларини билолсам! Тонгги рўзномаларни ҳали олиб келишмадими?

Каупервуд кўнгироқ қилмоқчи бўлди, бироқ хизматкорлар ҳам уйғонмаган бўлишса керак, деб ўйланиб қолди. Унинг ўзи даҳлизга чиқди. У ерда ҳам босмахона бўёғи куриб улгурмаган “Пресса” ва “Паблик лежер” рўзномалари ётарди. Биринчи саҳифага тез кўз югуртириб чиқар экан, унинг ранги бирдан ўзгарди. “Пресса”да катта, бутун устунни тўлдириб даҳшатли кўринишдаги Чикаго тархи жойлаштирилганди; қора ранг билан унда шаҳарнинг ёнган қисми белгиланганди. Чикагонинг бундай муфассал тархини у ҳали ҳеч қачон кўрмаган эди. Тарҳдаги оқ бўшлиқ – Мичиган кўли, мана бу эса дарё, шаҳарни қарийб уч тенг бўлакка – шимолий, гарбий ва жанубий бўлакларга бўлиб турарди. Каупервуднинг кўзига шаҳар бироз ғалати ва нимаси биландир Филадельфияга ўхшаб режалаштирилгандек туюлиб кетди. Унинг майдони икки ёки уч квадрат миллик Савдо қисми шаҳарнинг уч асосий қисми туташган жойда, дарёнинг асосий ўзанидан жанубда жойлашган эди, шу ерда жануби-гарбий ва шимоли-гарбий ирмоқлари бирлашиб, дарё кўлга қуйиларди. Бу марказдаги катта маҳалла эди, бироқ харитадан унинг бутунлай ёниб кетгани кўриниб турарди. “Чикаго – қуиб кул бўлди!” – сахифа бўйлаб турган йирик қора сарлавҳада шундай ёзилганди. Шундан кейин тафсилотлар бошланиб кетган – бошпанасиз қолганларнинг изтироблари, оловда ўлганлар сони ва бутун молдавлатидан маҳрум бўлганлар сони. Кейин шарқий штатларда ёнғинга қарши қандай курашиш кераклиги ҳақидаги масала муҳокама қилинарди. Суғурта жамиятлари ва саноатчилар, эҳтимол, бундай катта заарларга бардош беришга кучлари етмаса керак, деган фикрлар баён қилинганди.

– Падарига лаънат! – ғамгин тўнғилилаб кўйди Каупервуд. – Қайси жин уриб, мен бу биржа ишларига аралашиб қолдим.

У меҳмонхона бўлмага қайти-да, рўзнома мутолаасига шўнғиди.

Кейин, вақт эрта бўлишига қарамай, отаси билан бирга идорага йўл олди. У ерда унга почта мунтазир эди – у ёки бу битимни бекор қилиш ёки қофозларни сотиши таклиф қилинган ўндан ортиқ хат ётарди. У тик турганча хатларни кўриб чиқар экан, чопар бола яна учта хат келтирди. Улардан бири Стинердан эди, у шаҳарда тушга яқин бўлишини, ундан олдин улгуролмаслигини айтган эди, Каупервуд бир вақтнинг ўзида ҳам қўркув, ҳам енгиллик ҳис этди. Қарзларини соат учгacha тўлаб қўйиш учун унга йирик миқдордаги пул керак эди. Ҳозир ҳар бир дақиқа олтиндан қиммат. Стинерни вокзалда тутиб, у билан бошқалардан олдинроқ гаплашиб олиши шарт. Ҳа, бугунги кун оғир, югар-югарлар билан, кескин ўтадиган кўринарди.

Каупервуд етиб келганида Учинчи кўчада банкирлар ва биржачилар гужгон ўйнарди, уларни бу ерга ҳаддан ташқари кескин вазият бошлаб келганди. Ҳамма қаёққадир шошарди, хавода юзлаб жазавага тушган одамларни тинч ва ҳеч қандай ташвиши йўқ одамлардан фарқлаб турадиган кайфият ҳукмрон эди. Биржада ҳам ҳамма жунбишга келганди. Бонг урилиши билан улкан уй ақл бовар қилмас шовқинга тўларди. Бонг овози охиригача ўчмай туриб, маҳаллий биржа корпорациясини ташкил этувчи икки юз нафар одам қандайдир узук-юзук товушлар чиқарип олдинга ташланарди – ким нархни туширишга, ким, аксинча, айни вақтда фойдали бўлган таклифларни тутишга ҳаракат қиласарди. Ҳозир бўлганларнинг манфаатлари шу қадар хилма-хил эдики, ташки одам ҳозир нима фойдалироқ, сотиши ё сотиб олишми, билолмас эди.

Райверс ва Таргул одам энг қалин жойда қолишига, ака-ука Жозеф ва Эдвард Каупервудлар эса арzonу кимматига қарамай акцияларни сотиши пайида бўлиб, теварақ-атрофда ивирсилар эдилар. “Айиклар” зўр бериб нархни туширап эдилар, чунки ҳаммаси Молленхауэр, Симпсон ва Батлернинг агентлари, шунингдек, бошқа биржачилар конкали темир йўллар акцияларини ушлаб қолишига

## ЖАҲОН АДАБИЁТИ

харакат қиласыларми ва бу қоғозлар қандайдир қийматини сақлаб қоладими, йўқми, шуларга боғлиқ эди. Кеча Каупервуд билан хайрлашаётib, Батлер, кўлимиздан келган ҳамма ишни қиласяпмиз, деганди. Улар сўнгги имкониятгача акцияларни сотиб оладилар. Бозорни чексиз равишда тутиб туришга-ку, ваъда беролмасди, албатта, Молленхауэр ва Симпсонга ишонолмагани каби. У лоакал уларнинг иши қай ахволдалигини ҳам билмасди.

Ҳаяжон энг юқори нуқтага етганида Каупервуд кириб келди. У осто надаёк кўзлари билан Райверсни қидирди, бироқ шу онда яна бонг овози янгради ва битимлар тўхтатилди. Бутун оломон бирданига биржা котиби янгиликларни овоза қиласиган айвончага бурилди. Чиндан ҳам, ўттиз саккиз ёшлардаги бу қораҷадан келган, нимжон жуссали, амалдорларга хос рангпар юзли бу одам аллақачон ўз ўрнида турарди, унинг ортидан эса очиқ эшик кўринарди. Унинг ўнг кўлида бир варак қофоз бор эди.

— Америка ёнғин сугурта жамияти Бостонда ўзининг қарзини тўлашга қурби етмайди, деб эълон қиласди.

Яна бонг урилди. Шу заҳоти бўрон қўзғалди. Буниси олдингисидан ҳам шиддатли эди. Борди-ю, мана шу хира тонгда биржা очилишидан бир-бир ярим соат ўтар-ўтмас бир сугурта компанияси синган бўлса, унда яқин тўрт-беш соатда ва кейинги кунларда нималар бўлмайди? Бу шуни англатадики, Чикагодаги куйган одамлар ўз фаолиятларини қайта тиклай олмайдилар. Бу шуни билдирадики, банклар касодга учраган компаниялар билан боғлиқ барча қарз (ссуда)ларни аллақачон талаб қиласиганлар ёки хозир талаб қила бошлайдилар. Жон-пони чиқиб кетган, Шимолий тинч океани, Иллинойс-Сентрал, Ридинг, Лейк-Шор ва Уобеш темир йўл компанияларининг минг ва беш мингдан акциялари, шунингдек, конкали темир йўллар акциялари ва Каупервуд сотган замон облигациялари боғламларини нуқул арzonроқ тақлиф қиласиган “хўқиз”ларнинг бўкиришлари бу иншоотларга дахлдор барча одамларнинг юрагини ёриб юбормоқда эди. Бир дақиқалик жимликдан фойдаланиб, Каупервуд Артур Райверснинг олдига борди; аммо у ҳам унга ҳеч нарса айтиб олмади.

— Менимча, Молленхауэр ва Симпсоннинг агентлари нархларни, у қадар жон қуидириб ушлаб туришмаяпти! — ташвишланиб деди Каупервуд.

— Уларга Нью-Йоркдан хат келган, — хўмрайиб жавоб берди Райверс. — Энди ўзимизни минг ёққа урганимиздан фойда йўқ. Англашимча, у ерда яна уч сугурта компанияси синай-синай деб турибди. Уларнинг касодга учраганларини ҳар дақиқада эълон қилиб қолишлари мумкин.

Бундан кейин нима қилиш кераклигини муҳокама қиласиган улар бир мунча муддатга бу митти жаҳаннамдан чиқишиди. Стинер билан келишувга кўра, Каупервуд уларнинг ҳар иккови ҳам дурустгина маблағ ишлаб олган биржা ўйинидан қатъи назар юз минг долларгача бўлган шаҳар заёми облигацияларини сотиб олишга ваколат олганди. Аммо, бу тушиб кетаётган нархни тутиб қолиш зарур бўлган ҳолдагина қилинадиган иш эди. Хозир Каупервуд олтмиш минг долларга облигациялар сотиб олиш ва улар билан бошқа жойларда олинган ссудаларни таъминлашга қарор қилди. Стинер зудлик билан бу пулнинг ўрнини қоплайди ва унга яна нақд пул беради. У ёки бу тарзда бу усул қанчадир муддатга пул қадрини тутиб туриш ва уларни яна қийматларнинг ҳалокатли даражада тушиб кеттунига қадар сақлаб туришга ёрдам беради ёки ҳеч бўлмаганда шунга имкон туғдиради. Оҳ, канийди хозир пул қадрини туширишга ўйнаш учун унда маблағ бўлганда эди! Агар бундай ўйин унга тезда барбод этиш хавфи пайдо қиласиганида эди! Ҳатто мана шу хатарли дақиқада ҳам Каупервуднинг кўнглидан унинг ҳозирги оғир ахволида касод билан таҳдид қилиб турган вазиятлар бошқа вақтда унга мўмай фойда келтирас, деган гаплар ўтди. Аммо хозир у бундан фойдалана олмасди. Икки кеманинг бошини ушлаган гарк бўлади. Сен ё “айик” бўлишинг керак, ёки “хўқиз” – зарурият эса уни “хўқиз” бўлишига мажбур этмоқда. Фалакнинг гардиши шунақа бўлгач,

## ЖАҲОН АДАБИЁТИ

нима ҳам қила олардинг! Унинг барча найрангбозликлари ҳозир беҳуда эди. Ўйини гаровга кўйиб, пул олишга умид қилган бир банкир билан учрашгани йўл оламан деб турганда яна бонг овози янгради. Яна битимлар тўхтатилди. Артур Райверс ўзи турган пештахта олдидан Каупервудга маъноли қараб кўйди; у ерда штатнинг қимматли қофозлар ва шаҳар заёми облигациялари савдоси кетмоқда эди – шу облигацияларни сотиб олишга Артур эндиғина киришганди. Шу аснода унинг олдига Ньютон Таргул югуриб келди.

– Ҳаммалари сизга қарши! – ҳовлиқиб деди у. – Бунака нарҳда сотишга ури-нишингизнинг ҳам кераги йўқ! Фойдасиз иш! Улар оёғимизга болта уришаяпти. Жонимизни нақ ҳиқилдоғимизга келтириб юборди. Бир неча кундан кейин катта ўзгариш бўлади. Балки, чидаб берарсиз? Бўпти, янги кўнгилсизликка шай туринг.

У кўзи билан биржা қўмитаси котиби яна пайдо бўлган айвончага ишора қилди.

– Шарқий ва Фарбий ёнғин суғуртга жамиятлари Нью-Йоркда ўзининг қарзини тўлашга қурби етмаслигини маълум қиласди!

Танобий бўйлаб чўзиб айтилган “во-о-ой!”га ўхшаш нола янгради.

Тартиб сақлашга чақириб, котиб болгачаси билан столга уриб кўйди.

– Рочестердаги “Ири” ёнғин суғуртаси жамияти ўзининг қарзни тўлашга қурби етмаслигини маълум қиласди!

Яна “во-о-ой!” овози янгради.

Яна болгачанинг “так” этган овози эшитилди.

– Нью-Йоркдаги Америка кредит компанияси тўловларни тўхтатди!

– Во-о-ой!

Бўрон қутиради.

– Ҳўш, нима дейсиз? – сўради Таргул. – Бундай бўронга бардош қилиб бўларканми? Сотувни тўхтатиб, бир неча кун сабр қила олмайсизми? Нархни тушириш ўйинини ўйнаганингиз маъкул эмасми?

– Ҳозир биржани ёпиш керак эди, – тўнгиллади Каупервуд. – Энг яхши йўли шу. Бўлмаса иш чатоқ бўлади.

У шошиб ўзи билан бир хил ахволга тушиб қолган бир гуруҳ биржачилар олдига борди; балки улар ўз таъсирлари билан унинг ғояларини рўёбга чиқаришда ҳамкорлик қилиб юборишар? Ҳозирги нархни энг қулай, арпаси пишиб турган одамларга қарши бу аёвсиз юриш бўлган бўлур эди. Аммо улар билан нима иши бор унинг! Буни сармоядорлик деб кўйибдилар. Қофозларни касод даражада паст нарҳда сотиш бемаънилик; у ўз агентларига сотувни вақтинча тўхтатиб туришга фармойиш берди. Модомики, банкирлар энг керакли дамда хизмат қилишни хоҳлашмас, жамғарма биржаси ёпилмас, Стнерни унга яна уч юз минг доллар кредит беришга унатиб бўлмас эканми, бу унинг сингани демак. Ҳар дақиқани ғанимат билиб, у идоралари ўша Учинчи кўчада жойлашган бир қанча банкир ва биржачиларни кўргани йўл олди ва улардан биржани ёпишни талаб этишларини сўради. Соат ўн иккига бир неча дақиқа қолганда Стнерни кутиб олгани вокзалга чопди, аммо минг афсуслар бўлсинки, уни учратмади. Стнер у поездга илинолмаган бўлиши мумкин. Аммо Каупервуд қандайдир найранг бўлаётганини сезди ва аввало ратушага, кейин эса Стнернинг уйига боришга карор қилди. Балки у қайтиб келгандир-у, у билан учрашишдан ўзини олиб қочаётгандир?

Стнерни ратушада тополмай, Каупервуд ўзига-ўзи, “қани, энди тўғри унинг уйига бор!” деб буйруқ берди. У билан поездда тўқнаш келганида эса у ҳайрон ҳам бўлмади. Стнернинг ранги кув ўчган ва саросимали эди. Каупервудга кўзи тушиб, у баттар оқариб кетди.

– Э-ха! Салом, Фрэнк! – каловланиб деди у. – Қаердан келаяпсиз?

– Нима бўлди, Жорж? – ўз навбатида сўради Каупервуд. – Мен сизни Бродстрийт вокзалида учратаман, деб ўйлагандим.

## ЖАҲОН АДАБИЁТИ

– Ҳа, аввало ўша ерда тушмоқчи бўлдим, – жавоб берди Стинер (унинг башарасига одам қараб бўлмасди), – лекин кейин Фарбий станцияда тушдим, кийимимни алмаштиргани уйга кириб чиқмоқчи бўлдим. Бугун бир дунё ишларни қилишим керак. Сизнинг олдингизга кирмоқчи эдим.

Каупервуднинг шошилинч телеграммасидан кейин бундай жавоб фоят ахмоқона эди, аммо ёш ишбилармон уни бир қулоғи билан эшишиб, иккинчи сидаң чиқариб юборди.

– Ўтиринг менинг аравамга, Жорж! – таклиф қилди у Стинерга. – Биз жиддий гаплашиб олмасак бўлмайди. Мен сизга биржада ваҳима кўтаришим хавфи бор деб телеграмма юборган эдим. Худди шундай бўлди ҳам. Бир дақиқани ҳам бой бермаслигимиз керак. Акциялар даҳшатли даражада тушиб кетди, банклар эса олган қарзларини тўлаб кўйишимни талаб этишяпти. Сиз менга бир неча кунга йиллик тўрт ёки беш фоизга уч юз эллик минг доллар қарз бериб тура оласизми, йўқми, шуни билишим керак. Мен сизга бир цент ҳам қолдирмай қайтараман. Пул менга мана бундок керак. Бусиз асфаласо-филинга учиб кетаман. Бу нимани англатишини биласизми ўзи, Жорж? Барча активларимни охирги долларигача музлатиб кўйилади, у билан бирга сизнинг конкали темир йўлларга сарфлаган пулларингиз ҳам. Мен у пулларни сизга сарф қилгани беролмайман, шахар ғазнасидан олинган ссудалар билан боғлиқ бу барча гаплар не нохушликларни бошимизга солмайди ҳали. Сиз кассадаги камомадни қоплай олмай қоласиз – бунинг оқибати нима бўлишини ўзингиз тушунарсиз, ҳарқалай? Биз икковимиз ҳам қаттиқ чув тушдик. Сизнинг сувдан куруқ чиқиб кетишингизни хоҳлайман, аммо ўзингизнинг ёрдамингизсиз бундай қила олмайсиз. Кеча кўйилмаси борасида Батлерга мурожаат қилишга мажбур бўлдим ва бошқа манбалардан ҳам пул топишга жоним борича харакат қиласман. Борди-ю, менга ҳамкорлик кўрсатмас экансиз, бу оғатдан соғ чиқолмасман, деб кўрқаман.

Каупервуд жим бўлиб қолди. Стинер йўқ деб жавоб қайтаришидан олдинроқ унга бутун манзарани яққолроқ тасвирилашга ҳаракат қилди у – ўзининг ҳам ахволи яхши эмаслигини билиб кўйисин Стинер.

Аслида эса Каупервуд ўзига хос зийраклик билан шубҳа қилган ҳол юз берди. Стинерни пишитиб кўйишга улгуришганди. Ўтган оқшомда Батлер ва Симпсон кетишлиари ҳамон Молленхауэр котиби, салласини деса, калласини олиб келадиган учар йигит Эбнер Сэнгстекни чорлади-да, унга хазинабонни топишни буюрди. Сэнгстек Стинер билан овга кетган Стробикка муфассал телеграмма жўнатди, Стинерни Каупервудга қарши қайраб кўйишини қаттиқ тайинлади. Хазинада камомад борлиги фош бўлган. Сэнгстек Стробик ва Стинерни Уиллингтонда кутиб олади (Каупервуддан олдин кўришиш учун) ва тафсилотлардан хабардор қилади. Судда жавоб бермаслик учун Стинер Каупервудга қарз (ссуда) тўлашни бас қилиши керак. Биронта одам билан учрашишдан олдин Стинерга Молленхауэрнинг олдидан ўтиб кўйиши тавсия этилади. Стробикдан уларнинг эртага тушда етиб келишлиари хабар қилинган жавоб телеграммасини олиб, Сэнгстек уларни Уиллингтонда қарши олгани жўнатади. Стинернинг вокзалдан тўғри ишбилармонлар маҳалласига эмас, уйга кириб, кийимини алмаштириш баҳонаси билан шахар чеккасида тушиб қолгани шундан эди. Аслида Каупервуд билан кўришишдан олдин Молленхауэр билан юзма-юз бўлишни кўзда тутганди.

У ўлгудек кўрқиб кетган бўлиб, вақтдан ютишга ҳаракат қиласади.

– Йўқ, ундей қилолмайман, Фрэнк, – аянчли оҳангда деди у. – Бусиз ҳам мен бу ишга қаттиқ ўралашиб қолдим. Молленхауэрнинг котиби мени бундай кадам кўйишидан огоҳлантириш учун ҳам бизни Уиллингтонда кутиб олишга келган экан. Стробикнинг фикри ҳам шундай. Менинг қанча пулим тарқатиб берилганлигини улар билишади. Ё сизнинг ўзингиз, ё бошқа битта-яримтаси уларга бу ҳақда хабар берган. Мен Молленхауэрга қарши иш тутолмайман.

## ЖАҲОН АДАБИЁТИ

Ўзимдаги ҳамма нарса учун мен ундан миннатдорман. Мени хазинабон қилиб тайинлаган ҳам у бўлади.

– Гапимга қулоқ солинг, Жорж! Ҳозир қандай иш тутсангиз ҳам партия олдидаги бурч ҳақида қилинаётган сафсата билан ўзингизни абгор қилманг. Сиз жуда ёмон аҳволга тушиб қолгансиз, мен ҳам. Борди-ю, ҳозир мен билан бирга ўзингизни кутқариш чорасини кўрмас экансиз, ҳеч ким жонингизга оро кирмайди – ҳозир ҳам, кейин ҳам! “Кейин” и келганда аттанглаб қолиш ҳақида гапирмаса бўлади. Мен бунга кеча кечқурун, Батлердан икковимизга ёрдам сўраганимда амин бўлдим. Конка акцияларига қизиқиб қолганимизни улар билишади ва ҳар қандай йўл билан бизнинг ичак-чавоғимизни ағдаришни истайдилар – ҳамма бало мана шунда! Ҳозир битта масала кўндаланг турибди – ким кимни қутқаради? Бу ўзимизни ё қутқаришимиз, мудофааланишимиз, ё биргалиқда жаҳаннамга тушмоғимиз керак – мен сизга айтмоқчи бўлган нарса шу эди. Сизнинг тақдирингиз Молленхаузерни мана бу фонусчалик ҳам қизиктиримайди. Уни сиз менга берган пуллар ташвишга солмайди, балки ўша пуллардан ким ва қанча фойда кўраётгани қизиктиради. Наҳотки шугина нарсани ҳам тушунмасангиз: биз сиз билан конкани кўлга киритаётганимизни улар билиб қолишган ва бу уларга ёқмаган. Улар биздан акцияларни тортиб олган заҳоти биз улар учун йўқ одамларга айланамиз, буни яхшилаб эслаб қолинг! Борди-ю, сарфлаган маблағларимиз куйиб кетса, сиз тугаган одамсиз ва мен ҳам: бизга ёрдам бергани ҳеч ким қўлини чўзмайди, ҳатто сиёсий нуқтаи назардан ҳам. Бу машъум ҳақиқатни таг-тагигача англаб етсангиз дейман, Жорж. Менга “йўқ” деб жавоб беришингиздан олдин – чунки сиздан буни Молленхаузер талаб қиласяпти, – сиз менинг сўзларимни яхшилаб ўйлаб олишингиз керак.

Ўзининг иродида кучи билан Каупервуд учун жавобгар бўлган ягона қадамини қўйишга хазинабонни рози қилиш учун у Стинерга қаттиқ тикилди, ҳолбуки, пировардида Стинерга бундан фойда жуда кам эди. Шуни таъкидлаш жоизки, Стинер ҳозир уни мутлақо қизиктиримасди. У бор-йўғи бир пиёда дона бўлиб, у қўлига тушган ҳар қандай одамнинг ихтиёри билан ҳаракат қиласди. Молленхаузер, Симпсон ва Батлерга қарши ўлароқ Каупервуд мана шу пиёда донани ушлаб туришга ҳаракат қилмоқда эди. Илон күёнга кўз тиккандай, Стинерни ўзига бўйсундириш ва кўркканидан чалажонга айланган бу одамда лоақал ўзини кўлга олиш сақфи табиатини уйғотиш учун унга еб қўйгудек қараб турарди.

Бироқ Стинер ўзини йўқотиб қўйганди ва унга энди ҳеч нарса кор қилмаётганди. Унинг юзи қўкиштоб тус олган, қовоқлари шишган, кўзлари гўлайган, кўл ва лаблари нам тортганди. Эй Худо, қандай кунларга қолиб ўтирибди у?

– Ҳаммаси тўғри, Фрэнк! – алам билан деди хазинабон. – Сизнинг ҳақлигингизни биламан. Аммо ўзингиз ўйланг, агар бу пулларни сизга берсам, ахволим не кечади? Ахир улар мени тилкалаб ташладилар. Ўзингизни менинг ўрнимга қўйиб кўринг. Эх, ҳеч бўлмаганда Батлерга айтмай турганингизда эди! Сиз аввало мен билан гаплашиб олишингиз керак эди!

– Ахир сиз аллақаёқларда ўрдак овлаб юрган бўлсангиз, сиз билан қандай гаплашай, Жорж? Сиз билан уланишга ҳаракат қилиб, телеграмма юбормаган жойим қолмади! Тағин нима қила олардим? Мен ҳаракат қилишим керак эди. Бундан ташқари, Батлер менга ҳар доимгидан қўра дўстонароқ муносабатда бўлар, деб ўйлагандим. Ҳозир Батлерга мурожаат қилганим учун мени койидиган вакт эмас, ахволимни яхшилаш керак. Иккаламиз ноҳуш муаммога тушиб қолганимиз. Сузиб чиқа оламизми ёки чўкиб кетамизми – гап шунинг устида кетаётиди. Бошқа ҳеч ким эмас, биз, тушунаяпсизми ўзи буни? Мен сўраган нарсани Батлер ё қила олмасди, ё истамаётганди – бу Молленхаузер ва Симпсоннинг қимматли қоғозлар қийматини ушлаб туриши эди. Улар ҳозир айнан шунинг тескарисини қилишяпти. Улар ўз ўйинларини тикиштиришяпти ва

**ЖАҲОН АДАБИЁТИ**

бунинг оқибати бизнинг ичак-чавоғимизни ағдариб ташлашга олиб келади. Наҳотки сиз буни тушунмаётган бўлсангиз? Улар биз тўплаган ҳамма нарсани биздан тортиб олишмоқчи. Биз ўзимизни ўзимиз кутқаришимиз керак, Жорж, сизнинг олдингизга шунинг учун келган эдим. Борди-ю, сиз менга уч юз эллик ёки ҳеч бўлмаганда уч юз минг доллар берсангиз, икковимиз ҳам тамом бўлдик деяверинг. Сизга эса, Жорж, мендан кўра ёмонроқ бўлади, чунки юридик жиҳатдан мен ҳеч қандай жавобгарлика тортилмайман! Аммо гап бунда эмас. Мен ўзимни ҳам, сизни ҳам кутқариб қолмоқчиман, улар биз ҳакимизда нималарни гапирмасинлар, бизга қарши қанақангি ифвогарлик қилмасинлар, бизни пул билан боғлиқ қийинчиликлардан халос қилувчи воситани биламан мен; ундан ҳар икковимизнинг нафимизга фойдаланиб қолиш эса сизга боғлиқ бўлиб турибди. Наҳотки буни ўзингиз тушунмаётган бўлсангиз? Мен ўз ишимни кутқариб қолмоқчиман, ўшанда эса сизнинг номингиз ҳам, пулларингиз ҳам омон қолади.

Нихоят, Стинерни унатишга муваффақ бўлдим деган умидда Каупервуд гапдан тўхтади, Стинер бўлса ҳамон иккиланаради.

– Мен нима ҳам қила олардим Фрэнк? – заиф ва аянчли овозда эътиroz билдириди у. – Мен Молленхаузрга қарши боролмайман. Агар мен сиз айтган нарсани қилсам, улар мени судга беришади. Бу уларнинг қўлидан келади. Йўқ, Фрэнк! Мен сиз ўйлаганчалик кучли одам эмасман. Борди-ю, улар ҳеч нарсани билмаганларида, борди-ю, сиз уларга ҳеч нима демаган бўлганингизда эди, унда... балки ўшанда – бошқача бўларди, аммо энди...

У бошини чайқади, кулранг кўзларида чексиз надомат ифодаси бор эди.

– Жорж, – деб яна гап бошлади Каупервуд, борди-ю бирор нарсага эришишга муваффақ бўлса, фақат энг ишончли далилларгина қўй келиши мумкинлигини англаған ҳолда, – мен нима қилиб қўйганимни бир четга қўйиб турайлик. Мен нима қилиш зарур бўлса, шуни қилдим. Сиз бутунлай ўзингизни йўқотиб қўйдингиз ва ҳар қанақа оғир хато содир этишга тайёрсиз. Мен бунга тек қараб туролмайман. Сизнинг манфаатингиз деб беш юз минг долларлик шаҳар пулини жойлаштирганман – қисман ўзимнинг манфаатим деб ҳам. Албатта, барибири қўпроқ сизнинг манфаатингизни ўйлаганман...

Бу фикр хақиқатга унчалик мувофиқ эмасди.

– ... ва шундай бир паллада сиз иккиланиб ўтирибсиз, ўз манфаатингизни ҳимоя қилишингиз керакми, йўқми, буни ҳам билмаяпсиз. Мен сизни тушунолмай қолдим! Ахир бу бўхтон, Жорж! Акциялар аллақачон гўрларга кириб кетаяпти, хонавайронлик биз икковимизгагина таҳдид солаётгани йўқ. Биржада ёнгина туфайли пайдо бўлган ваҳима, саросималик авжида, ўзини ҳимоя қилиш чорасини тополмаган одам билан жавоб беради. Сиз, хазинабон қилиб кўтаргани учун Молленхаузэр олдида бурчлиман, мени бир бало қилиб қўйишидан кўрқаман, дейсиз. Ўзингизнинг ва менинг ахволимни бир ўйлаб кўринг, токи мен касодга учрамагунимча у сизни ҳеч нима қилолмайди. Борди-ю, мен ўзимни синган деб эълон қилсам, сизга нима бўлишини биласизми? Унда сизни суддан ким кутқаради? Молленхаузэр югуриб келади-да, сиз учун ярим миллион доллар киритади, деб хомтами бўлиб юрманг тағин. Икки дунёда ҳам у бундай қилмайди. Борди-ю, Молленхаузэр ва бошқалар сизнинг манфаатингизни ўйлар экан, нима учун улар бугун мени биржада қўллаб-куvvatлашмади? Нимагалигини мен биламан. Улар бизнинг конкали темир йўллар акцияларимизга кўзларини ола қилишаяпти, кейин сизни қамоққа тикишлари билан уларнинг уч пуллик ишлари йўқ. Ақлингизни йиғинг-да, гапимга киринг. Мен сизнинг манфаатларингизга ҳамиша хайриҳоҳ бўлиб келганман, сиз бундан кўз юмолмайсиз. Мен туфайли сиз пулдор бўлиб олдингиз, тағин озмунча ҳам эмас! Кўзингизни очинг, Жорж, газнага боринг-да, бирон-бир чора кўришдан аввал менга уч юз минг долларга чек ёзиб беринг. То бу иш қилиб бўлингунча биронта одам билан кўришманг

## ЖАҲОН АДАБИЁТИ

ҳам, гаплашманг ҳам. Гап тамом, вассалом. Бу чекни ёзиб беришингизга ҳеч ким монелик қилолмайди. Сиз – шаҳар хазинабонисиз. Пул қўлимга келиб тушган захоти мен бу машмашалардан қутилиб чиқаман-да, бир хафта, жуда кўп деганда икки ҳафтадан кейин сизга ҳаммасини қўшқўллаб қайтараман – унгача ваҳима ҳам анча босилиб қолса керак. Бу пуллар ғазнага қайтгандан кейин биз ҳалиги беш юз минг борасида ҳам келишиб оламиз. Уч ойдан кейин, балки ундан олдинроқ шундай қиласманки, сиз камомадни бемалол қоплай оласиз. Нимасини айтасиз, мен буни икки ҳафтага қолмай дўндираман, факат оёққа туриб олишга ёрдам берсангиз бўлгани! Вақт – менга фақат мана шу керак. Сиз киритган пулларингизни йўқотмайсиз, пулларни қайтарганингизда эса ҳеч ким мушугингизни пишт демайди. Улар ҳеч қанақангি оммавий можаро кўтаришга қодир эмаслар. Хўш, сиз нима қилмоқчисиз ўзи, Жорж? Молленхауэр менга чек ёзиб беришингизга тўсқинлик қилолмайди, мен ҳам сизни шундай қил, деб мажбур этолмайман. Сизнинг тақдирингиз ўз қўлингизда. Гапиринг, нима қилмоқчисиз ўзи?

Гарчи ҳалокат ёқасида турган бўлса-да, Стинер ҳамон ўйлар ва иккила нар эди. У ҳаракат қилишдан, Молленхауэрдан, Каупервуддан, ҳаётидан ва ўзидан кўркар эди. Вахима ҳакидаги, уни даҳшатга соглан фалокат ҳакидаги фикр унинг тасаввурда мулкий ахволидан кўра жамиятдаги ва сиёсий оламдаги мавқеи билан кўпроқ боғланиб кетган эди. Молиявий қудрат нима эканини тушунадиган одамлар бармоқ билан санаарли. Бошқалар бойлиги устидан ҳукмронликни ўз кўлида ушлаб туриш, жамият ҳаётининг манбаи ва айирбошлаш воситаси ҳисобланган нарсага эга бўлиш нима эканини ҳис этувчилар анқонинг уруғи. Аммо бунинг маъносини чақиб олганлар энди бойликнинг ўзини деб унга ўч бўлиб қолмайдилар. Одатда одамлар пулга ўзини маълум ҳаётий қулийклар билан таъминлаш воситаси, деб қарайдилар, аммо сармоядор учун пул – бу фаровонликни тақсимлаш устидан назорат воситаси, ҳурмат, қудрат, ҳокимиятга эришув воситасидир. Стинердан фарқли ўлароқ, Каупервуд пулга айнан ана шундай муносабатда эди. Ҳар доим Каупервудни унинг учун ҳаракат қилишга ундан келган Стинер энди, Каупервуд унга вазиятдан чиқиб кетишнинг ягона йўлини беш кўлдай аниқ тасвирлаб берганда юраги ёрилгудек кўркмокда эди. Унинг мушоҳада қилиш қобилияти Молленхауэрнинг ғазаб ва интиқоми, Каупервуднинг касод бўлиш эҳтимоллиги ва мусибатни мардона қарши олишдаги ўз ноқобиллиги олдида хира тортиб қолди. Каупервуднинг түгма сармоядорлик истеъоди энди унинг ишончини қозонолмаётганди. Бу банклар ғоят ёш ва у қадар тажрибакор эмас. Молленхауэрнинг ёши улуғ ва бойроқ. Симпсон ва Батлер ҳам. Пулдор бу одамлар бемисл қудрат соҳибларидир. Бундан ташқари, Каупервуднинг ўзи унга, Стинерга хатарда қолганини, уни боши берк кўчага камаб кўйганларини тан олмадими? Ҳеч қанақа эътироф Стинерни ортиқ кўрқита олмас эди, аммо Каупервуд шундай қилишга мажбур бўлганди, зоро, хатарнинг юзига тик боқишига Стинерда мардлик етишмасди.

Шу боис фойтунда ғазна йўлидан кетиб боришар экан, Стинер оппоқ оқарган, руҳан эзилган холда ўтираверди, фикрини бир жойга тўплаёлмас, ўзининг ахволи ва ундан қутилишнинг ягона йўлини тез, аниқ, яққол тасаввур этишининг уддасидан чиқолмас эди. Унга таъсир ўтказгани яна бир марта уриниб кўриш учун Каупервуд у билан бирга ғазнага кирди.

– Хўш, Жорж? – совуқ оҳангда деди у. – Мен жавоб кутаяпман. Вақт ўтаяпти. Биз учун ҳар бир дақиқа ғанимат. Менга пул беринг ва мен бу мажаролардан ситилиб чиқиб олай, бўладими? Яна бир карра қайтараман: ҳар бир дақиқа ғанимат. Анави жанобларнинг дўқидан кўркманг. Улар ўзларини фойдалари учун ўйин қиласптилар, улардан ўрнак олинг.

– Қўлимдан келмайди. Фрэнк, – синиқ овозда жавоб берди, ниҳоят, Стинер: Молленхауэрнинг қаҳрли чехрасини ҳар ўйлаганда унинг ўз келажаги

## ЖАҲОН АДАБИЁТИ

борасидаги кўркув беиз йўқоларди.

– Мен ўйлаб олишим керак. Ахир бирданига бир нарса деёлмайман-ку. Сиз келишингиздан бир-икки дақиқагина олдин Стробик мен билан хайрлашиб кетганди ва унинг ўйлашича....

– Худо олсин сизни, Жорж! – газаб билан деди Каупервуд. – Стробикни гапириб нима қиласиз менга! Унинг бунга нима дахли бор? Ўзингизни ўйласангиз-чи! Сизга нима бўлишини ўйланг аввал! Гап Стробикнинг эмас, сизнинг тақдирингиз устида кетаяпти.

– Ҳаммасини тушунаман, Фрэнк, – қайсарлик қиларди шўрлик Стинер. – Аммо, начора, буни қандай қилишга ҳеч ақлим етмаяпти. Рост айтяпман! Ўзингиз бу можародан омон-эсон чиқиб олишимга кўзим етмаяпти деяпсиз, тағин уч юз минг доллар... ҳазилакам гапми, уч юз минг доллар-а! Йўқ, Фрэнк. Қилолмайман! Ҳеч нарса чиқмайди. Бундан ташқари, мен аввал Молленхауэр билан гаплашиб олишим керак.

– Эй Худойим, қаёқдаги гапларни гапирасиз-а! – охири Каупервуд портлаб кетди, у хазинабонга ошкора ғазаб ва нафрат билан боқди. – Бўпти! Югуринг, Молленхауэрнинг олдига! Сўранг ундан, сизнинг фойдангиз учун калламни тезроқ олишнинг йўли борми, денг! Менга уч юз минг доллар қарз бериб туриш – мумкин эмас-у, хазинабондан олинган беш юз мингга таваккал қилиш ва уларни йўқотиш – мумкин экан-да? Сизни тўғри тушундимми? Ахир сиз бу пулларни, уларга қўшиб бошқа ҳаммасини бой беришга қасд қилибсиз-ку. Менимча, миянгиз айниб қолибди. Молленхауэрнинг бир оғиз сўзидан жон-понингиз чиқиб кетибди, сиз энди ҳаммасини: бойлигингизни, обрўйингизни, мансабингизни қиморга тикишга тайёр бўлибсиз! Агар мен касодга учрагудек бўлсам, сизга нима бўлишини биласизми? Сизни ҳибсга олишади. Панжара ортига ўтқазишади, Жорж, тамом-вассалом. Анави сизга нималар қилмаслик кераклигини ўргатган Молленхауэрингиз бўлса, шармандаи шармисор бўлганингиздан кейин пинагини ҳам бузмай тураверади. Эсланг: мен сизга ёрдам бермаганмидим, хўш? Сўнгги дақиқагача ишларингизни муваффакиятли юргизиб турмаганмидим? Миянгизга қандай курт кириб қолди экан, мен шуни билмоқчиман. Сиз нимадан кўрқаяпсиз?

Стинер яна қандайдир жўялироқ сабабни рўкач қўлмокчи бўлиб турганида хонага унинг девонхона бошқарувчиси Альберт Стайерс кириб келди. Азбаройи ҳаяжонланганидан Стинер ҳадеганда уни пайқамади, Каупервуд эса викор билан унга мурожаат қилди:

– Нима дейсиз, Альберт?

– Мистер Молленхауэр топшириғига мувофиқ мистер Сэнгстек мистер Стинер билан кўришишни истайди.

Бу даҳшатли исм қулоғига чалиниши ҳамон Стинер кузги япроқ каби бужмайиб кетди. Бу Каупервуднинг эътиборидан четда қолмади. У Стинердан уч юз минг доллар олишдаги сўнгги умиди пучга чиқаётганини англади.

– Нима ҳам дердик, Жорж, – деди у, Стайерс Сэнгстекка Стинер уни қабул қилишга тайёrlигини хабар қилиш учун йўл олганида, – менга ҳаммаси равшан бўлди. Бу одам сизни авраб олибди. Сиз қаттиқ қўрқиб кетибсиз ва энди ўзингизни идора қилолмай қолибсиз. Майли, ҳаммаси қандай бўлса, шундай қолаверсинг: мен яна қайтиб келаман. Факат, Худо хайрингизни берсин, ўзингизни кўлга олинг. Агар яхшилаб ўйлаб олмасангиз, ҳаммаси нима билан тугашини мен сизга айтдим. Гапимга киринг ва сиз мустақил, бой одамга айланасиз. Акс ҳолда – сизни қамоқхона панжараси кутмоқда.

Биржани ва банкирлардан кўмак олгани яна бир марта уриниб кўришга ахд қилиб, Батлернинг хузурига йўл олишдан олдин Каупервуд тез газнадан чиқди-да, унга мунтазир турган юмшоқ кабриолетга сакраб минди. Ўрнидиги ҳам ўзи каби сарик рангли бу ажойиб аравага асов тўриқ байтал кўшилганди. Каупервуд гоҳ у, гоҳ бу бино олдида тўхтар ва ясама бефарқлик билан банклар

ва биржада идоралари зиналаридан чопиб тушиб-чопиб чиқар эди.

Бироқ ҳамма ҳаракатлари беҳуда кетди. Унинг гапларини дикқат билан тинглар, ҳатто хайрихоҳлик билдирад ва ўша заҳоти вазият қалтислигидан нолир эдилар. Жирард миллий банки қарз (ссуда)ни тўлаш учун лоақал бир соат муҳлат беришга рози бўлмади ва Каупервуд уларга биржада қиймати тушишидан келиб чиққан тафовутни қоплаш учун ўзининг энг қимматли қоғозларидан қалин бир дастасини бетўхтос жўнатишга мажбур бўлади. Соат иккода ота Каупервуддан чопар келди: Учинчи миллий банк раиси сифатида у бир юз эллик минг долларлик қарз(ссуда)ни тўлаб қўйишини талаб этишга мажбур экан. Фрэнк қўйган акциялар, директорлар фикрича, у қадар ишончли эмас эмиш. Каупервуд зудлик билан ўзининг шу банқдаги эллик минглик қўйилмасига чек ёзиб берди, унга идорасида сақлаб келаётган нақд йигирма беш минг долларни қўшди, “Тай ва К” фирмасидан эллик минг долларлик ссудани тўлаб қўйишни талаб қилди, Грин ва Каутс изи конкали акцияларини нархидан уч баравар камига сотиб юборди – бу ўша қаттиқ умид боғлаб келаётган кўнка изи эди. Шу йўл билан олинган барча пулни у учинчи миллий банкка жўнатди. Кекса Каупервуд елкасидан тоғ ағдарилгандай хис қилса-да, юрагининг бир чеккасини ит тимдаларди. Туш пайтида ўз қоғозлари учун қанча олиши мумкинлини билиш ниятида ўзи йўлга тушди. Бундай йўл тутиб, у бир чети обрўйига путур етказди, бироқ унинг ота қалби изтиробда эди, бундан ташқари эса у ўзининг шахсий манфаатлари ҳақида ўйламаса бўлмасди. Уй қуриб ва вазият, аравалар, томорқа ва акцияларини гаровга қўйиб қарз (ссуда) олиб, у юз минг доллар ишлаб олди-да, уни Фрэнк номига ўзининг банкига қўйди. Аммо мана бундай кучли довул пайтида бу барибир ҳам ғоят заиф лангар эди. Фрэнк тўловлар учун камида уч ё тўрт кунлик муҳлат олишга эришмоғи зарур эди. Мана шу лаънати куннинг туш чоғи соат иккода ўз ишларининг аҳволини яна бир карра тарозига солиб, Каупервуд қовоғини уйганча тўнгиллаб деди:

“Йўқ, бу Стинер дегани менга уч юз минг доллар ссуда бермаса бўлмайди, бошқа гап йўқ. Энди эса Батлерни кўришим керак, бўлмаса у идора ёпилгунча ўз қўйилмасини тағин талаб қилади”.

У яна извошга сакраб чиқди-да, телбаларча Батлернинг ҳузурига учди.

*Рус тилидан  
Амир ФАЙЗУЛЛА  
таржимаси*

(ТАМОМ)

**ЖАҲОН АДАБИЁТИ**



**ЗУЛФИЯ  
(1915 – 1996 )**

Мусаввир Чингиз Аҳмаров

**ЖАҲОН АДАБИЁТИ**

96

# САНЬАТКОР ТАРЖИМОН

Зулфия таржималарининг ўзи бир олам. Улар офтобдай нур сочиб турди. У ўзбек тилига ўтирган шеърлар туйғулар, эҳтиросларга йўғрилиб, худди асл нусха каби қиймат касб этади. Зулфия ўзбекчалаштирган буюк Пушкиннинг оташ-алангали шеърлари мафтункор, ўрганиш ва изтиробла-ри жонингизга титроқ солади. Пушкиннинг қайноқ мұхаббат дардларини қайта ҳис қиласиз у мисраларда. Ёки Некрасовнинг “Рус аёллари” поэма-сини мутолаа қилсангиз, сўзнинг рангини, ифорини, жарангини, таъмини, майин тароватини туясиз. Сўзнинг тошдай қаттиқ бўлгани, гул очгани, қорнинг олмос учқунларига айланганини кўргандай бўласиз. Ўзбек тилининг нечоғлик жозибадор, ранг-баранглиги сизни хайратга солади. Сўзда қаҳратон захрини, ёзнинг чараклаган қуёши тафтини, занглаган оғир ки-шанларнинг маҳзун шилдирашини ҳис қиласиз. Киборлар, зодагонлар баз-мининг ёрқин, ўз юлдузлари – княгиня Трубецкая ва Волконскаяларнинг ёшлиқ йилларига бағишлиланган сатрларда таржимон сўзларни сайратиб юборади, баҳту саодатга чулғанган, ҳашамга ботган гўзал хонимларнинг кўнгил кечинмалари шоҳона тасвирга айланади. Уларнинг зорлари, қора қаҳратоннинг қорли йўлларидағи машаққатлари баёнида, рус кишлоқлари таърифланган манзараларда шоира таржимонликнинг юксак намуналарини яратади. Икки буюк мұхаббат ва вафо тимсоли қисматини шоира худди ўз бошидан кечиргандай ҳарорат ва айрилиқ азобларини ўта санъаткорлик билан мисраларга жо этади. Асарни ўзбек тилида қайта яратади гўё. Зеро, таржимоннинг ўзи ҳам муаллиф қадар юксалиши, асар ёзилган даврнинг руҳини теран англаши ва ўз тилининг бутун имкониятларини намоён этиши керак-да!

Зулфияхоним амалга оширган таржималар рўйхатида жаҳонга таниқли шоираларнинг асарларини кўрасиз: Габриэла Мистрал, Леся Украина, Соломея Нерис, Анна Ахматова, Марина Цветаева, Елизавета Багряна, Маргарита Алигер, Десанка Максимович, Людмила Татьяничева... Шунингдек, Мирзо Турсынзода, Қайсин Кулиев, Мустай Карим сингари машҳур шоирлар билан дўстона муносабатларининг самараси бўлиб, фасоҳатли шеърий таржималар дунёга келган. У ўз қалбига, туйғуларига, қарашларига яқин бўлган шеърларнинг мұхаббат ва ихлос билан ўзбек тилига ўтиради. Устоз сұхбатларда Ҳамид Олимжон билан биргаликда таржималар қилган кезларини соғиниб эсларди, шоир таржималарининг равонлигини, асл нусха каби ёрқин ва мукаммаллигини тақорларди. Шу ўринда Зулфияхонимнинг айтганларини хотирга олсан жоиз бўлар.

1943 йил. Ҳаёт-мамот жанглари дунёни ларзага солиб турган суронли давр. Халқ қурол ясар, завод-фабрикаларда уйқусиз дастгоҳ юргизар, бир тишилам нонини ҳам, ташвишини ҳам фронтдагилар билан баҳам кўрарди. Госпиталлarda ҳамширалар малҳами билан, санъаткорлар эса қўшиқ билан ярадорларни даволар эдилар. Юрт ёзувчи ва шоирларнинг сўзига илҳақ эди. Тошкентда адабий ҳаёт кайнар, бу ерда яшаётган таниқли рус, украин, белорус шоирларининг асарлари ўзбек тилида кетма-кет чоп этилар, ўзбек жангчиларининг кўкрак чўнтағида Ҳ. Олимжоннинг “Кўлингга қурол ол”, F. Фуломнинг “Сен етим эмассан” шеърлари билан бирга К. Симоновнинг “Мени кутгил” каби ноёб шеърларининг ўзбекча таржимаси ҳам юрарди.

Ўша кунларда белорус шоири Якуб Коласнинг таваллуд тўйи ўтказиладиган бўлиб қолди. Адибнинг китобини зудлик билан ўзбек тилида чиқариш даркор эди. Дўстлик бурчи шуни талаб этарди. Ҳамид Олимжон хо-

## ЖАҲОН АДАБИЁТИ

надонининг энг катта хонаси икки шоирнинг ижодхонасига айланди. Ўргада икки юракни бирлаштириб шам ёнади. Бир шам ёруғида икки дил, икки сафдош шоир ярим тунгача Якуб Колас билан ғойибона сұхбатда. Ҳамид Олимжон китобга сўзбоши ёзар, Зулфия шоир шеърларини ўзбек тилига ўгиради. Уч кунда сўзбоши ҳам, таржималар ҳам тайёр бўлди. Шамнинг хира ёруғида бир хона кенг жаҳондай бўлиб, битта столнинг икки қаноти илҳом ва меҳнатга хизмат қиласди. Улар битта нафасга айланиб баҳтиёр яшар, ишлар эдилар. Қийин шароитни пайқамас эдилар. Ҳамма шундай яшарди. Меҳнат қилиш керак эди. Уруш борарди ахир. Халққа таянч сўз керак эди. Ўша машақатли кезларда нозикниҳол Зулфиянинг қудратли таянчи – Ҳамид Олимжон ёнида ёниқ сўзларни излаш ва топиш осондек эди.

Зулфия қардошларнинг адабиёт байрамларида албатта янги таржималарини муҳлисларига совға этарди. Эсимда бор, устоз Тошкентда ўтказилган Тожикистон адабиёти ва санъати кунларида Мирзо Турсунзоданинг “Ватан” шеърини ўз таржимасида ўқиб муҳлисларнинг олқишига сазовор бўлган эдилар. Шоира арузда деярли ёзмасди, лекин у Сулаймон Рустамнинг, Мирзо муаллимнинг аруздаги шеърларини маҳорат билан она тилимизга ўтирган. Шоиралар ижодидан қилинган таржималарда майинлик, нафосат, аёл қалбининг титроқлари сезилиб турса, Нозим Ҳикмат, Қайсин Кулиев ва Мустай Карим асарларида донолик ва ҳикмат, шарқона фалсафа ҳоким.

Зулфия таржималари орасида Шевченко шеърлари ўз ўрнига эга. Озодлик қўйчиси, украин халқининг эркин ва хур кунларини орзиқиб кутган Тарас Шевченконинг таваллудига 200 йил тўлган айни кунларда унинг шеърларидаги ҳарорат, оташнафаслик ва келажакка ишонч туйғулари Зулфия таржимасида жуда гўзал жаранглаётгани ҳам бежиз эмас.

Зеро, улар орасида тасодифий асарлар йўқ. Атоқли шоиримиз Абдулла Орипов ЙброҳимFaфуровнинг таржималари ҳакида сўз юритиб, таржимонлик учун улкан истеъодд ва қобилиятдан ташқари улкан сўз захираси ҳам кераклигини таъкидлаган эди. Шоира Зулфиянинг улуғ хурмат ва муҳаббат билан қилган таржималари ҳам бу улуғ истеъододнинг сўз заргари, санъаткори эканидан далолат бериб турибди.

Зулфиянинг таржимонлик санъати мактаби кўп ижодкорларга ўрнак бўларлидир.

*Ойдин ҲОЖИЕВА,  
Ўзбекистон халқ шоири*

## Александр ПУШКИН

\* \* \*

*Кечиравмиқансан, орзумдаги рашик,  
Ииқдаги бу сифат телба ёнишин?  
Содиқсан! Не учун севасан яккаш –  
Фикру хаётимга қўрқув солишини.  
Жазманлар қуршаган сенинг атрофинг,  
Кўринмак истайсан барчага дилбар,  
Гоҳ мунис, гоҳ маъюс сенинг нигоҳинг  
Ҳаммага нечун пуч умид баҳи этар?*

**ЖАҲОН АДАБИЁТИ**

98

Ақлимни банд этиб, ўзимни мафтун,  
 Бу баҳтсиз севгимга ишончинг комил,  
 Кўрмайсан шовқинли гурунгда бутун  
 Сұхбатга бегона, изтиробда дил,  
 Танҳолик ҳасратин чекаман толиб,  
 Маҳрумман илтифот ва шафқатингдан...  
 Кетмоқчи бўламан; қўрқиб, ёлвориб,  
 Кўзларинг қидирмас менинг изимдан.  
 Ишвали сўзлар-ла қилмоқ бўлиб ром,  
 Мени гапга тутиб қолса бир жонон, –  
 Сен бегам, осуда; қувноқсан мудом.  
 Бу таънанг мен учун ўлимдан ёмон!  
 Гапир-чи, не учун менинг рақибим,  
 Мену сен икковни кўраркан хилват,  
 Сенга нечун сирли қиласди таъзим?..  
 Айт-чи ким берибди бунга ижозат?  
 Сўйла-чи! Не учун тўлғанар рашқда,  
 Не учун оқарар жамолинг кўриб?  
 Не учун кун ва тун ўртаси пайтда  
 Онангиз сен танҳо оласан кумтиб?!  
 Лекин мен севимли... Мен-ла қолганда  
 Шу қадар муниссан, шу қадар дилдор!  
 Бўсанг – ўт! Сен ишиқдан сұхбат очганда  
 Самими юрагинг этилар изҳор!  
 Сенга кулгилидир мендаги азоб  
 Ва лекин севасан, етади ақлим.  
 Азизим, қийнама, ҳеч қолмади тоб,  
 Билмайсан, нақадар кучлидир ишиқим,  
 Билмайсан, қандай зўр менда изтироб.

\*\*\*

Агар сени алдаса ҳаёт,  
 Сен ноумид бўлма ҳеч қачон.  
 Фамли кунга қилгин итоат,  
 Хушнуд кунлар келади, ишон!

Қалб келажак ишиқи-ла яшар;  
 Бу кунимиз қайёу ва доғли:  
 Бари оний, ўтишига шошар,  
 Ўтган эса ҳамиша тотли.

\*\*\*

*...2a*

Эсимдадир ажисб дам ҳали,  
 Кўз олдимда бўлдинг намоён,  
 Соф гўзалик даҳоси каби  
 Бир лаҳзалик хаёл, туисимон.

Қувингликнинг чангидаги нурсиз  
 Ғамга тўлиб кунларим ботди;  
 Худо, илҳом ва кўз ёшиқиз,  
 Ишиқ, изтироб, ҳаётсиз оқди.

Ғам-аламдан дилим ёнгандаги  
 Түшларимда кўрдим чехрангни.  
 Ҳаётдаги бўм-бўш суронда  
 Келиб турди товшинг жаранги.

Мана, қалбга ошно бўлди най,  
 Кўз олдимда бўлдинг намоён,  
 Гўзаликнинг соф парисидай,  
 Бир лаҳзалик ажисб туисимон.

Йиллар ўтди. Исён бўрони  
 Ҳаёлларим совурди дилдан  
 Ва унумтдим дилбар садонгни,  
 Ўчди азиз чехранг ёдимдан.

Руҳим яна ўйғонди бу дам,  
 Яна унда тирилди најсом,  
 Яна дилда худо ва илҳом,  
 Кўз ёшию муҳаббат, ҳаёт.

**ЖАҲОН АДАБИЁТИ**

## Тарас ШЕВЧЕНКО

\*\*\*

*Алла, болам, алла, гуссам,  
Дардим сен тун-кун...  
Украинада кезганинг дам  
Каргайсан бир кун.*

*Сен отангни, ўғлим, ҳеч вақт,  
Құлма ғунохкор.  
Мени қарга, менман бадбахт  
Мендан қылғин зор.*

*Мен оламдан ўтган нафас  
Үрмөнга кетгін.  
Ҳеч ким қулиб, таҳқиrlамас  
Сен унда кезгин.*

*Калинамни ахтариб топ,  
Ва қылғин татъзим,  
Севар әдим мен уни соғ  
Жигарим, бағрим.*

*Халқ ичига кириб қолсанг  
Тинмасин құзинг.  
Аммо она-бола күрсанг,  
Ұғирғин юзинг...*

\*\*\*

*Бой қызига уйланма,  
Хұрлаб уйидан құвар.  
Қашиоқ қызга бойланма,  
Умринг іүқтікда ўтар.*

*Уйлан озод, әркинга,  
Шудир казак қисмати:  
Очсан, лекин әркингга  
Әгасан шамол каби.*

*Бирор қылмайды хуивакт,  
Азоб ҳам солмас ҳеч ким.  
Қаеринг оғрір, не ғап,  
Күнглингни олмас ҳеч ким.*

*Дейдилар: Эр-хотинга  
Бир дард чекмоқ енгилроқ  
Инонма, күз ёшиңгга  
Күз тушимагани беҳроқ.*

## Леся УКРАИНКА КҮЙЛАРИМ

*Күйларим! Нега сиз чақмоқдай бўлиб,  
Жангларда ёнувчи пўлат эмассиз,  
Ё душман бошини бешафқат узиб  
Ташловчи шамишири қасос эмассиз.  
Эй, менинг тобланган тигим – куйларим,  
Сизни қинингиздан олсам сугуриб,  
Фақат оқизасиз дилдан хунларим,  
Ёв бағрин тешмайсиз яшиндай уриб!..  
Бағишлаб барча куч, билим, санъатни,  
Мен пўлат шамишири чархлайман жангга –  
Ярқираб, деворнинг бўлиб зийнати  
Турған бу пўлатдан не фойда менга?  
Эй, менинг қурашга тайёр куйларим,  
Биз ҳалок бўлмасмиз беҳуда ҳеч бир.  
Балки сиз нотаниши жасур дўстларим  
Кўлида бўларсиз душманга шамишр.  
Кишинга теккан тиг чиқарган садо  
Душман қўргонини қўпориб ташлар.*

**ЖАҲОН АДАБИЁТИ**

100

Озод қардошларнинг дардига даво  
 Бўлиб кураши сари, жсанг сари бошлилар.  
 Қасоскор ҳеч қачон жсангда енгилмас,  
 Ҳужумга киаркан қўшиқ-ла ҳамдам.  
 Қўйларим! Бу заиф қўлларга эмас,  
 Жасур курашчига ёр бўлинг ҳар дам !

## Марина ЦВЕТАЕВА

\*\*\*

*Севги! Талвасада, тобут қаъридан  
 Тортиниб, интиқиб, талпингум қувноқ!  
 Севги! Гўр лабида, булут бағрида  
 Туриб ҳам, демасман сенга аливдо  
 Берилмаган ахир, жуфт үт қанотлар  
 Ўрсин деб юракка ортиб гам юкин.  
 Йўргакли, қўзюмуқ, безабон зотлар  
 Нуфузига қўшиммам яна бир ютун.  
 Қўлларим қутқариб, ростлайман қаддим,  
 Ишқ! Сени ўлимдан сақлайман омон.  
 Мен унга үт қўйсам минг-минг чақирим  
 Ерларда қор қайнаб, ёнади ўрмон!  
 Лекин қанотларим, кифтиим, тизларим  
 Букиб шум ҳукмига бера қолсам тан, –  
 Бу – ўлим устидан кутиб, эзганим,  
 Бу – мен шеър бўлганим, бўлганим гулишан.  
 Кечакардинг ҳали қўзимга,  
 Бугун қайлардадир кезади нигоҳ!  
 Кечакардинг ҳали қўзим-ла,  
 Бугун ҳамма тўргай – нақ қарга сиёқ.  
 Мен чунон нодонман, сен эса доно,  
 Сен тирик, мен жонсиз донг қотиб қолдим.  
 Замонлар аёлин доди бу садо:  
 “Жонгинам, мен сенга не қила қолдим?”  
 Аёл қўз ёши – сув ва қони ҳам сув,  
 Конда ва қўз ёйда чўмилди аёл.  
 Севги она эмас, ўгай она у,  
 Хукм ва тараҳҳум кутмак хомхаёл.  
 Кема олиб кетар севгилимизни,  
 Уларнинг ўллари нурафшин доим.  
 Фарёдимиз тутар ернинг юзини:  
 “Жонгинам, мен сенга не қила қолдим?!”  
 Ҳали кечагина ётиб пойимда,  
 Хитой ҳоқонига этгандинг қиёс.  
 Бирдан икки қўлим қолди ёнимда,  
 Занглаган чақадай сочилиди ҳаёт!  
 Фарзандин қатл этган бир жаллодсимон  
 Суддаман: носуяқ, журъатсиз, музлим.  
 Мен дўзахдан сенга чекаман фарёд:  
 “Жонгинам, мен сенга не қила қолдим?!”  
 Сўрайман стулдан ва каравотдан:  
 “Нечун шунча азоб, шунчалик тоқат?”  
 Ва жавоб оламан: “Тўйди ўтмакдан,  
 Ўзгани ўтмак-ла этмоқчи бадбаҳт”.*

ЖАҲОН АДАБИЁТИ

*Оташда яшашига ўзинг ўргатдинг  
 Ва муз саҳросига сўнг отдинг жиссими.  
 Мана, не кунларга солдинг, не қилдинг,  
 “Жонгинам, мен сенга не қила қолдим”  
 Мен барин айтаман, қилма эътироуз,  
 Боз кўзим очилди. Эмасман жазман,  
 Қаерда чекинса муҳаббат шу хос  
 Хукмин бошлилар ажсал аталмии бөгбон.  
 Олма шохларини силкитмоқ нечун  
 Пишиб етилганда тушар ўзи жисим.  
 – Мени кечир, бари, барчаси учун:  
 Жонгинам, мен сенга не қила қолдим?*

## *Анна АХМАТОВА*

\*\*\*

*Юртни ёв қаҳрига ташлаб кетганлар  
 Бўлолмас ҳеч замон ҳамроҳим меним.  
 Маҳлиё этолмас мадҳу найранглар,  
 Уларга бермасман битта ҳам шеърим.*

*Лекин мисли тутқун, мисоли хаста,  
 Ҳамиша аянчили менга қувгин жон.  
 Мусофир, йўлларинг қора зулматда  
 Ҳеч вақт ширин бўлмас ёт қўл берган нон.*

*Бу ерда, ёнгинлар аччиқ дудида  
 Қолган ёшигимиз этаркан қурбон,  
 Эл бошига тушган кўргиликлардан  
 Ўзимизни олиб қочмадик бир он.*

*Биламиз, келажак қиласар сарҳисоб,  
 Қимматин топади ўтган ҳар соат.  
 Лек биздай кўз ёшиз, оддий ва кибор  
 Одамлар бўлмаган жаҳонда ҳеч вақт...*

\*\*\*

*Мана, бир амаллаб бўлдик ажирим  
 Ва ўчиридик ўзи сўнган оловни.  
 Энди билмак даркор, абад рақибим,  
 Чиндан севмакни ҳам ахир бирорни.*

*Мен эркин, ҳар нарса мен учун эрмак –  
 Тунда учиб кириб юпатар илҳом.  
 Тонгда қулогимни батанг этарак  
 Шуҳрат шақилдоқдай қилмоқ бўлар ром.*

*Не кор мени ўйлаши, раҳм ва шафқат,  
 Кетаётуб ортга ташламоқ назар.  
 Қора еллар менга баҳи этар тоқат,  
 Ва хазонрезгизлик дилим қувнатар.*

Ҳижронни ўзимга биламан түхфа,  
Унумтоқни буюк ҳузур, мурувват...  
Лекин айт, бундайин дўзахвор ўтга  
Ўзгани ташлашга қилмассан журъат?..

## Сулаймон РУСТАМ

### АХТАРИНГ

Бир кун ёдингизга тушсам мабодо,  
Бу она ерлардан мени ахтаринг.  
Беш-олти қўшиги муаллифини  
Севган кўнгиллардан мени ахтаринг.  
Илк баҳор чогида,  
Иса боғида,  
Ораз қиргогида  
Сайр этган чогда  
Үрдакли кўллардан мени ахтаринг.  
Энг азиз билганим жонажон Ватан,  
Умидим босади на туман, на чанг,  
Карвон-карвон бўлиб маъноли кечган –  
Ойлардан, шиллардан мени ахтаринг.

Бу кўрар кўзимни,  
Юрак сўзимни,  
Менинг бор вужудим,  
Менинг ўзимни  
Куй севган диллардан мени ахтаринг.

### ҚИММАТИ ЙЎҚДИР

Сийаси дарёдай шеър-ла тошган  
Шоирнинг қуёшсиз сахари йўқдир.  
Қора кун ҳам ўтди, ёргу ҳам бошдан,  
Деманглар, дунёдан хабари йўқдир.  
Бу тупроқ ўғлининг орзуси зиёд,  
Ёрқин чўққиларга тўлиқдир ҳаёт.  
Узини менга дўст билмаган бир зот –  
У ким дилда тоза гавҳари йўқдир.  
Севгисиз ва дардсиз кечирган умр  
Ҳаётмас, ҳулёдан излаган ҳузур.  
Ватансиз, онасиз, бетолеъ, бенур  
Куни ўтганларнинг бир қадри йўқдир.

## Қайсин ҚУЛИЕВ

### ДАВОМ ЭТСИН ЖИМЛИК

Ўлдирманг жимликни! Жимликда ёлғиз  
Фикр денгизига чўмар донишманд.  
Сўнувчи чироқда ойга тикиб кўз,  
Битмас хаёллари билан бўлар банд.

ЖАҲОН АДАБИЁТИ

*Гуркираб кўкарап жимлиқда буғдой,  
Болалар тўқ бўлсин, ўссин дея сог.  
Жимлиқда ёғиб қор, қашф этиб чирой  
Яшнайди даламиз,  
Гуллар, ҳовли, боғ.*

*Шундай бир жимлиқни истайди полиз:  
Нозланиб қовунлар тўлсин шакарга,  
Тунда ой инсонга ўзи чўкиб тиз,  
Саёҳатга роҳбон бўлсин саҳарда.*

*Экин-тикинлар ҳам жимлиқда ўсар,  
Тупроқнинг ҳаётбахи шаробин ишиб.  
Гўдак, сут, яйловда пичанлар унар,  
Жимлиқкина уни турганда қучиб.*

*Жимлиқда ёнади ўчоқда олов,  
Она гўдагига тўқийди алла.  
Жимлиқда тандирда қизаради нон,  
Кушлар ҳам, куйлар ҳам учар баралла.*

## ҚАДИМГИ НАСИҲАТ

*“Сендан кичик йўқ бунда!” – дерлар,  
Зарра бўлсин газабланма сен.  
“Сендан улуғ йўқ бунда!” – дерлар,  
Зарра бўлсин магурланма сен.*

*Сокин тошидай бўл чидам рамзи,  
Бўронда ҳам, ёқсанда ҳам қор.  
Кўланкали дараҳтдай сахий  
Ӯром бўл ким шабадага зор.*

*Гар истасанг ўз йўлинг топмоқ,  
Зўр оқимдан олгин андоза.  
Не кун кўрма, тоз қори сиёқ,  
Қола билгин оппоқ ва тоза...*

*Зулфия таржималари*



## АФРИКА МАМЛАКАТЛАРИ

**Майдони:** 30 221 532 км<sup>2</sup>



**Аҳолиси:** 1 033 млрд. киши



**Таркиби:** 55 та давлат



**Тили:** Африка тиллари



## АФРИКА: КЕЧА, БУГУН, ЭРТАГА...

Журналинизнинг Африка қитъаси халқлари адабиёти, санъати, маданиятига бағишиланган сонини нашрга тайёрлар эканмиз, мазкур қитъа ахолисининг сиёсий, иқтисодий, ижтимоий ва этнографик турмуш тарзига, қитъада кечётган маиший ҳаёт манзараларига оид тўлароқ маълумотлар билан ўқувчиларимизни таништириш мақсади қуидагича савол-жавоблардан иборат сухбатни ҳам эътиборингизга ҳавола этишни маъқул топдик. Сухбатда таникли африкашунос олим, тарих фанлари доктори, профессор, Москвадаги Осиё ва Африка мамлакатлари институти директорининг ўринбосари Леонид Владимирович Гевелинг Африка мамлакатлари ҳаёти билан қизикувчи журналхонлардан келиб тушган саволларга жавоб беради.

Савол: – Африкадаги ва унинг асосий минтақаларида иқтисодий аҳвол ҳақида қисқача гапириб беринг.

Жавоб: – Сўнгги ўн йиллар мобайнида Африка мамлакатларининг иқтисодиёти анчагина парвозларни ҳам, инқизозларни ҳам бошидан кечирди. Саҳрои Кабирнинг жанубида жойлашган мамлакатларда 1975–1985 йилларда иқтисодий ҳаёт жуда кескинлашиб қолган эди. Стагнация (пасайишдан олдинги турғунлик) ҳолати 1990 йилларнинг ўрталаригача кузатилди. Шундан сўнгтина ҳаёт аста-секин жонлана бошлади: макроиктисодий вазият яхшиланиб, инфляция даражаси пасайиб, ўсиш, тараққиёт учун замин пайдо бўлди, қайта ишлаб чиқариш жараёнлари барқарорлаша бошлади. Марказий (тропик) Африка мамлакатларида йиллик ўртacha ички ялпи ишлаб чиқаришнинг ўсиши 80-йилларда – 1,6 % ни, 90-йилларда – 2,54 % ни, ва ниҳоят, 2000 йилларга келиб – 4,9 % ни ташкил эта бошлади (бу кўтарилиш ҳозир ҳам давом этмоқда). Африка мамлакатларидан олинадиган минерал хомашё ва қишлоқ хўжалик маҳсулотларига кўйиладиган нархнинг жаҳон бозорларида ўсиши бунда маълум даражада ижобий роль ўйнади, албатта. Қитъанинг иқтисодини кўзлаб кўйиладиган сармоялар миқдори кўтарила бошлади. Аммо иқтисодий ўсишнинг йўлига ғов бўлиб турган омиллар ҳозир ҳам оз эмас. Ҳалиям иқтисодий инфратузилмаларда эътиборталаб ўринлар кўп. Африка мамлакатларидаги хукumatлар инвестициявий иқлим, шарт-

**ЖАҲОН АДАБИЁТИ**

шароитларни яхшилаш, ташқаридан молиявий ресурсларни кўпроқ жалб килиш борасида унчалик ҳам бош қотираётганлари йўқ.

Савол: – Африка қитъасидаги сиёсий бекарорликнинг манбалари, сабаблари ҳақида нималар дея оласиз?

Жавоб: – Дарҳақиқат қитъада ҳарбий мажаролар камайгани билан, мамлакатларнинг ижтимоий тараққиётида барқарорлик сезилмаётир. Айтайлик, XIX аср – XX асрнинг ўрталарида давлат тўнтаришлари асосан Лотин Америкаси мамлакатларида амалга оширилган бўлса, ўтган асрнинг иккинчи ярмида бу борадаги “илгорлик” Африка мамлакатларига ўтиб кетди. Бу мамлакатларда ҳарбийлар фуқаролик хукуматларини ағдариб ташлаб, ҳокимият тепасига ўзлари ўрнашиб олдилар (бундай ҳолатлар баъзи мамлакатларда бир неча маротаба такрорланди ҳам).

Авваллари бундай мажаролардаги қарама-қаршиликларнинг бир томонида фуқаролар, иккинчи томонида ҳарбийлар турган бўлса, кейинчалик бундай қарама-қаршиликларга ирқий, этник ва қабилаларро жанжаллар, худудий ва диний мажаролар ҳам сабаб бўла бошлади. Африка қитъасида ислом динига, христианлика, шунингдек, маҳаллий маъбулларга сифинувчилар ҳам бор. Расман тақиқланган деб ҳисобланувчи ҳаракатларни ҳам ўз қаторига қўшиб олган афро-христианлик чerkовлари ва секталар ҳам йўқ эмас.

XX асрнинг охириларигача, бўлиб ўтаётган ҳарбий тўнтаришлар, биродаркушлик урушлари, шунингдек, этник ва диний мажаролар яқин йиллар ичида ўз-ўзидан тинчиджимиб кетади, деб ҳисоблаб келинди. Минг афус, сўнгти ўн йилликда бўлиб ўтган қаттолликлардан шундай хulosалар келиб чиқмоқдаки, ўтмишдаги аччиқ кўргуликлар ҳалигача бартараф бўлиб кетмаган экан. ОАВларда ҳозир-ҳозиргача “Африканинг фалон мамлакатида қўзғолон кўтарилди”, “фалон жойда тўнтариш бўлиб ўтди”, учинчи бир мамлакатда “давлат раҳбарига суккасд уюштирилди”, “диний асосда жанжаллар авж олмоқда” каби хабарлар тез-тез чоп этиб турилади. Нимаям дердик, қитъадаги тўла барқарорлик, тинчлик ҳақида гапиришга ҳали эртароқ шекилли.

Савол: – Ҳозир Африканинг кўплаб худудларида этник-қабилавий асосда келиб чиқаётган жанжалларни мунтазам равишда кузатиш мумкин. Менимча, бу жанжаллар – қитъада ижтимоий-маиший соҳаларда сақланиб турган уруғ-қабилавий муносабатларнинг бевосита оқибатидир. Вазият шундай бўлиб тургач, бу қитъа мамлакатларида сармояга асосланган замонавий иқтисодиётни йўлга қўйиш, барқарор демократик хукумат тузишнинг имконияти борми? Умуман, қитъа худудларидаги вазиятни барқарорлаштириш учун нималар қилиш керак?

Жавоб: – Уруғ-қабилавий муносабатлар қаердадир қисман сақланиб қолган-у, аммо бундай муносабатлар Африкада аллақачонлардан буён ҳал қилувчи омил мақомидан тушиб кетди. Шу асосда келиб чиқадиган қабилавий қарама-қаршиликлар ҳам эндилиқда секин-аста ўтмишдаги гапларга айланиб бормоқда. Мамлакатлардаги сиёсий аҳвол ҳақида гапирадиган бўлсак, албатта, сиёсий плюрализмни, фуқаролик жамиятига хос тамойил ва анъаналарни ривожлантириш бўйича ҳали анча-мунча тер тўкиш керак бўлади. Бинобарин, гарб одамлари тушунчасидаги каби мумтоз демократия анъаналарининг Африка мамлакатларида ҳам яқин йилларда қарор топшиши умид қилиш – беҳуда бир гап. Лекин шундай шароитда ҳам Африка мамлакатларида демократиялашни ривожлантириш учун имкониятлар бор. Мен бу борада, масалан, кўп partiyali тузилмаларни қарор топтириш, эркин демократик оппозициялар ва мустақил оммавий аҳборот воситалари сонини кўпайтириш, давлатга раҳбарлик қиласидаги органларнинг алмашиниб туриши каби чора-тадбирларни кўзда тутаяпман. Мана шундай демократик курилиш унсурлари, фуқаролик жамияти, мустаҳкам нодавлат ташкилотлари – булар барни Африкада барқарорлик яратиш учун ёрдам бериши, бундай иложлар иқтисодий соҳаларда ҳам чет эллик ва маҳаллий инвесторларнинг эркин ҳаракатларига кенг йўл очиши шубҳасизdir.

Ўйлашимча, Африка мамлакатлари товар ва маҳсулотларни экспорт қилиш, чет эллардан келадиган моддий ёрдамларни кутиш ишларига бутунлай ўтиб олмасликлари керак. Бу борада улар ўзларининг иқтисодий алоқаларини кучайтирасалар, фақат собиқ мустамлакачи давлатлар эмас, балки бошқа мамлакатлар билан ҳам алоқаларни кучайтирасалар, мақсадга мувофиқ бўлар эди. Айниқса, экспорт тузилмаларининг фаолиятини яхшилаш, импорт маҳсулотларини истеъмол қилиш хиссасини пасайтириш, юқори квалификацияли кадрларни тайёрлаш тадбир-иложларни амалга ошириш ҳам ўйлаб кўришга арзидиган жиҳатлардир. Аммо, барибири ҳам, иқтисодий ислоҳотларни чуқурлаштириш, технологик тараққиётни рағбатлантириш асосий масала бўлиб қолаверади.

Савол: – Африкадаги қайси мамлакатларни ўз ҳудудларида салоҳиятли лидерлар сифатида тилга олиш мумкин? Айтайлик, Африканинг (араб бўлмаган мамлакатларида) ЖАР давлатини бу борада сиёсий лидерликка муносиб мамлакат деб қараш мумкинми?

Жавоб: – Африканинг турли ҳудудларида лидерлик ролини бажара оладиган бир нечта мамлакатлар мавжуд. Мана, масалан, шимолий ҳудудларда Миср мамлакати. Ёки Африканинг жанубида сўзсиз ЖАР, гарбida Нигерия. Марказий ҳамда Шарқий Африкада эса бу борада етакчилик қила оладиган бирор бир мамлакатни аниқ кўрсатиш қийин. Агар ўзидағи биродаркушлик урушларни, иқтисодий бўхронларни жиловлаб ололганида эди, хеч сўзсиз Конго Демократик Республикаси (КДР)ни етакчи ўринларда кўриш мумкин бўларди. Вақти келиб, Шарқий Африкада Кения, Танзания ёки бошқа бирор мамлакатни илфорлар ўрнида кўрсак ажаб эмас, буни энди вақт кўрсатади, албатта. Бугунги кунда ЖАР ва Нигерия давлатлари ўзларининг ана шундай ролга муносиблигини тўла кўрсата олган улкан салтанат (держава)лардир. Бир вақтлар бу икки давлат айнан мана шу масалада – етакчилик борасида рақобатчи хисобланарди. Ҳозирги пайтга келиб эса ЖАР – дунёдаги “катта йигирматалик”ка киргач, Нигерияни йўлда қолдириб кетганини ҳамма кўриб турибди.

Савол: – Нима деб ўйлайсиз, китъада Афроиттифоқ тузиш имкониятлари борми?

Жавоб: – Бундай иттифоқ (АИ) аллақачоноқ тузилган. 2009 йилда бу иттифоқни Муаммар Каддафий бошқарар эди, 2010 йил январь ойи охирларида унинг ўрнини президент Малави Бингува Мугарика олди. Африка Қўшма Штатларини – АИга қараганда ҳам мустаҳкамроқ иттифоқ тузиш масаласини айнан мана шу арбоб кўтариб чиқди. Бу ерда гап “умумафрикавий давлат” тузиш ҳақида боради.

Сирасини айтганда, бу масала янги эмас, бундан 50-55 йиллар муқаддам Гананинг биринчи президенти Киаме Икрума томонидан ўргатга кўйилиб, у Африка мамлакатлари етакчиларига суверенитетдан қисман чеклаб бўлса ҳам, мана шундай давлат тузиш зарурлигини, мана шундай кенг камровли (гипотетик) давлат тузилсагина колониализмга, неоколониализмга қарши туриш мумкинлигини уқтирган эди. Айнан мана шундай мақомдаги давлатгина мамлакатлар ўртасида кўр-кўрона, шоша-пиша ўtkазилган чегаралар муаммосини ҳал этиб беришга қодир бўла оларди.

Икруманинг ғоялари Африканинг келажакдаги умумтараққиётини қамраб олганди. Аммо, на чораки, у йилларда умумафрикавий миқёсда қамровли фикр юритиш давр кайфиятига мос келмади, бинобарин кун тартибидан чиқиб ҳам кетди. Ўйлашимча, бу ғояни амалга оширишининг вақти ҳалиям келмаган. Африка Қўшма Штатларини таъсис этиш режасига кўплаб мамлакатларнинг бошчилари панжа орқасидан қараб келганлигининг боиси шу.

Савол: – Сизга ҳозир Африканинг (Ботсвананинг) ўзидан туриб мурожаат қиласяпман. Мени қўшни Зимбабведа тарқалаётган вабо касаллиги ўйлантираяпти. Бу муаммони ҳал этиш учун жаҳон жамоатчилиги томонидан қандай чоралар қўлланмоқда?

## ЖАҲОН АДАБИЁТИ

Жавоб: – Африка хавфли ва кам ўрганилган касалликлар келиб чиқувчи қитъа сифатида ҳамма вақт “шухрат” қозониб келган. Сўнгги пайтларда бундай касалликларнинг тарқалиши фаоллашганлиги ҳам бор гап. Мен малярия, холера, СПИД, Эбой лихорадкаси, полиомелит касалликларини назарда тутяпман.

Бир қанча ҳудудларда сил касалликлари ўчоғлари пайдо бўлди. Полиомелит касаллиги тарқалишида ислом дини раҳнамолари бир неча маротаба айборд қилиб кўрсатилди – нима эмиш, улар полиомелитдан эмланишга қарши турган эмишлар, сусткашлик қилган эмиш-у, шу билан бу касаллик авж олиб кетган эмиш.

Ваҳоланки, касалликлар – иқтисодий ва сиёсий инқирозлар туфайли келиб чиқадиган кулфат, кўргулик эканлиги аввалдан ҳам аён. Бундай инқирозлар Африка қитъасини узоқ йиллардан бери исканжага олиб келганлиги ҳам маълум. Жаҳон жамоатчилигининг имкониятлари ҳам шундан келиб чиқсан холда жуда чекланган. Касалликларни бартараф этиш учун эса инвестицияларга кенг йўл очилиши, Қизил Хоч, Бутунжаҳон соғлиқни сақлаш ташкилоти, “Чегара билмас врачлар” каби ташкилотларнинг имкониятларини кенгайтириш, шунингдек, дори-дармон етказиб бера оладиган, вакцинация ўтказадиган мамлакатларнинг олдини тўсмаслиқ, госпиталлар ташкил этилишига, Африка мамлакатларида тиббий персонал (ходимлар)нинг фаолиятини кучайтириш лозим бўлади. Касалликларга енгил-елпи қараваш, “ўтиб кетар-ов” дегандай муносабатда бўлиш жуда хунук оқибатларга олиб келиши шубҳасиз! Агар бу касалликлар қитъадан “ҳатлаб” ўтиб, бошқа қитъаларга ошиб кетгудай бўлса борми, фавқулодда сайёравий фалокатлар бошланади, деяверинг...

Савол: – Мен Марказий Африка мамлакатларига саёҳат қилишни орзу қиласман. Хавфсизлик, туристик инфратузилмалар хизматининг сифати нуқтаи назаридан, сиз қайси мамлакатларга саёҳат қилишни маслаҳат берган бўлардингиз?

Савол: – Европадан борган саёҳатчиларга маҳаллий халқларнинг муносабати қандай? Турагентлиқда ишлайдиган бир ходиманинг гаплари мени қўрқитиб кўйди, унинг гапига қараганда бу мамлакатлар ҳудудида ёлғиз саёҳат қилиш умуман хавфли эмиш, гурух бўлиб йўлга чиқиш ҳам кўпинча хайрли тугамас эмиш...

Жавоб: – Менга қолса, Африкага, тинчлик барқарор бўлган мамлакатларнинг ҳудудига ишонса бўладиган, эътиборли туристик фирмалар тавсиясига кўра саёҳат уюштирилгани маъқул. Шундаям, ёнингизда Африкада ишлаб тажриба орттирган одам (ё мутахассис) бўлгани яхши. Гурух бўлиб саёҳат килиш – энг афзали. Турист сифатида томоша қилса бўладиган, арзидиган, завқ оладиган табиат манзаралари, тарихий ва маданий қадамжолар Африканинг ҳар бир мамлакатида мавжуд. Ҳар битта мамлакатда россиялик туристларга муносабат яхши. Гвения кўрфази оролларига, Танзания ва Кенияга бориб, роҳатлани келаётганлар бор. Маслаҳатим, тинчлик барқарор бўлган, шарт-шароити яхши мамлакатларга бемалол бораверинг. Лекин, оғоҳлантириб қўйяй: марказий Африка мамлакатларига қилинадиган туристик саёҳатлар чоғида хавфли “сюрпризлар” рўй бермайди деб ҳеч ким кафолат бера олмайди.

Савол: – Жаҳоннинг қайси етакчи мамлакатлари (мен гарб мамлакатларини кўзда тутяпман) шунингдек, Осиёнинг қайси ривожланган мамлакатлари иқтисодий ўёналишларда Африка қитъаси билан кўпроқ боғланган? Бу соҳаларда ҳамкорликлар қайси соҳаларда айниқса манфаатлироқ кечмоқда ва нима учун? Буни неоколонизмнинг “қайта уйғониши” деб талқин қилиш мумкинми?

Жавоб: – Америка, Европа учун ҳам, Хитой, Ҳиндистон, шунингдек, Россия учун ҳам иқтисодий ҳамкорликда, бой манбалар излаб топища Африка мамлакатлари мухим макон ҳисобланади. Кофе, чой, какао, тропик мевалар, ширинликлар – булар барча мамлакатлар учун хуш кутиб олинадиган маҳсулотлардир. Мен ҳали қазиб олинадиган маъдан-конларни айтмаяпман. Сайёрамизнинг қайси бурчагида жойлашган мамлакат бўлмасин, Африка

қитъасига манфаат нүктаи назаридан қизиқиб қарайди, буни яшириб ҳам ўтирамайди. Совук уруш даврида Россияда Африкага империалистик мамлакатлар ва трансмиллий корпорациялар сүқилиб кираётган неоколониализм макони сифатида қарап эдилар. Кейинчалик эса бу талқин неоколониализм деб эмас, балки янгича колониализм деб атала бошланди. Европалик ва Америкалик эксперталар ҳатто шундай тезисни олға суришди: агар Африкадаги бесаранжомлик ва бўхронлар шу ахволга келиб қолган экан, африкаликларга озодлик ва суверенитетнинг умуман кераги йўқдир? Ахир улар мустамлақа бўлиб, Лондон, Париж, Лиссабондан туриб бошқарилган замонларда ҳаммалариям у ёки бу даражада, озми ёки кўпми – ҳар ҳолда, ривожланиб келаётган эдилар.

Фикримча, мустамлақачилик даврлари қайтмайдиган бўлиб ўтиб кетди ва эндиликда у даврларни қайси бир шаклда бўлмасин такрорлаш, реанимация қилиш – ақлга сифмайдиган ҳолдир. Классик шаклдаги неоколониализм (ўтган асрнинг 70–80-йилларида собиқ СССРда бу хил мустамлақачилик ана шундай тушунилар эди)нинг эндиликда ҳеч кимга ҳам кераги йўқ. Илғор гарб мамлакатлари, бир канча шарқ давлатлари намоён этаётган иқтисодий манфатдорлик ёки бошқа хил янги-янги шакллардаги қарамлик кўринишларининг пайдо бўйлши ва шу тахлитда ривожланиш – келажақда кутса бўладиган ҳолатлардир.

**Савол:** – Хозирги пайтда Африка қитъаси теварагида аллақандай “ахборот вакууми” вужудга келгандай туюлади. Африка дейилса, бирорвлар – Сомалидаги денгиз қароқчиларини, яна бирорвлар эса ЖАРдаги футбол бўйича жаҳон чемпионатинигина (2010 йил) тушунади. Кўпчилик одамларни эса мана шундай саволлар қизиқтиради: турли хил табиий бойликларга эга бўлган қитъада пешонаси шўр одамлар нега бунча кўп? Уруш ва ҳарбий можаролар уяси бўлиб қолган бу қитъа қаҷон эркин нафас олиб, тинчлиқдан баҳраманд бўлади? Африкадаги аҳоли Нельсон Манделани ким деб тушунади, у қаҳрамонми ёки кўпчиликка ўхшаган оддий одамми?

**Жавоб:** – Хайриятки, сиз айтган ўша вакуум ҳолатдан ҳозир аста-секин воз кечилаётир. Лекин гапингиз рост, кўплаб йиллар муқаддам бизнинг Африка ҳақидаги бор-йўқ тушунчаларимиз куйидаги болалар шеъри таъсирида шаклланар эди: “Болалар, Африкага борманглар, Африкада горилла, ёвуз тимсоҳлар кезиб юради...”

Ваҳоланки, Африка – ўрганишга, эътиборга арзийдиган қитъа. Ҳозирги вақтда бу қитъани, бу ерда яшайдиган ҳалқларни, илмий-этнографик жиҳатдан ўрганаётган, тадқиқ қилаётган муассасалар дунёning турли бурчакларида жуда кўп. Улар нашр қилаётган журнallарда Африка ҳақида қизикарли материалларни, лавҳа ва репортажларни учратиш мумкин.

Бундан 100 йиллар муқаддам фанда Африка аҳолисига (Миср аҳолиси бу хисобга кирмасди, албагта) тарихи йўқ ҳалқлар, уларнинг турмуши ўта примитив (саёз, бирхил, рангиз) деб қараларди. Ҳолбуки, ҳеч ҳам бундай эмас экан. Ҳозир Африка аҳолиси ясаган никоблар, ҳайкалчалар, безак-нақшлар бутун дунёда машхур. Уларнинг тош, ёғоч, терракота, газлама, металлдан бунёд қилган буюмлари бутун дунё ҳаридорларининг эътиборида. Бу буюмлар жаҳон афкор оммасининг наздида юксак санъат асари (шедевр) сифатида баҳоланади. Ҳуллас, Арфика ҳалқларининг санъати, маданияти дунёни эгалламокда. Дунёning энг машхур музейларида Африка никобларини, чолғу асблорини, ов куролларини учратиш мумкин. Машхур Бенин биринжи (бронзаси)дан ишланган буюмларни-ку бутун дунё антикварчилари кимошли савдоларда туриб, талашиб-тортишиб ҳарид қилишади.

Африка деганда биз бугун ажойиб бадиий ижод намуналарини – эртаклар ва афсоналарни, шеърлар ва романларни ҳам тушунамиз. Бу мамлакатларда гаройиб, ўта ўзига хос фильмлар яратилмоқда. Энди буларга қўшимча, Африка мусиқасини, Африка таомларини, африкача соч турмакларини, африкача кийимларни кўз олдингизга келтиринг – мана, замонавий ва қўхна, навқирон ва ранг-баранг Африка...

## ЖАҲОН АДАБИЁТИ



## ҮЗЛИК ҲИМОЯСИГА ЧОГЛАНГАН ШЕРİЯТ

Африка деганда дунёning бошқа ерларидағи аксарият омма шувиллаған, билқилама құмлар тұла саҳродағи түя минган фаллохтарни, жазира-rama чангалзорларда яшайдиган одамхұр қабилаларни, сұваракларни еб күн күрадиган занжыс болаларни, үйлаб ювинмаган ёввойи одамларни тасаввур қиласади. Африкани күпчилік жуда иссиқ бир саҳро деб билади. Ҳолбуки, бу жуда улкан, ранг-баранғ ықтимли қитъадир. Үнда абадий қор босған воҳалар ҳам, Климанжара каби улкан чўққили тоғлар ҳам, Виктория сингари курраи заминнинг улкан шаршарапари ҳам бор. Бугунги кунда Африкада тараққий қылған давлатлар, шаҳарлар ҳам кўп.

Россиялик шоир Роберт Рождественский: “Африка шеъриятини қулоқни бироз беркитиб эшитиши керак, чунки унда асрлар қаъридан келаётган шиддатли, оғриқли, инсон чидаб туролмайдиган бир дард чинқириб туради”, – деб ёзғанди. Зотан, бу ҳайқириқларда қадимий садо, поймол бўлған умид, қуллик кишинларига қарши исён, зиндан зулмати, дарз кетған гурур, туғилған мушт, кўз ёши, эрк тилаб Яратғанга қилинған муноҗатлар мужсассамдир. Бу шеъриятда Африка учун улкан муҳаббатга тўлиқ меҳрибон қалблар ниdosи ва Африканинг тақдиридан чекилған улкан қайғу, қаҳр бор.

Сўнгги эллик-олтмиши йил мобайнида Африка халқлари адабиётида, шеъриятидә, маданият ва санъатидә жуда кўплаб жаҳоний номлар пайдо бўлди. Антонио Жазинто, Агостино Нето (Ангола), Бернар Нуа Дадье (Кот-д'Ивуар), Кофи Авунар, Израэл Кафу Хо (Гана), Клементина Нзужи (Конго Демократик Республикаси), Элолонгэ Энанья Йондо (Камерун), Марина Гаше (Кения), Жан-Батист Тати-Лутар, Чикайя Утамси (Конго), Воле Шойинка, Габриэль Окара (Нигерия) каби иирик ижодкорларни бутун дунёда яхши биладилар. Улар орасида Нобель мукофотига сазовор бўлғанлари ҳам бор.

Инчунин, Африка шеъриятидан метафора, образлилик, санъат излаш ҳам бир қадар нокулай туюлади, чунки бу зулмга қарши ҳайқириқдир, кўкрагини ўқ тешиган асирнинг ажалолди гаргара тортишиидай, қуллик кишинларининг шакирлашидай оҳанглар эшитилади бу сатрлардан. Бу нолаларни ногоҳ зарба тушишидан ҳайиққандай сиқилиб, ториқиб тинглайсан, киши.

Тамаддун залвори остида ўзликни асраб қолишга уринаётган, озодликни, инсоний баҳтни орзу қилаётган бундай шеърият – абадиятга дахлдордордир.

Таржимондан

## Кот–д'Ивуар

### Бернар Буа ДАДЬЕ

#### ҚЎЛЛАРИМИЗНИНГ ЧИЗИҚЛАРИ

Кафтдаги чизиқлар,  
Кўлдаги чизиқлар –  
Параллеллар тўримас,  
Меридианлар ҳалқаси эмас.  
Тоғ йўллари эмас,  
Дараҳт нўстлогидаги ўйиқлар эмас,  
Қадим жсанглар изи – чандиқлар эмас.  
Кафтдаги чизиқлар,  
Кўлдаги чизиқлар –  
Илонизи хандақлар эмас,  
Тиконзорлар аро ўтган  
Сўқмоқлар тўримас,  
Ўпқонларнинг қовоқ уйган дарзимас.  
Кафтдаги чизиқлар,  
Кўлдаги чизиқлар –  
Ўқубат илдиз отган  
Торкўчаларнинг чалкашилигимас,  
Кўз ёшларининг ачимсигини шимган  
Ариқларнинг нозик калаваси эмас.  
Қаҳр занижиримас,  
Дор ити эмас...  
Кафтдаги чизиқлар,  
Қора, оқ, сариқ  
Кўллардаги чизиқлар –

Чегара тасмалари эмас,  
Далаларнинг марзасимас,  
Уватлар эмас,  
Жанжаллар тўпини боғлаган  
Каноптола тўқимасимас.  
Кўлдаги чизиқлар –  
Ҳаёт йўлидир,  
Дўстликнинг ва ёргу Тақдирнинг,  
Бахтнинг ва Кўнгилнинг  
чизиқлариодир.  
Кўлдаги чизиқлар –  
Улганлар ва тирикларни  
Абадий боғлаган,  
Турли минтақалардаги дўстларни  
Боғлаган  
Нафис занжиродир.  
Кўлдаги чизиқлар  
Корамас,  
Оқмас,  
Саргашимас.  
Кўлдаги чизиқлар  
Орзуларимизни  
Бир гулдаста каби боғлаган  
Риштадир.

#### АРТ КЎЗ ЁШЛАРИНГНИ!

Африка, арт кўз ёшларингни!  
Болаларнинг қайтмоқда,  
қайтмоқда жонажонлар,  
Бўронлар, чақмоқлар оралаб,  
самарасиз саргардонликдан  
қайтмоқда  
овворайи жсаҳонлар.  
Тўлқинлар қаҳқаҳаси ва  
елвизак шивири остида,  
тоңг шафагига ўраниб,  
шом яллигида товланиб,  
мағрур чўққулардан тушиб,  
офтоб оташ сочган саванналардан  
дашту биёбонлардан  
кељмоқда сен томон,  
бўронлар, чақмоқлар оралаб,  
бесамар тентирашлардан  
қайтмоқда улар.  
Африка, кўз ёшларингни арт!  
Бизнинг юракларимиз

аччиқ қисмат  
ва шонларнинг  
барча булоқларидан  
тўйиб ичганодир.  
Қалбдаримиз очиқ  
ярқираган дийдоринг учун,  
ўрмонларингнинг хуши бўйлари,  
сувларингнинг жодуси,  
осмонингнинг мовийлиги учун,  
нурларингнинг эркалости,  
шабнамга чайилган  
майсаларингнинг жозибаси учун  
ташина қалбларимиз.  
Африка, арт кўз ёшларингни!  
Болаларнинг қайтмоқда.  
Кафтларида тухфалари бор,  
қалбларида – ишқ.  
Болаларнинг қайтмоқда  
сени орзулар ва умидоларнинг  
либосига буркамоқ учун.

#### ЖАҲОН АДАБИЁТИ

## ФАРАНГ ОҲАНГИДА МУНОЖАТ

*Золимлар аҳлидан  
қутқар, Худойим.  
Жоҳиллар жаҳлидан  
қутқар, Худойим.  
Жосуслар сеҳридан  
қутқар, Худойим.  
Озод қиласман деб алдаётган  
Европанинг  
алдамчи меҳридан  
қутқар, Худойим.*

*Уларнинг чеки йўқ мулк даъвосидан  
қутқар, Худойим.  
Яна мансабдорнинг нафс балосидан  
қутқар, Худойим.  
Мустамлакачитикдан,  
яккаҳокимликдан  
қутқар, Худойим.  
“Африка муаммоси”да  
илми зўрлардан  
қутқар, Худойим.*

*Музaffer мунофиқлардан, рибоҳўрлардан  
қутқар, Худойим.  
Улганлар руҳига ором бер, Худо.  
Кўшиқларимиз ва орзуларимиз ҳақдир.  
Аввало бизни  
қўлигимизга сабаб бўлаётган  
нафсимиздан  
ва ҳаммага ишониб кетаверишимииздан,  
лақмалигимиздан  
қутқар, Худойим.  
Омин!*

## ЗАНЖИРЛАР

*Оғир, оғир, жудаям оғир –  
Хўжайинга ёқмоқлик учун  
Занжи  
Занжи учун ясаган занжир.  
Халқ йўлини тўсманг, олга йўл олсин!  
Занжирлари синсин,  
Тушов йўқолсин!  
Тўсиқларни кечиб уйғонсин жонлар,  
Йиқисин деворлар, йитсин тўғонлар.*

*Тоза сувлар тоисин, боғларга юрсин,  
Чиркин жисноятлар қонини ювсин!  
Оғир, оғир, жудаям оғир –  
Хўжайинга ёқмоқлик учун  
Занжи оёгига  
Занжи осган занжир.  
Оғир, оғир, даҳшатли оғир  
Кўлларим боғлагаган бутемир занжир!  
Синсин, ахир, йўқолсин, ахир!*

## Гана

### РАФАЭЛЬ Э.-Г. АРМАТТУ

## ҒАРИБ КЎНГИЛ

*Сахро сўқмогида  
Бир қари кампир  
Борарди, куларди негадир дикқат,  
Гапириб борарди ўзи-ўзига,  
Сахро сўқмогида гарiba аёл  
Ўзи билан ўзи қиларди сухбат.*

*Биласанми, болам,  
Не учун бу он  
Ўзи билан ўзи гаплашар инсон?  
Ортида – узун йўл,  
Йўлдоши ўқ дам –  
Ўзи билан ўзи гаплашар одам.*

*Ёмегирдай ёғилса юракка қайгу,  
Ғамлартўфон кабитоисса сарбаланд,  
Инсон – йўл топмаган чорасиз йўлчи,  
Сўзлашиб қолади ўз-ўзи билан.*

*Сахро сўқмогида кетётган аёл,  
Хаёт азоблаган шўрлик, оввора.  
Ўзидан сўрайди ўзи минг савол,  
Жавобин тополмай кулар бечора.*

## ЖАҲОН АДАБИЁТИ

*Кўзимда ёшларим қотиб қолгандир,  
Ичимдан чиқмайди оҳим, дамим ҳам.  
Она, сенинг гаминг жуда улкандир!  
Сеникидан каммас менинг гамим ҳам...*

## *Израэл КАФУ ХО*

### **ЧАҚАЛОҚ**

*Хотин, бу чақалоқ европаликдай:  
Унга ёқмаяпти бизларнинг овқат.  
Кафтданмас, сув ичар идишидан фақат.*

*Гўё европалик – бизнинг чақалоқ;  
Ота-онасини тобе қилгандир,  
Ўзидан ўзгани билмас, бақалоқ.*

*Чақалоқ инжиқдир европаликдай:  
Тилин тушиунмасак, кўтарар ғавво,  
Бизнинг тилимизда сўзламас асло.*

*Териси нозик, лек қора бўлади,  
Салгина тирналса, яра бўлади.*

*Нозикдир  
Милт этган чироқпиликдай–  
Боламиз гўёки европаликдай...*

### **ДУО**

*Ўтардим бир кулол уйи ёнидан –  
У офтоб сўрарди Яратганидан.*

*Деҳқон чайласига келганда яқин,  
Эшиитдим – сўрарди ёмгиру чақин.*

*Балиқчи шамол деб кўкка ёзгирап,  
Елкасида чивин сокинлик сўрар.*

*Ўзига омадни сўрар ҳар инсон –  
Нимадир сўрайди дўст ҳам, ганим ҳам.  
Тепада ўлтирап ўйланиб, ҳайрон –  
Кимнинг дуосини эшиитсин Эгам?*

## *Конго Демократик Республикаси*

### *Клементина НЗУЖИ*

### **ЙҮҚ, АЙБДОР ЭМАСМАН**

*Йўқ, менинг айбим йўқ,  
Тилимни тушиунмасангиз на чора.  
Менга  
Табиат берган  
Бежамдор бир тил.  
Баргнинг тили бу,  
шаббаданинг,  
гулларнинг,  
қуиларнинг  
ва сувнинг тили –*

*Бу ҳам тил,  
Инсонлар тушиунмас тилдир.  
Агар мени дарахт деб билсангиз,  
шамол,  
атиргул,  
қуи,  
сув деб билсангиз,  
шундай муомала қилсангиз,  
ва мени секин тингласангиз,  
тушуна бошлиқсиз.*

### **ЖАҲОН АДАБИЁТИ**

**Камерун**  
**Франсуа СЕНГАТ-КУО**  
**БИРИНЧИ ВАРАҚ**

*Бир қатор,  
тартибли тизилган сўзлар  
рангсиз, жўн, сафосиздир, аммо гоҳида улар  
чақмоқ чақногида ярқираган камалакдай сочилади,  
мунчоқ бўлиб кувонч ва қайгу итига тизилган,  
шиддатли тўлқинлар оқизаётган  
чиғаноқлардай очилиб кетади,  
ва шеъриятга айлана бошлайди...*

**Рене ФИЛОМБЕ**  
**ТАМАДДУН**

*Улар мени излаб топдилар ғаровдан  
бичилган,  
қадимий ва хароб кулбамдан.  
Улар мени излаб топдилар  
бадбўй терига ёпинган ҳолда,  
уларга бегона тилда сўзлардим,  
шаршара шовуллашидай кулардим,  
қора санамларга сигинардим,  
тамтам оҳангларини  
ва туморларни севардим ...  
– Иботидоий! Бечора! – дедилар улар  
ва ишга киришидилар.  
Бошимга қўйдилар совуқ сув каби  
бекорчи сафсаталарни ва китобий  
ийглоқиликни.*

*Кейин мени  
бўйимга бичилмаган  
тор костюмга тиқдила.  
Сўнг тоза,  
покиза қонимга  
айёргиқ, очкўзлик,  
ичкилиқбозлик, зино,  
сотқинлик,  
танга учун акасини ҳам  
сотииш генини  
томчилаб қўйдилар ...  
Воҳ-эй! Қаранглар, қанчалар  
кўркамман –  
маданийлаштирилган одамман!*

**Кения**  
**Марина ГАШЕ**  
**ҚИШЛОҚ**

*Кўнёрири, Азал Мехнат Қишилоги,  
Абадий машаққат, заҳмат қишилоги.  
Туганмас оқимдай ўйлдан ўтарлар  
Сўқасин ортмоқлаб қари камипилар,  
Қорайған, буқчайған, сокин, қайшиқоқ,  
Жўхори даласин қилишар ўтоқ.  
Ёши келинлар ўтар хўтиқдай боғлиқ,  
Уларни далага ҳайдар қашишоқлик,  
Эгатлар оралаб баландга, пастга,  
Бориб келаверар бемор ва хаста,  
Танлари камондай эгри, тортилган –  
Елкага ҳаётнинг юки ортилган,*

*Мехнат қилар бунда тинмай  
ёши-қари,  
Гўдаклар кун бўйи ерни титкилар,  
Чувалчанг излаган товуқ сингари.  
Ҳар ёнда – ҳаракат.  
Кун чўққанида  
Қишилоқ черкови ҳам бошлиар ваҳмини,  
Руҳоний отамиз карнай орқали  
Чорлар ибодатга содиқ қавмини.  
Эчкисин, боласин хотинга ташлаб,  
Оталар кетади кеч ибодатга.  
Кун бўйи ишлаган меҳнаткашларни,  
Роҳиб чорлар яна сабру-тоқатга...*

**ЖАҲОН АДАБИЁТИ**

## Либерия

### БАЙ Т. МУР

#### МОЗИЙГА БИР НАЗАР

*Африка –  
Парадокс.  
Лиссабонда  
Зах тортган идорада  
Харитачи*

*Харитадаги Африкага  
Кора сиёх түкиб юборар бехос,  
Шу боис Африкани  
“Кора континент” деб атайдилар,  
рост.*

*Африка.  
Тасавур уни ўлдирап,  
Одамхўрлар,  
Отаишхўрлар,  
Инсонларни қурбонликка сўядиган  
Ёввойилар билан тўлдирап.*

*Африка.  
Тадқиқотчилар  
Бу ер олтинга,  
Олмосга,  
Фил сугигиа,  
Зираворларга тўладир, деб  
Европага бердилар хабар.  
Флит-стрит йигитлари  
Ўлжса излаб  
Чонди.*

*Африка –  
Оқлар учун ажсал.  
Унда бор илонлар, морлар,  
Ёввойи қавмлар,  
Одам ўтмас чангизорлар.  
Аммо Африкага нур керак,  
Савдогарлар  
Келтирдилар  
Инжил  
Ва шароб.  
Тавқи лаънат инган қитъани  
Маърифат-ла қилдилар хароб.*

*Африка.  
Ўлжса излаб  
Оламнинг ҳамма еридан  
Чопар барча –*

*Фарангларнинг  
Хорижий легионидан  
Пўқак дубулгали қароқчигача.  
Замбараклар ва байроқлар ила  
Сузиб келишиар  
Денгиздан,  
Айрим жасурлар  
Буюк саҳролардан  
Карвонлар сафида йўлни босурлар.  
Фақат бир ниятда –  
Ёввойи халқ ҳам,  
Яшасин-да,  
Ошно бўлиб маданиятга.*

*Мана,  
Маданийлаштириши авжисда –  
Олтинлар ва олмослар  
Европага жўнатилмоқда,  
Даромад ҳисоботда қилинар зикр.  
Шу пайт тўсатдан  
Бошларига  
Келиб қолди бир фикр –  
Бу ерда  
Бошқа бойтик ҳам бор:  
Сота бошлидилар  
Одамларни  
Нью-Орлеанда,  
Бостонда,  
Саваннада.*

*Дарвоқе, йироқмиз даъво, хитобдан,  
бу бир парча, холос,  
Бор-йўги бир вароқ  
Африка Тарихи аталган –  
Буюк китобдан.*

**Нигерия**  
**Воле ШОЙИНКА**  
**ТЕЛЕФОНДАГИ МУЛОҚОТ**

Бу уй – нархи арzon, қатновга қулай,  
 Роса менбоп, жонга хузур бергудай.  
 Уй бекаси учиб-күнар, шод эди,  
 “Сиз қачон келсангиз, уй тайёр!” – деди.  
 Омад келиб мен ҳам шод-хуррам бўлдим,  
 Оғзимдан чиққанин билмаям қолдим:  
 “Миннатдорман, раҳмат, ёлғонга йўқман,  
 Айтиб қўйай, хоним, африкалиқман...”  
 Сув босди дастакнинг нарёгин шу тоб,  
 Уни ўчди-қолди беканинг шитоб.  
 Кўз олдимга келди сурати унинг,  
 “Нима деб қўйдим мен”, – ўйладим алҳол;  
 Тилла тиши, қип-қизил лаблар орасин  
 Базур ёриб ўтди шундай бир савол:  
 (Оҳанги ўзгариб) – “Сизнинг рангингиз  
 Қорапарангроқми ёки... жудами?”  
 Мен изоҳ бергунча, сездим, беканинг  
 Сира етмайти тоқат-чидами.  
 Хонимнинг бу нима дегани экан?  
 Пол қолдим, этларим кетди гувуллаб.  
 Таишқарига боқсам, улкан автобус  
 Утиб борајти ўйлда зувиллаб.  
 Мен-ку ўрганганман бу хил саволга,  
 Барibir галати... уялдим, бўртдим.  
 Жим-жит турганимча хоним-беканинг  
 Шу саволга изоҳ беринин кутдим.  
 Хоним яна сўроқ қўла бошлади,  
 Гап оҳанги тамом ўзгача бир сас:  
 “Рангингизни менга аникроқ айтинг,  
 Қон-қорамисиз ё унчалик эмас?..”  
 “Нимани назарда тутяпсиз, хоним,  
 Африкалиқман-у, қандай бўлай оқ?  
 Қай рангда бўлишим кутяпсиз, хоним,  
 Сутрангли дёяй ё шокаладрангоқ?”  
 “Қанийди...” – шу бир сўз жарроҳ тиғидай  
 Орамизни кесиб ташлади, ҳай-ҳай.  
 Эшигтагач қадримни ер қилган сўзни,  
 Кибор оҳангларга созладим ўзни.  
 Тилим жиiddий тутиб дедим мен аранг:  
 “Тусим – африкалик рангидайин ранг”.  
 Бўёқлар оламин хоним хаёлан  
 Кезиб чиқди, кейин эса у бирдан  
 Кўчиди қўяқолди ростига: “Аниқ  
 Айтинг рангингизни, қорасизми-йўқ?”  
 “Оқ-сариқдан келсан...” Хоним дер; “Эссиз,  
 Курум каби куйган қон-қорамисиз?”  
 “Жа унчалик эмас, хоним, масалан,  
 Юзларим жигарранг бўлгани билан,  
 Сиз айтгандай, кўйиб кетмайдим тамом,  
 Оққа монанд жойлар бордир менда ҳам...  
 Кафт, товон, яъникум оёқнинг ости  
 Оқ одам рангига ўхшайди, рости.

Ҳафсалангизни тир қилиб нетайин,  
 Бир хижолат жойим айтиб кетайин.  
 Ишлатилавериб қанчадан-қанча,  
 кунтегмас жойларим қорайган анча... ”  
 Сезяпман, дастакнинг нарёги ҳозир-  
 Ҳозир портлаб кетар гумбурлаб зир-зир!  
 Яранинг устига туз сепган каби  
 Мен дедим: “Хоним-а, ўзингиз балки  
 Текшириб кўрарсиз...”

## Адду АГВО

### БУ ЗОТНИНГ САФАРИ ТУГАДИ, ТАМОМ...

Азадорлар якдил турарлар ииғлаб,  
 Яна бир ботирга ўқ тортиди камон,  
 Манзилига етди яна бир йўлчи,  
 Бу зотнинг сафари тугади, тамом.

Жаңоза тугади – мулламиз айтди;  
 “Тупроқдан яралган тупроқка қайтди”.  
 Марҳумга қилишибди дуо, эҳтиром –  
 Бу зотнинг сафари тугади, тамом.

Ерга кўмишибди ва кетди дўст-ёрон,  
 Қабр – тор, қоронғу, зулмат, зимиштон,  
 Майитдан тирикка не наф тегади?  
 Бу зотнинг сафари энди тугади.

Энди унинг куни на тунд, на чақноқ,  
 Энди хотини ҳам қилмас ноз-фироқ,  
 Қавму қариндоши ҳам ёприлиб келмас,  
 Бу зотнинг сафари тугади, адок.

Юлдуз милтилламас, эсмайди шамол,  
 Куни узун эмас, туни ҳам алҳол,  
 На сув совуқ унга, на отаи – завол,  
 Бу зотнинг сафари тугади, тамом.

Энди қўрқмайди у тўфондан, хундан,  
 Ҳеч не умид қилмас эртанги кундан,  
 На зилзила хавфли, на ўқли камон.  
 Бу зотнинг сафари тугади, тамом.

Ҳаёт ташвишидан уйгоқмиз тун-кун,  
 Дунё дер нафсимиз, чорасиз авом,  
 Қурашиб, талашиб, чопамиз ҳамон,  
 Ҳали  
 Сафаримиз  
 Этмоқда давом...

### Френческа Жетунда ПЕРЕЙРА

#### ҚОП-ҚОРА ОНАМ

Она замин,  
 Ўйқудасан аллақачон.  
 Сенинг халқинг –  
 Табиат фарзанди,  
 Жонивор,  
 Ҳайвон.  
 Севади инчунун,  
 Ўлдиради кейин,  
 Еб қўяди яшамоқ учун.

Қалбимизни  
 Разолатдан қутқарии учун  
 Бегоналар келди,  
 Бойлик излашиби,  
 Билим излашиби,  
 Роса талашиби.

Қора Она,  
 Жуда, жудаям қоп-қорасан,  
 Чинқирдинг ҳар кимга,  
 Ҳар юракда  
 Садо берди обозинг:  
 “Озодлик, озодлик  
 Фарзандларимга!”  
 Бизга “нур” келтирганлар  
 Биздан кетдилар  
 Гўёки

Ўз хоҳишлари билан  
 Кетаётгандай,  
 Вазмин ва сассиз  
 Кутловлар остида  
 Сузиб кетишиби.

#### ЖАҲОН АДАБИЁТИ

Сени “қора” – дедилар,  
Бу – рост,  
Ростдан қорасан.  
Ана, холос!  
Улар сенга келтирдилар  
“Нур”,  
Ойдинда турдинг –  
Болаларингни кишианды  
Хобил қамчиси остида  
Үкүбат ўўлида кўрдинг.  
Бу сертовозе  
“Нур” берган жонлар,  
Шакаргуфттор,  
Мехрибонлар  
Еримизни тортиб олдилар  
Бизни ҳимоя қилар, деб сайлаган  
Даҳоларимизни  
Арзимас садақага  
Сотиб олдилар,  
Болаларимизни  
Сарқитлар билан боқдилар,  
Ширади гўштларни  
Узлари ейшиди.

Ай, Қора Она,  
Даҳоларинг  
“Нур” келтиришини  
Ва кишин ясашини  
Урганиб олгандилар.  
Ай, Қора Она,  
Юрагинг яра,  
Яна чинқирасан:  
“О, нажсом қайдада?”  
Халок бўлмоқда  
Болаларим!”  
Дунё  
Овозингни эшиштмайди ҳеч,  
Зеро юрт – мустақил,  
Мустамлакамас.  
Жовдирар  
Қора кўз болаларинг  
Ботир, бўз болаларинг.  
Энди болаларингни,  
Бегона эмас,  
Эзмоқда  
Ўз болаларинг...

## Джон ЭКВЕРЕ

### ЖАВОБ

Кўнгилчан оталаримиздан мерос –  
Ҳаммасини оёқ-ости қилган оқ  
босқинчилар –  
Кочдилар солиб уввос.  
Энди хайриячи миссионерлар

Шўрликхалқимизни чув туширолмас;  
Энди келгинди қалхатлар  
Жўжсаларимизни юлиб ололмас –  
Энди  
Ўзимизни ўзимиз еб қўймасак, бас!

*Сан-Томе ва Принсипи Демократик Республикаси*

*Каэтано Да Коста АЛЕГРЕ*

### МЕН ЎЛГАНДА

Алвидо, ёр! Салом, ажсал! Ёрда айб йўқдир.  
Тошкўмир оташи қорни севгандай,  
Оқ қизни севдим мен – қора? Қайдан биламан.  
Оқ қор, оташимни совут. О, сен – оппоқ ой!  
Менинг ажалимсан. Кечир! Ўламан.

Кабрга киргум иўқ. Даҳшатдир менга  
Куртларга ем бўлиб, чиримоқ, ётмоқ.  
Қалбим олов бўлиб ёнганди. Майли,  
Жонсиз танамни ҳам оловларда ёқ.

Майли, эркин шамол совуган кулим  
Бутун мамлакатга сочсин осуда.  
Мен кенг маконларда яшай ломакон:  
Чангу губор бўлай ер-кўкда, сувда-

Шунда, – бу ҳам таскин! – чангдай оқариб,  
Сенинг сийнанг каби оқариб, жоним,  
Мен, кулга айланган сенинг ошигинг,  
Ҳаволарда кезсам, қўрқма, қалқинма –  
Юрагингга кирсам, олганда нафас,  
Кирсам тириклигимда киролмаган қалбиннга...

### ЖАҲОН АДАБИЁТИ

**Эфиопия  
Мэнгэсту ЛЕММА  
НОМАРД ҚАРИНДОШ**

*Бу қариндош тушида ҳам ҳатто  
Күлбам сари көлмасди асло,  
Мана, ўлдим – қаранг гаддорни?  
Маросимга келди қаптайиб қорни.*

*“Мен очликдан ўлаётганда,  
Қайда эдинг, номард қариндош!  
Худойимга келдингми энди?  
Кипригингда икки томчи ёш?*

*Даҳшат газаб қўзголди менда,  
Унинг ёлғон азасин кўриб,  
Жоним қайта киргандай танда,  
Кетдим бехос тобутдан туриб.*

*Сенга қандай чидамоқ мумкин!  
Маросимдан кет эй, ноҳалол!”  
Шу сўзларни айтдиму секин,  
Тобутимда ётдим бемалол.*

**ЖОНГА ТЕГДИ**

*Бу гирт чучмал хор эфиоплар,  
Ёвропалик санги жсаноблар –  
Ҳаммалари калондимоглар.  
Дўстин сотиб кўнглини чоғлар,  
Жонга тегди баҳс, тухматлари,  
Керилиши ва гийбатлари.  
Ёлғон-яшиқ сўзни дейдилар,  
Бир-бирларин тинмай ейдилар.*

*Бу даврадан ўрмонга қочсак,  
Дараҳтларга қучоқни очсак.  
Симирамиз япроқ ҳавосин,  
Тинглаб қуйчи қушлар навосин.  
Кетдик яшил майсалар томон,  
Мен ва имим югуриб шодон.  
Чарчаб майса узра толамиз,  
Тонг отгунча ором оламиз...*

**Жанубий Африка Республикаси**

**Леонард КОСА**

**ТАРАҚҚИЁТ**

*Юрт тараққий этди, дейдилар,  
Гуллаганмиши, яшиабди ҳар ён.  
Шундай бўлса, мен бечорага  
узатинглар бирор парча нон.*

*Ҳайқириқ бор бутун ўлкада:  
“Курилмоқда уйлар, саройлар!”  
О, мен каби бечораларни  
нурәётган чайламиз пойлар!*

*Ишибилармон – сенга омад, баҳт!  
Конъюнктура! Ҳамма ёқ тўқин!  
“Болаларинг нон сўрайди” деб  
Жаврашингни тўхтатгин, хотин.*

*Шонли юртни кутар истиқбол,  
Эртанги кун кутмоқда тўлиб.  
Мен – кўрарман уни – унгача  
гар очликдан қолмасам ўлиб...*

**Освальд Джозеф МТШАЛИ**

**ОППЕНГЕЙМЕР ПАРКИДАГИ КАБУТАРЛАР**

*Ажабо, нега Оппенгеймер паркидаги қора кабутарларни  
хусусий мулкка доҳил ерда ноқонуний юргани  
ва жамоат жойидаги номуносиб ҳулқи учун  
судга бермайдилар.  
Ҳар куни кўраман, бу безбет қушлар  
ҳар қандай ҳокимиятни тан олмай,  
“Фақат оқлар учун” деб ёзилан*

**ЖАҲОН АДАБИЁТИ**

оромкурсиларга қўнадилар.  
 Наҳотки бу қўшлар  
 Ирқий имтиёзлар ҳақидаги Актдан бехабар бўлсалар?  
 Барча лозим ашқол-дашқолларини осиб олган  
 оқ полициячи  
 қинига солинган пистолетини силаганча ўтади  
 ва қонунни қўпол равшида бузадётган  
 безориларга тўписа қилиб ҳам қўймайди.  
 Бу қўшлар нафақат оқларнинг оромкурсисига ўтиради,  
 улар ўтирган ўринларини  
 қуш најаси ила безайдилар ҳам.  
 Эҳ! Оромбахи қонун-қоидалар! Қаранг бу кабутарларга,  
 бир-бирларига суюнмоқдалар,  
 суйқалмоқлар оқсуяк хонимларнинг,  
 дайдиларнинг,  
 хиринглаётган ходималарнинг кўз ўнгидга-я.  
 Дунё қаёққа кетмоқда?  
 Қани ахлоқсизликка қарши муқаддас Қонун? Ажабо!

## Фрэнсис Кэри СЛЕЙТЕР

### ЙЎЛ

(Шахталаарда ишилаш учун уйидан кетаётган  
 мардикор иишчилар қўшиги)

Ота уй! Биз яшаши умидида кетмоқдамиз,  
 Аммо биз ўламиз сендан йироқда, дараҳтлардай:  
 Илдизи билан қўпорилган, тошига экилган дараҳтлар каби,  
 Уларнинг барглари саргаяди, шохлари қурыйди.  
 Аммо биз ўламиз сендан йироқда, булоқ сувидай:  
 Булоқ сувини кўзага солсангиз – ўлади унинг бокиралиги,  
 Ўйқаланаади, чирийди, сасийди туриб қолса сув.  
 Адо бўламиз, онасининг мурдаси устида қолган гўдаклардай,  
 Ини бузилган қўшлар каби.  
 Шаҳарлар бетон уйларининг жаси билан чайнайди бизни,  
 Нуришим ва ҳавомизни шахталаар ютади,  
 Очкўз машиналарга хизмат қилиб,  
 Уларни тер ва қон билан тўйдирниб, қорамиз.  
 Ота уй! Биз қайтиши умидида кетяпмиз,  
 Сендан йироқда адo бўламиз, аён!

### Ангола

## Алда ЛАРА

### МЕРОС

Шаффофф билтур сиргаларимни  
 кўчадаги энг тубан  
 фоҳишага берини  
 васият қиласман.

Хаёлида  
 қасрдаги шаҳзода келиб

ҳали бир сатр ҳам ўқимаган  
 камсуқум кимсага қолдиарман.

Телбавор шеърларимни,  
 чорасиз,  
 муқаррар  
 оғриқдан тугилган,

**ЖАҲОН АДАБИЁТИ**

базрига босишини қутаётган,  
иффатли қари қизға  
жисимжисимадор  
никоҳ күйлагимни мерос қолдирман.

Худонинг борлигини  
бир умр инкор қилиб келаётган  
дўстимга васият қиламан  
тасбехимни.

Кимнингдир хавотири  
тасбех донасидаи қатор турган  
китобларимни

оташ умидларимга қоришган  
сатрларимни –  
сенга васият қиламан, севгилим!

Сокин, тахайюл огушига чўкиб,  
бўшаб қолган кулбамга  
руҳим адашиб кириб қолган  
ва сенинг кўзларингни секин ўпган  
соатда  
сен кўчага чиққин,  
болаларга совга қилгин  
шеърларимни  
сокин кунларда...

## Кабо-Верди Республикаси

### Мануэл ЛОПЕС ТОРТИНЧОҚ ШОИР

У гоҳо қўрқади шоирлигидан –  
ўзга дунёларнинг телба сайёҳи.

Кўрқади галати, кимсасиз жойлардан, ёлғизланишидан ҳайиқар,  
сирларини, ҳаммадан ёлғизлик сари беркинишилар сабабини  
билишига уринадиган,  
иржайган айгоқчилардан ҳадиксирар.

Даҳшат-ла кўрадики, кундалик ташвиши одамлари,  
бетакаллуфлик билан, ёввойи қушни томоша қилгандаи,  
унга қарайдилар, ифлос қўлларини  
покиза юрагига сола бошлайдилар.

Ўгринча қайтади у оддийлик доирасига,  
бунда офтоб ошкорадир,  
шамолнинг нашидаси томиб бўлинган,  
ранглар ўрганилган, фанлар ўқилган...

Ўз ичига юзланади, юмади кўзларини,  
ҳаловатсиз кенгликларини тарк этади ...

Ва у ўзи аччиқлигини қашф этган,  
мақсадга элтадиган гуссали йўлини тарк этади.  
Янги ваҳий – янги гусса – унинг қисмати.

Тақдиди оғирдир.

Гоҳо қўрқиб кетар шоирлигидан ...

Карим БАҲРИЕВ  
таржималари



## Лоран ГОДЕ

Лоран Годе 1972 йил Францияда туғилган. Унинг “Скорта қавми қуёши” (2004) романы олий соевин – “Гонкур Академияси” мукофотига лойиқ топилган ва дунёнинг кўплаб тилларига таржима қилинганд. “Қирол Тсонгор ўлими” (2002), “Элдорадо” (2006), “Дўзах дарвозаси” (2008) романлари, бир қанча пьесалар ҳамда ҳикоялар муаллифи. Ҳикояда инсонлар ўртасидаги энг азиз ва қадрли ришталар – дўстлик ва маънавий яқинлик туýгулари Африка мұхитида ўзиға хос тарзда бадиий ифода этилган.

### МОЗАМБИК КЕЧАСИДА

*Кўп бор Мозамбик тунларида  
бирга бўлган боқий дўстим  
Симон Кимга бағишиланади.*

Адмирал Анисето де Медейрос мана неча кунки ресторон эшигини қоқади, – зал кўзига хотираларида гавдалангандан кўра кичикроқ бўлиб кўринди. Столлар йиғиширилган, стуллар тўнтириб қўйилган, пол хлорли эритри билан артилган, тинчлик ва осойишталик.

Зал ичкарисидан: – Ресторан ёпиқ, – деган овоз эшитилди.

Ўн беш ўшлардаги йигитча залнинг полини артарди. Адмирал ресторон ёпиқлигини билиши ва айнан шу сабабли ҳам бу ерда эканлигига ишора қилиб қўлинни кўтарди. Унда ресторанга мижозлар йўқлигига назар ташлаш истаги бор эди, бироқ буни овоз чиқариб айтмади. Ҳали тўнтириб қўйилмаган стулни кўриб, бамайлихотир ўтириди.

– Жаноб?

Ресторан ёпилганилиги тушунарли, аниқ қилиб айтилганига қарамай, залнинг ўртасида ястаниб ўтириб олган чақирилмаган меҳмоннинг сурбетлигидан очиқчасига жаҳли чиқсан йигитча, ифлос латтага қўлинни артар экан, унинг ёнига келди.

– Фернандога Адмирал Медейрос келди деб айт...

Бу сўзлар хотиржам ва ним табассум билан айтилганига қарамай, йигитчанинг муомаласи туйқусдан ўзгарди. Эҳтимол, адмираллик унвони ўз таъсирини ўтказгандир. Йигитча белагини ағдариб юборишига сал қолди, ховлиққанича залдан югуриб чиқиб кетди.

Адмирал ёлғиз қолди. Атрофни кўздан кечирди, унинг нигоҳида кувонч билан қайғу кўшилиб кетган эди. Йилда ё икки йилда бир, балки икки марта келиб турган бу залда қанча вақтини ўтказган экан-а ... Доимо ўтиришлар тонггача чўзилиб кетар, аммо бу бир зумда ўтгандай туюларди.

Шунга қарамай, бу жой нима учундир, унга ўз уйидан ҳам қадрлироқ туюларди. Балки мовий фаянс<sup>1</sup> қопланган мана шу деворлар бу ерда жаранглаган кулгилар, сухбатлар, дил изҳорлари ҳақидаги хотираларни ўзида сақлагани учундир? Албатта, у бундай эмаслигини биларди ва бу ишонч унга ҳаддан ташқари шафқатсизликдек туюлиб кетди.

– Адмирал...

Эллик ўшлар атрофидаги бу одамнинг овозидан кўпдан таниш бўлган самимий оҳанглар эшитилди. У Медейроснинг олдида турар, аввалгидан

<sup>1</sup> Фаянс - ганч аралаш лой (*тарж.*).

сал тўлишган, юзида қувонч акс этарди. У ёш буқадай бакувват, зуваласи пишиқ, бўйни йўғон, кўл-оёклари қалта, фавқулодда чакқон харакатлари билан ажралиб турарди. Кириб келган кишининг исми Фернандо Пимента бўлиб, умрининг илк дамларидан ҳаётга баҳтиёр нигоҳ билан қарабди. У хусусий ресторанига эга бўлиб, ишларини йўлга қўйиб олганди. Ўз мижозларини ва ошхонасида пишириладиган таомларни хуш қўрарди, оқшомлари оstonада ўтириб олиб, сигарета чекишни ёқтиарди.

— Бирор нима ейсизми, адмирал? Дорада креветкалардан колган...

Медейрос рад қилди. Овқатланишни хоҳламаётганди. Айникса, бу ерда. Бу хоинликдек туюлди. Афтидан, Фернандо ҳам шу ҳақида ўйлади шекилли, адмирал ишора билан таклифини рад этишидан олдинроқ, кўл харакати билан афсусда эканлигини билдириди.

— Ҳа. Йўқ. Албатта. Балки қаҳвадир. Ҳа, қаҳва. Ҳар иккимизга, — ўйланаб туриб, бир қарорга келди адмирал.

У ҳали гапини тутатишга улгурмай, Фернандо ғойиб бўлди. Йигитчанинг ошхонадан кетишига рухсат бераётгани, ресторанни ўзим беркитаман, дегани эшитилиб турарди. Идиш-товоқларнинг жаранги эшитилди, қаҳва автомати вишиллаб буг чиқарди. Анисето де Медейрос қаҳванинг ҳидини сезиб жилмайди. У келганидан хурсанд эди.

Фернандо столга қаҳва қўйилган финжонларни қўйиб ўтириди, адмирал унга нигоҳ ташлаб:

— Мозамбикни соғиниб кетдим, — деди.

— Мен ҳам, — жавоб қайтарди ресторон хўжайини.

Уларнинг ҳеч бири ҳеч қаҷон Мозамбиқда бўлмаган ва шунга қарамай, ҳар иккиси ҳам ҳақиқатни гапиради. Баҳам қўрилган туйғудан ертўлада сакланган яхши майни майдалаб ичгандай лаззатланишиб, бир муддат сукутга чўмдилар.

— У ёққа қайтишимизга кўзим етмайди, — деди адмирал.

— Менинг ҳам, — жавоб қайтарди Фернандо ва меҳмонга болаларча нигоҳ ташлаб қўйди, — у бутунлай кетди, деб ўйлайсизми? — деб сўради.

Адмирал юзини буриштириди — гўёки, ҳеч нарса аниқ эмас, бироқ ҳеч нимани инкор қилиб ҳам бўлмайди. Кейин нигоҳини қаҳвали финжонга қаратиб, қўшиб қўйди.

— Мана Фернандо, Да Коста ўтган йили вафот этгандан кейин, биз ҳам етим бўлиб қолдик.

— Адмирал, биласизми, менга энг муҳими нима етишмаётганини?

Адмирал дўстига тикилиб, гапини охиригача етказишини сўраб, бош ирғаб қўйди.

— Янги воқеалар! Ким уларни бизга айтиб беради?

Адмирал сал бўлмаса йиглаб юборишини хис қилди. Мана шунақа гаплар. Айнан шу нарса уни Фернандонинг ёнига, унинг ресторанига бошлаб келди. Унинг ўзи унга ҳеч ҳам тинчлик бермаётган нарсани ифода қила олмаётган эди, ниҳоят бу гап айтилгач, бўғзига бир нима тиқилганини сезди. Ким энди уларга янги воқеаларни айтиб беради? Мозамбик ҳақидаги ҳикояни ким якунлайди? Анисето де Медейрос маъюс турарди.

— Биламан, Фернандо, — пичирлаб деди у ва йиғлаб юбормаслик учун шаҳд билан қаҳвани ичиб тутатди.

Маънисиз, ҳеч нарсани англатмайдиган нигоҳлар билан анча вақтгача жим ўтиридилар. Кўз олдиларида бир хил манзаралар намоён бўларди. Хотираларида бир хил товуш янграради. Мозамбик яна улар билан бирга, уларнинг ёнгинасида эди.

Икковлон унинг қайтишига ва уларни маҳв этишга изн бердилар. Улар гўёки вафот этган икки дўстларини камтарона дастурхон атрофига таклиф қилган эдилар. Дўстлар, ўтмишдаги байрам ноз-неъматларининг ёқимли ҳидлари залга аста-секин тарқалаётган пайтдаги дамларини бузуб қўйишдан чўчиб узоқ вақт сукут сакладилар. О, ўтмишнинг баҳри-

## ЖАҲОН АДАБИЁТИ

дилиингни очадиган илиқлигидан роҳатланиб, шу алфозда ўтириш ва сукут сақлаш қанчалар завқли!

Улар ҳар доим Фернандоникида, хўжайин саранжон-саришталик билан узун қоғоз дастурхонлар тўшайдиган, ёғоч столлардан бири атрофида тўпланар эдилар. Ҳеч қачон тунги соат ўндан аввал келмасдилар. Олдиндан маҳсус келишишмаган, бироқ кечки пайт бежиз танланмаган – бу вақтга келиб ресторон бўшаб қолар, кейинроқ ёпилар ва қош қорайган сари бу жой фақат бизники, деган туйғу пайдо бўларди. Бунинг устига, кечани Фернандосиз тасаввур қилиб бўлмасди, у эса фақат шу пайтга келиб бўшарди.

Ошхона эшиги ҳар доим ланг очиқ турадиган бу эски ресторан уларга ёқарди – денгиз маҳсулотларидан тайёрланадиган таомларнинг илиқ, ёқимли ҳидлари залга кириб борар, май шишалари очилаётганда узок хўрсенишлардай товуш чиқарарди.

Улар бу ерда йилига бир ёки икки мартадан кўп учрашмасдилар. Ҳеч қандай аник сана белгиланган эмас эди, барчалари бўш бўлганларида тўпланаверардилар. Айтиш жоизки, тўртовлон бир вақтнинг ўзида жонажон шаҳарларида бўлишлари камдан-кам учарди.

Фақат учрашув куни белгиланса бас, қолгани ўрнатилган тартибда кетаверарди. Адмирал Медејрос кўнгироқ қилиб, столга буюртма берарди. Бу унинг зиммасидаги мажбурият эди. Шу дақиқадан бошлаб Фернандо фақат белгиланган учрашув кувончи билан роҳатланиб яшарди. Мазали баликларни фамлаб, дўстларини қандай газак ва таомлар билан ҳайратга солишини ўйларди. Улар келганларида эшикни хўжайнинг ўзи очар ва устки кийимларини ечишга ёрдам берарди. Кўлларини сиқиб, сўнгти марта қачон тўпланишгани, қандай таомлар билан меҳмон қилинганлари, қандай май ичганларини эслашга ҳаракат қиласди. Чарм қопланган зил-замбил ва бесўнақай стулларга ўтиришлари хамонок, Фернандо қадаҳчаларга бирор бир ўткир ичимлик қуяр ва ёнғоқлар келтиради. Улар қадаҳларни уруштиришар, буюртма беришарди, сўнг хўжайнин чиқиб кетар, улар эса кечки овқатга ўтиради.

Фернандо уларга кейинроқ, иш куни тугагач, қўшиларди. Унингсиз сухбат қовушмас, иккиласми мавзулар тилга олинар, асосан у тайёрлаган таомларга муносиб баҳо бериларди.

Адмирал Анисето де Медејрос, контр-адмирал Да Коста ва капитан Мануэль Пассеолар денгиз мактабида танишгандилар. У пайтларда улар ёш денгиз зобитлари эдилар – оқ кўлқоплар кийиб, ҳарбийларга хос қаддиларини ростлар, кўзлари чақнар, ўзини денгизга тўлиқ бағишлишга доим тайёр турардилар. Ҳаёт уларнинг ҳар бирига кутилмаган совғаларни тайёрлаган эди. Биринчи бўлиб ғолибона нигоҳ капитан Мануэль Пассеода сўнди. Субординацияга<sup>1</sup> риоя қилмаслик билан боғлиқ қандайдир ходиса. Ўзидан катта лавозимдаги кимса билан тортишув. Мактабни тамомлашга бир йилдан ортиқроқ вақт қолган эди, ҳарбий денгиз флоти билан хайрлашишга тўғри келди, лекин денгиз билан эмас – бундай қарорга келишига жасорати етишмади. “Савдо флоти” – бу сўзларни у олдинига нафратланиб айтиб юрди – кейинчалиқ у бор кучини сарфлайдиган жойга айланди. Ўртоклари, устидан кулиб, “сув транспорти ходими” деб аташарди. Контр-адмирал Да Коста уйланди. Бир неча йилдан кейин хотини асаб касаллигининг кам учрайдиган тури билан оғриб қолди. Эри ёнида бўлиши керак эди. Да Коста борган сайин денгизга камроқ чиқа бошлади, кейин уни бутунлай қуруқликкаба ўтказишларини сўради. Уни Лиссабон аслаҳаҳонасидағи лавозимга тайинлашди, яъни у ҳакиқий “денгиз бўрилари”нинг тушунчаси бўйича, қумга кўмилиб олган балиққа айланди. Фақат адмирал де Медејросгина ўз вазифасига, денгиз ўтлари-ю денгиз кўпигига бўлган енгиб бўлмас майлига содиқ қолди. Бироқ ажаб-

<sup>1</sup> Субординация - хизматда кичикларнинг даражама-даражага катталарга бўйсуниши (тарж.).

лантирадиган жойи шунда эдики, саёхату сафарларга тўла ҳаётининг сўнгида у омадсизроқ дўстларидан ортикроқ бирор нарсани билмаслигини ахён-ахёнда хис қилиб турарди.

Шундай қилиб, уларда, Фернандонинг ресторанига тўпланганларида, кимдир сўз олиши ва бирор-бир воқеани гапириб бериши одат тусига кирган эди. Бу худди тунда денгизга чиқишига ўхшарди, ҳаммалари биргаликда, маҳсус уст-бошсиз, унвонларсиз, бир тўлқинда чайқалишар, саёхатларнинг маст қилувчи ҳавосидан тўйиб нафас олишар эди. Бир сўз билан айтганда, хаётда хаёлинга ҳам келмайдиган нарсалар бўларди.

Охирги марта улар икки йил бурун – 1978-йилнинг ажойиб июнь оқшомларидан бирида йиғилишган эди. Контр-адмирал Да Костада, бир йилдан кейин уни олиб кетган ҳасталик аломатлари сезилиб турарди, ранги зафарон тус олган ва силласи қуриган, жон таслим қилаётган митти жониворга ўхшаб қолган эди.

У ичкарига кирганида юзида муҳрланган чукур чарчоқ излари дўстларини лол қолдирди, бироқ у касаллиги тўғрисида лом-мим демади ва ҳеч ким уни саволлар билан безовта қилмади.

Уша кеча улар Фернандо тайёрлаган таомлардан ҳузур қилиб тотиб кўрдилар. Ресторан ёпилгандан кейин эса, стулларни стол атрофидан сурдилар, Фернандо қаҳва ва бир шиша олча шароби келтирди, ўтирганларга болаларча қизикувчанлик билан боқиб: “Хўш, ким бошлайди?” – деб сўради.

Контр-адмирал Да Коста кўзларини бир оз қисиб, ишора билан дўстларининг дикқатини ўзига тортди.

– Умуман олганда, бу ҳеч қандай воқеа ҳам эмас, шунчаки сизларга муҳокама учун тақдим қилмоқчи бўлган саволим, – гўё ўрнатилган тартибга риоя қилмагани учун ўзини айбордордек сезиб, деди у.

– Агар фалсафа сўқиладиган бўлса, ичкилик камлик қилса кераг-ов, – деди кулиб Медеирос.

Фернандо пештахтадан шишани олди ва қадаҳларни тўлдирди. Орага жимлик чўқди: ҳамма ҳузур қилишни олдиндан сезиб, жимиб қолди.

– Шундай қилиб, сизларга бундан беш ой бурун амакиваччаларимдан бири билан содир бўлган кичикроқ бир воқеани айтиб беришимга ижозат бергайсизлар. Олтмиш икки ёшида у кенжа қизини турмушга узатаётган эди. Биз тоғдаги қишлоқ – Магадурога тўйга таклиф қилинган эдик. Келин кун санар, сўнгги ҳозирликлар давом этарди.

Контр-адмирал жимиб қолди; сўлғин юзлари уни кампирга ўхшатиб турарди.

– Тўй куни, – яна гап бошлади у, – мен тонг сахарда амакиваччамникига келдим. Биз биргалашиб қаҳва ичдик. У куёвнинг оиласи ҳақидаги таассуротлари оғушида эди – бу оила унивидан каттароқ, бадавлатроқ бўлиб, Лиссабондан тўлиқ таркибда келишганди. Тайинланган вақт яқинлашганда, биз ҳаммамиз никоҳ маросими ўтадиган шаҳарнинг юқори қисмида жойлашган черковга йўл олдик. Биз кўтарилаётган ёнбағир тик эди. Кун жуда иссиқ, қуёш аёвсиз қиздиради. Тоқقا олиб борадиган йўлда амакиваччам ўзини ёмон хис қила бошлади. Унинг оёқлари дармон-сизликдан чалишиб кетди. Мен уни ушлаб қолишга улгурмадим. У ерга кулаг тушди ва байрамона кийинган кўп сонли қариндошлари орасида менинг қўлимда юрак хуружидан вафот этди.

Контр-адмирал яна жимиб қолди, эҳтиёткорлик билан майдан хўплади – унинг худди ёввойилардек бир нечта шишани бўшатишга кўнишиб қолган дўстлари, – юз берган бундай ўзгаришни пайқамасликлари мумкин эмас эди.

– Тасаввур қилинглар-а, байрам мотамга айланди. Бундай бўлиши мумкинлигига ҳеч кимнинг ишонгиси келмасди. Куёв билан келиннинг кўзларидан аламли ёшлар тўкиларди. Тўй базми бекор қилинди, созандা-

## ЖАҲОН АДАБИЁТИ

ларга жавоб берилди. Ўша куни кўпчилигимиз, одамлар устидан бундай ёвуз ҳазил қилгани учун фалакка лаънатлар ўқидик

– Ҳа, бундан баттари бўлмайди, – тўнғиллади капитан Пассео.

– Даҳшатнинг ўзи, – пицирлади Фернандо.

– Хўш, қандай масалани биз билан муҳокама қилмоқчи эдинг? – қизиқиб сўради Медейрос.

Контр-адмирал кўзларини сал қисди ва сухбатнинг бошида ташланган хўрак ёдларида эканлигидан қувонди.

– Мен буларнинг ҳаммаси тўғрисида кўп ўйладим. Ўшა куннинг иккинчи яримидағи воқеалар, менинг назаримда тўғри бўлмади. Ўша кунни бундай ўтказмаслигимиз керак эди. Биз ҳамма нарсани бекор қилдик ва ғамга ботдик. Шундайликка шундайку-я. Бироқ менинг саволим бундай, нима учун инсон қалби икки қарама-қарши туйғуларни ўзига сифдира олмайди, нима учун уларнинг ёнма-ён мавжуд бўлишига йўл қўймайди?

– Ҳеч нарсани тушунмаяпман, – таажжубланди Фернандо.

– Ҳозир тушунтираман. Тўй давом эттирилса тўғрироқ бўлмасмиди? Ёшларни никоҳлаб, шу куннинг ўзида оталарини дафн этса бўлмасмиди?

– Бироқ бу қандай байрам бўлар эди? – гап қистирди Медейрос.

– Мен ҳам шу ҳақида айтаяпман-да, – қизишиб гапни илиб кетди контр-адмирал. – Нима учун инсон бунга қодир эмас? Ахир, ҳаёт бунга қодир-ку. У бизни кўп марталаб синайди, ўтдан оловга ташлайди, яна ҳеч қандай мақсад ва раҳм-шафқатсиз. Мана шунинг учун мен бу ақлсизликни енга олишга қурби етадиган одам ҳақида ўйлаб қолдим. Қувончда йиғлаш ва ғамда кулиш. Биз ҳам ўша кунни шундай ўтказишимиз керак эди. Тўйни давом эттириш, раксга тушиш, ёшларга оқ фотиха бериш ва ўша куннинг ўзида ўтганга аза тутиш. Тақдир шуни раво кўрган бўлса, нима ҳам қилиб бўларди?

Дўстлар бирданига жавоб бермадилар. Ҳар бири бундай тўйни тасаввур қилишга ўзича ҳаракат қиласарди – кўз ёшлари ва мушакбозликнинг ғайриоддий омухтаси.

– Сен ҳақсан, – деди, ниҳоят Медейрос, – шундай қилинса яхши бўларди.

Гапи тугаганини ва бошқа айтадигани қолмагани ишораси сифатида, контр-адмирал бир стакан сув ичди.

Фернандо кремли шириналарни олиб келиш учун бир зумга ошхонага чиқиб келди.

– Шириналар “қиёмат” деб номланади, – эълон қилди у, ўз меҳнати самарасини дўстлари ҳукмига ҳавола қиласар экан.

– Номини зап танлабсанми?! – кулиб юборди Пассео.

– Бундай фикр каллангта қаердан кела қолди? – қизиқиб сўради Да Коста.

– Ҳозир тушунтириб бераман, – қувлик билан деди Фернандо, – Бу менинг бугунги кечага кўшган ҳиссам бўлади. Аввал татиб кўринглар-чи...

Шириналар устига апельсин пўстининг хушбўй ҳиди келадиган қиём суртилган эди. Даствлаб тахирроқ таъм сезиларди. Аста-секин, ичимликнинг кўшимча таъми устунлик қила бошларди.

– Лекин бу ажойиб десерт билан қиёматнинг қандай алоқаси бор? – деди хайрати аримаган ва яна шириналардан тотгиси келиб турган Да Коста.

– Қиёмат куни Лиссабонда нима бўлиши сизларга маълумми? – қувлик билан сўради Фернандо.

Мехмонлар йўқ, деган маънода бош чайқадилар.

– Ҳеч нарса, мутлақо ҳеч нарса бўлмайди. Португалия ҳар доим орқада юради. Дунё жаҳаннамга қулаг, осмон ёрилиб кетадиган ва оташ оқимлари барча тирик мавжудотларни йўқ қилиб юборадиган, қолган дунё вайрон бўлаётган куни ҳам Лиссабонда ҳамма нарса ўз жойида қолади. Ҳатто шунда ҳам биз кеч қоламиз, бир неча кун бизда одатий ҳаёт давом этади, ваҳоланки дунёнинг қолган қисми вайронага айланади.

Пассео ва Медейрос жилмайишди, бунга шириналарни нима алоқаси борлигини ҳали ҳам тушуна олмаётган Да Коста қовоғини уйди.

– Хўш, нима бўлибди? – сўради у.

– Хеч нима, – Фернандо томошибинлар юзидаги ҳайратни мамнунлик билан сезиб турган сеҳргардек қувлик билан жавоб берди – Қиёмат бошлимаганлигини биз қаердан биламиз? У аллақачон бизнинг атрофимиизда-ку. Бахт лаззатини тотиб кўриш учун бир неча кун қолди. Улардан имкон қадар фойдаланинг. Роҳатланинг.

Мехмонлар кулимсираб, яна биттадан ширинлик олдилар ва гўёки Фернандо тўғри сўзлаганини, Нью-Йорк, Лондон, Париж ва Токио олов ичида қолганини ҳазилга олиб, тасаввур қилдилар.

Шу билан суҳбат секин-аста ўз поёнига этиши ва учрашув яқунланиши мумкин эди, бироқ ҳали Пассеога сўз навбати келмаганди.

Гапириш навбати унга келди; унинг ҳамтоворклари, ўз шахсий ҳаёти билан боғлиқ машақкат ва армонларни, барча-барча нарсаларни унтиб, ҳафсала билан сигареталарини тутатдилар ва бутун вужудлари қулоққа айланди, уларнинг кўзларида болаларча бетоқатликни уқиш мумкин эди. Капитан Пассео гапиришни бошлаганда, унинг ҳикояси узоқ давом этиши маълум бўлди. Мухими, шу эди. Қолгани ҳисобга ўтмайди. Лиссабон уйқуда эди. Пассеонинг сўзлари тамаки тутуни ва дўстларининг табассуми билан араласиб, ресторан зали бўйлаб сузиб бораради.

– Мени узоқ вақт дengiz билан яқинлашиб, бойидикми ёки қашшоқлашдикми, деган савол қийнади. Дўстлар, сизларга ростини айтадиган бўлсан, мен узоқ вақт, оламни бунчалик кўп кезиши, барча дengиз ва океанларда сузиш, одамни фақат қашшоқликка олиб боради, деб ҳисоблаганман. Қалбимиз тубида сиз ҳам, мен ҳам саёҳатлар сўнгидаги қўлларимизда бир ховуч дengиз сувидан бошқа ҳеч вақо қолмаганини англаб етамиз. Бизнинг қатъият ва ўжарлик билан дengизда сузишга бўлган интилишимиз ортида, балки қашшоқлашишнинг биргина саркаш истаги яширингандир. Ахир дengизда олтин бўлмайди-ку. На сиз, на мен дengиздан уни топганимиз. Мен оддий савдогарман. Кемам очиқ дengизда сузишга мослаштирилмагани боис, қанчалик чўчиб, қирғоққа яқин сузишими, пуллаш мумкин бўлган барча нарсаларни трюм<sup>1</sup>да ташиганимга қарамай, бойимадим, қўлимда қандай тангаларни ушламадим, дейсиз – дунёда мавжуд бўлган барча туридан! – ҳатто шунда ҳам жонажон қишлоғимдан чиқиб кетган кунимдан кўра ҳам қашшоқроқман. Ўттиз йил ичида мен топган ва тўплаган пуллар қандай келган бўлса шундайлигича кетди. Бироқ ҳаётида барча интилишларимни оқладиган шундай нарса бўлган эди-ки... Ўттиз йил савдо-сотиқ қилиш, югуриб-елиш ва пора беришга арзийдиган бир воқеанинг қиймати... Менинг кемамдан ҳам кимматроқ бўлган. Агарда бугун мендан кимлигимни сўрасангиз, мен сизларга ўз исмимни, ёшим нечадалигини, миллатим ва касбимни ҳам айтмайман ва шундай жавоб бераман: мен Тигирка қизи тарихидан воқиф кишиман. Мана шунинг ўзи етарили.

Капитан жимиб қолди. Бир қултум ичиб, қадаҳни столга қўйди ва тингловчиларга қаради. Улардан ҳеч бири ҳикоя айтилаётган пайтда гап қўшмади. Улар кутишар ва ҳайрат тўла қўзларида сабрсизликни уқиш мумкин эди. На вақтнинг кеч бўлганини, на чарчаганларини ҳис этардилар. Улар тингладилар.

– Тирикчилик учун қандай йўл билан пул топишим сизларга маълум, – давом этди Пассео. – Сизлар ҳар доим менга нисбатан меҳрибон ва марҳаматли бўлгансизлар, мени ўзларингга яқин билгансизлар, ваҳоланки, сизнинг ўзингиз мамлакат дengиз флоти аъзоларисиз. Мен савдогарман. Сотаман, сотиб оламан, пул ишлайман. Ўттиз йилдан ортиқроқ бирорта бандаргоҳни қолдирмасдан Мозамбик қирғоқлари бўйлаб сузиб юраман. Кемамнинг трюмлари бўшайди ва яна тўлдирилади. Юқлаш, тушириш. Бунинг учун менга тўлайдилар ва мен йўлимда давом этаман.

<sup>1</sup> Трюм - кеманинг юқ ортиладиган остиқ қисми (тарж.).

Мен бу мамлакатни яхши биламан, буни эшитиш сизга қанчалик хайратланарли бўлмасин, уни севаман. Уни ҳолдан тойдираётган қашшоқлик, коррупция, яширин урушга қарамай барибир яхши кўраман. Мустакилликнинг эълон қилиниши мен учун ҳеч нарсани ўзгартирмади. Мен бор-йўғи савдогарман ва ҳеч қачон бу мамлакат фуқароси бўлишга даъво килмаганман. Истиқлол шакарқамиш далаларини ёқиб юбормади, кешю ёнғоғи заҳираларини пайҳон қилмади. Савдо кемаларини тўлдирса бўладиган нарсалар ҳали бисёр ва бу менга жуда кўл келади. Шакар, чой, ёнғоқ. Бейрадан Мапутугача, Мозамбикдан Жанубий Африкагача. Шакар, чой, ёнғоқ – у ёқдан-бу ёққа олиб борилади. Фақатгина бу эмаслигини сезиб турган бўлсангиз керак. Курол ҳам ташийман, бунинг учун бриллиант билан ҳисоб-китоб қилишади. Жанубий Африка замини олтину қимматбаҳо тошлар билан тўлиб-тошиб ётган бўлса, қандай қилиб унинг бойликларига бефарқ қараш мумкин. Кўряпсизми дўстлар, мен ҳам бошқа осий бандалар каби қароқчи бўлмасам ҳам, бир муンча фирибгарман. Буларнинг барчаси ноқонуний, лекин Мозамбикда қонуний нарса борми ўзи? Бундан ташкари, кема трюомида ташиладиган йўловчилар ҳам бор. Мамлакатда йўллар йўқ. Поездлар зўр-базур харакатланади. Бўлганда ҳам унда кетишни Мапутудан иш топиш илинжида Замбези соҳилларини тарқ этаётган дехқонларнинг ҳамёни кўтармайди. Сув йўли ҳали-ҳамон энг арzon ва ишончли харакатланиш воситаси бўлиб келмоқда. Мен ҳам барча килган ишни қиламан: Бейрадан бир неча камбағалларни кемага оламан. Ҳукумат бунга кўз юмади. Сирасини айтганда, мен трюомларда нима борлигига ортиқча эътибор қаратмаслиги учун ҳокимятнинг оғзини ёпаман. Бейрада капитан Пассео шундай хизмат кўрсатиши хақида яшин тезлигига мишишлар тарқалди. Шундан бери бортга бир неча нолегални оламан. Очифини айтаман, бу менга ёқади. Бу орқали мен ўзимнинг шунчаки савдогар эмаслигимни ҳис қиламан. Ўзинг бор-йўғи майда савдогар бўла туриб, фалончиман деб гердайишинг аҳмоқлик эканлигини тушунаман, бироқ шундай бўлса ҳам... Хулас, ўз қийматига эга бўлгандарнинг барини – эркаклар, аёллар, курол, бриллиантлар, пишириқлар, шакарқамиш поясини ўз манзилига етказиши зиммамга олганман.

Анисето де Медейрос Пассеодан кўзини узмасди. Пассео унга қадалган нигоҳлар найзасига дош беролмаётгандай беихтиёр бармоқларини қалин соchlari орасидан юргизди, бўйинни қашлади.

Адмирал дўсти нимадан хабардор бўлганига тушуна олмасдан, уни нима хайратга соглани, нега юзида дунёнинг нариги четига бориб келган кимсадай чарчоқ излари мухланганига акли етмасди. Пассео яна сўзлай бошлаганида саволларига жавоб олишга шайланиб, нафасини ичига ютди.

...Мен ўша тунда содир бўлган барча нарсани эслайман. Биз Бейра соҳилида тўхтадик. Кема Мапутуга йўл олганди. Трюомдан пишириқларнинг ўткир ҳиди тараларди. Ноқонуний йўловчилар одатдагидан кўпроқ – йигирмага яқин эркак ва аёл эди. Уларнинг барчаси Мапутуда – шаҳар тегирмонида ўз баҳтини синаб кўрмоқчи бўлган, ердан тирикчилигини ўтказа олмаган бечора омадсиз дехқонлар. Эркаклар нари борса сон-саноқсиз курилишларда иш топиши мумкин. Аёлларга эса ҳеч нарсадан умидвор бўла олмас эдилар. Буни билсалар-да, ўз илоҳларига уларни жуда тез янчиб ташламасликларини илтижо қилган ҳолда эрларига эргашадилар.

Бейра анча ортда қолди ва мен ёрдамчимга трюомни очишни буюрдим. Бечора одамларнинг шўр босган трюомда қамалиб ўтиришларига йўл кўя олмасдим. Уларни шаҳарда кутаётган азоб-уқубатлар, олатасир шовқин-сурон олдидан сўнгги тунда баҳра олсинлар. Улар кўрқа-писа палубага кўтариладар эканлар, хашаматли салонга кириб қолган чуварнидиларга ўхшаб кетардилар.

Механикдан барча нарса жойидалигини билгач, ўз каютамга кириб ётдим. Ушбу тун менга кутилмаган совға тайёрлашини қаердан ҳам билибман дейсиз?

Бир-икки соатлардан сўнг қичқириқлардан уйғониб кетдим. Палубада жанжал бошланганди. Бундай ҳолатлар баъзан ноқонуний йўловчилар ва улардан яна озроқ чой-чака ундиromoқчи бўлган команда аъзолари ўртасида бўлиб турарди. Шошиб кийиндим.

Юқоридан қичқириқ овозлари янада баландроқ кела бошлади. Зиналардан ҳатлаб юқорига чопиб борар эканман, аёл кишининг юракни ларзага солувчи кучли чинқириғидан сал бўлмаса қулоғим тешилаётди. Мен икки ҳатлаб палубага чиқдим ва тўпланган оломонни ёриб кириб ҳамма четга чишишини, бу олатасир нимани англатишини тушунтиришларини талаб қилдим, лекин кеч бўлганди.

Палубада бир аёл киши юзтубан холда ётарди. Лабларим титраб кетди. Мен аёлни ўраб олганларнинг маънисиз, ҳиссиз юзларига қараб ҳеч нимани тушунмадим. Сўраб-суриштирудим. Матрослардан бири кўрган-билгандарини гапира кетди.

Пассео ўз хикоясида давом этаркан, бир оз тин олиб чека бошлади, тингловчилар жонланиб қолдилар, Фернандо эса ўрнидан туриб кетди. Ким сув ичади? Кимга яна қавҳа? Шириналлар-чи? Медейрос ва Пассео стулларни столдан узоқлаштириб оёқларини узатдилар. Да Коста ҳожатхонага йўл олди. Лекин бир оздан сўнг уларнинг барчаси яна стол атрофида жам бўлишиб, жон қулоқлари билан тинглашга тутиндилар, Пассео эса ўз хикоясини давом эттируди.

– Мана, у менга нималарни сўзлаб берди. Ярим тунда аёл эркак кишига нима учун ташланди? – мен барибир сабабини аниқлай олмадим. Жанжал босилгандан сўнг англаб бўлмайдиган воқеа содир бўлди: эркаклар ҳаммаси унга ташландилар ва дўпослай бошладилар. Денгизчиларим бирон бир чора кўришга улгуришмаган, саноқли сонияларда улар аёлни ўлакса қилиб дўпослай бошладилар. Гўёки уларнинг барчасини бирдан нафрат чулғаб олгандай. Воқеа қандай бўлганини сўзлаб беришни тўрт марталаб сўрадим. Жанжал нимадан келиб чиққанлигининг ажабланарли жойи йўқ эди: рашқ, қасос, хиёнат, яна нима ҳам сабаб бўлиши мумкин ...

Бироқ барчасидан сўнг кўрқоқларча, қабих, аҳмоқона ва шафқатсизларча бўлиб ўтган Линч суди... бу бутунлай бошқа гап. Мен лол қолган эдим, бироқ чекинишни истамасдим. Барча нолегал йўловчиларни йиғиб таъзирини бердим, агар гап нимадалигини айтишмаса, уларни хукуматга топшираман, деб кўркитдим. Ҳатто уларнинг барчасини кемадан улоқтириб юбораман, деб пўписа ҳам қилдим. Ҳеч нарса таъсир қилмади. Баъзи ашаддий сурбетлари менга ҳатто кўз кирини ташлашни ҳам лозим кўрмадилар, бошқалари эса ортиқча безовталанишга ўрин йўқлиги, мархума бор-йўғи Тигирканинг қизи эканлиги ҳақида астагина ғўлдирашди. Кун келиб менинг кемам сузувлари тобутга айланиб қолишини тасаввуримга ҳам келтира олмаган бўлардим. Бу аёл бошқалар қатори тирикчилик важидан ишлаш учун Мапутуга кетаётганди, менга ишониб моллар жойлашган ифлос қоплар орасида кетишга рози бўлган эди. Мен бўлсан биргина аёлни ҳам Африканинг қоқ марказида атиги бир тун давомида химоя қила олмайдиган оддий савдогар бўлиб чиқдим.

Ресторан эшиги тақиллади. Буйруқ берилганда тўртовлон бирдан чўчиб тушдилар. Икки севишган ичкарига кўйишиларини сўраб, ойнаванд эшикни зўр бериб тақиллатар эдилар. Фернандо ўрнидан сапчиб турди ва имо-ишора билан ресторан ёпиқлигини билдириди. Йигитча улар учун исстисно қилишлари ҳақида ёлвориб сўраганда, хўжайин:

– Йўқ, йўқ, йўқ! – деб қичкирди.

– Ўз сўзларини тасдиқлаш учун темир пардани тушириб кўйди. Севишганлар кўздан фойиб бўлишди. Фернандо одамларга тинчлик бермайдиган сурбетлар ҳақида нималарнидир жавраб ўз ўрнига келиб ўтируди.

Атрофни сукунат қоплади ва Пассео хикоясини давом эттируди.

– Аҳволим ниҳоятда оғир эди. Мапуту хукумати одамларига бу жасад

## ЖАҲОН АДАБИЁТИ

билан кўринишим ҳақида гап ҳам бўлиши мумкин эмас эди. Жасадни кемадан улоқтириб юборишга журъат қила олмадим. Лекин бу энг оқилона йўл бўлиб, бундай вазиятда кўплаб капитанлар айнан шундай йўл тутар эдилар: ҳеч нарсани кўрмадим, ҳеч нимани билмайман, кема сузишда давом этаверади. Қопни сувга ташлайсан – тамом-вассалом. Теварак-атрофдаги одамлар бечора аёлга нисбатан шу қадар нафрат билан ёнмаганларида балки мен ҳам шундай қылган бўлармидим. Аёлдан энг оддий йўл билан қутулиш учун уларнинг фикрига қўшилишим лозим эди, у бор-йўғи Тигирканинг қизи эканига розилигимни билдирган бўлар эдим. Фикримча, ҳамма худди шуни кутар, балки уларнинг кўпчилиги жасадни денгизга улоқтиришда менга бажонидил ёрдам ҳам берган бўлардилар.

Бундай жанжал Мапуту кўчаларида содир бўлганда эди, мен унга мастилаастлар жанжалига эътибор бермагандай қаардим, бироқ бу менинг кемамда содир бўлди. Двигателнинг бир маромдаги овози остида бирмунча тинчландим. Наздимда, тун чўзилиб кетгандай бўлди.

Ёрдамчим Зонгадан кўмак сўрадим. Биз катта оқ чойшаб топиб унга мурдани ўрадик ва бирон сўз демай, уни машина бўлимига туширдик.

Ушбу тун белгиланган жадвал бўйича, Мозамбикнинг “бадбўй брилианти” деб таърифланувчи Мапутудаги исқириқ қаҳвахонанинг денгизга қараган айвонида ўтириб, ҳаётимнинг сўнгти кунларини ўтказишини истаган масканим – инсонлар пешона тери билан озиқланиб, эвазига шовқин-сурон ва ичимлиқдан бошқа ҳеч вақо таклиф эта олмайдиган мастилааст шаҳарга етиб келдик.

Порт идорасига кирдим, ҳужжатларни расмийлаштиридим ва аввал келишилган вактда денгизга чиқа олмаслигимни билдиридим. Сўнг кемага кайтиб йўловчиларни қўйиб юбордик. Уларнинг аянчли шарпалари тун қўйнида бутунлай йўқ бўлиб кетди. Исмларини ўзларидан бошқа ҳеч ким билмайдиган қиёфасиз нолегаллар аввалгилари каби шовқин-сурон шаҳар қўйнига сингиб кетдилар, еб тўймас Мапуту орзу-умидларига эришмоқчи бўлган дехқонлар сафидан янгидан янги қурбонликларни талаб қилмоқда эди.

Анча вақтгача трюмга тушишга юрагим бетламади. У пастда ётарди. Нима учундир бу аёл бошимга бало бўлишини ич-ичимдан ҳис қиласдим.

– Тигирканинг қизи дегани нимани англатади? – Ҳикоячининг гапини бўлди Фернандо. Бошқа тингловчилар ҳам шуни билишни истар.

– У пайтларда бу ҳақида ҳеч қандай тушунчам йўқ эди. Лекин аниқлашга катый қарор қилдим. Ёрдамчим Зонга менга сигарета узатди ва гап орасида йўловчилардан бири мархуманинг акаси Грекда ошпаз бўлиб ишлиши ҳақида оғиз очганлигини айтиб қолди.

Грекнинг ким эканлигини таърифлашга ҳожат йўқ эди. Бу жой Мапутунинг ўпкаси, ҳа, ифлос ва димиқкан бўлса ҳам барибир нафас олиш жойи, бошқача қилиб айтганда, доимо одамлар билан лиқ тўла бўлишига қарамай, барибир ўзига тортувчи қуий тоифадаги қаҳвахона. Ҳар сафар Мапутуга келганимда барча денгизчилар сингари у ерга кираман.

На бордель, на казино дейиш мумкин бўлган бу муассасада ҳар болога дуч келиш мумкин. Грекнинг ўзи шоп мўйловли барзангি эди. Мозамбик мустақилликни қўлга киритгандан сўнг у ҳам бу ердан кетишини истамади. Бу ерларга меҳри тушиб қолган бўлса керак. Мапуту ҳам усиз Мапуту эмасди. Пастак столлар атрофида қанчадан-қанча келишувлар, иш юзасидан учрашувлар бўлиб ўтгар эдики, Грекка аллақачон Мозамбикнинг фахрий фуқароси унвонини бериш вақти келганди.

Мен ҳар қандай оқ танли сингари, қора терга ботиб файзсиз тунги тикилинчни кузатган қўйи борар эдим. Гуёки қурилишларнинг биридан иш бошқарувчи келади-ю, ушбу исмсиз, ўтмиш ва келажаксиз, бир-биридан факат терисининг ранги билан фарқланувчи ва шаҳар оҳанрабоси тортган бу одамларни ишга қабул қила бошлайди.

## ЖАҲОН АДАБИЁТИ

Мен Грекнинг олдига кирдим. Хўжайин мени баланд овозда “Капитанга салом!” дея қувонч билан қарши олди. Унинг қўлини қисдим, менга португал роми қўйилган стаканни узатди. Бир қўтаришда ичдим. Унинг мен билан гурунглашгиси борлигини сезиб турардим. Айтиш керакки, бизнинг у билан бъази бир ишларимиз бор эди, афтидан келтириб берадиган товарларимнинг нархи хусусида яна гаплашмоқчига ўхшарди. Суҳбатдан ўзимни олиб қочиб, қайта келишимни айтдим ва ошпазни чақириб беришини сўрадим. Грек ажабланди, шундай бўлса ҳам мени стол ёнига ўтқизди, бир шиша пиво, иккита стакан олиб келди ва ошпазни чақиришларини буюрди.

Олдимга ёш йигит келди. Унга ўтиришни таклиф қилдим, ўтириди. Ўзимни таништириб Бейра, Мапуту ва Жанубий Африка оралиғида савдо кемасида қатнашимни айтдим. Ушбу тунда Мапутуга етиб келганимизни ва кемамизда унинг синглиси борлигини айтдим. Шу пайт у сўзимни бўлиб, бу унинг туғишган синглиси эмаслиги, чунки оналари бошқа эканлигини айтиб, аниқлик киритди. – Шундай ҳам дейлик, – рози бўлдим мен лекин унинг қондош синглиси ҳозирда тирик эмаслигини, уни меннинг кемамда ўлдиришганини айтдим. Йигит лом-лим демади. Мен яна тақрорладим: ўлдиришди. У менга тикилиб қолди ва пиводан хўплади.

– Бу воқеа қандай содир бўлгани сизни қизиқтирмайдими?

У ҳамон жим эди. Мен бўлиб ўтган воқеа ҳақида гапира бошладим. Қотиллик ҳақида лом-мим демасди. Линч суди тўғрисида ҳам. Кўплаб одамлар унга бирдан ташлангани, уларнинг ғазаб отига мингани ҳақида сўзладим. У жим эди. Охир-оқибат, ҳаммасини гапириб берганимдан сўнг бу қадар хотиржам эканлигига тушунолмай, унга тикилиб қолдим. Шунда у менга тикилиб, секингина гап бошлади:

– Соз бўпти. Ҳа, у Тигирканинг қизи эди, – унинг оғзи нафратомуз қийшайди. Томиримда ўша қон оқмаганида мен ўзим ҳам шундай қилган бўлардим.

Ичим қизиб бораётганлигини ҳис этдим. Тишлиримни ғижирлатиб, қўлларимни мушт қилган ҳолда унинг кўзига тик боқдим. Уни ҳақоратлагим, ҳайдаб солгим, унга қичқиргим келди, бироқ мен ҳеч нарсага улгурмаёқ, у ўрнидан турди ва аввалгидай жим, ҳатто хайрлашмай, қўлини ифлос ва увадаси чиқиб кетган латтага артиб бўлгач, чиқиб кетди.

– Хўш, сен нима қилдинг? – деди шошилиб адмирал.

– Наҳотки у ҳеч нарса демаган бўлса? Синглиси ҳақида-я? – Фернандо ҳам ўзини тута олмади.

– Шу пайт бу ишга нуқта қўйишга қарор қилдим, – давом этди Пассео. – Жасадни соҳилга олиб чиқаман ва Мапутуда дафн этаман. Мен охир-оқибат нима бўлишини тасаввур ҳам қила олмас эдим. Худди ушбу тун қанчалик узоқ ва гаройиб бўлишини билмаганимдек. Бироқ мен Тигирка қизи ким эканлигини билишим керак эди. Нима бўлишидан қатъи назар.

– Сен нима қилдинг? – сўради Медейрос.

Пассео жавоб бермади. Дўстлари у бироз тин олиши керак деб ўйлашди, бироқ сукут анчага чўзилиб кетганлиги учун безовталана бошладилар.

– Хўш, кейин-чи, кейин нима бўлди? – деди сабри чидамай Фернандо.

Пассео жилмайди ва оғзига ширинлик бўлагини солди.

– Келаси сафар айтиб бераман, – деди у қатъий оҳангда.

Бу гапдан сўнг шундай тўполон бошландиди, асти қўяверасиз! Бу ҳақида гап ҳам бўлиши мумкин эмас! Уни нима жин урди ўзи! Қанақасига келаси сафар бўлар экан? Ҳозироқ гапирасан! Ақлга сифадиган ишми бу: ҳикояни шундай, ўртасида, энг қизиқ жойида тўхтатиш! Пассео қатъий туриб олди. Ҳикояни кейинги сафар якунлашини, ҳозир эса кеч бўлганлигини тақрорлади. Ундаги қатъиятини кўрган дўстлари чекинишига мажбур бўлдилар.

– Сен у ерга қайтасанми? – қизиқиб сўради Медейрос.

## ЖАҲОН АДАБИЁТИ

– Эртадан кейин йўлга чиқаман, – жавоб берди Пассео.  
 – Сен билган, кўрган ёки ўша тунда бошдан кечирғанларингнинг қайтишингга алоқаси борми?  
 – Ҳа. Ўша тундан сўнг энди Мозамбиксиз яшай олмайман. Шу ерда Да Костанинг сабри чидамади ва байрамнинг қок ўртасида ётиб ухлашга юборилаётган боладай зорлана бошлади.

– Ким билади, ўша худо урган мамлакатдан қайтасанми-йўқми? Вокеа якунини қаердан биламиз, ахир?

– Унда бу Мозамбик мени ютиб юборғанлигини англатади ва орангиздан кимдир воеа якунини билиш учун ўёққа равона бўлишига тўғри келади.

– Сиз даҳшатли нусхасиз! – деди Фернандо хафа бўлган бола сингари тумшайиб, – бу ҳам етмагандай, бешафқатсиз. Сизларни бўқтириб маст қилиш керак, ана шунда гап бошлаган бўлармидиларинг.

Ҳамма кулиб юборди ва қадаҳларни охириги марта уруштирилар. Барчалари қаттиқ чарчаган эдилар, гурунгдагилар уй-уйларига тарқаб, ухлаш учун йўл олишга қарши эмас эдилар. Үрниларидан туроғтиб, ҳар бири хаёлан Мозамбик билан учрашув тайинладилар. Ярим-бир йилдан кейин улар, албатта, тўпланишади ва ушбу ҳикоя давомини эшитишиади.

Столдан сигарета қутиларини олар эканлар, барчалари улар ҳар доимгидек Фернандодан қанча тўлаш кераклигини сўрадилар, лекин у ҳар доимгидек ҳеч нарса керакмас деди, уларнинг жаҳли чиқа бошлади, шундан сўнг улар бундай бўлса, бошқа келмасликларини билдирилар, бироқ у ҳеч нарсани эшитиши ҳам истамади. Улар дўстига қуюқ миннатдорчилик билдириб, кийинишидни ва кўчага чиқишидни. Лиссабон кўчалари бўм-бўш эди. Атлантика томондан шамол эсди. Үйларнинг чироқлари ўчди, шаҳар қоронгулик оғушига чўмди.

Деворлар бўйлаб мушуклар пусиб юрардилар. Ёмғир майдалаб ёға бошлиди. Учта шарпа турли томонга тарқалиб кетди. Фернандо рестораннинг пардаларини охиригача тушириди.

– У яна қайтади деб ўйлайсизми?

Фернандонинг овози адмирал Медейросни хаёл оғушидан олиб чиқди.

– Вақт қанчалик ўтса, мен шунчалик камроқ ишонаман бунга, – жавоб берди адмирал.

Фернандо бош иргади. У ҳам Пассеони Мапутуга етиб борган ва уни бошиқа кўрмайман, деб ўйларди. Дўстлар давраси тарқаб кетди. Ажал Да Костани олиб кетди. Пассеони ҳаёт ўз гирдобига тортиб кетди. Энди улар икки киши эди. Аммо энди улар нима қилиши мумкин? Навбат билан бирбирига воеаларни сўзлашадими? Бироқ қандай ҳикояларни? Фернандо фақатгина ўзининг мавзесида бўлаётган воеаларни биларди, холос. Улар икки киши қолганликларига ва Мозамбик ҳақида қўпроқ билиши истакларини рўёбга чиқара оладиган одам йўқлигига кўнишишларига тўғри келади.

– Фернандо, буларнинг баридан нима қолди, ўзи? – деб сўради туйкусдан Анисето де Медейрос маҳзун кайфиятда.

– Нимадан? – тушунмади Фернандо.

– Учрашувларимиздан-да. Биз бир-бirimizgiga айтиб берган воеалардан. Бизнинг гурунгларимиздан. Мен нафақат сўнгги учрашувни, Пассео гапириб берган ўша Мозамбик тунини назарда тутмаяпман. Охиргиси, балки хотирамизда узок вакт сақланиб қолар. Лекин бошқа учрашувлар-чи? Умуман, бу ерда кечирған барча лаҳзаларимиз-чи? Бугун эрталаб, ўша лаҳзалар менга қанчалар ётишмаётганини хис қилганлим учун бу ерга қайтиб келдим. Келаётib, барчамиз ҳақимизда ўйладим. Фернандо, балки кулгили туюлар, бироқ сизлар билан ўтказган онлар – мен учун ҳаётим давомидаги энг қадрлиларидан биридир. Албатта, факат уларгина эмас, лекин улар ҳам. Агар мен учун энг муҳим нарсани айтиш лозим бўлганда, мен ўша лаҳзалар ҳақида сўз очмай турга олмасдим. Тушуняпсанми?

Фернандо бош иргади. У ҳам худди шундай ҳислар оғушида эди. Бироқ у

жавоб беришга ҳам улгурмай, адмирал аввалгидан ҳам қайғулироқ оҳангда гап бошлаб қолди:

– Хўш, буларнинг барчасидан нима қолади ўзи? Ҳеч нарса, Фернандо, умуман ҳеч нарса.

Туйкусдан Фернандонинг юзи қувончдан ёришиб кетди. Буни қўриб адмирал ҳайрон бўлди:

– Нимага хурсандсан?

– Пассеони қайтариши қўлимдан келмайди, – жавоб берди Фернандо. – Биз энди ҳеч қачон тўртовлон тўплана олмаслигимизни билганимиз учун қайғудамиз. Тақдир ҳукмини ўзгартириб бўлмайди. Лекин барибир, сиз адашьпиз, адмирал. Бизнинг учрашувларимиздан нима қолади? Ҳеч нарса, деб ўйлайсизми? Бундай эмас. Менинг ҳам арзимас кичик сирларим бор. Шошмай туринг. Мен сизга бир нарса кўрсатаман.

У ўрнидан турди ва ошхонага кириб, йўқ бўлиб кетди. Нимадир гумбурлади, қулақ тушди, силжитилаётган яшикларнинг шовқини эшитилди, шундан сўнг яна Фернандо пайдо бўлди. У топографик харита ёки суратлар сақланадиган катта картон ғилофларни қўлтиқлаб олган эди. У адмиралга яқинроқ келишини сўраб, ишора қилди, ғилофлардан бирини очди ва ундан бир ўрам қофозларни чиқарди.

– Мен дастурхонларни сақлаб қўйганман, – деди у ўрамни очиб текислар экан.

– Дастурхонлар? – тушунмади адмирал.

– Уша кечалари биз фойдаланган қофоз дастурхонлар. Буни қаранг. Уларнинг бари шу ерда. Мен уларга ҳатто саналарини ҳам ёзиб чиққанман. Масалан, “1969 йил, 8 август”. Ёки мана яна “1978 йил, 3 июнь”. Бу охиргиси. Кўп эмас, албатта, лекин барибир нимадир бор.

Адмирал лол қолди. Аввалига, Фернандо дастурхонларни тўшай бошлаганда, асраб бўлмайдиган нарсани сақлаш истаги унга кулгили туюлди. Лекин кейин дастурхонлар устида энгашди, бармоқларини улар устидан юргазиб, томоша қила бошлади. Бу улар ўртасидаги дўстликнинг ўзига хос харитаси эди. Шаробдан қолган доғлар. Тақсимчалар ва анжомларнинг қўйилган жойлари. Унга кўра ҳатто улфатларнинг ҳар бири қаерда ўтирганлигини аниклаш мумкин эди. Ҳатто унинг кўзига дўстлари ва ўша оқшомларда бўлиб ўтган воқеалар кўрина бошлади. Ана, кимдир бокалдаги майни ағдариб юборди, ҳикоя бир муддатга узилди. Мана, кимдир бармоқлари билан эзғилаб юмалоқлаган ва қофозга ёпишиб қолган нон ушоқлари. Бир уюм дастурхонлар – бу учрашувлардан қолиши мумкин бўлган энг ҳаяжонли излар-ку, ахир.

У охирги дастурхонни аввалгиларидан узоқрок қўриб чиқди. Унга 1978 йил деб ёзилган эди. Фернандонинг ёрдамида қаерда ким ўтирганини аниклади. Биргалиқда капитан Пассео жойини синчиклаб ўргандилар, буни майдан қолган доғ бехато кўрсатиб турар эди. Бу доғни туширган киши бу ерга бошқа қайтмаслигини билганмикан, деб ўйлаб қолди адмирал. Улар дўстлигининг ашёвий далили кундай равшан эди. Уларнинг барча гурунглари ҳақидаги хотиралар шу ерда, ушбу уриниб қолган қофоз бўлакларида муҳрланган эди. Адмиралдаги қайғу ўрнини осойишталик эгаллади. Ҳа, бу жуда соз. Улар учрашдилар, гурунглашишди, галма-гал воқеаларни ҳикоя қилишди. Ҳаёт изларини дастурхонларга муҳрладилар. Бор-йўғи шу, холос.

*Рус тилидан  
Абдуғафур ҚОСИМОВ,  
Сиддиқжон ХЎЖАЕВ  
таржимаси*

## ЖАҲОН АДАБИЁТИ

## Сиприан ЭКВЕНСИ

*Сиприан Эквенси – Нигерия прозаиги, 1921 йил тугилган. Гана ва Англияда таҳсил олган. Касби доришунослик, биология ва кимёдан дарс берган. Радиода узоқ вақт ишлаган. Кўплаб романлар ва ҳикоялар тўплами муаллифи. F.Гулом номидаги Адабиёт ва санъат нашриётида 1972 йилда “Шаҳар одамлари” романни (Нуъмон Раҳимжонов таржимаси) босилиб чиқкан.*

### ЯЙЛОВЛАР ҚОНУНИ

**Э**р киши ўзи ёқтирган ҳар қандай аёлни олиб қочишга ҳақли. Саваннанинг кўчманчи чорвадорлари қонуни шунаقا. Қиз ёшми ёки бўй етиб қолганми, эрлими ё қариқизми – бунинг аҳамияти йўқ. Агар у севиб қолган қизини уйгача олиб кела олдими – тамом, ҳаммаси шу билан тугайди. Борди-ю, йўлда кўлга тушиб қолгудек бўлса, йигитнинг шўри қуриди деяверинг!

Ҳикоямизда тасвирланган воқеалар бўлиб ўтган ўша оқшомда бир кулба ичидан икки кишининг баланд овозда айтишаётгани кулоққа чалинди. Амина акаси Модио билан сан-манга бориб қолганди. Модио шиддат билан Аминани итариб юборди.

– Ҳой ака! – чийиллаб деди Амина, ўзини чаққон четга олиб. – Олинг қўлингизни!

Қиз оғзини хиёл очди – аммо бу табассум эмасди; унинг ғўч сийналари шундай кўтарилиб-тушар эди, данак ва кумуш тангалардан қилинган мунҷоқлар жони бордай қимирлар эди. У похол кулба устунига ёпишиб, ийқилишдан ўзини базур тутиб қолди.

– Менга қўлингизни теккиза кўрманг!

– Оллоҳга қасам ичаман, – бўқирди Модио. – Нақ эсингни киритиб қўяман!

Қиз чақнок қўзлари билан акасига ғазабли нигоҳ ташлади. Акаси тажо-вузкорона эгилди, мушаклари тараанг тортилди, қўллари ўлжасига човут солишга шай лочиндеқ чангакланди.

– Ҳеч қаёққа бормайсан!

– Бекор айтибсиз! – қичқирди қиз. – Бугун Ялланикода бўламан! Тегсам, ўшанга тегаман!

– Жама нима бўлади? Уни отамиз танлаганлар! Сенга деб Жама берган қалин моллар нима бўлади?

– Бу ёғи билан менинг ишим йўқ, – жавоб берди қиз. – Сизлар мени... Вой! Қўйиб юбор, иблис! Жинни-пинни бўлганмисан?

Акасининг ғадир-будуру қўли келиб унинг лабларига урилди. У синглисини кўтарди-да, типирчилаганига қарамай, ўзининг кулбасига судраб кетди. Яланг оёғи билан эшикни тепиб очди-да, Аминани қоқ ерга ирғитди. Паға-паға чанг кўтарилди. Қиз ерга юз-тубан йикилганича ётиб қолди, ўқириб йиғлаганидан аъзойи бадани титрар эди. Узун паришон соchlари елкаси оша тушиб, ердачувалиб ётарди. Қўз ёшларидан қизил упа сурган юзлари жиққа хўл бўлиб кетди. Амина ҳали жуда ёш эди – ўн гулидан бир гули очилмаган бокира қиз...

– Ярамас! – Акасининг овози қулоғига чалинди.

У акасининг эшик лўқидонини суриб қўйганини ва оғзидан боди кириб, шоди чиқиб сўқинаётганини эшишиб турарди. Охири уни ўчиб, акаси у ердан кетди.

Юрагини поралаётган дардга малҳам бўлиб, унинг севгилисига эҳтиросини босадигандек, қиз кўз ёшларига эрк берди. Аммо шу заҳоти ҳали ҳам ҳеч нарса йўқотилмаганини, ҳали ҳам умид борлигини ўйлаб қолди. Ахир уни Ялладан ҳамишаликка ажратиб бўларканми? У севгилиси қошига бормаса бўлмайди, боради ва ҳаммасига нуқта қўяди!

Аlam нафратга айланди ва кўқси ўт бўлиб ёна бошлади. Жама унга ёқмаса, бунинг учун у айбордми? Отаси аввал Жамадан молларни олди ва шундан кейин қизига муддаосини айтди. Жама эса бўғинлари ййнаган бир хотинчалиш одам бўлиб чиқди. Шу ҳам эркак бўлдими? У бўйра тўкиб, саваннада мол боқа олармиди! У шунақанги қуёнюракки, сал қийинчиликка дуч келса, ёш болалардай хўнграб юборади. Тўғри, қийинчиликка ҳар ким ҳар хил чидайди, аммо эркак зоти ундай бўлмайди-да... Унга эрга теккандан ерга теккани яхши. Отаси уни Жамага қўшқуллаб топшириб юбораверади. Бошқа қизларнинг қизи устидан кулишлари билан бир пуллик иши йўқ: “Эринг қалай энди, кун чиққунча тўшакдан бош кўтармайдими? Ёмғир деса юраги тарс ёрилиб кетадими? Вах-ҳа-ҳа! Шу ҳам эр бўлдими!”

Бунинг ҳаммасига Ялланинг ўзи айбдор. У нимагадир сўзида турмади. Ваъда оддигина эди – улар Жама келиннинг қалинига деб охирги хўқизларни ҳайдаб келишидан олдинроқ отасининг ўтовидан қочишга келишиб олган эдилар. Ялла чиябўрилар ялов ортидан угувлай бошлагандা кулба олдига келиб туриши керак эди: хуштори ҳайқирган дороуа дарахти остида кутиб турганини Амина билиши учун ўша ерга етиб келиши ва жўжаларнинг қиронини келтирадиган қиргий қичкириғида қичкириши керак эди.

Қиз бу қичкириқни кўп кунлар кутди. Чиябўрилар тошлар орасида яшириниб турган оқшом чоғларида қиз севгилиси ҳақида ширин хаёлларга бериларди – ана у, баланд бўй, кенг елкали, майдалаб ўрилган соchlарига мис гардиш кийдирилган бўз йигит. Шунақанги полвонки! У отасининг подасидаги қайсар хўқизнинг белини бир уришда синдиради, асов отнинг суробини тўғрилаб қўя олади! Шу билан бирга, у жилмайганида ва уни қўлидан тутганида йигитнинг юзлари шу қадар майин ва юмшоқ қўриниб кетарди, қўяверинг... Қиз Ялланинг кенг ўмровига бошини қўйганча унинг тим-кора кўзларига тикилиб тўймасди. Йигит қизнинг қулоқларига тегишини яхши кўради. Гоҳо қизнинг бундан ғаши келарди ва шунда у Жамага кетиб қоламан деб дўқ қиласди. Ялла ва Жама – бир-биридан осмон билан ерча фарқ қиласди! Жама – кўрқоқ! Тез-тез чўлдан қутуриб қўзғалган довулдан кулбани кутқариб кола олармиди? Тўсатдан подага ҳамла қилиб қолган ёввойи итлар, чиябўрилар, қоплонлар, арслонларни ҳайдаб юбора олармиди?

Шу ҳам эркакми? Тўғри, Аминанинг эслашича, уни Жаманинг бўлажак хотини деб билишарди. Беш юз бош мол. Аммо Амина сотилмайди!

Охири бугун кечга яқин Ялла қизнинг отаси гузарида пайдо бўлди. У сал наридаги дороуа дарахти ёнида тўхтади-да, қизни чақириб, хуштак чалди. Аминанинг юраги ҳапқириб кетди. Ҳазилакам ишми – у қадрдон гўшасини бутунлай тарқ этади! Ҳеч ким билан хайрлашиши ҳам, кўз ёши тўкиши ҳам мумкин эмас... У қариндош-уруғлари нақ оғзидан отиб ташлайдиган одам билан қочиб кетаяпти...

Чўл узра ўлик сукунат чўқкан. Амина оҳиста кулбадан мўралади. Кўз олдида бепоён чўл намоён бўлди. Булар ҳаммаси энди у ва Яллани – агар уларда журъат етишса... Ҳамма-ҳаммаси: салқин шамолдан эгилиб-эгилиб кетаётган пакана дарахтлар ҳам, шарқираб оқсан дарёлар ҳам, қоялар ҳам, тиканли тўқайзорлар ҳам – барчаси Амина ва Яллани ўзлари томон чорларди: келинглар, бизга эгалик қилинглар! У ерда улар ўз қўраларига эга бўлишади ва сигир-хўқизларини бокишиади – бирорларникини эмас, ўзлариникини!

Ялла яна хуштак чалди – бу гал кулранг қирғийнинг бетоқат ва ундовчан хириллоқ қичкириғи билан овоз берди.

Амина барча иккиланишларини итқитиб ташлади. У кулба ичидан югуриб чиқди. Узи билан ҳеч нарсани олмади, ҳатто онаси совға қилган ёғоч чўмични ҳам уйда қолдирди... Шу заҳоти уни акаси тутиб қолди! Акаси мудом ёнгинасида, дарахт ортида, ярим ёввойи кўппаклар галаси орасида

## ЖАҲОН АДАБИЁТИ

яшириниб олишини хаёлига ҳам келтирмаганди. Кўппакларни Яллага олкишлаб, у Аминани тутди-да, қайта кулба ичига судраб кетди. Қиз уни тимдалар, дўй урар, қарғанар эди, акаси бўлса нукул кулар эди... Эркин яйловлар қонуни энди Ялла ва Аминани ҳимоя қилмаётганди.

Мана, энди киз – асира, кулбага қамаб кўйилган. Аммо барибир ҳам у Яллани бутунлай йўқотганига заррача ишонаётгани йўқ эди. Бундай бўлиши зинхор мумкин эмас! – Унинг ҳам бир иложи бордир, ахир! Жама қалинга атаган хўқизларни охиригача ҳайдаб келмасидан олдин Ялла қандай қилиб бўлмасин, уни мана бу қамоқхонадан олиб чиқиб кетолса ва ўзининг кулбасига олиб боролса, қандай яхши бўларди, Ялла ҳали ҳам уни ўзига хотин қилиб олишга улгуарди – кучлиларнинг қонуни бу. Ҳеч ким эркин яйловлар қонунини буза олмайди. Буни барча кўчманчилар билади, бу қонунни ҳамма ҳурмат қиласди... Фақат Ялла унинг қаердалигини қандай билади? Хўқизларини ҳайдаб, Жама қачон келишини қандай билади? Йўқ, ҳаммаси, ҳаммаси тамом бўлди!.. Аминанинг кўзларидан яна аччик ёш дув тўкилди.

– Ох, Ялла, Яллагинам! Кел, мени қутқар, Ялла! Мен – сеникиман, сен – менинг эримсан!

Акаси девор ортидан қичқириб, агар тинчланмасанг, нақ кўрадиганингни кўрасан деб дўй урмагунча қиз ўзини ҳар тарафга урди, қичқирди, кўркитди. Аммо аъзойи бадани чангта беланиб, тиканлар кириб, вужуди оловдек ёниб турганда қандай тинчлана оларди? Ҳой ажал, тезроқ келсанг-чи! Жамага хотин бўлганимдан ўлганим афзал!

Ташқаридан қулоғига чалинаётган ғала-ғовурдан у англадики, отларга эгар уришмоқда. Модиодан ташқари у ерда чўлдан қайтиб келган оғаниилари ҳам бор эди. Улардан бири уни қора чодрага ўраб олиш керак, деса, бошқаси, бу удумимизга тўғри келмайди, оқ чодра бўлиши керак, деди. Уларнинг топған гапларини қаранг! Тўнғич ака айтдики, у келин билан битта отда боради, уни олдига мингаштириб олади. Модио уни қай тариқа ушлаб қолганидан кейин айникса хушёр бўлишмаса бўлмайди. Ох, шўрлик ака-укалар-а, бор-йўғи беш юзта қорамол деб шунча куйиб-пишишларини-чи!

Бир вақт ака-укаларнинг овозлари эшитилмай қолганини фаҳмлаб қолди қиз. Уларнинг вайсашибари, кўпол ҳазил-мутойибалири кутилмагандан узилган эди. Чўл узра даҳшатли жимлик чўқди. Мўъжазгина кулба ичидаги ҳаво оғирлашиб, димиқиб кетди. Аминанинг томоги қишиша бошлади. Бирдан сукунатни ака-укалардан бирининг хириллаган қичқириғи бузди:

– Ёнғин! Ёнғи-ин! Ҳой, сув келтиринглар, сув! Ёнаимиз!

Амина типирчилади. Унинг мўъжаз қамоқхонаси қуюқ тутунга тўлганди. Нафас олиш тобора қийинлашиб борарди, кўкраги йўталдан ёрилиб кетмоқда эди. Жон ҳолатда унинг бир кучига ўн куч қўшилди. У эшикни ура бошлади. Барча тирқишлардан тутун ичкарига бўралаб кирмоқда эди. Ташқаридан ҳуркиб кетган молларни ушлашга ҳаракат қилган эркакларнинг қичқириклари ва сўқинишлари кулоқقا чалинарди. Уларнинг овозлари қизнинг қулоғига босиқ зарбалардек келиб уриларди. Наҳотки ака-укалар уни эсдан чиқариб кўйишган бўлса? Қиз бўғиларди. Наҳотки, улар шу қадар бағритош бўлса? Ёки ростданам сигирлар уларга сингилларидан азизроқми?

Кучли қўл эшикни ланг очиб юборди ва паст эркак овози амона қичқирди:

– Ортимдан ютур! Бу мен, Ялламан!

Кизнинг юраги шодлиқдан ўйноклаб кетди, аммо бўғилишдан карахт бўлиб қолган лаблар бирон товуш чиқаришдан ожиз эди. Кучли қўл унинг белидан кучиб олди ва қизнинг оёқлари ердан узилди. Унинг соchlари томга ёпилган қуруқ ўт пояларига илашиб қолди. Мехрибон эркак бармоқлари соchlarga ёпишган тиканакларни авайдаб териб ташлади. Қизга булар бари тушда бўлаётгандек туюлмоқда эди. Ўпкасига ёқимли ҳаво отилиб кирди. Аланганинг сариқ тиллари осмонга ўрлаб, кўзни олувчи олов устунига қўшилиб кетмоқда эди. Қўли билан ўзини оловдан пана қилиб, қиз акалари-

ни кўрди. Улар ўзларини бир кулбадан бошқасига урап, бўйра, саватхалта, сутли хурмаларни элтар эдилар. Ўйк, бу энди туш эмас эди. Ҳаммаси – ҳатто овозлар ҳам – ўнг эди.

– Ана у! Акалар, тез бу ёкка келинглар! Тутинглар уни!

– Ялла, – деди пиқ-пиқ йиғлаб Амина, – улар бизни қувиб келишаяпти! Нима қиласиз энди?

– Қувишиша қувишишаверсин! Уйимгача атиги беш мил. Бир қувлашмачоқ ўйнасан ўйнабмиз-да!

Аминани қўлида кўтариб олган Ялла бутун қўрадан югуриб ўтди-да, қизни ўзининг отига миндирди.

– Тезроқ! – қичқирди у қизнинг ортида ўтириб, отни елдирганча. – Олга!

От чўл ичига отилди. Унинг ҳар бир одими Аминанинг аъзойи баданини зирқиратиб юбормоқда эди. Сочлари шамолда ҳилпирав эди. Орқадан эса чарчашиб нималигини билмайдиган, чакқон чавандозлар, боз устига сингилларининг ўғирланганидан ғазабга минган ака-укалар от солиб келар эди. Амина уларнинг отлари дупурини аниқ-тиник фарқлай оларди. Эй Худо, нима қисса экан-а?!

Вз-з-з!..

Бу ёй ўқининг овози эди. Фурсат ғаниматда таслим бўлган яхши!

– Ох, Ялла, тўхтаб, уй-уйимизга кетганимиз аъло эмасми! Барibir улардан кутулиб бўлмайди.

Ялла фақат қах-қах уриб кулиб юборди, холос ва қиз момақалдириқдек эрқак овозини эшитиб, ўзини аҳмоқдай ҳис этди. У нимага куляяпти? Анамана орқасидан келиб санчиладиган, уни ўлим талвасасига солиб, у ғужанак бўлиб, йўталдан бўғилиб ўладиган жойга йикитадиган камон ўки устидан куляяптими? Ох, жасоратли Ялла, севгилик менинг!

Устидаги юқ оғирлигидан от ҳарсиллай бошлади. Буталар бирдан сий-раклашди, энди йўллари тик қоялар орқали ўтарди. Чавандозлардан қайси бири эпчилроқ экани энди жуда билинади. Шу ерда уни ўғирлаган йигит ё ундан жудо бўлади, ёки абадий ўзиники бўлади. Қиз нафасини ичига ютди. Аъзойи бадани чаён чаққандай симиллаб оғирди, лекин у олдинда қандай қувонч кутаётганини биларди ва бу унга матонат бағишларди.

Улар минган отнинг чопиши тобора оғирлашиб ва зўрикиб бормоқда эди. Ялланинг ўзи ҳам ҳар қанча кучли бўлмасин, оғриқ ва чарчоқдан тишларини ғичирлатар ва тулпорига тинимсиз қамчи босиб, ғазабнок никтар эди.

– Иехув-в-в! – наъра тортарди у; шунда юзидан тўкилган тер томчилари Аминанинг кўзига келиб тушарди. – Иехув-в-в!

Узоқдан чироқ шуъласини қиз биринчи бўлиб кўрди.

– Менинг уйим, – деди Ялла. – Менинг ёлғиз уйим.

– Бизнинг уйимиз!

Йигит яна қах-қах уриб кулди.

– Вз-з-з!..

Шунда Ялла бирдан ох тортиб юборди.

– Ох, уларнинг ўки нишонга тегди! Орқам!.. Эй Худо, ўзинг сақла... Ўлаляпман...

У жумлани охиригача етқизолмай, отдан ерга қулақ туша бошлади – заҳарланган ўқ тез таъсир қиласи. Таъқибчилар яқинлашиб келарди ва ўқлар улар ёнидан бот-бот визиллаб учиб ўтар эди.

– Агар мен ўлсам, кулбамга бор. Уйим остонасидан ҳатлаб ўтсанг, бас, улар сенга қўлининг учини ҳам теккиза олишмайди. Бу... Конун шунақа...

Аминани даҳшат чулғади. У атрофга аланглади ва чавандозларнинг корасини элас-элас кўра бошлади, улар аста-секин тиниқлашиб борарди. Улар ичидан биринчи бўлиб қиз тўнғич акасини таниди. Ялланинг бутунлай мадори қуриганди, у базўр эмаклаб борарди, аммо Амина уни бор кучи билан олға сударди. Африка чўлларининг қизи эмасми, у ёш, кучли ва жасур эди.

Ялланинг мажоли қолмади. Бироқ шу он улар подасидаги сигирлар

## ЖАҲОН АДАБИЁТИ

хуркиб, ўзларини олиб қочди. Қўйлар безовталаниб маърарди. Товуқларни сергак тортириб, хўрот қичқирди, товуқлар қулоқни қоматга келтириб, қақағлай кетди. Қочоқлар Ялла қўрасинининг чегарасидан ошиб ўтишиди. Энди кулбагача етиб олиш қолганди...

– Тўхта, лаънати ўғри!

Ошик-маъшуқлар қўра ва товуқхонадан ҳам ўтиб олишиди. Шунда Амина бор кучини тўплаб эгилди-да, Яллани кўтарди, уни кулба ичига итариб юборди ва унинг ортидан ўзи ҳам қок ерга йиқилди.

Йигит бирданига енгил нафас олди.

– Хотиним! – инграниб деди у. – Ниҳоят сен мен билансан! Энди тезроқ... ўқни... Сен хали ҳам мени кутқаришинг мумкин... Заҳарга қарши...

Аминанинг акалари кулба олдига етиб келишиди.

– Ҳой ўғри! Синглилизни қайтар бизга! – бўқирап эди улар.

– Ҳали мен ўғри бўлиб қолибманми? – истехзоли сўради йигит. – Ўғри сизлар. Тўй отимни ўғирладинглар!

– Билиб қўй, қалин моли тўламагунингча отамиз рози бўлмайдилар. Энди Жаманинг қалин молларини қайтаришимизга тўғри келади.

– Бу ёғи менинг ишим! – қичқирди уларга Ялла ва Аминага шивирлаб деди: – Вой, орқам! Тезроқ заҳарга қарши малҳамни...

Ака-укалар отларининг бошини шиддат билан орқага буришиди-да, ўзларининг қўргонлари томон йўртдириб кетишиди.

Улардан бири деди:

– Барибир мана шу Яллага қойил қолдим. Ҳақиқий эркак экан. Қўргонимизга ўт қўйди, синглилизни олиб қочди, бошқа куёвга атаганимиз отни ундан тортиб олганимиз учун бизни ўғрига чиқарди! Нима ҳам дердик, яйловлар қонуни бу! Ялла бизни боплабчув тушириди...

*Рус тилидан  
Алимурод ТОЖИЕВ  
таржимаси*

## Мануэл ФЕРРЕЙРА

Кабо-Верди Республикасида турли миллат вакиллари истиқомат қиласди. Мустамлакачилик туфайли туб жой аҳолиси маданияти мутараққий Ғарб маданиятидан таъсирланниб шу ўйналишдағи талай замонавий шоир ва ёзувчилар етишиб чиқди. Мануэл Феррейра шундай ижодкорлардан бири. Унинг деярли бир қанча роман ва ҳикоялар тўпламида туб африкаликлар руҳи ва турмуш тарзи яққол кўзга ташланиб туради “Илк рақс кечаси” ҳикоясида инсон ор-номусини асрраб-авайлаш аввало ҳар бир кишининг ўз қўлида, деган умуминсоний ғоя илгари сурилган.

## ИЛК РАҚС КЕЧАСИ

– Ойижон! Бугунги Зе-де-Канда рақс кечасига боришни жуда-жуда хоҳляяпман! Нима дейсиз, рухсат берасизми?

– Қизим, Белинья, рақс кечасига бориш учун ҳали ёшлиқ қиласан. Улғайгин, Сонсентда бўладиган барча рақс кечасида иштирок этасан.

– Ойижон, ҳамма ўртоқларим борајти-ку. Мен ҳам бора қолай? Бир ўзим бормаяпман-ку. Қаранг, мана, бўйимнинг ўсганини. Каттаман-ку, – Белинья шундай деб оёқ учиди туриб олганини кўрган онаси кулгидан ўзини тутиб туролмади. Бақтнинг ўтишини қаранг. Бамисоли учкур от! Болалари кўз ўнгига жуда тез катта бўлишяпти-я. Кўз тегмасин, қизи хўп етилган-да, гўзаллигини айтмайсизми: соchlари қалин, юзи нақш олмадай. Жуда кўзга яқин-да.

– Ойижон, рухсат берасизми?

– Йўқ дедим-ку сенга, йўқ. Сендан хавотир оламан, қизим.

**ЖАҲОН АДАБИЁТИ**

— Рақс тушганимни бир кўрганингизда борми! Барча рақсларга бемалол туша оламан. Байрамда қандай рақс тушганим ёдингиздами?

— Ёдимда қизим, ёдимда. Қизгинам Белинья, жавоб бермаётганимнинг сабаби, енгилтак йигитлар бошингни айлантирмасин деяпман-да. Сен кимсан Сенто-Антаонинг қизисан-а! Ахир бизнинг қиз ва аёлларимиз ўз хулк-атворлари билан барчага намуна бўлганлар. Мен сени ўйлаяпман, жон қизим. Ёшлик – бебошлиқ, дейдилар. Ҳар қадамингни ўйлаб босишинг керак.

— Ойижон, қадамимни ўйлаб босаман. Ақлим жойида. Ахир мен билан дугонам Розинья Ана ҳам боради, у жуда одобли қиз, уни ўзингиз яхши танийсиз-ку. Шу дугонам билан бирга боришимга рухсат бера қолинг. Унинг ёнидан жилмайман. Сўз бераман сизга. Жуда боргим келяпти-да.

Она-бала ёнма-ён ўтиради. Қиз онасининг кўлларини силаб-сийпар, эркаланар, онасининг бир оғиз “хўп” дейишига интизор, кўзларини унинг оғзидан олмас эди.

Кулбалари ёнида ўтирган эркаклар эринчоқлик билан сигарета чекиб, кечки салқин тушишини интизорлик билан кутишар эди. Куёш аста-секин ботиб борарди. Пастликка олиб тушувчи ёлғизоёқ йўлда бир қанча ёш-яланг сўзлашиб борарди. Афтидан улар ҳам рақс кечасига ошиқаётган бўлса, ажаб эмас. Бир гапириб, ўн кулар эдилар. Ҳа, ёшлик хўп ажойиб давр-да!

Узоқдан юракни энтиклирувчи қўшиқ эшитила бошлади. Қўшиқчи гитара оҳангига монанд куйларди, аста эшитилаётган қўшиқ қўнгилга хуш ёқар, хаёлни узок-узокларга олиб кетарди.

### *Сокин ва Миндел тунлари... –*

дея бошланувчи бу қўшиқни эшитган она беихтиёр ўз ёшлигини эслаб кетди. Ох, ўша ширин дамлар... Қувончли кунлар... Буғдойтепа ёнидаги Таррафал қўрғонидаги ва Паула соҳилларида кечган севги онларини соғинч билан эслай кетди. Рақсга тушган кечаларни эсламай бўлар экани... Ширин ўй-хаёллар унинг жисми-жонини чулғаб олди.

— Ойижон, рухсат бера қолинг! – ҳамон ялинарди Белинья.

Ўз ёшлигини эслаб, ширин хотираларга берилган она қизининг интиқ кўзларига тикилиб қаради-ю, она экан-да, кўнгли ийиб кетди.

— Йифини бас қил, қизим! Рақс тушгани борасан, рухсат бераман! Лекин эсингда бўлсин, Сонсент йигитлари рақсга таклиф этсалар, хўп деб ўтирма, тағин. Тушундингми? Дугонангнинг ёнидан бир қадам жилма.

Коронгулик ён-атрофга ўз чодирини ёймоқда эди, аста-секин салқин тушмоқда эди. Осмонда юлдузлар бирин-сирин кўзга ташланна бошлади. Ой атрофни нури билан ёритган бир пайтда Зе-де-Канда рақс кечаси бошланди.

Чоғроқ рақс зали чароғон қилиб ёритилган эди. Ёш-яланлар гавжум, ҳаво дим, атрофдан турли хил ҳидлар димоққа уриларди.

Мажаллий йигитлар ҳам аста-секин йифила бошладилар: улар орасида ишчилар, талабалар ҳам бор. Мусика янграй бошлади. Мигелим исмли йигит Белиньяни рақсга таклиф этди.

— Белинья, сенга бу ер ёқяптими? – сўради у қиздан.

— Ҳа, ёқяпти, – жавоб берди Белинья.

— Үқишларинг қандай? Қайси касбни ёқтирасан?

— Шифокор бўлишни орзу қиласман.

— Белинья, сенга гапирадиган гапларим кўп. Эшитяпсанми, Белинья?

Рақс кечаси қизигандан-қизимоқда эди. Кимнингдир бакириб гапирган овози эшитилар, кимдир бирорни чақирав, теварак-атрофдан алмойи-алжойи ҳазил-хузуллар қулоққа чалинарди. Ажойиб рақс кечаси бўлаётган эди.

### **ЖАҲОН АДАБИЁТИ**

Бу ерга йигилганларнинг барчаси ёшлар. Улар мириқиб рақс тушмоқда эдилар.

– Ҳой, йигитлар, қизларни хафа қилманлар! – деди кимдир йигитларни тартибга чақириб.

Енгил-елпи ҳаёт кечиришга ўрганган қизлар оёқларини бир-бирига чалиштириб, қўллари орасига сигарета қистириб олгандилар. Бу ҳол Белинъяга эриш туолди. Тавба, қандай жойга келиб қолди ўзи!

– Қани, шўҳроғидан чалинглар! – деган овозлар эшитиларди ён-атрофдан. Рақс тушаётганлар гавдалари тебранганча, жуфт-жуфт бўлиб рақс тушардилар.

Белинъя Мигелимдан ўзини олиб қочса-да, унинг ширин сўзлари қизни ром эта бошлаганди. Қандай қилиб ундан кутулса экан? Кучи етармикан. У билан рақс тушаётган бу йигитнинг кўллари жуда абжир, гавдасини айтмайсиз! Лекин қиз йигитнинг нимасини ёқтириб қолдийкин?

– Белинъя, хўп десанг, рақс кечасидан сўнг сени уйингта кузатиб қўяман. Бу ердаги валакисаланг йигитлардан ўзим сени ҳимоя қиласман. Белинъя, йўқ дема, – деди-да, Мигелим қизни ўзига тортди.

Киз чўчиб тушди. Уятдан қип-қизариб кетди.

Мигелим ширин сўзлар билан қизнинг кўнглини овлай бошлади. Бундай сўзларни илк бора эшигтан қиз ўзини йўқотиб қўйди. Ўзи билмаган ҳолда йигитни ёқтириб қолди. У билан рақс тушар экан, бу кеча ўзини ниҳоятда баҳтли ҳис этди.

– Белинъя, сенга ғаройиб гап айтмоқчиман. Фақат рақсдан кейин айтаман.

– Ҳозир айтсангиз-чи.

– Йўқ, бу сир. Юр, бу ердан ташқарига чиқамиз, хўш, нима дейсан?

Киз йигитнинг тузоғига илинмасликка ҳарчанд ҳаракат қиласин, лекин айтилаётган ширин сўзлар олдида ожиз қолаётган эди. Йигит тобора уни ўзига ром қилиб, мафтун этиб қўйганди.

Ниҳоят, рақс кечаси тугади.

Рақс тушиб, дилларини ёзган йигитлар кафтларини бир-бирига ишқаб завқ олардилар. Мусиқачилар ҳам рақс мусиқаларини боплаб чалишдида, ўзиям.

Рақс тушганлар ҳамон бир-бирларидан кўнгил узолмай, ёнма-ён турардилар. Мусиқа ва рақс уларни ипсиз боғлаб қўйдимикан?

– Белинъя, юр, яна рақс тушайлик, – илтижо билан деди Мигелим ва қизни қўлтиқлаб олди.

Белинъя қизариб кетди. Ҳамма уларга қараб турибди. Уят-да, ахир! Тавба, Мигелим нега ҳамманинг олдида уни уялтиради? Кўринишидан ақлли, ўзини тутиб олган йигитга ўхшайди. Унинг айтганига кўнсам, нима қипти?

Иккала ёш бир-бирига қараб қолди. Ён-атрофдагилар аста-секин тарқала бошлашди. Ташқари салқин бўлгани сабаб улар қўлтиқлашиб кета бошладилар.

– Юр, Белинъя, кетдик! – деди Мигелим.

Қаерга? Йўқ, у бу ердан ҳеч қаёққа бормайди. Фақат буфетгагина чиқиши мумкин. Тавба, Мигелим унга елимдек ёпишиб олгани-чи! Қанака йигит ўзи у?

– Сенга қалбимни очмоқчиман.

У аста қизнинг қўлидан олди.

– Юр, Белинъя, сенга ёмонлигим йўқ.

Йўқ, йўқ, бу йигит билан кетмайди. Шу ерда қолади. Бу йигитдан у кўрқади.

– Азизам, Белинъя, сенга бир гап айтмоқчиман, холос. Йўқ дема, юрақол.

Бу йигитга ишонса бўлармикин? Йўқ, нима гапи бўлса шу ерда айтиверсин, майли, буфетда айта қолсин.

- Белинья, сўзимни қайтарма.
- Йўқ, йўқ, сиз билан кетмайман.
- Белинья, йўқ демагин.

Белинья истар-истамас йигитга эргашди. Қиз аввалига йигитдан чўчиди. Каерга бошлаб кетаяпти, ўзи?

Тун коронғусида атрофдан турли хил овозлар қулоққа чалинарди: нақ Африка мамлакатида янгровчи замонавий мусиқа қалбни жунбушга келтиради. Атроф ой нурига чулғанганд. Мигелим:

– Белинья! – деди-ю, қизни қучоғига олди. Қиз унинг ширин сўзларига учди-ю... Унинг қичқириғи зим-зиё тун қаърида йўқ бўлиб кетди.

*Рус тилидан  
Дилором АЗИМОВА  
таржимаси*

## Энрике Тейшейра Де Соуза

**Жабрдийда Африканинг йўқсил одамлари ҳақида дардмандлик билан асарлар битадиган ёзувчилардан яна бирни Энрике Тейшейра Де Соуза бўлиб, у ҳам қитъанинг замонавий адабиёти тараққиётидаги ўзига хос ўринга эга. Мазкур адабга ҳам юртдининг гаройиб табиати ва мунгли одамлари илҳом беради.**

### ЗАЙТУН МОЙИ

**Р**омуальдо ўзининг бўйдоқлик тўшагида уйғонганида биринчи хўроz қичқириғи янграганди: унинг олдида ҳали шаҳарга етиб олиш учун ҳачир устида уч соат силкиниш, ўттиз километрдан ортиқ масофани босиб ўтишдек машаққатли йўл туарарди. У ҳали бирон марта ҳам Кова-Фигейдан Сан-Фелиппгача масофа вактини қисқартиришга мұяссар бўла олмаганди: бу масофани баъзи отликлар уч соат деганда қандай босиб ўтишаркин, бунга Ромуальдонинг хеч ақли етмасди.

У ҳачирни эгарлаётган пайтда оқсочи Луиза фонус ёруғида эчки соғарди: Ромуальдонинг ошқозони оғирорди ва у эрталаблари, албатта, янги соғилган сут ичиши ва обдон қовурилган кускус<sup>1</sup> ейиши керак эди. Хўжайинининг овқатланиш тартибини Луиза яхши биларди ва у роҳибликтининг жабрзулмидан озод бўлиб, шундай кекса ўқитувчининг оғирини енгил килаётганидан мамнун эди. Тўғри, ўқитувчи тинмай қих-қих қилиб йўталар, нолишдан чарчамасди.

Тизгин буткул тўзиб, эгар ёстиғидаги жун газлама ситилиб, лахтаклахтак бўлиб кетганди, узангининг бир неча жойига ямоқ ҳам тушганди, бироқ абзал ҳали дуруст эди, қайиш ҳам. Нима ҳам қила олардик – одамлар қаригандек, буюмлар ҳам эскиради.

Янги соғилган бир стакан сутни симириб, ёғли кускусни жигилдонга уриб, Ромуальдо йўлга тушди. Унинг ҳачири қариган сайин ювош бўлиб бораарди: шундай бўлса-да, унча-мунча йўлни кўрдим демасди, ҳалиям тетиқ, чаққон эди, Ромуальдо ўла-ўлгунча уни хих-хихлаб юришга тайёр эди.

Хўроллар тонг ёғудусини қутлаганча, овозларини баралла қўйиб қичқиради. Йўл чараклаган юлдузларнинг ёруғида аник-равшан қўринарди. Ҳе-йўқ, бугун яна ёмғир бўлиши даргумон: буни Сомон Йўлининг нур сочиб турганидан билса бўлади. Қария ховлидаги дараҳтлар ҳали барг чиқармаганини пайқади, ахир июнь ойи поёнига етай деб қолди, куртаклардан аллақачон барра япроқчалар ёзилиб чиқиши керак эди. Аммо бунинг учун ёмғир керак, қани ўша ёмғир!

<sup>1</sup> Кускус – асоси буғдой ёрмасидан тайёрланадиган таом тури (*тарж.*).

Шуниси ҳам борки, жаноб Ромуальдони курғоқчилик унча ташвишга солмасди – ёмғир ёғадими, йўқми, унинг ҳаёти бунга боғлиқ эмасди. Қария умр бўйи ўқитувчилик қилган ва вақти соати билан нафақага чиққанди. Нафақа пули ҳақиқатан ҳам кам эди: тирикчиликка аранг етади, боз устига яна мана бу овқатланиш тартибини айтмайсизми: шифокор унга лўвия ва чўчқа гўштини ва умуман чўчқа ёғидан тайёрланган ҳар қандай егуликни тақиқлаб қўйган... Яхшиямки, унга Луиза деган инсофли оқсоч учраб қолди, яхшиямки, ўша Луиза кускус деганинг ейишга рози бўлди: оқсочни боқиши учун энди ортиқча сарф-харажатнинг ҳам ҳожати йўқ. Парҳез арзонга тушидиган нарса эмас: шифокор Баррето, ўсимлик мойи, гуруч, патир ноннинг қотгани, сут ва ора-сира қовурилган жўжга еб туришни буюрди... Эзишга-ку, ўёзди, бироқ ҳамма гап шундаки, бу кўрсатмаларни бажариш жаноб Ромуальдонинг кўлидан келмасди: пул етмайди. Бунинг устига ҳамма нарсани ҳам бозордан топиб бўлмайди. Масалан, бузоқ гўштини қаердан оласан?!

Фарзанд доди уни адой тамом қилганди – у бирдан етимчага айланиб қолгандек эди, ота-онасидан айрилган кезлар ҳам у ўзини бунчалик ғарип хис этмаганди... Бу пайтда устоз шўрлик ўғлининг жасади ётган қабристон дарвозасининг нақ ёнгинасидан ўтиб бораради. Мануэл отасини қандай яхши кўрарди, ёшига қараганда қандай фаросатли, одамларга ишонувчан ва уларга фақат яхшиликни право кўрувчи бола эди у! У онасини билмасди: у туғилгандан сўнг бир ой ўтиб, онаси Дакарга жўнаб кетди ва ўша кетганча бошқа қорасини кўрсатгани йўқ.

Ромуальдо болага жуда бағир босиб қолганди, бир нафас ҳам фарзанди-сиз туролмасди – ёши улғайганда Яратган унга шунақа овунчоқ ато этганди. Унинг яна бошқа фарзандлари ҳам бор эди, бироқ бари ўсиб-улғайиб, дунёнинг ҳар чеккасига қанот боғлаб учиб кетишганди, Ромуальдо уларнинг фақат биттасидан мактуб оларди. Мануэл қариянинг якка-ёлғизлигини билинтирмасди, бироқ бу ҳам узоққа чўзилмади... У олти ёшида менингит касалига чалиниб дунёдан ўтди. Бола хушсиз ётган кезлар қандай мунгли оҳангда инграганлари, отасининг бўйнига осилиб: “Ана у! Ана, келяпти!” дея қандай қаттиқ қичқирганлари ҳали-ҳамон устознинг қулоғи тагида жаранглаб туради. Мануэл бу дунёни абадий тарқ этганида, унинг тинчиб қолган чехрасида азоб-уқубат ифодасидан ном-нишон қолмаганди, қариянинг юрагига эса аввал у сира бошдан кечирмаган соғиниш хисси пусиб кириб олганди.

Хозир эса у шаҳарга отланганди, чунки қиёматлик дўсти Жоан идишда ёғ сотилаётгани тўғрисида хабар берганди – унинг парҳези учун зарур бўлган жуда яхши зайдутун мойи. Мой ҳозирча божхонада бўлиб, пайшанба куни бир юз саксон эскудодан кимошди савдоси орқали сотиладиган бўлганди. Ундан арzon бўлмайди. Агар олибсотар баққоллар мойни олишга улгuriшмаса, ёғ бир неча ойга етади – омадни синаб кўриш керак.

Ҳачир йўлдаги ўнқир-чўнқирликларни одатдагидек айланиб ўтар, туёқларини тақиллатганча, илдам юриб бораради, чуқур ўйга ботган жаноб Ромуальдо эса бундай силкинишларни ҳатто сезмасди ҳам.

У Сан-Фелипда ва Кова-Физейрда деярлик қирқ йил дарс берди; унга олти юз эскудо нафақа тайинлашганди; хотини ва болалари бўлганда, шугина нафақа уларга урвок ҳам бўлмасди... У ҳатто ҳалқ маорифи соҳасида ўз вазифасини ҳалол адо этгани учун мукофот ҳам олди; шахсан губернаторнинг ўзи муниципалитет танобийисида уни бағрига босиб табриклиди. У бу тантанага ўғлини ҳам олиб борганди ва Лиссабондан ташриф буюрган нуфузли жаноб унинг қўқрагига қандайдир чиройли нарсани қадаб қўяётганда, боланинг юраги ғууррга тўлганди! Жаноб яна шундай деганди: “Бу мукофот болаларга яхши таълим берганинг учун...” Шўрлик, азиз ва жажжи Мануэл!

Бир неча кундан сўнг авлиё Иоанн куни байрами, бироқ кунгурадор тоғ тизмалари тепасида бир парча бўлса-да, булутдан асар йўқ ва яқинлашиб

келаётган тонг ёруғида бу тизмалар янада яққолроқ кўрина бошлаганди. Ҳадемай қизиган темирдек қип-қизил ва қайноқ куёш чўққилар орасидан қалқиб чиқади. “Яхшиям соябонни олиб олганим, -- хаёлдан ўтказди қария, – осмон тип-тиниқ, роса куйдириши тайин”. Жаноб Ромуальдо йўлга мұкаммал шайлланганди: тутинган ўғли Америкадан олиб келган шўх рангдаги каноп сурупдан костюм, бошига панама илганди.

Денгизга олиб тушадиган теп-текис йўлни кимдир белкуракдами, ё кетмондами жўрттага қазиб ташлагандек эди. Қовжираб-қақраб кетган ернинг ёмғир кўрмаганига ҳам анча бўлганди, фақат унда-бунда яшил доғдек ўталафлар кўзга ташланарди. Саёзлашиб қолган сойлар оғзини катта очган маҳлук жағларига ўхшарди, гўё. Эҳ, қани эди бир шаррос ёмғир қўйиб берса! Теваарах-атроф бир зумда бошқача тусга кирган бўларди! Қақраб кетган ерни буғдой қопларди, чукурликларнинг четларидан чечаклар униб чиқарди, ҳаммаёқ барра майса билан қопланарди, моллар ҳам мириқиб ўтлар эди... Ҳозир-чи, атрофга қарагинг келмайди... ҳаммаёқ куйиб ётиби!

Кария эски ошнаси Руфинонинг дўконида бир оз ушланиб қолди.

- Бугун дўконни эрта очибсанми!
- Жаноб Ромуальдо, каллай сахарлаб йўл бўлсин?
- Шаҳарга тушмоқчийдим, ишим бор.
- Аҳволингиз яхшими ўзи, жаноб Ромуальдо?
- Ҳа, тупроқдан ташқари дегандай...
- Судда гувоҳ бўлиб кетмаяпсизми?
- Йўғ-э, Ҳудо сақласин.
- Олис йўл, сиз эса энди ёш эмассиз, соғлиқ ҳам...
- Нима ҳам қиласдик, илож қанча... Рафиқангиз, болалар яхшими ўзи?
- Худога шукур, ёмон эмас. Нининъянинг кеча кўзи ёриди, биз яна биттага қўпайишдик.
- Ҳ, умри билан берган бўлсин! Энди фарзандлар қанча бўлди?
- Тўққиз жон. Кеча дунёга келганини ҳам қўшиб айтадиган бўлсак, беш нафар қизу, тўртта ўғил бола. Балки ичкари кириб, бир пиёла қаҳва ичиб бир оз нафасни ростлаб оларсиз?

– Мехрибонлигинги учун ташаккур. Кун қизиб кетмасдан шаҳарга тезроқ етиб ола қолай. Бўлмаса жазирамага қолиб кетаман.

– Зоримиз бору зўrimиз йўқ, унда қайтишингизда меҳмонимиз бўлинг. Шаҳарда унча узок қолмассиз, а?

- Йўғ-э. Эртагаёқ қайтаман.
- Демак, тез битадиган юмуш экан-да?..
- Арзимаган иш. Майдонга бир кўз ташласам бўлгани.
- Майдонга?
- Ҳа. Божхонада баъзи бир моллар сотилар экан.
- Ростданми?
- Бўпти, Руфино, вақт йўқ. Хотинингга салом айт, кўришгунча.
- Яхши боринг, жаноб Ромуальдо, ишингиз ўнгидан келсин!

Хачир яна қадамини тезлатди ва шу кетишида Кова-Фигейргача тўхтамади, хўжайини соябонини очди: осмондан оловли найзалар ёғила бошлади. Бир неча дақиқа ичиди ҳамма ер тоғ тизмалари устидан отилиб тушаётган ёғдуга кўмилди.

Жаноб Ромуальдо ўзини улкан соябон гумбази панасига олди. Шаҳарга етиб олиш учун яна ярим соатлик йўл қолганди.

Чиндан ҳам йигрма беш дақиқадан сўнг бош черковнинг баланд кўнғироқхонаси кўзга чалинди. Денгиз худди ёғ тўкилган ердек ялтиради. Гарчи бу пайтларда унинг чўққиларини оппоқ қор қоплаб ётган бўлсада, айни пайтда парча булут ҳам кўринмасди. Бу яхшилик аломати эмас. Остонада авлиё Иоанн куни турган бўлса-ю бир томчи ёмғир бўлмаса-я.

У тушишда давом этарди. Фелип Сантос Силви майдонида болалар коптоқ кетидан кувиб юришарди, уларнинг баъзилари ўкувчилар халтасини

## ЖАҲОН АДАБИЁТИ

елкаларига осиб олишганди. “Үқиш ўрнига, эси пастлар копток кетидан қувиб юришади. Ох, бу футбол деганлари ёшлик даврининг заволи бўлди фақат”.

Жаноб Ромуальдо майдонни аранг кесиб ўтди: хуркиб кетган хачир дам-бадам жойида серрайиб қотиб қоларди. Тажриба йўқ. Одоб нима билмайдиган бу тирранчаларнинг ота-оналарида уят деган нарса қолмабди: фарзандларига тузукроқ тарбия беришни ҳам билишмайди...

Ромуальдога кўзлари тушиши билан болалар бакира кетишиди:

– Ундан ясалган чувалчанг! Ундан ясалган чувалчанг!

Бу гапнинг эгаси, албатта, у эди: оқ кавуш, оқ қалпоқ, оқарган мўйловлар. Уни масхара қилишаётгани аниқ, бошқа яна кимни ҳам бўларди... Тери ҳам худди ўчакишгандек рангсиз эди...

– Ху-у-у, ундан ясалган чувалчанг!

Хачир туёклари билан шаҳар тош кўчаларини тақирлатиб кириб борганида, минора соати саккизга занг урганди. У уйдан сахар соат тўртда йўлга чиққанди... Ҳаммаси тўғри – йўлга нақ тўрт соат вақт кетиби.

Чўқинтирган ота Жоан ва унинг аёли Маргид устозни самимий қувонч билан кутиб олишди. Хачирнинг эгарини ечиб, шийпонга элтиб қўйишиди, Ромуальдога бувлама курсига ўтиришни таклиф этишиди. Унинг оёқлари увушиб, ўқтин-ўқтин оғриётганди.

– Жаноб Ромуальдо, узангингиз ҳаддан ташқари калта экан. Уни туширмаса бўлмайди.

– Мен шундай юришга ўрганганман.

– Йўқ, йўқ, сиз уни бир узайтириб кўринг-а, қандай қулай бўлишини ана ўшанда кўрасиз. Йўл қанча олис бўлса, узанги ҳам шунча узун бўлмоғи керак, буни мен отамдан ўрганганман.

Жаноб Ромуальдо бу одамларни ҳамиша кўнглига яқин оларди: Маргид онадек барчага меҳрибон эди, бу эҳтимол унга оналик баҳти насиб этмаганидандир. Бундан толе эгаси бўлган аёл ич-етини еб яшарди ва шу боис унинг уйидан эрталабдан то қош қорайгунга довур ёш болаларнинг шовқин-сурони аrimасди. Кўпчилик эр-хотинлар ўз жуфтларини шу хонадонда топишганди, энди уларнинг фарзандлари Жоан ва Маргидни ўз бувиларию ўз буваларидек кўришарди ва уларни шундай деб чақиришарди ҳам.

Жаноб Ромуальдо ўзининг касалию парҳези тўғрисида, омади чопиб Луизадек меҳрибон хизматкор учрагани ҳақида, ёлғизлиги ўн йил бурун бу дунёни тарк этган ўғли Мануэл ҳақида ва яна ёмғирдан ҳали ҳануз дарак йўқлиги, ҳозирги замонда болаларга тузукроқ тарбия берилмаётгани ва пировардида ўзининг бу ерларга азза-базза овора бўлиб бир идиш ёғ учун келгани тўғрисида сўзлай кетди.

– Литри қанчадан экан?

– Тўрт галлондан, шунда, ўн литри – ўн саккиздан бўлади.

– Бошланғич баҳоси-чи?

– Бир юз ўн саккиз эскудодан. Бу жуда арzon. Зайтун мойининг литри одатда ўн тўққиз эскудодан сотилади. Икки юздан сотса ҳам бўлади. Бир катта идишдагиси каминага бир йилга, балки ундан ҳам кўпроққа этиб қолади. Биз ахир Луиза иккимиз холосмиз-ку.

Гарчи қария оворагарчиликнинг кераги йўқ, қаерда бўлса ҳам ётиб кетавераман дея эътиroz билдиrsa-да, чўқинтирган ота Жоан жаноб Ромуальдони ҳамиша мана шундай – кўярда-кўймай уйида олиб қоларди. Қария қанча таранг қилса, Маргид ҳам шунча қаттиқ туриб оларди ва олис йўлдан тинкаси қуриб келган Ромуальдо охири ноилож таслим бўларди. Яхши маънодаги бундай мулозаматлару эътиrozлар ўн йилдан бери шу тахлит тақрорланарди.

Уни элтиб қўйишиган хонада, Америка маҳсулоти бўлган юмшоқ тўшакли, эгилувчан, худди яп-янгидек ялт-юлт этиб турган беҳисоб соққачалару харидан иборат баланд ва кенг, темирдан ясалган ва сарғиш

рангга бўялган каравот турарди. Каравот кенг хонанинг ўртасига, металлдан ясалган улкан хочнинг тагига жойлаширилган бўлиб, унинг бош тарафи шимол деворига қараганди. Бу каравот маърифатли ва билимдон, ва у ҳам Марказий мактабда дарс берган, тёварак-атрофдагиларга маълуму машхур Маргиднинг отаси руҳоний Кассианога тегишли эди.

Деворда яна жаноб Ромуальдонинг ғашига тегадиган ўймакорлик ва олеография усулида ишланган расмлар, календарлар осилиб турарди: улардан бирида кўз-кўз қилиш учун уст-бошсиз қиз бола тасвирланган бўлиб, бу календар нақ Маргиднинг портрети тагига илинганди. Чўқинтирган ота Жоан хотинидан сал бўлса ҳам хурматини дариф тутмаса бўлармиди. Ожиз одам!

Жавон устида ҳам ромга солинган фотосуратлар турарди ва расмлар орасида Жоан ва Маргиднинг чўқинтирган ўғли жажжи Мануэлнинг ҳам сурати жой олганди. Бу унинг ўлимидан сал аввал олинган сўнгги расми эди. Шунақангичаройли ва шунақангича ақлли бола... Яратган унга нега шундай қисқа умрни раво кўрди экан, балки жаноб Ромуальдонинг ёши улғайганда унга эрмак топилишини истамаганидандир!?

Эртасига барвакт Ромуальдо Жоан билан бирга божхонага йўл олишди: олди-сотди саккизга белгиланганди. Минора соати қачон занг уаркин дея икковининг ҳам қулоғи динг эди. Улар ўринидекка ўтириб, об-ҳаво тўғрисида, ёмғирдан дарак йўқлиги тўғрисида сухбатлашишди ва бўладиган ҳосилни ўзларича чамалаб ҳам кўришди. Агар ёмғир ёғмаса, ҳамма ер куйиб тамом бўлади. Кейин хукумат очин-тўқинларга ёрдамлашиш учун бирон-бир чора-тадбир кўллашга мажбур бўлади. Ёмғирдан эса ҳамон дарак йўқ: дараҳтларда барг тугул ҳатто куртак ҳам кўринмасди, май ойи одатга кўра шаррос ёмғирни башорат қиласа-да, ғивир этган шамол ҳам эсмайтганди...

Шу пайт, худди театр пардаси очилгандек, божхона эшиги очилди. Оталар тушунгандек, бир-бирларига қараб қўйишди, сўнг ўринларидан туриб, сафнинг олдига ўтишди.

Одамлар йиғилаётганди ва чўқинтирган ота Жоан Ромуальдо эшитиб қолмасин дея эҳтиёт бўлиб қўшнилар билан гапга тушиб кетди: мана, истеъфодаги ўқитувчи эмиш, нафақаси ҳам оз экан, шифокор парҳез қилишини буорибди, чўчка ёғидан тайёрланган ҳар қандай таомни тақиқлаб, фактат зайдун ёғидан истеъмол қилишини айтибди, шу боис у зайдун ёғи солинган идишдан бирини олмоқчи, агар сиз унга йўл бериб, химмат кўрсатсангиз, олийжаноб иш қилган бўлурдингиз.

Одамлар, денгиз кўпигидек оқ, бошига соябонли қалпоқ, эгнига барча тутгалари текис қадалган қалта каноп камзул кийиб олган озгин, ҳамманинг кўзи мўйловли қарияда – бу кўзлар озмунча ёш тўқмади. Кўриниши иззату хурматга лойиқ одам эди. Биронта ҳам рақиб уни синдиришга жазм этолмасди.

Машинкада босилган бир уюм қоғоз кўтариб, очиқ савдо вакили кириб келди-да, кути устига чиқди ва шу билан очиқ савдо бошланди.

Сотувга чиқкан моллар рўйхати бинойидек катта эди, навбат ёғ тўлдирилган идишга келди.

– Бир юз саксон, ким кўпроқ беради?

– Бир юз саксон бир! – қўлини кўтарди жаноб Ромуальдо.

– Бир юз саксон бир, ким кўпроқ? Бир юз саксон бир – бир! Бир юз саксон бир – икки!..

Ҳеч ким баҳони кўтармади. “Уч!” – қичқирди очиқ савдо вакили ва идишдаги ёғ одоб билан жилмайиб турган жаноб Ромуальдога насиб этди. Чўқинтирган ота Жоан уни тўлиб-тошиб табриклиди.

Энди идишдаги зайдун мойини Кова-Фигейрга етказиш қолганди ва унинг жонига яна қиёматли дўсти Жоан оро киргазди: эски қадрдонига эшагини берди. Барни ишлар жойида кетаётганди. Тушдан сўнг жаноб

## ЖАҲОН АДАБИЁТИ

Ромуальдо ўз ҳачирида йўлга тушади, ортидан эса елкасига ёғ тўла идиш юкланган эшак майдо қадамлар билан йўртиб боради. Энди у бир йилгача ёғ ғамини емай яшайверса ҳам бўлади.

Тушлик қилиб бўлган қария Маргиднинг меҳмоннавозлиги учун миннатдорчилик билдириди-да, у билан хайрлашди ва эгарга ўтириб божхона тарафга қараб йўлга тушди. Дўсти Жоан унга ёрдамлашиш учун бир йигитни ёллаганди.

Соат икки бўлса-да, ҳали божхона ёпиқ эди, бироқ эшикка қўлинг тегиши билан эшик ҳам очилди.

Ийигитча амалдорнинг кўмаги билан юқ ортиладиган эгарни тайёрлашга киришди: идишдаги ёғни олис манзилга етказишнинг ўзи бўмасди. Улар бор куч билан қоринбоғни тортишди, сўнг ёғ тўла идишни эҳтиётлик билан юқ ортиладиган эгарга кўндаланг қилиб жойлаб, бирининг устига иккинчисини кесиштириб арқон билан боғлашди ва тутун таранг қилиб тортилди, аргамчи эшакнинг терисига маҳкамланди. Юкни маҳкам тортиб боғланганига ишонч ҳосил қилганларидан сўнг эшакни ўз ҳолига қўйишиди.

Яна қанча вақтга ажралишаётганларини билмай, бир-бирлари билан ўпишишди: турган гап қария шаҳарга тез-тез келомайди, унинг ёшида бундай сафарлар билан ҳазиллашиб бўлмайди. Қарияни кўргани Кова-Фигейрга яхшиси қиёматли дўсти борсин: у ҳали ёш, бақувват, ўзи билан Маргидни ҳам бирга олиб келсин, у ернинг ҳавоси аёлдаги мигрен касалига шифо бўлса, ажаб эмас.

Кўча майдондан қиялик бўйлаб тикка борарди. Денгиз манзараси қай тарзда намоён бўларкин: оқшом у ерга шаҳарликлар тўпланишади. Ромуальдо қачонлардир, шаҳарда яшаётган пайтлари ҳар оқшом у ерга бориб турарди ва ҳайкал супачасига ўтириб олиб, шаҳарнинг бообруй кишилари билан узоқ сухбат куради. У пайтлар ҳали ёш, соғлиғи зўр, пул ҳам чўнтағида етарлича бўларди. Маоши унча катта эмасди, шунга яраша ҳамма нарса арzon эди. Марказий мактабда ойига йигирма беш милрейсдан маоши тўлашарди ва десерт учун метрополиядан ўзига узум сотиб олишга ҳам қурби етарди. Энди бўлса, базур қўйл учида кун кўярпти ва идишдаги арзимаган ёғни учун жазирама офтобда, ўнқир-чўнқир, паст-баланд йўлларда қадамини зўрга босиб, овораю сарсон тентираб юришга мажбур бўляпти...

Майдондан кетаётib, ҳали молия муассасаси муюлишига бурилиб улгурмаёқ ёғ тўла идиш қулаб тушди. Куладиу думалаб кетди. Орқасидан келаётган Жоан ўзгаргудек овозда дод-фарёд кўтарганча воеа жойига отилди. Қария эгарда тошдай котиб қолганди. Божхона хизматчиси ҳам кичқира кетди. Ёғ тўла идиш тош йўлдан гумбуrlаганча юмалаб борди ва панжарага келиб урилди. Идишнинг чамбараклари учиб, ҳалқалари сочилиб кетди, ёғ эса тизиллаб оқа бошлади. Эти сугига ёпишган ит ялтираб ётган силлиқ тош йўлни осилиб тушган лунжалари билан ялай бошлади.

– Қадрдоним Ромуальдо, бу қандай гап бўлди?! – қайгуриб хитоб қилди Жоан.

Ромуальдонинг ҳатто қимиirlашга ҳам мажоли қолмаганди. У ёғни тинмай ялаётган итдан кўзини узмасди: тош йўлни ҳалқоб босганди.

– Бу қандай оғат бўлди яна, бу қандай мусибат! Шундай олис йўл босиб келиб, бир юз саксон эскудо пул сарф қилинсаю уйга куп-куруқ қўл билан қайтилса...

– Кўйсанг-чи, Жоан. Мануэлдек боламдан айрилишга етган бардошим, шу оддий ёғга келганда етмасмиди...

У улкан шамсиясини очди: пружина қарсилади. Ромуальдо қоқ суюк гавдасини жазирамадан ва шаҳарликларнинг ачиниш тўла нигоҳларидан яшириди.

Рус тилидан  
Дилдорхон АЛИЕВА  
маржимаси



## АФРИКА ОВОЗИ – НЕЛЬСОН МАНДЕЛА

Ўтган асрнинг иккинчи ярми бошида бутун Африка қитъасини (халқибораси билан айтганда, “Кора Африка”) ирқчиликка қарши кураш алангаси чулғаб олгани кўпчиликнинг ёдида бўлса керак. Ирқчилик тузумининг маркази Жанубий Африка Республикаси (ЖАР) бўлиб, оқтанли президент Ян Смит бошчилигидаги ирқи жаллодлар узоқ вақтгача бу улкан қитъани аросатда сақлаб турди. Ҳиндистоннинг буюқ раҳнамоси Махатма Ганди ҳам ватанидаги миллий озодлик курашини айнан шу китъанинг Иоҳаннесбург, Претория, Дурбан сингари шаҳарларида бошлаган эди. 1907 йилнинг 1 январида бу икки буюқ шахс Янги Дехлида бўлиб ўтган халқаро анжуманда танишган, Гандининг Жанубий Африкада зўравонлик сиёсати ишлатилмаслиги ҳақидаги ғоясини қўллаб-қўлтиқловчи халқаро анжуман уюштирилган эди. Кисқа қилиб айтганда, Шимолий ва Жанубий Африканинг бепоён ва гўзал сарзамини Африка халқларини эмас, ўзидан ўзга халқларни кул деб тушунувчи бир гала халқаро мустамлакачиларни бойитиб ва тўйдириб келар эди. 1918 йил 18 июлда Мфезо деган жойда Нельсон Мандела оламга келганида бутун қитъа бамисоли алнга ичидаги яшарди. Отаси Нельсон Мфезо қишлоғининг оқсоқоли эди, аммо ирқчи ҳукumat билан чиқиша

олмай, амалдан туширилади ва оиласи билан Цунага кўчиб кетади, бироқ маҳаллий ҳокимиятнинг Махфий кенгашида ўз ўрнини сақлаб қолади. Айнан ана шу кичиккина сиёсий имтиёз миллий озодлик ҳаракатининг келажакдаги оламга машҳурраҳнамоси бўлиб етишувига сабаб бўлди. Асли исми Ролилала бўлган бу йигитча ўз мамлакатидаги қора танлиларга рухсат этилган Фортхелл дорилғунунида таҳсил олади, Англияда ўқиди ва малакали ҳукуқшунос бўлиб етишади. Унинг ижтимоий ҳаётдаги бутун фаолияти сиёсий қурашларга бой бўлди. У умрининг 27 йилини ирқчи тузумининг қамоқхоналарида ўтказди.

1990-йилларнинг боши. Мандела ниҳоят озод. Унинг учун қурашчи йўлидан заррача енгил бўлмаган тинчлик ўрнатувчи йўли бошланади. Ирқчилик тузуми бекор қилингандан қейин, ЖАРдаги аҳвол кескинлашди. Ўттиз миллиондан ортиқ қора танли беш миллионлик оқ танли устига ташланишга тайёр турарди.

Мамлакатда истиқомат қилувчи турли қабилалар ўртасидаги ўзаро муносабатлар ҳам яхши эмасди. Комил ишонч билан айтиш мумкинки, агар Мандела бўлмаганида, ЖАР қонга ботган бўларди.

Таажжубланаарлиси, бир умр оқ танлиларга қарши қурашиб келган ва оқ танлилар ҳоҳиши билан узоқ йиллар қамоқда ўтириб чиққан одам озод бўлгач, ўша заҳоти миллий ва ирқий адоват ўйинини ўйнашга бўлган ҳар қандай ҳаракатнинг олдини ола бошлади. У ҳар қандай одам билан гаплаша ва келиша олар эди, Мандела энг муросасиз рақибни ҳам дўстга айлантирадиган сўзларни топар эди.

1994 йил 2 майда Нельсон Мандела ирод қилган нутқ ЖАРда биринчи эркин сайлов бўлиб ўтганданоқ унинг учун ўзгача аҳамиятга молик бўлиб қолди, бу ғолибнинг нутқи эди, бироқ мағлубларнинг қонига ташна ғолибнинг эмас, балки мамлакатда тинчлик ва хотиржамликка, тери рангидан қатъи назар ҳаммани бирлаштиришга, демократия ва фарғонликка интилувчининг нутқи эди – бу Африка овози эди.

Нельсон Манделанинг истеъоди серкирра бўлиб – у шоир ҳам, табиб ҳам, сиёсатчи ҳам, олим ҳам эди. Энг

**ЖАҲОН АДАБИЁТИ**

асосийси, у юксак инсонпарварлик хусусиятига эга чинакам инсон эди. Даставвал ҳокимият тепасига келганды (1994 йил 10 май) у ирқчиликнинг илдизига болта урадиган бир ишни қиласи – оқ ва қора танлиларни тенг ҳукуқли деб тан олиш сиёсатини амалга оширади. Сиёсий курашли сифатида ўзига қарши томондан кўплаб ғанимлар “орттирган”ига қарамай, кейинчалик қора танли бўлмаганлар ҳам Нельсон Манделани ўз одамидек кўра бошладилар, бу эса унинг ҳалқаро майдондаги обрўйини ҳаддан ташқари ошириб юборди. ЖАРнинг саккизинчи (ва биринчи қора танли) Президенти ўзининг беш йил давом этган давлат раҳбарлиги мобайнида юз йилда қилинмай келган ишларни бажарди, тиббий муолажалар, таълим олиш каби муҳим соҳалар бепул деб ёълон қилинди, шунингдек, савдо-сотик, транспорт, коммунал хизматларда ҳам йилдан-йилга арzonлаштириб бориш режалари тушиб чиқилди ва амалга оширилди. Бундан ташқари 1994 йилда Ер тўғрисидаги, 1998 йилда Болаларга моддий ёрдам тўғрисидаги, ҳамда Ишчилар мамлакасини ошириш тўғрисидаги, 1995 йилда Мехнатга муносабатлар тўғрисидаги, 1997 йилда Мехнат тақсимоти тўғрисидаги, 1998 йил-

да Мехнатда ирқчилик аломатига барҳам бериш тўғрисидаги қабул қилинган қатор Қонунлар мамлакат иқтисодиётининг жадал ривожланишига сабаб бўлади.

Нельсон Мандела ҳалқаро майдондаги сиёсий воқеаларга ҳам бефарқ бўлмаган – зўравонликдан азият чекканлар фарёди қулоққа чалинган эл ё элат борки, бу жафокаш инсон беғараз ёрдам қўлини чўзар эди.

Нельсон Манделанинг ўз мамлакати ва ҳалқаро майдонда кўрсатган жасоратлари тақдирланмай қолмади, у жами ийигирма тўққизта олий даражадаги маҳаллий ва ҳалқаро мукофотларга сазовор бўлди. Бу мукофотлар чўққисини 1993 йилда берилган Нобель мукофоти безаб турибди.

Нельсон Мандела 2013 йил 5 декабрда 96 ёшида Иоханнесбург яқинидаги Хоутон Эстейт шаҳарчасида оила кучогида оламдан кўзюмади.

Узбекистон Республикаси Президенти Ислом Каримов Жанубий Африка республикаси Президенти Жейноб Зумага таникли сиёсат арбоби, мамлакатнинг собиқ Президенти, тинчлик соҳасидаги Нобель мукофоти лауреати Нельсон Манделанинг вафот этгани муносабати билан ҳамдардлик билдири.

## Нельсон МАНДЕЛА МЕН ЎЛИМДАН ҚЎРҚМАЙМАН!

(Суддаги нутқ)  
1964 йил 20 апрель

Мен айланувчилини гиричинчисиман.

Мен санъат бакалаври дипломига эгаман; бир неча йил мобайнида Оливер Тамбо билан бирга Иоханнесбургда оқловчилик билан шуғулландим. Мен судланганман ва рухсатсиз мамлакатдан чиқиб кетганим ва 1961 йил май охирида иш ташлашлар ташкил этганим учун беш йиллик қамоқ жазосини ўтамоқдаман.

Энг аввало шуни айтмоқчиманки, суд очилиши вақтида Жанубий Африкадаги ҳалқ кураши чет элликлар ёки коммунистлар таъсири остида

олиб борилмоқда деган айблов билан айтилган гаплар ҳақиқатга мутлақо мос келмайди.

Инсон ва ўйлбошли сифатида ни маики қилган бўлсам, фақат шахсий тажрибам ва ўзимнинг африкалик наасабимга таяниб қилдим, бу наасабим билан фархланаман; бошқа ҳеч ким ҳеч қандай тарзда менга таъсир кўрсатмаган.

Ешлигимда Транскейда менинг қабилам чоллари ўтмиш ҳақида хикоя қилганларини эшитган эдим. Бу хикоялар орасида ватанини ҳимоя қилиб аждодларимиз олиб борган урушлар ҳақидаги гаплар бўлар эди...

**ЖАҲОН АДАБИЁТИ**

Ўшанда мен халқимга хизмат қиласман ва унинг озодлик учун курашига қўлимдан келганча ҳиссамни қўшаман, деб аҳд қилган эдим. Мана шу нарса менинг барча аъмолларими ни белгилаб берди, бу – судда менга қарши қўйилган айбловлар учун баҳона бўлди...

...Мен ҳар доим ўзимни биринчи навбатда африкалик ватанпарвар деб билар эдим. Зоро 46 йил олдин мен Уматада туғилган эдим. Мени амаким – Тембуленднинг олий сардори қаноти остига олган эди. Ҳозирги олий сардор Сабати Далинебо сингари Транскейнинг бош диний пешвоси Кайзер Матанзима ҳам менинг қариндош-уругларим ҳисобланишади.

Ҳозир мен синфсиз жамият тарафдори ҳисобланаман; бу иштиёқ қисман даҳо сиёsatдонлар китобларини кўп мутолаа қилганим ва қисман илк африка жамиятининг тузилмаси ва ташкиллаштирилишидан ҳайратга тушганим боис юзага келган эди.

Ишлаб чиқаришнинг асосий воситаси бўлган ер ўша вактда қабилага қаради. Бойлар ва камбағаллар йўқ эди, эксплуатация йўқ эди.

Олдин айтиб ўтганимдек, даҳо сиёsatдонларнинг китоблари менга таъсири ўтказгани бор гап. Аммо бу кўплаб янги мустақил давлатлар раҳбарлари учун ҳам ҳаққонийдир. Махатма Ганди, Жавоҳарлаъ Неру, Кваме Нкрума ва Жамол Абдул Но-сир сингари кўплаб шахслар буни тан олганлар.

Халқимиз жаҳоннинг мутараққий мамлакатларига етиб олиши ва бизга мерос бўлиб қолган ақл бовар қилмас қашшоқликни бартараф этиш учун иштирокионнинг қандайдир шакли зарурлигини барчамиз тан оламиз. Аммо бу биз марксчилармиз дегани эмас.

Нафси замрини айтганда, менга келсақ, сиёсий курашмизнинг ҳозирги босқичида коммунистик партия алоҳида роль ўйнаши кераклиги ҳақидаги масалани баҳсли деб ҳисоблайман.

Ҳозир ирқий камситилишни бартараф этиш ва Озодлик хартияси асосидаги демократик хукуқлар учун кураш асосий вазифа ҳисобланади. Коммунистик партия бунга эриша-

ётгани даражасидаги унинг ёрдамини олқишлийман. Мен буни улар ёрдамида барча ирқдаги халқлар курашимизга бош қўшишлари во-ситаларидан бири деб ҳисоблайман.

Илғор ғояли адабиётни ўқишдан ва шундай ғоядаги шахслар билан қилинган сухбатлардан менда шундай таассурот пайдо бўлдики, коммунистлар Ғарбнинг парламент тизимини нодемократик ва тескаричилик деб ҳисоблайдилар. Мен эса, аксинча, шундай тизим тарафдориман.

...Америка Конгресси, ҳокимиятни тақсимлаш доктринаси, АҚШ одил суди тизимининг мустақиллиги каби менда ўшандай туйғу уйғотади.

Менинг қараашларим ҳам Ғарб, ҳам Шарқ таъсири остида шаклланган. Булар бари мени шундай фикрлашга олиб келдики, ўз сиёсий кредомни аниқлашда мен мутлақо беғараз ва холис бўлмоғим шарт эди.

Мен ўзимни иштирокиондан бошқа ҳеч қанақанги ижтимоий тизим билан боғлай олмайман. Мен ҳам Ғарбдаги, ҳам Шарқдаги энг яхши нарсаларни олишда эркин бўлмоғим қарзу фарз эди...

...Жанубий Африка – Африка мамлакатлари ичидаги энг бойи ва дунёдаги энг бой мамлакатлардан бири бўлиши мумкин эди. Аммо бу фавқулоддаликлар ва ҳайратомуз ранг-барангликлар мамлакати. Оқ танлилар, эҳтимол, дунёдаги энг олий ҳаёт даражаси билан таъминланган, айни дамда африкаликлар камбағаллик ва қашшоқликда яшамоқда...

Бундай танқидга жавоб берароқ хукумат аксарият Жанубий Африка даги африкаликлар қитъанинг бошқа мамлакатларидаги одамлардан кўра яхшироқ яшайди деб нах уради. Бу фикр ҳаққини қанчалик мос келишини билмайман ва бу мамлакатларда ҳаёт қиймати ҳисоб-китобларини олмай туриб, бундай қиёслаш мумкинлигига ишонгим келмайди.

Хўп, шундай ҳам дейлик, аммо бу африка халқига нисбатан барбири ноўрин бўлиб чиқади. Биз бошқа мамлакатлар халқларига нисбатан қашшоқроқ эканимиздан эмас, балки биз ўз мамлакатимизда оқ танлиларга нисбатан қашшоқроқ эканимиздан ва қонун бу номувофиликни ўзгартиришга

**ЖАҲОН АДАБИЁТИ**

тўсқинлик қилаётганидан нолияпмиз.

Африкаликларнинг инсоний қадр-қимматини назар-писанд қилмаслик – бу оқ танлилар ҳукмронлигининг бевосита натижаси. Оқ танлиларнинг афзаллиги қора танлилар тўлақонлигига тўсқинлик қилмоқда. Оқ танлиларнинг афзаллигини сақлашга қаратилган қонунлар буни мустаҳкам қоидага айлантирган. Жанубий Африкадаги коранданинг иши мутлақо африкаликларнинг қисмати хисобланади.

Бирор нарсани бир жойдан бошқа жойга олиб бориш ёки тозалаш керак бўлганда, оқ танли одам бу ишни унинг учун бажарадиган африкаликини қидиради, бу африкалик уникуда хизмат қиласидими ё йўқми, бунга қараб ўтирамайди. Натижада оқ танли африкаликини бошқа насл мавжудоти деб қарайдиган бўлади.

Улар африкаликларни ўз оиласига эга одамлар ўрнида кўрмайдилар; улар африкаликларда худди оқ танлилар каби севищлари мумкин бўлган туйғуси бор деб, худди оқ танлилар каби ўз хотини, бола-чақалари билан бирга бўлишни хоҳлайдилар деб; оиласини боқиши, рўзгор тебратиш, болаларини кийинтириб, мактабга жўннатишни истайдилар деб билмайдилар.

Аммо қарол, боғбон ёки қишлоқ хўжалиги ишчиси бундай нарсаларни лоақал орзу қила оладими? Конунчилигимиз хужжатларининг африкаликлар учун энг жирканч кўринишларидан бири – бу рухсатнома ҳақидаги қонунлардир, улар африкаликларни полиция назоратига ҳавола этади, полиция эса хоҳлаган вақтда ва хоҳлаган жойда жабрдийда ишини кўриб чиқиши мумкин.

Уйлайманки, бу борада полиция билан кўнгилсизлик юзага келмаган лоақал битагина эркак африкалик топилмаса керак. Рухсатнома ҳақидаги қонун туфайли ҳар йили юзлаб ва минглаб африкалик қамоқقا тиқилади. Аммо бундан-да беш баттари шундаки, рухсатнома ҳақидаги қонунлар эрлар билан хотинларни бир-биридан айиради, бу ҳамма жойда оиласарнинг тўзиб кетишига олиб келмоқда.

Қашшоқлик ва тўзиб кетган оиласалар беоқибат қолмайди, албатта. Болалар қашшоқлар маскани – гет-

толарда саланглайдилар, чунки улар учун на мактаб, мактабга бориши учун на пул бор, бола мактабга бориши учун кўз-кулоқ бўладиган одам ҳам йўқ, чунки оила очлиқдан ўлмаслиги учун ота ҳам, она ҳам (агар улар “кўш хўкис” бўлишса) ишлашга мажбур.

Бу ахлоқ даражасининг тушшиб кетишига, жинояччиликнинг даҳшатли ўсишига ва нафақат сиёсат соҳасида, балки бошқа соҳаларда ҳам зўравонлик авж олишига олиб келади. Геттода яшаш турган-битгани жаҳаннам. Бирор кун йўқки, қотиллик ёки бирон одамга тажовуз қилиш содир бўлмасин. Зўравонлик ишлари ҳозир фақат геттоларда эмас, балки оқ танлилар истиқомат қиласидиган туманлarda ҳам тарқалмоқда.

Коронги тушгандан кейин одамлар бир ўзи кўчада юришга кўркади. Эшик бузиб ўғрилик қилиш ва бирорвлар мулкини талон-тарож этишлар миқдори ортгандан-ортмоқда ва бундай жиноятлар ўлимга ҳукм этиш билан жазоланиш мумкин бўлишига қарамай, давом этмоқда. Ўлим жазоси билан бу мадда боғлаган чипқонни даволаб бўлмайди...

Африкаликлар уларга лоақалтирикчилик ўтиб туришига ярайдиган иш ҳақи тўлашларини истайдилар. Африкаликлар имконлари кўтарадиган ишни қилишни истайдилар, ҳукумат: қилсанг ҳам қиласан, қилмасанг ҳам қиласан, дейдиган ишни эмас.

Африкаликлар иш олиш мумкин бўлган жойда яшашни истайдилар, улар у ерда туғилмаганини рўйиши килиб, у тумандан-бу туманга тепиб ҳайдашларини эмас. африкаликлар ишлайдиган жойда ўз ерлари бўлишини истайдилар, улар ҳеч қанақасига меники дея олмайдиган жойда ижара туришни эмас...

Африкаликлар бутун аҳолининг teng ҳукуқли қисми бўлишни истайдилар, ўз геттоларида бир умр қолиб кетишини эмас. Эркак африкаликлар хотин-бола-чақалари билан улар ишлайдиган жойда яшашни истайдилар, табиийликка зид равишда эркаклар ётқоларида яшашга мажбур бўлишини эмас.

Африка аёллари ўз эрлари билан яшашни истайдилар, доимий беваликка маҳкум бўлишни эмас. Африкаликлар кечки соат ўн бирдан кейин

кўчага чиқиши хукуқига эга бўлишни истайдилар, уйларида кўмилиб ётишга мажбур бўлишни эмас.

Африкаликлар уларга ўз мамлакатлари бўйлаб кезишга ва улар хоҳлаган жойда иш қидиришга рухсат беришларини истайдилар, Мехнат бюроси буюрган жойда эмас. африкаликлар рисоладагидек кун кечиришни ва жамиятда ўз мавқеларига эга бўлишни истайдилар.

Ҳаммадан ҳам биз teng сиёсат хукуқларни истаймиз, чунки бусиз бизнинг хукуқсизлик қобилиятимиз пул деса учиб кетгудек ҳолда қолиб кетаверади. Бу оқ танлилар учун ўта инқилобийча садо беришини тушунаман, чунки сайловчиларнинг кўпчилигини бу ҳолда африкаликлар ташкил этади. Айнан шунинг учун оқ танлилар демократиядан кўрқадилар.

Аммо бу кўрқув барча учун ирқий тенглик ва озодликни кафолатлашга имкон берувчи ягона ечим йўлини тўсиб кўймаслиги шарт.

Барчага сайлаш хукуки тақдим этиш ирқий хукмронликка олиб келади дейиш тўғри эмас. Тери рангига

асосланган сиёсий тақсимот мутлақо сунъий тусга эга, борди-ю, у йўқолса, бир ирқ устидан бошқасининг хукмронлиги ҳам ғойиб бўлади.

Африка миллий конгресси ирқчиликка қарши ярим асрдан бери курашиб келади. Ғалабага эришганда у шу сиёсатда содик қолади.

Мана, Африка миллий конгресси нима учун курашмоқда. Унинг кураши ҳақиқатан ҳам миллий тусга эга. Африка халқини бу курашга унинг жабр-ситамлари ва унинг тажрибаси туртки бермоқда, бу яшаш учун кураш турткисидир.

Бутун ҳаётимни мен африка халқи учун курашга бағишилагманман. Мен оқ танлиларнинг хукмронлигига қарши курашдим ва қора танлиларнинг хукмронлигига қарши курашдим. Менинг олий мақсадим – демократик, эркин жамият, унда барча одамлар ҳамжиҳатлиқда яшайдилар ва teng имкониятлардан фойдаланадилар.

Мен олий мақсадим рӯёбга чиққан вақтгача яшасам дейман. Борди-ю, зарурат туғилса, унинг учун ҳаётимни беришга тайёрман...

*Амир ФАЙЗУЛА  
тайёрлади*

Корт тиэтр” театр труппаси ижодкорлари африкалик истеъоддли ёш драматургни кашф қилишибиди. Унинг “Арслон ва марварид” пьесаси шу чоққача саҳнага қўйилган асарлардан тамом ўзгача, исён руҳида битилган эмиш...

Утган асрнинг 50-60-йиллари жаҳонда кўплаб давлатлар, хусусан, Осиё ва Африка мамлакатларининг мустақилликка эришиш даври, илғор маданият, санъат, сиёсат ва ижтимоий соҳа намояндадарининг эрк, ватан озодлиги йўлидаги қишилари дунё бўйлаб акс-садо бераётган, жаҳон сиёсий харитасида янги-янги номлар пайдо бўлаётган замон эди. Ёш драматургнинг ижодига қизиқиши уйғонишига унинг ватани мана шундай ёш давлатлар пайдо бўлаётган қитъада жойлашганлиги ҳам сабаб бўлгандир балки? Ҳар нечук, Воле Шойинканинг жаҳонга танилиши айнан мана шу нуқтадан бошланади.



## ЙЎЛБАРС ХАТТИ-ХАРАКАТИДАН БИЛИНАДИ...

1957 йил янги мавсум очилиш арафасида Лондон театр оламида янги бир хабар пайдо бўлди: “Роял

**ЖАҲОН АДАБИЁТИ**

Нигериялик драматург, адаби ва шоир Акинванде Воле Бабатунде Шойинка 1934 йил 13 июлда Ғарбий Нигериянинг Абеокут шаҳарчасида туғилган. Уша пайтда Ғарбий Нигерия Буюк Британиянинг мустамлакаси ҳисобланарди. Унинг отаси Самуэль Айоделе Шойинка инглиз тилида таълим бериладиган Муқаддас Пётр бошланғич мактаби директори, онаси Грейс Эниола Шойинка эса хусусий дўконга эга бўлиб, ижтимоий ҳаётда фаол иштирок этувчи, ўзининг билими, зукколиги боис чор-атрофда хурмат қозонган аёл эди. Бўлғуси ёзувчинг ота-онаси Нигериядаги энг катта элат – йоруба вакиллари эди. Воле Шойинканинг болалиги ўзига тўқ, маърифатли, серфарзанд оиласда ўтган.

Муқаддас Пётр бошланғич мактабини битиргач, Воле Шойинка Абеокут ўрта мактабига ўқишига киради. Ўқиш давомида у ёзган иншолари учун бир неча марта мукофотларга сазовор бўлади. 1946 йилда Ибадандаги нуфузли Ҳукумат коллежига ўқишига қабул қилинади. Бу ўкув юртида Нигерия миллий анъаналари билан бир қаторда Британия мустамлакачилиги таъсири ҳукм сурарди. Коллежни битиргач, бўлажак ижодкор Лагосдаги идоралардан бирида кичик ходим бўлиб ишлай бошлайди, радиопъесалар ва ҳикоялар ёзади, унинг машқлари Нигерия радиосидан эфирга узатилади. 1952 йилда бўлғуси ижодкор Ибадан Университет коллежига ўқишига киради. Бу ҳам Британия ҳукмидаги нуфузли олий ўкув юрти бўлиб, инглиз адабиёти, тарихи, юон тили ўргатилар эди. Айнан ушбу муассасада таълим олган йиллари ёш йигит мамлакат мустақиллиги йўлида курашаётган озодлик ҳаракати вакиллари билан яқинлашди.

1954 йилда Шойинка Англияга келиб, Лидс университетида инглиз адабиётини ўргана бошлайди, истеъодли ёш инглиз ёзувчилари билан дўстлашади, таниқли олим Г. Уилсон Найтнинг драма назарияси билан танишади, Европа театри анъаналарини ўрганади, Европа ва Нигерия театр маданиятини ўзаро боғлашга урина бошлайди. 1957

йилда санъат бакалаври унвонини олгач, Лидсда қолиб, диссертация устида иш бошлайди, америкалик драматург, адабиёт бўйича Но́бель мукофоти совриндори Южин О'Нил ижодини ўрганади. Худди шу даврда ўзининг иккита пьесаси – “Ботқоқлик аҳли” ҳамда “Арслон ва марварид” саҳна асарларини ёзди.

“Роял Корт тиэтр” труппаси аъзолари билан бўлган ўша тарихий яқинлашувдан кейин ёш драматург ўқишини ташлаб, шу труппага ишга келади. Унинг вазифаси саҳналаштириш учун танланган асарни овоз чиқариб, ифодали ўқиб беришдан иборат эди. Баҳона ортидан сабаб келади, дейишади. Воле Шойинка мана шу кичкинагина лавозими баҳона кўплаб театр арбоблари билан танишади, замонавий инглиз драматургиясидаги асосий йўналишлар ва оқимларнинг моҳиятини ўрганиб чиқади, шу даврда унинг “Ботқоқлик аҳли” ва “Ўйдирма” асарлари талабалар саҳнасида кўйилади.

Шойинканинг изланишлари эътироф этилиб, 1960 йилда Ибадан Университет коллежи қошидаги Рокфеллер илмий-тадқиқот марказининг драма санъати соҳасидаги мукофотига сазовор бўлади. Шу йили ватанига қайтиб, “Ниқоблар-1960” ҳаваскорлик театр труппасини ташкил қилади. Шойинканинг “Ўрмон рақси” пьеса премьerasи тарихий санага – Нигерия ўз мустақиллигини эълон қилган кун – 1960 йилнинг 1 октябрига тўғри келди. Худди шу йили саҳна юзини кўрган “Биродар Иеронимнинг кўргиликлари” сатирик пьесаси Воле Шойинкани Африка қитъаси бўйлаб танитди. Бу пайтда драматург 26 ёшда эди.

Шундан кейинги воқеалар Воле Шойинканинг ижодкор ва фуқаро сифатидаги ижтимоий қараашларини яққол кўрсатиб берди. Бу вақтда драматург Ифа университетида таълим берарди. У “негрофил” деб аталувчи адабий оқим вакиллари билан баҳсга киришади. Мазкур адабий оқим Африка анъаналарининг мутлоқ ҳокимлиги тарафдори бўлиб, Европа маданияти билан яқинлашув миллий маданиятни инқизозга олиб келади, деб ҳисоблар эди. Драматург эса факат “кора” ўтмишни, Африка

тариҳини кўйлаш билан чекланиш ҳар қандай ривожланишнинг олдига ғов солади, деб ҳисобларди. Унинг назарида мамлакат адабиёти, маданияти, хусусан, театр ва кино санъати ривожланишнинг янги босқичига кўтарилиши, жаҳондаги илғор анъаналарга эргашиши шарт, фақат инсоният ёришган муваффақиятлар ва ютуқларни ўзлаштириш билангина олға силжиш мумкин. У ўзининг матбуотдаги чиқишлидан бирида “Негрофиллар” Африканинг энг муҳим муаммоларини ҳал қилишга қодир эмас, ахир йўлбарс мен йўлбарсман, дея ўкириб ўтирамайди, балки ким эканлигини ўз хатти-ҳаракати билан билдириб кўя қолади”, деб ёзади.

Воле Шойинканинг “Йўл” драмаси Лондонда бўлиб ўтган санъат фестивалида намойиш қилинади, Дакар фестивалида театр ҳақида доклад билан чикади, “Конго ҳосили” пьесаси учун мукофотга сазовор бўлади, “Шарҳловчилар” (“The Interpreters”) романини эълон қиласи.

Роман қаҳрамонлари бўлган бир гурух ёш зиёлилар Англия ва АҚШ университетларида таълим олиб, жаҳондаги илғор қарашлар ва анъаналарни ўзлаштириб, янги жамият куриш умидида ватанига қайтади. Аммо бу ердаги муҳитда ўз ниятларини амалга ошира олмай қоладилар. Романни янги авлод ва мавжуд муҳит ўртасидаги бегоналик руҳи тасвири, ёшларнинг маънавий исёни тимсоли дейиш мумкин.

Роман қаҳрамонлари бўлмиш Секони – муҳандис, Кола – рассом, Саго – журналист, Эгбо – каттагина бир вазирликда котиб, Банделе – университет ўқитувчиси. Улар турли касб кишилари, лекин ҳаммаларини битта тақдир бирлаштириб туради. У ҳам бўлса, жамиятга керакли одам бўлиш ёки ортиқча кишига айланишдир. Улар Африканинг янги замон зиёлилари, ижодкорлар, янгиликка ўч, руҳан мустақил одамлардир. Аммо уларнинг руҳидаги мустақиллик синиб қолмасмикин? Мавжуд муҳит билан бегоналик хисси курашга айланармикин? Романнинг бор мағзи ва мазмуни қаҳрамонларнинг дилидаги руҳий исённи фаол ҳаракат этиб

кўтаришдан иборат. Бу асарни ўқиган кишининг юрагида момақалдириқ олди сукунати қўзғатадиган хавотир уйғониши, кўнгли гулдирак олди димлиги каби қайфиятдан алағда бўлиши аниқ. Бу асарда Секони яратган, танасини чирмаб олган бўғма илон билан олишаётган курашчи ҳайкали умумлаштирувчи тимсол сифатида бобдан-бобга ўтиб юради. Рассомнинг наздида бу тимсол Африканинг келажагини бўғиб қўяётган кучларга қарши ғазабдир. Роман қаҳрамонларининг назарида мамлакатда ҳукм суроётган муҳит бинонинг ҳашамдор безаклар берилган олд томони холос, унинг ортида эса нураган зиналар, совук йўлаклар, чириган тўсинлар бор...

Романнинг баъзи ўринларида тасвирлар насрдан кўра кўпроқ назмий сатрларни ёдга солади. Бу Воле Шойинканинг шоир бўлганлиги сабабли бўлса керак. Бу қайфият, айниқса, Секонининг ижод жараёни тасвирлашда кўринади.

Ижодкорнинг ҳаётида яна қора кунлар бошланади. Нигерия икки йиллик (1967 – 1969) фуқаролик уруши алангаси ичидаги қолади. Бунга ибо қабиласининг Нигерия таркибидан чиқишига уриниши сабаб бўлганди. Уруш арафасида Воле Шойинка Энугу ўлкасида ибо қабиласи сардори Чукуемека Одумегва Оджуқву билан махфий равищда учрашиб, уни мамлакат таркибидан чиқмасликка чақиради. Лекин уринишлари самараисиз тугайди. Уруш бошланади. Ёзувчинг холис нияти унинг зиёнига айланиб, уни исёнчилар билан тил бириткиришда айблашади. Нигерия ҳукумати раҳбари, мамлакат президенти Якуб Говоннинг буйруғи билан турмага, бир кишилик камерага ташлашади. Ғарбнинг тараққийпарвар ёзувчилари томонидан билдирилган норозиликлар энди уни кутқаролмайди. Воле Шойинка 27 ой мобайнида эни тўрт, узунлиги саккиз фут келадиган тор камерада ётади. Бир фут 30 сантиметрдан сал кўпроқ эканини ҳисобга олсан, ёзувчи икки йилдан ортиқ муддат ичидаги эни бир ярим метр ҳам келмайдиган, бўйи эса икки ярим метрли ярим қоронғи хонада ётганини тасаввур қилиш мумкин.

## ЖАҲОН АДАБИЁТИ

Хибсда ётган чоғида у яқинлари билан кўришолмайди, маҳбуслар учун белгилаб кўйилган бир соатлик сайрга ҳам чиқарилмайди, тиббий ёрдам ололмайди, китоб ва ёзув ашёлари эса инчунин. Шойинкани фақат бир нарса хавотирга соларди. Ишқилиб, бу муҳитда руҳи сўнмаса, ақлдан озиб қолмаса бўлгани. Аммо шундай шароитда ҳам у яширинча шеърлар ижод қилишга имкон топа олади. Яратган шеърларини ёд олади, бўлғуси пьесаларининг қораламаларини миясида пишишиб, хотирасига мустаҳкамлайди.

Ёзувчи фуқаролик уруши тугагач, хукumat қўшинларининг Биафра сепаратчилари устидан қозонган ғалабаси шарафига эълон қилинган умумий авфдан кейингина озодликка чиқади. У энди Ибадан университети қошидаги Драма мактаби директори. Воле Шойинканинг “Конго ҳосили” пьесаси қитъя экранларига чиқади, у Европада Африка маданияти ҳақида лекциялар ўқиди, Кембриж, Черчилль-колледжа малака оширади, ўйлаб кўйган пьесаларини ёзиб тутгатади, Лондон ва Нью-Йоркда “Инсоннинг ўлими” номли асари чоп этилади. Бу асар ёзувчининг турмада кечирган кунлари ҳақидаги хотиралари эди.

Драматург энди одамлар кўп тўпланадиган истироҳат боғларида намойиш қилинадиган бир актли пьесалар ёза бошлайди. Томошибинлар, унинг “Воњос операси” пьесасини томоша қилишга оқиб кела бошлайдилар. Бу асарда Нигерияда янги нефть конлари топилиши, нефть қазиб оловчи мамлакатлар иттифоқи бўлмиш ОПЕК ташкилотига аъзо бўлиши натижасида пайдо бўлган шов-шувлар қаламга олинган бўлиб, нефть савдоси мамлакатни яшнатиб юборади, деган даъволарнинг қанчалик ёлғон экани фош қилинади.

1979 йилда Чикаго шаҳрида драматургнинг “Улим ва қирол отбоқари” пьесаси саҳнага чиқади, 1981 йилда эса “Аке: болалик йиллари” асари эълон қилинади.

Воле Шойинка ўз асарлари орқали Африка маданияти, дини ва фалсафасини жаҳонга танита олган ижодкордир. “Боткоқлик аҳли”, “Кучли авлод”, “Уйдирма”, “Урмон

ракси” пьесалари, “Иданре” достони шоир ва ёзувчи Шойинка ижодининг фоялари – эрк, инсонпарварлик ва маърифат руҳи билан суғорилган.

Мисол тариқасида унинг “Кучли авлод” пьесасини келтириш мумкин. Унда Африкадаги баъзи элатларда хукм сурган урф-одат – бахтсизлик ва лаънатлардан, бидъатдан қутулиш ҳақида сўз боради.

Янги йил арафасида қабила аъзоларидан бири қабиладошларининг бошидаги бахтсизлик ва тавқи лаънатни ўз зиммасига олиб, дарё ортига ўтади-да, ер қаърига кўмид қайтади. Аждодлардан қолган одатга кўра, бу ишни зиммага олиш ихтиёрий бўлиши шарт. Лекин сўнгги пайтларда ҳеч ким бу ишни зиммасига олишни истамай қолган. Чунки бу вазифа жуда оғир. Аввало бу одам ўз исмини йўқотади, қабиладошлари учун шунчаки “Олиб кетувчи”га айланади. Лаънатларни ўз зиммасига олиш ҳам оғир маросим, одамлар ўз бошларидағи лаънатларни “Олиб кетувчи”га ташлашади, яъни йил давомида нима бахтсизликлар кўрган бўлсалар, шуларнинг ҳаммасини “Олиб кетувчи”нинг бошига тушсин, дея тилашади, кейин уни лаънатлаб, калтаклаб, қувиб юборишади. Одамларнинг лаънати ўзининг залвори билан “Олиб кетувчи”нинг қаддини оғир юк мисоли букиб юборади. Шу боис зиммасига “Олиб кетувчи”лик юкланган аксарият одам узоқ умр кўрмайди...

Янги йил яқин, бахтсизликлардан қутулиш шарт, шу боис қишлоқ аҳли бош тортиш кўлидан келмайди, дея соқов бир йигитча – Ифадани “Олиб кетувчи” қилиб танлайди. Қишлоқда ўқитувчилик қилаётган Эман исмли яна бир йигит бўлиб, унинг ота-боболари “Олиб кетувчи”лик қилган, Эман одат ўзининг бошига тушиб қолмаслиги учун ўсмирлик чоғи туғилған юртидан бош олиб кетган эди. Йигит Ифадани бу балодан кутқармокчи бўлади-ю, лекин қишлоқ аҳли Эманднинг ўзи “Олиб кетувчи”лар авлодидан эканини тасодифан билиб қолади. Энди бош қаҳрамон олдида иккита йўл қолади: ёки рози бўлиш, ёки бу ердан ҳам қочиш. Албатта, Эман қочади, бирор қаёққа ҳам бора оларди? Ахир ортидан тавқи лаънат қувиб келяпти-ку!

## ЖАҲОН АДАБИЁТИ

Эман отаси билан юзма-юз келар экан, отаси унга ўз авлодининг вазифасини шундай тушунтиради: “Авлодимиз – ер юзидағи энг кучли авлодлардан, ўғлим. Фақат кучлиларгина ҳар йили дарёдан Лаънатлар қайғини олиб ўта олади. Бошқалар бу ишни бажаролмай кучдан қолганда, бизнинг авлод одамларнинг лаънатини олиб кетгани учун янада кучлироқ бўлиб бораверади. Мен кетаётган умрнинг ёвузликларини йигирма йилдан кўп вақт мобайнида олиб кетдим. Сен менинг ўрнимни эгаллайсан, деб умид қилгандим”. Лекин Эман аждодларининг ишини давом эттиргиси йўқ. Томирида оқаётган қон эса уни барibir Laъnatlar қайғи ва дарё томон етаклаб келади...

Орадан беш йил ўтиб, 1986 йилда Воле Шойинка Африка ёзувчилари орасидан биринчи бўлиб “улкан маданий истиқболга эга бўлган театр ва шеъриятни яратгани учун” адабиёт бўйича Нобель мукофотига муносиб деб топилади.

Швеция Қироллик академияси аъзоси Ларе Йюлленстен номзодни танишитирар экан: “У ўз пьесаларида ранг-баранг саҳна усулларидан, аввало Африканинг анъанавий санъати, яъни маросим ракслари, никоблар ва пантомима, миллый мусиқа ва оҳанглардан, театр ичидаги театр услубидан моҳирона фойдаланади, – дея таъкидлайди. – Шойинка театри Африка маданияти ва оламига таянади. Тан олиш керакки, у жуда маърифатли драматург... Афсоналар, анъана ва маросимлар унинг учун шунчаки маскарад либослари эмас”. Ёзувчи ўзининг Нобель мукофоти берилиши олдидан Қироллик академиясида ўқиладиган лекциясини Жанубий Африкалик эрк курашчиси Нельсон Манделага бағишлиади.

Воле Шойинканинг наздида ушбу юксак мукофот унинг зиммасига янада масъулиятлироқ вазифаларни юклади. Бундан бўён ёзувчи шунчаки янги асарлар яратиш билан

чекланиши мумкин эмас эди. Мамлакат, қитъя ва жаҳондаги ижтимоий ва маданий ривожланиш силсиласида унинг ўрни янада мустаҳкам бўлиши, умуминсоний тараққиётда унинг улуши яна каттароқ бўлиши зарур эди. Қолаверса, унинг ватанинаги сиёсий ва ижтимоий жараённинг муқим эмаслиги ҳамон уни изтиробга соларди.

1993 йилда Нигерияда демократик сайловлар бекор қилиниб, хукумат тепасига ҳарбий диктатор Сани Абача келгач, ёзувчи муҳожирликка жўнашга мажбур бўлади. Шу даврлар ёзувчи учун публицистик чиқишлилар палласи бўлди. “Қитъанинг очиқ жароҳатлари: Нигериядаги инқироз ҳақида шоҳидлик” эсселар тўпламида Нигериянинг мустақилликка эришган 1960 йилдан то Сани Абача режими ўрнатилгунга қадар бўлган тарихини яратади. Ижодкор алам ва изтироб билан Нигерияда маънан айниш палласи бошланди, қадриятлар топтала бошланди, дея ёзади. Унинг миллатпарвар шахс сифатидаги бу чиқиши жавобсиз қолмайди, албатта. Мамлакат хукумати Воле Шойинкани ватанига хиёнат қилишда айблайди. Ёзувчи учун бундан ҳам оғирроқ айбни топиб бўлмас эди.

1998 йилда Нигерия хукумати ёзувчига кўйилган айловни олиб ташлади. Шу йили Воле Шойинка ватанига келди. Ва навбатдаги “Хотира юки: авф этиш илоҳаси” эсселар китобини чоп этди. Бу китоб “Очиқ жароҳат...”нинг ўзига хос давоми эди. Ижодкор Африкада ҳамон инсонийликка зид жиноятлар содир этилаётгани, ярашув жараёни қийинчилик билан амалга ошаётгани ҳақида куйиниб ёзади.

Воле Шойинка ўз пьесалари ва романлари, мақолаларини инглиз тилида ёзган. Шеърлари эса она тилиси – йоруба элати тилида битилган. Унинг наср ва драматургиясидан баъзи намуналаргина рус тилига таржима қилинган.

*Рисолат ҲАЙДАРОВА*

ЖАҲОН АДАБИЁТИ



## РУҲИЯТ МУСАВИРИ

Узоқ Африка диёрининг фарзанди, номи ўзбек томошабинларига у қадар таниш бўлмаган кинорежиссер Идрисса Уэдраого 1954 йилнинг 21 январида Африка ғарбидаги Буркина-Фасо мамлакатининг Банфора деган жойида дунёга келган. Болалиги уруғчилик муносабатларига асосланган қабилада ўтган Идрисса юртдошларининг ҳали-ҳамон ибтидой қоидалар асосида яшаётганини яхши англар, дунёни кўришга, оламни билишга интиларди. У қабиладошларининг эски одатларга садоқати сабабини билишга кизикарди. Шу туфайли 1981 йилда Уагадугудаги Африка кинематография институтини тутагади ва режиссерлик фаолиятини ёш Буркина-Фасо Давлат кинематография компаниясида бошлайди. У ерда бир нечта қисқа метражли фильмларни суратга олиб, жамоатчилик эътиборига тушади. Чунки унинг реал воқеалар асосида яратилган фильмларида барчага маълум бўлган, ҳамма ҳар куни кўриб юрган муаммолар ўзига хос талқинларда акс этар, кишиларни уларга нисбатан муносабат билдиришга мажбур қиласиди. Шундай фильмларидан бири “Поко”да мамлакат тиббиётининг аянчли аҳволи, оналик ва болалик борасидаги жуда жиддий масалалар акс этганди. Кишиларнинг оғир аҳволи, оғир яшаш шароитига қарамай аёлларнинг фарзанд кўришга, миллат наслини

давом эттиришга бўлган уриниши, бунинг учун ўз ҳаётини хатарга кўйиши кўрсатилади. Режиссер мазкур фильмни учун Уагадугудаги Африка мамлакатлари кино ва телевидение фестивали “ФЕСПАКО-81”да “Энг яхши қисқа метражли” фильм номинацияси бўйича тақдирланади. Ушбу мукофот қайсиadir маънода Идриссанинг қалбидаги эски дардларни кўзғатиб, унинг дунёни кўришга бўлган интилишини қайтадан жонлантиради. Уни ўзидан қониқмаслик ҳисси безовта қилас, дунёнинг ривожланган мамлакатларида тажрибасини оширишни истарди. Шу мақсадда дастлаб Киведа, кейинчалик Парижда таҳсил олади. Жаҳон кинематографиясининг ўзига хос жиҳатларини, услубияти ҳамда ғоявий йўналишларини пухта ўрганиб, бадиий фильмлар суратга ола бошлайди. Унинг дастлабки “Танлов” (“Yaam Dabo”)номли фильмни унга кутилмаган даражада муваффақиятни келтиради. Фильмнинг “ФЕСПАКО-87” фестивалида “Энг яхши фильм” деб топилиши режиссерга янада куч ва масъулият юклади. Орадан иккى йил ўтиб Идрисса Уэдраого ижтимоий муаммолар акс этган “Буви” (“Yaaba”) фильмини томошабинларга тақдим этди. Турли қатламга мансуб болаларнинг ўзаро дўстлашувига сабабчи бўлган кампир ҳақидаги ушбу кинофильмда инсонпарварлик ғоялари кўтарилади. Яъни, инсон ўзига дўст танлар экан, уни бойлиги, жамиятда тутган ўрни, ирқи, миллати, ранги, ёшига қараб эмас, балки қалбига қараб танлаши лозимлигини, бундай умуминсоний туйғулар, қадриятлар йўлида ҳар бир киши ўзини камарбаста қилиши талаб этилишини режиссер оддий кишилар тақдирни мисолида кўрсатади.

Фильмдан фильмга тажрибаси ошиб бораётган режиссер 1990 йилда жамоатчиликка ўзининг “Конун” (“Tila”) кинокартинасини тақдим этди. Фильм ўша йилнинг ўзидаёқ ҳалқаро Канн кинофестивалида “Энг яхши фильм” номинацияси бўйича гран-прини кўлга киритди. Бу асар режиссер ижоди биринчи даврининг айни чўққиси бўлди. Фильмда муҳаббатга етолмаган севишганларнинг тақдирни мисолида

**ЖАҲОН АДАБИЁТИ**

156

режиссёрни умр бўйи қийнаб келган муаммо – замон тараққиётини тан олмайдиган қабила ҳётида ибтидоий қонунларнинг устуворлиги масаласи ҳақида сўз боради. Асар воқеаларига кўра, қабиланинг мавжуд қоидаларига хилоф равишда яшамоқчи бўлган севишганлар жазога мустаҳиқ этилади. Бош қаҳрамонлар Саа ҳамда Наумалар севгисидан кўра хиссият ҳамда бурч ўртасида ёнаётган Коурининг руҳий ҳолатлари томошабиннинг эътиборини кўпроқ жалб қиласди. У бир томондан қоидаларга амал қилмаслик бутун бир қабила тузумини ўзгартириб юбориши, тартибсизликларни келтириб чиқариши, бундан ташқари аждодлардан қолган қадриятларга беписандлик билан карашда айбланишини, иккинчи томондан эса, ўз акасининг инсон сифатида севишга, севилишга ҳақли эканини ич-ичидан ҳис этиб қийналади. Худди мана шу қарама-қарши туйғулар унинг ич-етини кемиради. Қабиладошлари билан зиддиятлари кескинлашгани туфайли Коури акаси Саани отиб ташлашга мажбур бўлади. Шунча курашларга қарамай, қабила қонунларига итоат, бурч масаласи устун бўлиб қолаверади. Мутахассисларнинг фикрича, Идрисса Уэдраого маҳаллий уруғ-қабила одатларига нисбатан ўз танқидий муносабатини ушбу фильм орқали билдирган. Бироқ режиссёр фильмда бирор бир томоннинг позициясига очик хайриҳоҳлик қилмайди. Хулоса чиқаришни томошабиннинг ўзига қолдиради. Фильм номининг “Конун” эканлиги ҳам чуқурроқ ўйлашга мажбур қиласди. Бу ўз мохиятига кўра, мамлакат номи – Буркина-Фасо (“Ҳалол кишилар ватани”) билан ҳамоҳанглик касб этгандек туюлади.

Идрисса Уэдраого айнан ушбу фильми учун 1993 йилда Германиядаги кинофестивалда ҳам “Кумуш

айик” мукофоти билан тақдирлангач, бутун санъат жамоатчилиги диққат-эътиборини қозонади. Кўпчилик у ҳақида гапирап экан, қолок африка ҳалқларини жаҳонга танитишига интилаётган режиссёр сифатида баҳолашади, айнан мана шу услубни унинг хос йўналиши деб билишади. Режиссёр гарчи ижоди барчанинг эътирофида эканлигидан қувонсада, жамоатчиликнинг унга нисбатан муносабатидан негадир ранжириди. У имконияти кенг ижодкор эканини кўрсатиш мақсадида 1991 йили “Карим ва Сала” фильмини суратга олди. Бу унинг ижодида иккинчи босқични бошлаб берди. Эндиликда унда “қолок африка” эмас, балки интеграллашаётган дунёнинг бир бўлагига айланашаётган Африка кўрсатилганди. Паст иқтисодий ҳолатдан дунёнинг ривожланган иқтисодий муносабатлари сари юз бурган фильм қаҳрамони орқали бу ҳалқлар иқтидори ўзгалардан кам эмаслигини намоён қиласди. Шундан сўнг Идрисса Уэдраогонинг “Самба Траоре” (1993), “Юрак ҳайқириғи” (1994), “Люмьер ва компания” (1995), “Кини ва Адамс” (1997), “Маъбудлар нафрати” (2003), “Като Като” (2006) каби кўплаб фильмлари дунёга келди. Бу фильмлар турли мавзу ва жанрларда ишланган бўлса-да, уларнинг барчасини бир умумийлик – режиссёрнинг инсон руҳиятига чуқурроқ киришга бўлган муваффақиятли интилишлари бирлаштириб туради. Унинг учун ҳамиша ҳётий вазиятларда инсонларнинг ички кечинмалари, туйғуларининг қай тахлит бўлиши, ҳётий қийинчиликларда онги ва қалбидаги ўзгаришларни тасвирлаш, ҳар қандай мураккаб вазиятда ҳам инсонийликни сақлай олиши асосий мавзу бўлиб қолди. У инсон руҳиятининг мусаввири бўлиб, образларнинг қалбини ўрганишга ва шу орқали томошабин қалбини ҳам тарбиялашга интилаётган ижодкордир.

*Баҳтиёр ЁҚУБОВ*

## ЖАҲОН АДАБИЁТИ



## МИЛЛИОН-МИЛЛИОН ШАМНИНГ ШУЪЛАСИ

Атоқли олим, йирик жамоат арбоби, моҳир таржимон, оташин публицист, “Жаҳон адабиёти” журналинг ташкилотчиларидан ва биринчи бош муҳаррири Озод Шарафиддинов ҳаёт бўлганларида 85 ёшини қаршилаган бўлардилар. Суҳбат домланинг 70 йиллик юбилейлари арафасида ёзib олинган, мазкур мақола бир адабий журнал учун тайёрланган эди. Бу орада домла яна касалхонага ётдишлар. Касалхонага бориб суҳбат матни берилган журнал корректурасини ўқитиб олишининг мавриди эмасди. Шунинг учун суҳбатдаги “Милион-миллион шамнинг шуъласи” жумласини танлаб сарлавҳага чиқардик.

Домла касалхонадан чиқшилари билан уйларига қўнгироқ қилиб ҳол-аҳвол сўраишгандан кейин, домла, суҳбатни тайёрладик, яқин ойларда чиқиб қолса керак, дедим.

— Яхши, яхши, — дедилар.

— Домла, бир узримиз бор, вакт тигиз эди. Сизни касалхонада безовта қўлмасдан суҳбатга матнининг ўзидан бир сарлавҳа танладик, — дедим.

— Ҳа майли, нима деб номладинглар, — деб сўрадилар.

— Милион-миллион шамнинг шуъласи, — деб айтдим.

Бу домлага ҳам маъқул тушибди.

Бироқ суҳбат журналда нашр қилинмади. Уни бошқа бирор журналга берииш ҳақида сўз очганимда, домла ҳозирчалик ўзингизда турсин, дедилар. Шу билан ҳалигача қўлимиизда турибди.

Суҳбатда айтилган фикрлар, айниқса, китобнинг инсон шахсини шакллантиришдаги ўрни, ўтмии меросга муносабат, зиёлилар масъулияти каби масалалар, бизнингча, бу гунги кунда ҳам ўз долзарбигини ўйқотгани йўқ. Шу сабабли уни эътиборингизга ҳавола қўлмоқдамиз.

Суҳбатдошдан

— **Домла, Сиз элу юртнинг ҳурматига сазовор бўлган жасоратли зиёлилардан бирисиз.**

**Ижозатингиз билан, суҳбатимизни бевосита ёшлик йилларингиздан, дастлабки бадиий китобдан олган таассуротларингиздан бошласак.**

— Менинг болаликдан бери энг яхши кўрган асарим Марк Твеннинг “Том Сойернинг бошидан кечирганлари” деган романидир. Бу асар факат мени эмас, бутун жаҳон болаларининг севимли асари, уни ўқиб, ундан завқланмаган одамни учратиш қийин. Шунинг учун уни адабиётнинг мангу асарлари қаторига қўшишади. Мен биринчи марта бу китобни ўқиганимда 11-12 ёшларда эдим. Ундаги воқеалар худди менинг ҳаётимдан олингандек эди. Том Сойернинг ёши ҳам менинидай, қилган шўхликларию шумликлари ҳам айнан менинига ўхшарди. Қўйинг-чи, кўп ўтмай мен ҳар қадамида саришта ва озода, батартиб ва рисоладан чиқмайдиган Полли холани куйдирадиган, ҳар куни бирор янги ҳангома ўйлаб топадиган, топқир, довюрак ва мард Томни жонимдан ортиқ яхши кўриб қолдим. Ҳар қадамимда унинг маслаҳатларирига амал қиласидиган, хатти-ҳаракатларимда унга тақлид қиласидиган бўлиб қолдим. Масалан, у Беккини “яхши кўриб” колгач, “яхши кўрган одам, албатта, қизни бир марта ўпмоғи керак” дейди.

Мен унга амал қилиб, 4-синфда ёнимда ўтирган синфдош қизнинг бетидан бир ўпид, бир тарсаки еганман.

Мен мисисипилик бу ажойиб боланинг ҳаётда борлигига сира шубҳа қилмасдим. Шунинг учун Америкага қочиб кетмоқчи, у ерда Томни топиб, “Шунақа-шунака, мен Тошкентдан келдим, сен билан бирга қароқчилик қилиб юрмоқчиман” демоқчи бўлдим. Бироқ бу ниятим фош бўлиб қолди, уйдагилар йўлга атаб йиғиб юрган қотган нонларни мусодара қилишди, ўзим эса боллаб калтакландим. Бироқ булар менинг “Том Сойер”га муҳаббатимни сусайтиргани йўқ. Ҳозирга қадар бу китобни камида 10 марта ўқигандирман. Унинг мазмунини, ундаги ҳар бир воқеани ёд биламан, ҳозир ҳам романни бошидан охиригача айтиб беришим мумкин, лекин бирор муносабат билан китобни қўлимга олиб қолсан, яна ҳамма нарсани унугтаман-у, уни ўқишига тушаман. Эҳтимолки, менинг адабиётшунос бўлишимга, бир умрга китобга меҳр қўйишимга шу асар ҳам сабабчи бўлган бўлса ажаб эмас. “Том Сойернинг бошидан кечирганлари” ҳамма замонларда, ҳамма китъаларда, ҳамма болалар ўртасида севилиб ўқиладиган умроқий асрларданadir.

**— Китоб ўқишининг инсон шахси шаклланишидаги ўрни тўғрисида ҳам тўхтассангиз.**

— Дунёда бошқа ҳеч нарса инсон шахсини шакллантириш ва улғайтиришда китобчалик катта рол ўйнамайди. Ўтган донишмандлар, мутафаккирлар, адиблар, шоирларнинг бирортаси йўқки, китобнинг ролига юксак таърифлар бермаган бўлсин. Уларнинг ҳаммаси китобни инсоният кашфиётлари ичидаги энг улуғ неъмат деб ҳисоблашади. Австрия ёзувчиси Стефан Цвейгнинг бошдан-оёқ китобга бағищланган “Китоб – турфа дунёнинг очқичи” деган жуда зўр мақоласи бор. Унда китоб ҳақидаги теран ва батафсил мулоҳазалардан ташқари саводсиз, умрида бирорта китоб ўқимаган, умуман, хат танимайдиган одамнинг қиёфасини чизиб беради. Адид ўзининг ҳайратини бундай ифодалайди:

“... қандай қилиб китоблардан эсувчи дунё шабадаларидан бебахра нафас олмоқ мумкин? Мен... китоб ўқишин билмайдиган ва шу важдан маънавият оламидан ажралган одамнинг аҳволини тасаввур қилишга уриндим... Аммо бунақа одамнинг миясини тасаввур қилолмадим, гаранг одам бирор гапириб берганига қараб, мусиқанинг сехрли кучини англамаганидек, мен ҳам бутун умр давомида биронта китоб ўқимаган инсоннинг фикрлаш тарзини англай олмадим”. Мен 70 ёшлик умримда ўзим учун кашф этган энг муҳим ҳақиқатлардан бири шуки, китоб ўқимайдиган одам ўзини дунёдаги энг катта бойлиқдан маҳрум қиласди.

Хўш, китоб одамга нима беради?

Биринчидан, китоб билим беради, дунё ҳақида, турли мамлакатларнинг яшаш тарзи тўғрисида, уларнинг тарихи, жўғрофияси, иқтисоди, халқларнинг расм-русумлари тўғрисида бир умр хотирангиздан ўчмайдиган тасаввурлар беради.

Иккинчидан, “инсон” деган ғоятда мураккаб, ғоятда зиддиятли, ғоятда тилсимли бир мавжудотнинг психологияси, ички дардлари, оламни идрок этиш, яшаш учун кураши, улуғлиги ва забунлиги, зўрлиги ва ожизлиги ҳақида тасаввур беради. Буларнинг бари сизни теран фикрлашга ўргатади.

Учинчидан, китоб сизнинг туйғуларингизни тарбиялайди, эстетик дидингизни шакллантиради, табиатингизда дағаллик, шафқатсизлик бўлса, уларни юмшатади, қалбингизда эзгулик, олижаноблик япроқларининг ёзилишига йўл очади. Кўп китоб ўқиган одам китоб ўқимаганга қараганда дунёни бутунлай бошқача қимматда ва бошқача рангларда, бошқача нисбатларда қабул қиласди.

**— Узбек ҳалқи қандай маданиятнинг, улуг тарихнинг меросхўри эканлигини ёшларга англатиш борасида қилинаётган ишлардан кўнглингиз тўладими? Бу борада яна нималар қилиши лозим деб ўйлайсиз?**

**ЖАҲОН АДАБИЁТИ**

— Йўқ, кўнглим тўлмайди, албатта. Аввалига бир воқеани айтиб берай: бундан 30 йиллар муқаддам Татаристонда бўлган эдим. Бир куни Абдулла Тўқай қабрини зиёрат қилгани бордик. Унинг мозорига жуда ёш оламдан ўтган буюк шоирнинг ҳайкали ўрнатилган экан. Сукунат. Енгил шабада, толлар баргининг шивир-шивиригина эшитилади. Дунёнинг бебақолигини, умринг бевафолигини ўйлаб, беихтиёр маъюс тортасиз. Шу чоқ аллақаёқданdir бир кампир пайдо бўлиб қолди. Унинг букик қадди-қомати, ажин босган юзлари, бўйи баравар келадиган ҳассасини тўқиллатиб, имиллаб юришига қараганда анча ёшга бориб қолганга ўхшайди. Кампир олдимиизга келиб биз билан сўрашди, қаердан эканлигимизни билди, кейин бамисоли бир профессордай Абдулла Тўқайнинг кимлиги-ю, буюклиги нимада эканлигини бизга гапира кетди. Унинг “маъруза”си Тўқай ҳаётининг биз билмаган тафсилотларига тўла эди. Биз кампирнинг ҳикоясини жон қулоғимиз билан тингладик. У, албатта, ёзувчи ё шоир эмас, ҳатто ўқитувчи ҳам бўлмаган экан. Бутун умри уй бекаси бўлган экан. Лекин Абдулла Тўқайни, татар адабиётини ва умуман адабиётни жон-дилдан яхши кўрар экан. Табиийки, биз кампирнинг иқтидорига, дидига, хотирасига қойил бўлиб, унга тасаннолар ўқидик. Лекин, сирасини айтганда, бу унчалик фавқулодда ҳодиса эмас эди. Ҳаётда бундай иқтидорли одамлар кўп учрайди. Лекин мени қойил қолдирган нарса – бошқа нарса бўлди. Ўшанда мен бир ой давомида Татаристонни бошдан-оёқ кезиз чиқдим, ҳамма йирик шаҳарларида, ўнлаб қишлоқларида бўлдим, корхоналар ва колхозларига бордим, хонадонларда меҳмон бўлдим. Буни қарангки, ҳар бир қишлоқ ёнида узоқдан кўриниб турадиган озода ва саришта жой бўлар экан – татарлар уни “зиёрат” деб аташар экан. Бу ўзимизнинг тилда “қабристон” дегани экан. Қишлоқ аҳли қабристонда ётган авлод-аждодларини жуда қадрлар, уларнинг ҳаётда қолдирган изларини батафсил билишар эканлар. Ҳар бир қишлоқ, ҳар бир хонадонда одамлар Абдулла Тўқайни жуда-жуда қадрлар, унинг шеърларини, ҳикматларини ёд билишар, бошидан кечган воқеаларни хотирлаб юришаркан. Фақат ёши ўтганлар эмас, мактаб болалари ҳам, ўспириналар ҳам, эндигина оила қурган ёш-яланглар ҳам. Ҳар бир қишлоқда Абдулла Тўқайнинг кичкина бир ҳайкали, унинг тубида – гуллар ... Шунда бутун халқнинг ўз шоирига, ўз адабиётига, ўз меросига, ўз тарихига муҳаббатини кўриб қойил қолгандим.

Қани энди бизда ҳам бутун халқ қалбида шундай ялпи муҳаббат ниш урса, унинг онгига ўзининг ўзбеклиги учун ифтихор туйғулари тўлқин урса. Бу борада ҳозир кўп ишлар қилингати. Менимча, миллий ғуурни, миллий қадриятларга муҳаббатни қон-қонимизгача сингдирмагунча, уни тафаккуримизнинг таркибий қисмига айлантирмагунча, мақсадга эришиб бўлмайди.

— *“Жаҳон адабиёти” журналининг ташкилотчиси, бош муҳарририсиз. Журналда турли тиллардаги нодир асарларнинг таржима қилиб босилаётганлиги Ўзбекистон маданий ҳаётида катта воқеа бўлди. Сизнингча, бу келгусида қандай мевалар бериши мумкин?*

— Аввало бир масалага тўхтаб ўттай: сўнгги пайтларда айрим одамлар “бизга ғарб адабиётининг нима ҳожати бор? Унинг кўп жиҳатлари бизнинг миллий анъаналаримиз ва миллий қиёфамизга тўғри келмайди, ёшлигаримизнинг тарбиясига салбий таъсир кўрсатади” деган даъволарни олдинга суришяпти. Бу мутлақо қўшилиб бўлмайдиган даъводир. Ҳеч кимга сир эмаски, бизнинг юртимиз ёхуд кенгроқ олсан, бутун Марказий Осиё сўнгги уч-тўрт аср мобайнида бутун жаҳондаги ижтимоий ривожла-нишдан орқада қолиб кетди. Бунинг турли сабаблари бор, албатта. Аммо энг катта сабаблардан бири – жаҳондан ажralиб қолганимиз, уч хонлик шаклида ўз қобиғимизга ўралиб олганимиз, ўзимизга ўзимиз маҳлиё

бўлиб бошқаларни писанд қилмаганимиз эмасми? Бу яккалик иллатидан, мақтанчоқлик касалидан эндиғина қутула бошламоқдамиз. Нима, яна ўз қобигимизга ўралиб олайликми? Яна ҳозирги замон учқичларини ийғиштириб қўйиб, тұямызга миниб, эски карвон йўлларидан секин имиллаб кетаверайликми? Бугунги дунё шитоб билан бир томонга йўналаётган бир пайтда биз бугунгача тескари томонга йўл олайликми? Йўқ, бу йўл фақат ҳалокатга олиб боради. Бирдан бир тўғри йўл жаҳоннинг ривожланган мамлакатлари билан ҳамдўстликлар йўлидир, уларнинг маънавий бойликларидан баҳраманд бўлмоқ, тажрибаларидан фойдаланмоқ керак. Чиллаки чиллакини кўриб чумак уради, деган гап бор. Ҳудди шунга ўхшаб, фикр ҳам фикрдан озиқ олади.

“Жаҳон адабиёти” журнали шу йўлда қўйилган дадил қадамлардан биридир. Журнал чиқа бошлаганига эндиғина икки йил бўлди. Тахририят унда энг яхши, энг теран асарларни эълон қилишга ҳаракат қиляпти. Китобхонларнинг муносабатига қараганда, аллақачон тилга тушган ва қизғин муҳокамаларга сабаб бўлаётган айрим асарларга қараганда тахририят бу бобда баъзи муваффақиятларга эришди ҳам. Лекин ҳозирча эълон қилинган асарлар ҳар қанча маъқул бўлмасин, жаҳон адабиёти деб аталган буюк бир уммондан бир томчи, холос. Жаҳон адабиёти битмас-туганмас бир ҳазинадир, унинг дурдоналаридан ҳали кўп йиллар давомида баҳраманд бўлишда давом этасиз. Ҳозирча эса бизни икки нарса қийнаяпти – энг яхши асарларни топиш ва танлаш, иккинчидан чинакамига истеъоддли ёрқин таржимонларнинг етишмаслиги. Яна бир нарса – журнал ўзининг муайян миқдордаги ўқувчиларига эга бўлса ҳам, улар кам. Биз ёшларимизнинг лоақал тўртдан бир қисми журналнинг доимий ўқувчилари бўлишини истар эдик.

*– Аср бошлиарида Беҳбудий, Фитрат ва Чўлпон сингари ўнлаб зиёлилар миллатнинг савиясини қўтариб, мустабид тузумга қарши қурашмоқчи бўлдилар. Шу мақсадда ўз ҳаётларини ҳам аямадилар. Сиз шундай ижодкорларнинг, хусусан, Чўлпон ҳаёти ва ижодини ўрганишининг ташаббускорларидан бўлдингиз. Сизнинг хизматларингиз билан “навоийшунослик”, “қодирийшунослик” қаторида “чўлпоншунослик” деган тушунча пайдо бўлди. Шу ўналишида яна қандай ишлар қилиши лозим?*

– Менинг назаримда, “чўлпоншунослик” ҳам халқимиз доим шуғулланадиган боқий соҳалардан бири бўлмоғи керак. Мен “адабиёт-шунослар” деяётганим йўқ, “халқимиз” деяпман. Бу билан мен, албатта, ҳар битта одамни адабиётшунс бўлишга ундаётганим йўқ. Одамлар “чўлпоншунослик” билан шуғулланар эканлар, бундан “иккинчи Чўлпон” бўлишга интилиш керак деб хulosса чиқармасликлари керак. Ҳеч кимдан “иккинчи Чўлпон” чиқмайди, лекин ҳар битта одам Чўлпон билан танишиб, ўз юртини чўлпончасига севмоқни, унинг озодлиги, баҳт-саодати йўлида чўлпончасига фидокор бўлмоқни, чўлпонча фуурурга эга бўлмоқни, зулмга, кишанларга, адолатсизликка чўлпонча нафрат билан қарамоқни ўрганиши керак. Қани энди Ўзбекистоннинг ҳар бир фуқароси жонажон ватанимизнинг истиқболи йўлида, майли, катта машъала бўлмасин, лоақал битта шам ёқса ... Миллион-миллион шамнинг шуъласи ҳамма ёқни мунаvvар қилиб юборар эди ... Бунинг учун Чўлпонни билиш керак, уни англаш керак.

“Чўлпоншунослик”, менимча, ўз зиммасидаги вазифани бажара олади.

*– Ҳозирги ўзбек зиёлилари зиммасида қандай масъулиятили вазифа турибди?*

– Ҳозирги пайтда “зиёли” деган сўзнинг баҳоси бироз тушиб кетган-дек кўринади. Биз, умуман, ўқиган, маълумотли одамнинг ҳаммасини “зиёли” деб атайдиган бўлиб қолдик. Бу – тўғри эмас. Менимча, “зиёли”

## ЖАҲОН АДАБИЁТИ

деган сўз ўқитувчи, инженер, шифокор ва ҳоказо каби касб эгаларинигина билдирилди. Фақат ўқиган эмас, ўқимаган одамлар ўртасида ҳам зиёлилар учраб туради. “Зиёли” деган сўз “нур” сўзидан олинган бўлиб, ўзи нурли, фикри нурли одам атрофини курсаб олган зулматни, одамларнинг фикрларидағи зулматни ёритмоқлари керак. Зиёли одамнинг энг муқаддас вазифаси кўр кўзларни очиш, кар қулоқларни эшитадиган бўлишига ёрдамлашишдир. Одамлар ҳаммалари бирдай соғлом ва бардам кўринсаларда, уларнинг маънавиятида, руҳиятида катта-катта кемтиклар бор. Зиёли ана шу кемтикларни йўқотишга хизмат қилмоғи керак. Тўғриси, эҳтимол, битта зиёли бутун зулматни ёритишга кучи етмаслиги мумкин. Майли, у кучи етадиган ишни қилсин, лоақал битта шам ёқсин, у ҳеч бўлмаганданда зулматнинг бир чеккасини ёритади-ку! Мендан хафа бўлишмасин-у, ҳозир кўпгина зиёлиларимиз ўз қадрларини анча тушириб юборгандай кўринади. Менинг назаримда, зиёлилик ҳамиша фидойилик тушунчаси билан боғлиқ бўлиб келган. Ҳалқقا, юрга хизмат қилиш йўлида, зиёли одам зинҳор-базинҳор ўз манфаатини, ўз фароғатини ўйламайди, ўзига имтиёзлар, мукофотлар талаб қилмайди, аксинча, ўзи қийналса-да, оч колса-да, дакки эшитса-да, зиммасидаги муқаддас вазифани ўташга харакат қиласди. Қачон шу масалалар ҳакида ёёсам ё гапирсам, кўз ўнгимга Собит Комилов деган мактабдаги ўқитувчимиз келади. Яхши дарс берар, бирор соат дарс қолдирмас эди, болаларни ўз фарзандидай яхши кўрарди. Аёлманд одам эди. Уруш даври бўлгани учун жуда қийналиб кетганди. Ҳатто дарсдан кейин Тошкент теварагидаги ҳовлиларга бориб, ҳосили йиғишириб олинган далалардан қолган-қутган турпми, шолғомми, лавлагими олиб келиб, шу билан болаларини боқкан кунларини биламан. Бирок бу одам бирон марта ҳам синфдаги ўқувчиларнинг қўлига таъма билан қараган эмас, буни хаёлига ҳам келтирган эмас, тиланчиликни, порахўрликни сира-сира ўзига муносиб кўрган эмас. Афсуски ҳозирги зиёлиларимизда бошқача ҳолни кўрамиз – улар ўзларининг қусурларини замоннинг оғирлиги билан изоҳлайдилар. Йўқ, бу масалада замонга айб юкламаслик керак. Ҳамма гап виждоннинг сусайиши-ю, ҳакалак отиб кетган нафсада. Зиёлилар даставвал йўқолган обрў-эътиборларини қайта тикламоқлари даркор.

*– Қизиқарли ва мазмундор сұхбатингиз учун катта раҳмат!*

*Сұхбатдош: Жўра ХУДОЙБЕРДИЕВ*

*1999 йил*



## Марио Варгас ЛЬОСА МУТОЛАА ВА АДАБИЁТ ВАСФИ

Нобель маърузаси

Беш яшарлигимда хат танидим – Боливиянинг Коҷабамба шаҳридаги де Ласал мактабида таҳсил олган акам Юстиниан менга илк устоз бўлди. Бу ҳаётимда туб бурилиш ясаган ҳодиса эди.

Бугун, орадан етмиш йил ўтиб ҳам, мени жодулаган ўша воқеликни – китоб саҳифаларидағи сиймолар замон ва мақон тўсиқлари оша ҳаётимга бостириб кириб, уни остин-устун қилиб юборганини аник-тиник эслайман. Капитан Немо билан ҳамнафас сув остида йигирма минг лъё йўл босдим, д’Артанъян, Атос, Портос ва Арамис билан елкама-елка туриб, устомон Ришелье сояи давлатида қироличага қарши фитна тўрини тўқиган ғаламисларнинг додини бердим, ўзимни Жан Вальжан ҷоғлаб, рамақижон Мариус билан Парижнинг пана-пастқам кулбаларига бош сукдим.

Мутолаа орзуларимни ҳаётга, ҳаётимни орзуларга айлантириди: муazzам адабиёт коиноти бир қарич болакай қўлини узатса етгудек масофага пастлади. Онамнинг айтишича, “қаламимга мансуб” илк кораламалар ўқиган китобларимнинг шундоқкина давоми эди, негаки, қаҳрамонлардан ажралишга кўнглим бўлмаган ёки асарларнинг хотимаси кўп-да маъқул келмаганди. Ўзим англаб-англамай, шу иш билан бутун умр машғул бўлдим: улғайиб, сочимга киров кўнганида ҳам, болалигимни завқу шавққа лиммо-лим тўлдирган ҳикояларни қоғозга туширишдан чарчамадим.

*Марио Варгас Льоса – перулик ёзувчи, драматург, публицист ва сиёсий арбоб. Унинг номи испанзабон адабиётини юксак рутбага кўтарган Хуан Рульфо, Карлос Фуэнтес, Хорхе Луис Борхес, Габриэль Гарсиа Маркес сингари сўз санъаткорлари қаторида эътироф этилади. Замонавий ва тарихий мавзудаги романлари Лотин Америкаси фикр аҳлига кучли таъсир кўрсатган.*

1936 йил 28 марта Перунинг Арекипа шаҳрида дунёга келган. Ленсио Прадо номидаги ҳарбий билим юртида таҳсил олган. Аммо билим даргоҳидаги носоғлом мухит боис, ўқишини ташлашиб кетган. Таҳсилни Сан-Маркос ва Мадрид университетларида давом эттирган. Бир муддат Испания, Франция ва Англияда истиқомат қилган.

Адаб “Шаҳар ва кўпаклар” (1963) деб номланган илк романи биланоқ тилга тушиган. Автобиографик ҳарактердаги асарда Ленсио Прадо номидаги ҳарбий билим юртидаги зўравонликлар, навқирон авлоднинг ақлини майиб, түйгусини мажруҳ этаётган нобоп тартиблар фоши этилган. Роман аламзада ҳарбийлар томонидан намойишкорона ёқилган, муаллифнинг ўзи ёмонотлиқ қилинган.

XX асрда Лотин Америкаси ҳалқлари синовли ўйларни бошдан кечирди. Бирин-кетин ҳокимиётга чиққан мустабид ҳукмдорлар миллатлар бошига мислсиз кулфатлар солди. Кечмиши воқеаларни оғрикли қабул қилган ёзувчи инсон эрки, тафаккур ҳурлигини ҳимоя қилиб чиқди. “Яшил рангли уй” (1966), “Капитан Панталеон ва ҳожатбаборлар ротаси” (1973) асарларида ҳокимлар ва тобелар, золимлар ва мазлумлар мавзуси қаламга олинган. “Ибодатхонадаги мулоқот” (1969), “Қиёмат қўпганода” (1981), “Таканинг байрами” (2000) романларида эса мустабидлик тузумларининг анатомияси бадиий маҳорат билан чизиб берилган.

ЖАҲОН АДАБИЁТИ

Амадо Нерво ва Пабло Неруда шеърларини кўзида шашқатор ёш билан ўқиган шоиртабиат онам, машқларимдан боши осмонга етган, бурундор ва тепакал Педро тоғам, сўз санъатига бутун қалб ва вужудни баҳш этиш зарурлигини кулоғимга куйган Лучо амаким (холбуки, у маҳаллар адабиёт салтанати ўз фуқароларига кўп-да саховат кўрсатавермасди) бугун ёнимда бўлғанларидами!.. Умр йўлимда шубҳа-гумоннинг кўли баланд келган лахзаларда жонимга ора кириб, кўнглимни кўтарган хайриҳо инсонлар кўп учради. Уларнинг далдаси, жиндек омад ва, албатта, ўлгудек қайсар феълатворим сабаб бўлиб, ҳаётимни мўъжиз адабиётга, унинг қувончу шодликларига бағишладим; умримни акл бовар қилмас воқеани ҳаёт ҳақиқатига, ҳаёт ҳақиқатини акл бовар қилмас воқеага, кўримсизликни гўзаликка айлантира оладиган, алғов-далғовларга барҳам берадиган, ўткинчи лаҳзага умброкийлик баҳш этадиган, ўлимни-да енгиш кудратига эга, заминий кулфатлардан қочиб бошпана топиладиган параллель оламни яратишга сарф этдим.

Ёзиш жўн иш эмас. Тасаввурдаги воқелик сўзга айланиб, ўй-хаёллар қоғозга тушганида, ғоя ва образлар хира тортгандек туюлади. Ҳўш, уларга қандай қилиб масих нафасини бериш мумкин? Толе кулганини қарангки, улги олиш, этагидан тутиш учун сўз санъаткорлари, мураббийлар ҳамиша ёнимда бўлди. Флобер талант тарбиясида темир интизом ва чўнг ироди мухимлигини кулоғимга қўйди. Фолкнер сюжетни бойитиш ва пишиқ-пухта қилишда шакл (услуб ва структура) мухим ўрин тутишини ўргатди. Марторель, Сервантес, Диккенс, Бальзак, Толстой, Конрад, Томас Манн роман кўлами ва қарори сюжет чизигини маромига етказиш ва услугга сайқал беришдан кам аҳамият касб этмаслигини уқтириди. Сартр сўз кудратли куч экани, роман, пьеса ёки хикоя муайян даврда тарихни ўзгартиришга қодир эканига ишонтириди. Камю ва Оруэлл ахлоқий қадриятлардан маҳрум адабиёт ҳайвоний истакларга йўл очиб беришидан огоҳ этди. Мальро эса эпос ва қаҳрамонлик мотивлари бугун ҳам аргонавтлар, “Одиссея” ва “Илиада” давридаги каби аҳамиятли эканини эслатди.

Озми-кўпми, менга устозлиқ қилган адиларнинг барини санаб чиқиши лозим бўлганидами, ҳисобдан адашиб, кулгига қолишим аниқ эди. Ҳисоби йўқ уларнинг. Устоз адилар наинки ижодий маҳорат сирларидан воқиф

*Адаб 1990-йиллар бошида сиёсий арбоб сифатида майдонга чиқиб, “Демократик фронти”дан Перу президентлигига номзодини кўрсатди. Ўшанда Лъоса ўз қарорини ишнодай изоҳлаганди: “Мени катта сиёсатга етаклаган куч шахсий амбициялар эмас. Асло! Мени миглат олдидағи бурчдорлик ҳисси сиёсатга йўллади. Барча жабҳаларда бўхронни бошдан кечираётган мамлакатимга ёрдам бериши учун шу йўлни танладим. Бундай фавқулодда мушикул аўволда ҳеч бир кўзи очиқ фуқаро сиёсатдан четода туролмайди.”*

... Президентлик сайловида муҳандис Альберто Фухиморига имкониятни бой бергач, ёзувчи яна қизгин ижодга қайтади. Кейинги йиллардаги изланишилар меваси сифатида “Сатанг қизнинг саргузашлари” (2006), “Кельтнинг туши” (2010) романлари дунё юзини кўрди.

Адаб ижодини чуқур ўрганган олим Кейт Букер фикрича, унинг романларида сехрли реализм, модернизм ва постмодернизм унсурлари қоришиб кетган; тиниқ кувваи ҳофиза, қудратли таҳайюл ва кучли тафаккур эгаси бўлган муаллиф рамзу маъсозларга бой асарлари билан жаҳон романчилиги ривожисига катта ҳисса кўшиганди.

Дарвоқе, Лъоса сехрли реализм йўналиши асосчиларидан бири Габриэль Гарсиа Маркес билан қадрдан дўст бўлган, Маркес прозаси бўйича салмоқли шимий асар ҳам ёзган. Аммо кейинроқ номаълум сабабларга кўра икки забардаст адабининг орасига совуқчилик тушган...

Марко Варгас Лъоса – Испания қироллик академияси аъзоси, бир қатор нуфузли университетлар фахрий доктори. Ромуло Гальегос (1967), Шаҳзода Астурыйский (1986), Сервантес (1994), Чино дель Дука (2008) номидаги ҳалқаро мукофотлар соҳиби. Ҳокимият тузилмасини ҳамда инсоннинг исён, кураши ва мағлубиятини тасвирилашдаги маҳорати учун 2010 йили унга адабиёт бўйича Нобель мукофоти берилган.

Таржимондан

## ЖАҲОН АДАБИЁТИ

этишди, инсоннинг тубсиз ички оламини тафтиш қилиш, жасоратига тан бериб, шафқатсизлигидан нафратланишга ҳам ўргатиши. Улар надимларим бўлиб қолиши, китобларини ўқиб, энг тушкун паллада ҳам умидсизликка ён бермаслик лозимлигини англадим, биргина ўқиш ва ижод этиш неъмати учун тирикликни кўзимизга тўтиё қилсан арзиди, деган тўхтамга келдим.

Вақти-вақти билан ўйланиб қолардим: қашшоқлик, саводсизлик ва адолатсизлик авж олган, ўқувчилар сийрак, баракасиз, маданият эса бир сикимгина одамларга хос бўлган менинг мамлакатимда ёзувчиликка ҳавас қўйиш түяning ҳаммомни орзу килганига ўхшаб қолмасмикин?.. Бирок бу иштибоҳли ўй мени ижод ўйлидан қайтара олмади, фикру ёдимни рўзгор тебратиш ташвиши банд этган пайтларда ҳам ёзишдан тўхтамадим. Энди ўйласам, ўшанда тўғри ўйлутган эканман. Адабиёт нашъу намо топиши учун жамият юксак маданиятга эга бўлмоғи лозим эди, эркинлик, фаровонлик ва адолатдан мосуво жамиятда у йўқликка юз тутиши турган гап эди. Адабиёт туфайли, адабиёт уйғотган тафаккур, интилиш ва истаклар туфайли, хаёлот салтанатига сафар чоғи кўнгилда бош кўтарган кечинмалар туфайли, бугунги цивилизация одамийлашди, нажот топди. Адабиёт ахли ўйлаб топган бадиий тўқима кумга сингиган сувдек изсиз кетмади, бильакс, тошга айланган юракларни мумдек эритиб ташлади. Яхши китоблар бўлмаганида эди, инсониятнинг бугунги ҳолига маймунлар йиғлаган бўларди, мустақил фикрдан маҳрум лаббайгўйлар урчириди, дилижамлик йўқоларди, муте кайфият кенг ёйилиб, ўз-ўзини тафтиш этиш хисси – тараққиётнинг бош омили шу, ахир! – йўқоларди. Мутолаа, худди ёзувчилик каби ҳаёт кемтикликларига қарши исёндир. Ҳаётдан топа олмаганларимизга тасаввур кучи орқали эришишга ҳаракат қиласиз, инсон мавжудлигининг асоси бўлмиш ҳаёт истакларимизга жавоб бера олмаётгани, у бошқача бўлиши лозимлиги ҳақида ўзимиз англамаган суръатда фикр юритамиз. Бенаволиклардан зада бўлган пайтлар тахайюлимизнинг қушдек эркин парвоз этишига кўйиб берамиз – муваққат бўлса-да, ўзимиз орзулаган ҳаётда яшаб кўриш кўнгилга таскин бағишлиайди.

Озод ўй-хаёл бўлмаганида эди, биз учун эркинликнинг қадри қанчалар муҳим эканини тўла тушуниб етмасдик, мустабид шахс, мафкура ёки дин уни оёқости қилиб, дунёмизни дўзахга айлантирган тақдирда ҳам, буни тузук-куруқ идрок этолмасдик. Адабиёт гўзаллик ва баҳтга йўғрилган орзуларни уйғотиб қолмай, ҳар қандай шаклу шамойилдаги зулм-истибод түғдиралигидан хатардан огоҳ этади. Бунга шубҳа килганилар саволимизга жавоб берсинлар-чи: етти ёшдан етмиш ёшгача раъиятнинг юриш-туришини назоратга олмоқчи бўлган ҳукмдорлар нимадан бунчалик кўрқади, нега қаттол цензура тартибини жорий этади, нега мустақил ижодкорларнинг босган ҳар бир қадамини чўтга солади? Чунки улар инсоннинг китоб саҳифалари бўйлаб ҳаёлан эркин кезиши хатарли эканини яхши биладилар, ўқувчи китобларда тараннум этилган ҳурлиқ неъмати ҳамда амалдаги жаҳолат-таҳлика муҳитини муқояса килганида, бадиий тўқима исёнга ундаши мумкинлигидан кўрқадилар. Ёзувчи асарлари орқали – ўзи хоҳлайдими-йўқми, англайдими-англамайдими, бундан қатъи назар – норозилик келтириб чиқаради, у дунёнинг бир кам эканини, ҳаёлотдаги ҳаёт ўнгимиздаги ҳаётдан фаровонороқ эканини кўрсатади. Бу қараш фуқароларнинг онги ва зехнига ўрнашса борми, тамом, уларни алдаш-авраш қийинлашади, панжара ортида яшашни кўз-кўз қилаётган миршаблар ва ситамгарларнинг ёлғонига лакқа тушмайди.

Чин адабиёт халқлар ўртасида ишонч кўприкларини бунёд этади, тил, эътиқод, одат, анъана ва тутумлардаги ихтилофларни йўққа чиқариб, шодлик, ғам-ташвиш, ҳайрат туйғулари орқали бизларни яқдилу яктан қиласи. Улкан оқ наҳанг капитан Ахавни сув тубига тортиб кетганида, ўқувчининг юрагида – у Токиода яшайдими, Лимадами, ё Тимбуқтудами, бундан қатъи назар – кўркув хисси бош кўтаради. Эмма Бовари заҳар ичганида, Анна Каренина ўзини поезд тагига ташлаганида, Жюльен Сорель жаллод кундасига бош кўйганида, Борхеснинг “Жануб” қаҳрамони, шаҳарлик Хуан Дальманн овлоқ қишлоқ қовоқхонасидан чиқиб, қонсираган талончига дуч келганида, Комала (“Педро

## ЖАҲОН АДАБИЁТИ

Парамо” романни воқеалари кечган қишлоқ) ахолиси битта қолмай қирилиб битганида, ўқувчи – Буддага ишонадими, Конфуцийгами, Исо Масихгами, Аллоҳгами, ё ўзини дахрий деб биладими, бўйинбоғ тақиб, пиджак киядими, ё бурнус, кимоно, пончога бурканиб юрадими, булардан қатъи назар – бир хил инсоний изтиробни бошдан кечиради. Адабиёт ранг-баранг қарашлар замирида яқдил биродарлик ришталарини ўрнатади, жаҳолат, қалтабинлик, турли мафкура, тил ва динлар таъсирида юзага келган чегараларни супуриб ташлади.

Ҳар бир замоннинг ўз мудхиш жиноятлари бўлади. Бизнинг давримиз мутаассиб манқуртлар, худкуш террорчилар даври, олис ўтмишдан дайдиб келиб колган бу нусхалар инсон қонини тўкиш орқали жаннатга тушишига, боплаб қасос олишига, адолатсизликка барҳам беришига, энг тўғри эътиқодни қарор топтиришига кўр-кўrona ишонади. Ҳар куни дунёнинг турли буржларида бехисоб инсонлар ўзини ҳақиқат байроқдори деб билган кимсалар кўлида ўлим топмоқда. Мустабид империялар бирин-кетин қулаганида, ҳолокост, геноцид, тажовузлар ва қирғинбарат урушлар ўтмишга айланди, энди она сайёрамизда тинчлик, хурфирлилик ва инсон ҳуқуқларига хурмат муҳити ҳукм суради, олам гулистон бўлади, дея ширин орзуларга берилгандик. Лекин чучварани ҳом санаган эканмиз. Мутаассиблик таъсирида жаҳолатнинг янги-янги шаклу қўринишлари ёмғирдан кейинги қўзиқориндек бодраб чиқди, оммавий қирғин қуроли шу қадар тез ёйилди, бир тўда ақлдан озган сўзботирлар кун келиб ядро ҳалокатини келтириб чиқариши мумкин, бу таҳдид туфайли инсоният оромини йўқотди. Биз уларнинг режаларини йўққа чиқаришимиз, уларга қарши туришимиз ва албаттаға қозонишимиз лозим. Содир этаётган жиноятлари Ер сайёрасини зир титратиб, қалбларимизни таҳликага тўлдираётган бўлса-да, ҳартугул, улар кўпчилик эмас. Цивилизацияларнинг узок тарихи давомида кўлга кириптган ардоқли неъматимиз, бор-йўғимиз – озодлигимизни тортиб олмоқчи бўлаётган ғанимга терс қарашга ҳақкимиз йўқ. Либерал демократияни ҳимоя қилиш учун жонимизни беришимиз керак: гарчи муқаммал тартибот бўлмаса-да, у сиёсий плюрализм, тотувлик, бағрикенглиқ, инсон ҳуқуқлари, танқидга тоқат, қонун устуворлиги, эркин сайловлар, ҳокимиятнинг алмашиб туриши, алҳосил, бизларни ёввойилиқдан қутқариб, адабиёт яратган кўркам, бенуқсон хаётга етакламоқда, ушалмас орзуларимизни бирин-кетин рӯёбга чиқармокда. Қўли конга бўялган мутаассибларга қарши курашиш билан ардоқли орзуларимизни, уларни рӯёбга чиқариш имконини асраб қолайлик!

Ёшлигимда, бошқа тенгдош-даврадош ёзувчи ҳамкасларим қатори, марксизм тарафдори бўлганман, факат социализмгина ватанимда, Лотин Америкасида ва “учинчи дунё”да авж олган зулм ва бедодликка чек қўйишига чиппа-чин ишонғанман. Давлатнинг истаги ҳар нарсадан устун саналган, жамоавийликка асосланган тузумдан кўнглим қолиб, либерал демократга айланнишим – ўзимни шу тоифага мансуб деб биламан, ҳаркалай, шундай бўлишига ҳаракат киласман – узок ва машаққатли кечди. Кубада инқиlobчиларнинг давлат тепасига келиши (дастлаб шўроларнинг эгизаги бўлган ушбу бошқарув тизимини зўр мамнуният билан кўллаб-куvvatлаганман), тиканак симтўсиклар оша тутқунгоҳлардан қочишига мувваффақ бўлган диссидентлар билан сухбатлар, “Варшава шартномаси” мамлакатларининг Чехословакияга бостириб кириши каби воқеалар, шунингдек, Раймон Арон, Жан-Франсуа Ревель, Исаия Берлин, Карл Поппер сингари мутафаккирлар таъсирида аста-секин демократик маданият ва очиқ жамият тарафдорига айландим. Мулоҳазасизлик, балки қалтабинлик туфайли, Гарб зиёлиларининг кўзи шўро социализми оҳанжамаларидан, янада ёмони, Хитой “маданий инқилоби” ялтири-юлтурларидан қамашиб турган бир пайтда, узоқни кўра билган мазкур муаллим зотлар жасорат намунасини кўрсатишиди.

Болалигимдан Парижда яшашни орзу қилганман, француз адабиётига ошуфта ҳаваскор сифатида ўша ерда истикомат қилсан, Бальзак, Стендаль, Бодлер нафас олган ҳаводан мен ҳам тўйиб нафас олсан, чинакам ёзувчи

бўламан, Перуда қолсам, ўргамиёна қаламкашлиқдан нарига ўтолмайман, деб ўйлардим. Чиндан ҳам, қимматли сабоқлари, масалан, адабиёт фақат илҳом самараси эмас, интизом, меҳнат ва қатъият меваси эканини англатгани учун Франция ва француз маданиятидан ўзимни қарздор хис этаман. Саргр ва Камю ҳали ўлмаган, ижод билан нафас олган даврда яшадим; Ионеско, Беккет, Батай ва Чоран, Брехт драматургияси ва Ингмар Бергман фильмлари, Жан Виларнинг Миллий халқ театри ва Жан-Луи Барронинг “Одеон”и, “янги тўлкин” ва “янги роман”, Андре Мальронинг оммани маҳлиё қилган чиқишлари ва ўша давр Европасининг энг шов-шувлари томошаси – момақалдироқдек гулдираб, яшиндек чакнаган генерал де Голлнинг матбуот анжумани ва маърузалари кўзимни очди.

Ҳаммасидан ҳам, менга Лотин Америкасини қайтадан кашф этишга ёрдам бергани учун Франциядан миннатдорман. Перу тарих, жуғрофия, умумий ижтимоий-сиёсий муаммолар, уйғун ҳаёт тарзи ва оғзаки ҳамда ёзма муносабатлар асоси бўлган бетакрор тил воситасида бирлашган улкан ҳамжамиятнинг ажралмас бир қисми эканини англаб етдим. Ўша йиллари мазкур ҳамжамият бағрида мислсиз қудратли адабиёт дунёга келди. Фаранг заминида Борхес, Октавио Пас, Кортасар, Гарсия Маркес, Фуэнтес, Кабрера Инфанте, Рульфо, Онетти, Карпентьер, Эдвардс, Доносо ва бошқа адиллар китобларини ўқиб туширдим. Уларнинг асарлари испан забон адабиётига янги нафас олиб кирди, сўз усталарининг хизматлари туфайли Европа ва курраи арзнинг бошқа минтақалари Лотин Америкаси фақат давлат тўнтишилари, ҳавойи мустабидлар, серсоқол партизанлар, маракас чолғуси, мамбо ва ча-ча-ча ракслари ватани бўлиб қолмай, росмана адабиёт тилида яратилган бадиий ғоя, шакл ва образлар бешиги эканига ҳам ишонч ҳосил қилди.

Ўша даврдан ҳозирга қадар Лотин Америкаси гоҳ туртиниб, гоҳ суртиниб, анчагина йўлни босиб қўйди. Лекин Сесар Вальехо ўз шеърида ёзганидек, “hay, hermanos, muchí simo que hacer” (“биродарлар, ҳали қиласиган ишларимиз қўп”). Боливия ва Никарагуанинг демократия дайвосидағи кўғирчоқ ҳукуматларини ҳисобга олмагандан, минтақамиизда яккаҳукмдорлик тузумлари бармоқ билан санарли қолди, дарвоқе, Куба ва Венесуэла ҳам ўтмиш диктатуралариға ўзини ворис деб билади. Қитъанинг бошқа мамлакатларида демократик тартиб-қоидалар ҳалқ дастаги билан такомилга етмоқда, Бразилия, Чили, Уругвай, Перу, Колумбия, Доминикана Республикаси, Мексика, бутун Марказий Америкадаги ўнгу сўл сиёсий кучлар конун устуворлиги, фикр ҳурлиги, сайлов ва ҳокимиятнинг алмашиб туриши тамойиллари йўлида бир ёқадан бош чиқарип ҳаракат килмоқда, бу тарихда мисли кўрилмаган ҳодиса. Рост йўл ҳам шу! Агар Лотин Америкаси шу йўлдан оғишмай олға юрса, зулукдек жамият қонини сўраётган коррупцияга қарши беаёв курашса, ташки дунё билан ҳамкорликни жонлантирса, ҳали-замон “келажак қитъаси”дан бугунги кун қитъасига айланади.

Европада, умуман, бошқа ерларда ҳам ўзимни ҳеч қачон бегона хис этмаганиман. Париж, Лондон, Барселона, Мадрид, Берлин, Вашингтон, Нью-Йорк, Бразилия, Доминикана Республикаси – қаерда бўлмай, ўз уйимдагидек бемалол умргузаронлик қилдим. Хотиржам яшаш, ишлаш, янгиликлар кашф этиш, орзуларга берилиш, дўсту ёр ортириш, маънавий бисотимни бойитиши учун ҳамиша файзли бошпанга топилди. Ўзим истаб-истамай дунё фуқаросига айланаб қолганим билан, асл наслимни унутмадим, ватаним билан робитани узмадим – гарчи энди китобларимдаги воқеалар она юртимдан олисда кечеётган бўлса-да, Перу хотиралари ҳали ҳам менга туганмас илҳом манбай бўлиб хизмат қилади. Киндик қоним тўкилган заминдан олисда кечган йиллар давомида ватан туйғуси кучайса кучайдики, заифлашмади, тийрак нигоҳ ва ардоқли соғинчга доя бўлган жонбахш хотиралар окни қорадан, яхшини ёмондан ажратишга ёрдам беради. Ватан ишқи мажбурлаб уйғотилмайди: муҳаббатнинг бошқа кўринишлари каби у ҳар бир инсоннинг фитратида бўлади, у ошиқ-маъшуқ, ота-она ва фарзандлар ҳамда дўстлар кўнглини висол мұждаси билан хушнуд этади.

## ЖАҲОН АДАБИЁТИ

Перу умрбод қалбим тўрида яшайди. Мен ўша заминда туғилиб ўсдим, ақлимни танидим, ҳаёт йўлим, аъмолимни белгилаб берган болалик ва ёшлик йилларимни ўтказдим, илк муҳаббатнинг ширин оғриқларини бошдан кечирдим, нафратландим, хурсанд бўлдим, изтироб чекдим, бош-кети йўқ хаёлларга берилдим. Ҳали-хануз Перуда рўй бераётган воқеалардан бошка жойларга қараганда кўпроқ хаяжонланаман, кўпроқ таъсиранаман, кўпроқ ғамга ботаман. Бу менинг изму ихтиёrim билан кечадиган ҳолат эмас – табиий йўсинда шундай кечади. Перудаги сўнгги диктатура даврида демократик мамлакатларни мустабид тузумга қарши дипломатик ва иқтисодий жазо чораларини қўллашга даъват этганимда, айрим юртдошларим мени хоинликада айблашди, фукаролиқдан маҳрум этилишимга ҳам бир баҳя қолди. Аслида, мен Пиночет, Кастро, Афғонистондаги толиблар, Эрондаги имомлар ҳокимиияти, ЖАРдаги айирмачилик сиёсати ёки бугун Мъянма деб аталаётган Бирмадаги ҳарбий зобитлар яккахукмронлиги – мустабидликнинг ҳар қандай шаклларига қарши муросасиз бўлганман. Худо кўрсатмасин, эртага Перуда яна бир давлат тўнтариши рўй бериб, эндиғина куч олаётган демократия ниҳоли кесиб ташланса, яна шундай муросасиз йўл тутаман. Ҳар нарсани ўз қаричи билан ўлчашга одатланган бадгумонлар менинг бу хатти-харакатимни аламзада одамнинг ҳис-хаяжонга берилиб, ўйламай-нетмай айтган гапи, деб иddaо қилишди. Йўқ, мен мустабидлик ҳар қандай мамлакат учун катта мусибат; зўравонлик ва коррупциянинг дояси, деган қатъий эътиқоддан келиб чиқиб шундай йўл тутдим, бу иллат миллатлар келажагини хавф остида қолдиради, йиллар давомида битмайдиган оғир жароҳатлар етказади, демократия йўлига тўғаноқ бўлиб, авлодан авлодга ўтадиган заарли одатларнинг урчишига олиб келади. Шунинг учун ҳам мустабидлик тузумларига қарши барча воситаларни, жумладан, иқтисодий жазо чораларини қўллаган ҳолда курашиш тарафдориман. Ачинарлиси, демократик мамлакатлар хукуматлари Кубадаги “Оқ кийимли хонимлар”, Венесуэладаги мухолифат, Аун Сан Су Чжи ёки Лю Сяобо каби ўз давлатида яккахукмронликка қарши курашаётган кучларни қўллаб-қувватлаш ўрнига золимлар билан қадаҳ уриштироқда. Довюрак инсонлар факат ўзларининг эмас, бизнинг ҳурлигимиз учун ҳам курашаётганларини эсдан чиқармайлик.

Ватандошим Хосе Мария Аргедас перуликлар танасида турли эл-элатларнинг қони оқади, деганди. Топиб айтилган гап. Биз шундай халқмиз, ўзи истайдими-йўқми, ҳар бир перуликтин юрагида тўрт улус эътиқоди – турли анъаналар ва диний қарашлар қўним топган. Мен ўзимни кўхна Наск ва Паракас маданиятининг вориси деб ҳис этаман. Испан маданиятига қадар мавжуд бўлган ушбу тамаддун эгалари оддий күш патидан кийим-кечак тиккан, ҳозирда дунёнинг энг номдор музейларида сакланаётган мочикано ва инк кулолчилиги намуналарини яратган. Мачу-Пикчу, Чиму, Чан-Чан, Куэлап каби кўхна маданият ўчоқларини, Сипан, Эл-Бруҳо, Эл-Мол, Ла-Луна сингари беназир меъморий обидаларни бунёд этган. Айни чоғда, ўзимни Перуга қилич ва наиза билан Греция, Рим маданияти, яхудий-насроний анъаналари, Уйғониш нафаси, Сервантес, Кеведо, Гонгора каби ижодкорлар, кейинроқ Анд халқлари андак сайқал берган Кастилия тилини олиб келган испан суворийларининг авлоди деб биламан. Африка қитъаси ҳам Перунинг ранго-ранг маданиятини ўзига хос таровати, мусиқаси, ижодиёти билан янада бойитди. Тарих қатламларига чукурроқ кириб борилса, Перу Борхеснинг “Алеф” и каби мўъжаз миниатюрага жо бўлган ҳайҳотдек мамлакат эканига амин бўлиш мумкин. Ҳайратангиз шараф соҳиби бўлган мамлакат хилма-хил маданият ва қарашларни ўз бағрида тарбиялаган.

Американинг босиб олиниши, бошка барча истилочилик юришлари каби қонли кураш ва шафқатсиз қирғин сифатида тарихга кирди ва албатта буни асло оклаб бўлмайди. Лекин биз кўпинча ушбу талончилик юришлари ва қирғинбаротларнинг бош айбори ўз ота-боболаримиз – Америкага кемада сузуб келган ва ҳудудга хос ҳаёт тарзини қабул қилган испанлар (уларнинг Испанияда қолган юртдошлари эмас!) эканини унутиб қўямиз. Демак, адолат

юзасидан танқид найзасини, аввало, ўзимизга қаратишими兹 лозим. Икки юз ийл мұқаддам мустамлака ҳудудлар Испаниядан мустақил бўлгач, ҳокимият тепасига келган арбоблар мавжуд адолатсизликка чек қўймади, хиндуларни озод қилмади, аксинча, ўзга сайёрадан келган истилочилар каби уларни қулдек ишлатаверди, айрим мамлакатларда эса тубжой ҳалқлари бутунлай ё қисман қириб ташланди. Ҳақиқатга тик боқиб айтганда, икки юз ийл давомида хиндуларни озод этиш бизнинг, ха, факат бизнинг зиммамиздаги мажбурият бўлиб келмоқда. Бу ҳозиргача бутун Лотин Америкаси ҳалқлари бўйнидаги тавқи лаънат бўлиб қолмоқда – шармандалиқдан ҳар биримиз уялишимиз керак!

Испания – Перу каби юрагимдан жой олган мамлакат, бу юрт олдиаги қарзларимни узишга умрим етмаса керак. Ер куррасида Испания мамлакати бўлмаганида эди, мен ҳеч қачон ушбу минбарга қўтарила олмаган, адаб сифатида танилмаган бўлардим, кўплаб қаламкаш ҳамкасларим каби күёш нури етиб бормайдиган қоронғу маконларда қолиб кетардим. У ерларда тақдир кулиб боқмаган талай ижодкорлар саросар кезади, уларнинг асарлари чоп этилмайди, ўқилмайди, уларга мукофотлар берилмайди, ожизгина таскин шуки, шояд, кун келиб, авлодлар уларнинг иқтидорини кашф этса! Барча китобларим Испанияда дунё юзини кўрди, камтарона меҳнатларим шу юртда эътироф этилди, Карлос Барраль, Кармен Бальсельс ва бошқа қўпдан-қўп дўстлар қўлёзмаларим ўз ўкувчисини топиши учун куйиб-пишиб ёрдам беришиди. Ватанимда фуқароликдан мосуво бўлаётган пайтим, Испания менга иккинчи фуқаролик ҳадя қилди. Испан паспортига эга перулик эканимни ҳамиша табиий қабул қилганман. Негаки, факат каминага бўлган муносабатдан келиб чиқиб эмас, балки тарих, тил, маданият каби мухим омилларга таяниб, Испания ва Перуни битта танганинг иккита томони, деб ҳисоблаганман.

Испан заминида узоқ йиллар умргузаронлик қилдим, лекин ҳаммасидан ҳам, Барселонада 1970-йиллар бошида кечган беш йиллик ҳаётимни ёдга олганда, юрагим энтикиб кетади. Франко диктатураси отдан тушса-да, эгардан тушмаганди – ҳали ҳам раъиятга курол ўқталиб турарди, лекин жон талвасасида сўнгги нафасини олаётган қоқсуяқ бемор ҳолига тушган ҳокимият жамиятни, хусусан, маданий соҳани аввалигидек назорат қила олмасди. Мустабид ҳокимият қўтарган баланд деворда дарз ва ёриклар пайдо бўлган, сергак маъмурларнинг эса уларни ямашга курби етмасди, ёриклар оралаб илгари тақиқланган янги ғоялар, китоблар, фалсафий оқим ва таълимотлар, адабий қарашлар кириб келди. Бошқа бирор шаҳар Барселона каби эркинлик насимидан қўп ва хўб баҳраманд бўлмади, бошқа бирор шаҳарда Барселона каби ижодий-ғоявий юксалиш рўй бермади. Барселона Испаниянинг маданий пойтактига айланди: ҳурлиқ ҳавосини эҳтиёжманд одамлар тўп-тўп бўлиб кела бошлади. Бу гўша маълум маънода Лотин Америкаси учун ҳам маданий марказ вазифасини ўтади: Лотин Америкаси мамлакатларида етишиб чиқкан талай рассомлар, ёзувчилар, ноширлар, санъаткорлар ё шу ердан қўним топган, ё тез-тез келиб турарди, нафсилими, бизнинг давримизда ёзувчи, шоир, рассом, бастакор бўлишни ният қилган одам Барселонада яшashi шарт эди. Бу шаҳар унтилмас биродарлик, дўстлик муносабатлари, янги асарлар, сермаҳсул ижод даври сифатида умрим китобини ёруғ саҳифалар билан бойитди. Худди Париж каби Барселона машхур Бобил минорасини эсга солар, умуминсоний, космополит шаҳарга айланганди, Фуқаролар урушидан кейинги даврда илк маротаба испан ва лотин американси ёзувчилари ўртасида қардошлиқ муносабатлари тикланди, илдизи бир эканини тушуниб етган қалам ахли умумий ғоялар рўёби йўлида бирлашди, Испанияда диктатура ҳокимияти сўнгги кунларини бошдан кечирар, янги демократик жамиятда маданият асосий ўрин тутиши маълум бўлиб қолганди.

Гарчи барча умидлар оқланмаган бўлса-да, Испаниянинг диктатурадан демократияга ўтиши бизнинг давримиз учун ибратомуз жиҳатларга эга, негаки, бу эврилиш соғлом тафаккур ва идрокнинг ғалабасига йўл очди, магик реализм йўналиши романларида бўлгани каби мўъжиза рўй бериб, бир-бiriни

## ЖАҲОН АДАБИЁТИ

кўрарга кўзи, отишга ўқи йўқ бўлган сиёсий мухолифлар умум манфаати йўлида низо ва адоватларни четга суриб, бир ёқадан бош чиқарди. Испаниянинг мустабидликдан воз кечиб озодликка, қолоқликдан воз кечиб илфорликка, “учинчи дунё” мамлакатларига хос қашшоқлик ва нотенглиқдан воз кечиб “ўрта табақа жамияти” йўлига ўтиши, Европага интеграцияси, демократик тартиботни қисқа фурсатда амалга татбиқ этиши мамлакатни жаҳон билан хамкадам қилди. Ушбу ўзгаришларни яқиндан, баъзида ичкаридан туриб, чексиз ҳаяжон билан кузатдим.

Миллатчилик замонавий дунёнинг жумладан, Испаниянинг соғлом вужудига илашган дарди бедаво, бу иллат гўзал эртакни фожиага айлантирмасин, деган умид ва илинждаман. Ҳудудий (баъзида диний) тарафкашлик, қалтафаҳм ва қалтабин ғояларга – миллатчиликнинг ҳар қандай хуружига асло тоқат қилиб бўлмайди. Этник ва ирқий хурофотлардан озиқланувчи миллатчилик ўсиб келаётган интеллектуал авлодни нобуд қиласди. Ҳавотирли жихати, тасодифий воқелик – инсоннинг қиндиқ қони тўкилган жой омилини байроқ қиласди, палид қарашларини юксак ахлоқий қадриятлар билан хаспушлашга уринади. Диний мутаассиблиқ билан бирга, миллатчилик инсоният тарихидаги энг даҳшатли қирғинларга сабаб бўлган, бу ўринда жаҳон урушлари ва Яқин Шарқдаги бугунги талотўпларни эслаш кифоя. Айнан миллатчилик туфайли Лотин Америкаси Болқон каби уруш майдонига айланди, лузумсиз урушлар ва низоларда бегуноҳ инсонлар қони тўкилди, мактаб, кутубхона ва шифохона қуриш ўрнига, беҳисоб маблағлар қурол-аслаҳа сотиб олишга сарфланди.

Сўқир миллатчилик, “келинди”ни сифдирмаслик иллатлари билан ватан-парварлик туйғусини чалкаштирмаслик керак, зотан, ота-боболаримиз яшаган, қиндиқ қонимиз тўкилган, нурли орзу-хаёлларимизни аллалаб камолга етказган, қувончу шодликларимизга шоҳид бўлган, бизни кимсасизлик азобидан қуткарган заминга муҳаббат зулматдаги нур каби йўлимизни ёритади. Ватан байроқ, мадхия, енгилмас қаҳрамонлар ҳақидаги оташин қасидалардангина иборат эмас, ватан бу кўнглимизга соғинч номи билан муҳрланган қадрон масканлар, тувишгандан-да яқин инсонлар, Ернинг қайси пучмоғида яшамайлик, кун келиб қайтганимизда маломатсиз ўз бағрига оладиган маъводир.

Перу деганда, кўз олдимга Арекипа – қиндиқ қони тўкилган, лекин тақдир тақозоси билан тарқ этган она шаҳрим келади, чинакам арекипенъос (арекипалик) бўлган жигарларим овораи жаҳон бўлиб, дарбадар кезган даврларида ҳам Оқ шаҳарни унутмаганлар – онам, бувам ва бувим, холаларим айтиб берган соғинчли ҳикоялар билан бу шаҳарнинг нурли сиймоси онгу шууримга муҳрланди. Перу деганда, кўз олдимга Пьюра – чўлнинг қоқ ўртасида бино бўлган, саҳрои дарахтлари, меҳнаткаш пак-пакана эшаклари (пъюраликлар ғиринг демай хизмат қиласдиган бу жониворларни “иккинчи оёғимиз” деб эркалас кўйишарди) билан ёдда қолган жойлар келади, шу ерда чақалоқларни лайлак олиб келмаслиги, балки черков гуноҳи азим деб баҳолаган эр-хотинлик муносабатларидан дунёга келишини билдим. Перу бу – Сан-Мигель мактаби ва илк бор бир парчагина пьесам саҳналаштирилган “Варьете” театри. Перу бу – Лиманинг Мирафлорес даҳасидаги Диего Ферре ва Колумб кўчалари кесишишган чорраҳа, уни “баҳт қелтирувчи даҳа” деб атагандик, шу ерда калта иштонли болакайдан шим кийган ўспиринга айландим, биринчи марта сигарета чекдим, рақсга тушишни ўргандим, севги дардига йўлиқдим, изҳори дил қилдим. Перу бу – “La Crónica” газетасининг туну кун қирққулоқ қозондек қайнаган таҳририяти, шу ерда ўн олти ёшимда кўлда қалам билан иш бошладим, адабиёт каби бу сеҳрли оламни ҳам бутун умр тарқ этолмадим, журналистлик тўқисроқ яшаш, дунёни тўлароқ англаш, турфа мамлакат, турли табақадаги одамлар – эркак-аёл, дўст-душман, яхши-ёмон билан кўришишга имкон берди. Перу бу – Леонсио Прадо номидаги ҳарбий академия. Хонанишин бўлиб яшаб кўп нарсадан ғоғил эканман, академияда ўқиб, Перу мўъжазгина қалья эмас, кўхна ва улкан мамлакат эканини билиб олдим, тенгсизлик ҳукм сурган жамиятда тез орада курдрагли бўрон ва довуллар юз беришини савқи табиий билан англадим. Перу бу – “Кахиде” яширин ташкилоти, Сан-Маркос университетининг бир

гурух “шаккок” талабаси ўзимизча жаҳон инқилобига ҳозирлик кўргандик. Перу бу – Озодлик ҳаракатида иштирок этган қадрдонларим; қўпорувчилик ҳаракатлари, таъкиб-тазииклар ва сиёсий қотилликлар шароитида уч йил давомида демократия ва эркинлик маданиятига кўксимизни қалқон қилгандик.

Перу бу – Патрисия, охудек ҳеч кимга тутқич бермаган холаваччам, қирқ беш йил муқаддам бошимга баҳт қуши қўниб, унга уйландим. У ҳозиргача менинг инжиқликларим, савдои феълим, қуюшконга сифмайдиган одатларимга тоқат қилиб келмоқда, ижод учун бадастир шароит яратиб, иссиқ-совуғимдан хабардор бўлиб турибди. Шу мушфик хилқат бўлмаганида, турмушнинг шиддатли довулларида йўқ бўлиб кетишим ҳам мумкин эди, ҳаётимизга нур олиб кирган фарзандларимиз Альваро, Гонсало, Моргана ва олти набирам дунёга келмаган бўларди. Кўлидан ҳамма иш келади ва ҳамма ишни қойилмақом бажаради. Патрисия уйдаги муаммоларни ҳал қилади, хўжалик ишини юритади, бошбошдокликка чек қўйиб, тартиб ўрнатади, журналистлар ва хира муҳлисларни қувиб солади, вақтимни ҳимоя қилади, учрашув ва сафарлар ўюнтиришга бош-қош, сафархалтамни ҳозирлайди, шу қадар олиҳимматки, аҳён-аҳёнда “Марко, кўлингдан ёзишдан бошқа иш келмайди!” деб “хушомад” ҳам қилиб қўяди.

Адабиёт мавзусига қайтсан. Болалигим чинакам пошшоликда ўтган, десам муболаға бўлмайди. Кочабамбадаги уч айвонли ҳовлимизда катта хонадон муҳитида ўсиб улгайдим. Амакиваччаларим ва дўстларим билан гоҳ Тарзан бўлардик, гоҳ ўзимизни Сальгари қаҳрамонлари қиёфасида тасаввур қиласардик. Пьюра префектурасидаги уйлар чердагида кўршапалаклар ин курганди, фалак тоқида юлдузлар нур сочади, кун бўйи иссиқдан азият чеккан замин ҳарсиллаб нафас олади, шу маҳал кўршапалакларнинг учиши бизга сирли-синоатли бўлиб туюларди. У маҳаллар ёзиш мен учун анчайин ўйин эди, қораламаларимни тинглаган яқинларим кўнглимни кўтаришар, мени – набира ва етим жиянчани (менга отанг ўлган, деб айтишганди) қарсаклар билан сийлашарди. Отам бўйдор, кўркам киши бўлган, ҳарбий денгиз формасида тушган сурати столим устида туради: ҳар тун уйкуга кетишдан олдин суратни қўлимга олиб дуо қиласар, сўнг уни ўпид қўярдим. Пьюрада кечган тонгларнинг бирида – ўшанда ичимга кириб олган дилхиралик ҳали-хануз мени тарк этмагандек – онам суратдаги киши асли тирик эканини айтиб қолди. Отам билан яшагани Лимага жўнаб кетишимиз керак экан. Ўшанда ўн бир ёшда эдим, шу воқеадан кейин ҳамма нарса ўзгарди-қолди. Болаликка хос маъсумлик қайгадир ғойиб бўлди, бола идрокимга ёлғизлик, ҳукмфармолик, катталар ҳаёти ва ҳадик тушунчалари бостириб келди. Хайрият, китоблар, яхши китоблар жонимга ора кирди, факат гўзалликлардан иборат оламдан бошпанга топдим, охири кўринмайдиган саргузаштларга андармон бўлиб, яна эркинлик ва баҳт туйғусига ошно тутиндим. Бу вактда кишибилмас ёза бошлагандим – бирор айб ишга кўл ургандек, тақиқланган мевани тановул килгандек сезардим ўзимни. Адабиёт мен учун ортиқ ўйин бўлмай қолди. У ноҳуш вазиятларга қарши норозилик, исён, кўнгилсизликларни аритиш, ҳаёт мазмунини қидириш воситасига айланди. Ўша пайтлардан ҳозирга қадар дилгир бўлсан, саросимага тушсан, кўнглимни руҳсизлик чулғаса, бошим билан ёзув-чизувга шўнғииман, зим-зиё жинкўчада кетаётган одам бирдан ёруғликка чиққандек, ҳалокатга учраган кеманинг очик денгизда қолиб кетгандан йўловчиси дафъатан қайиқقا дуч келиб қолганидек, адабиёт менга најот қўлини чўзади.

Ёзишигна билан кудук қазишдек машаққатли иш, гоҳида оёқ-кўлим фалаж бўлиб, юрагим уришдан, миям ишлашдан тўхтаганга ўҳшайди (бошқа ёзувчиликларда ҳам шундай бўлса керак), лекин бу каби қийинчиликларга қарамай, дунёдаги ҳеч бир машғулот асар устида ойлаб, йиллаб тер тўкиш аноссида ортирилган завқни беролмайди, денгиз тубига шўнғиган чапдаст ғаввосдек адабиёт салтанати оралаб сўз ёмбилиарини қидирасиз, бедор тунлар, жидди жаҳд ўз самарасини беради, марвариднинг сочилиб кетган доналари тизилиб, яхлит асар дунёга келади. “Ёзувчилик бу – ҳаёт тарзи”, деган Флобер қанчалар

## ЖАҲОН АДАБИЁТИ

ҳақ эди. Бу шундай ҳаёт тарзики, гоҳида хомхаёлларга бериласиз, гоҳида қувончдан ўзингизни йўқотасиз, гоҳида кўнглингиз тизгинсиз фикрлардан оловланади, асов от кетидан қувлаган шинавандга овчи сингари тутқич бермас образлар ортидан тушасиз, иштаҳа овқат маҳали келганидек, ижод сурури кўзингизни кўр, қулоғингизни кар қилганини-да сезмайсиз. Роман устида ишлаш асносида воқеалар суръатидан дастлаб андак бошингиз айлангандек бўлади, асар қоғозга кўча бошлагач, саркаш персонажлар сизга бўйсунмай қўяди, ўзи билганча ҳаракатланади, ўйлайди, хис этади, ҳатто ўзига ҳурмат-эътибор талаб қила бошлайди, энди уларни бирор ишга мажбурлаб бўпсиз, эркidan маҳрум этишни эса хаёлингизга ҳам келтирманг, факатгина жонини олиш орқалигина персонажларни яна ўз измингизга сола биласиз, аммо воқеалар табиий маромини бу тарзда ўзгартириш билан ўқувчи ишончини қозониб бўлмайди – ҳатто ҳозир ҳам кўлимга қалам олганимда, ўша илк машқлар чоғи хис қилган ҳаяжонли кечинмалардан кутулолмайман. Бу кечинмалар шу қадар инжа, шу қадар соҳирки, уларни севикили дилдор билан кунлаб, ҳафталаб, ойлаб ўтказилган висол лаззатигагина муқояса қилиш мумкин.

Адабиёт ҳакида гапира туриб, романга кўпроқ аҳамият қаратдим-у, унинг яна бир муҳим шакли – драматургияга хийла эътиборсизлик қилдим. Бу, албатта, бориб турган адолатсизлик. Драма – менинг биринчи муҳаббатим. Ўсмир пайтим Лимадаги Сегура театрида Артур Миллернинг “Гумаштанинг ўлими” спектаклини томоша қилдим, қарашларимни ағдар-тўнтар қилган ушбу томоша таъсирида мук тушиб инклар ҳакида пьеса қораладим. Ўтган асрнинг 50-йиллари Лимада театр ҳаракати кенг ёйилганидами, мен роман-навис эмас, драматург сифатида танилган бўлардим. Аммо саҳна санъати хос доирада қолгани сабабли, кўпроқ ҳикоя шакллари устида изландим. Театрга муҳаббатим сўниб қолгани ҳам йўқ: романларнинг куюқ соясида пинакка кетган бу туйғу бирор спектакль кўриб, мутаассир бўлган маҳалим яна бош кўтариб, оромимни ўғирларди. 1970-йиллар охирида юз билан юзлашган қария қариндошим Мамаэ момо ҳақидаги хотиралар менга тинчлик бермади. Умрининг сўнгги йиллари яқинлари билан алоқани тамомоли узиб, узлатга чекинган, хотирот ва хаёлот оламидан паноҳ топган аёл тақдирини қаламга олгим келди. Ўшандаёқ, бу воқеани факт театр учун ёзиш лозимлиги, воқеалар силсиласини саҳнадагина ёрқин ва таъсиридан тарзда ифодалаш мумкинлигини хис этдим. Ушбу пьесани ҳаваскор қаламкашҳо ҳос ҳаяжон ва журъатсизлик билан битдим, бош ролни Норма Алеандро ижро этган асарни саҳнада кўрганимда эса, елкамдан тоғ ағдарилгандек бўлди, шу-шу, роман ва ҳикоялар орасидаги танаффусларда мазкур жанрга бот-бот мурожаат қилдим. Очиини айтай, етмиш ёшимда ўзим ҳам саҳнага актёр сифатида ҳаяжондан туртиниб-суртиниб чиқишим етти ухлаб тушимга кирмаганди. Бу қалтис саргузаштмонанд ҳолат бутун умр турфа тақдирларни қаламга олган ёзувчи – каминага илк бор бадиий тўқима маҳсули бўлган персонаж ҳаётини томошабин қаршисида яшаб кўриш имконини берди. Ушбу бокира таассуротларни (ҳаяжон ва кўркувдан эсхонам чиқиб кетганини ҳам кистириб ўтмасам бўлмас) баён этишга мени кўндиригани учун дўстларим – режиссёр Хуан Олле ва актриса Айтан Санчес Гихондан бениҳоя миннатдорман.

Адабиёт – ҳаётнинг ёлғондакам тасвири, лекин у борлиқ мазмунини англашда кўмакка келади, инсон туғилиб, адашиб-улоқиб, ахийри ўлим топадиган уч-кети йўқ турмуш сўқмоқларида сарбон янглиф йўл курсатади. Реал воқеликдаги омадсизлик ва дилсиёҳликларни унудишга ёрдам беради, адабиёт кўмагида тирикликтининг қатор жумбоклари яширилган маҳфий ёзувни кисман бўлса-да, ўқиши мумкин, зотан, одамзод табиатан қатъиятдан кўра шубҳа-гумонга мойил, ақл ёки тажрибанинг устунлиги, шахсий ва жамоавий вазифалар, кўнгил амри, мозийнинг маъниси ва маънисизлиги, тафаккурнинг ўзгариб туриши каби масалалар кўпинча бизни боши берк қўчага олиб кириб қўяди.

Мени қуийдаги ҳолат чандон ҳайратимни оширади: ҳали ақлсиз мавжудотлардан у қадар фарқ килмайдиган аждодларимиз (мулоқот воситаси саналган

тил эндигина пайдо бўлган пайтлар, ахир) мавхум бир алфозда – ғорларда, гулхан атрофида ўтирганча, момоқалдириқ ва чақмоқ каби табиат таҳдидлари, вахший жониворларнинг хуружи шароитида, ҳикоялар ўйлаб топиб, бирбирига айтиб беришни ўрганганд. Бу инсоният тарихидаги муҳим паллалардан бири эди, негаки, ровийнинг сирли овози ва ажабтовур ҳикояларига мафтун бўлган ибтидоий одамлар кейинроқ цивилизация яратди, қабилалардан индивидлар ажралиб чиқди, олис тадрижий тараққиёт мустақил фикрли кишиларни тарбиялади, фан, санъат, қонун, эркинлик ғоялари юзага келди, инсонни, табиат ва коинотни тадқиқ этишда кўз кўриб, қулоқ эшитмаган на-тижаларга эришилди, одамзод юлдузларга учишни кўзлаб колди. Тилсимларга бой оламнинг таҳдидларидан юрак олдириб қўйган, тирикликтининг бор маъно-мазмунини бетизгин нафс майлларини қондириш ва жонини оғатлардан сақлаш деб билган ибтидоий тингловчиларга илк эртаклар, масаллар, асотир, афсоналар, ҳойнаҳой, жазирамада ёқкан лайлаккордек кучли таъсир кўрсатган бўлса керак. Одамлар ровийнинг ҳикояларидан илҳомланиб, орзу-хаёлларга бериладиган, ўй-фикрлари билан ўзаро ўртоқлашадиган бўлди: яшаб қолиш учун муттасил курашишга одатланган, танглайи турмуш ташвишлари билан кўтарилигандан одамзоднинг ҳаёт тарзи ўзгарида. Атроф-муҳитдаги жумбокларни ечиш, синоатларнинг тагига етиш шаҳдида мавжуд қолиплар фавқулода жасорат билан бузуб ташланди.

Узлуксиз такомиллашув жараёнида ёзув пайдо бўлди, оғзаки ҳикояларни ёзib қўйиш, демакки, уларни мангуликка муҳрлаш имкони туғилиши билан адабиёт юзага келди. Янги авлод қулоғига қуйиб олмагунича, адабиётини шунчаки қўнгилочар машғулот, фақат ақлни пешловчи, зеҳнни очувчи, шижоатни оширувчи фаолият тури сифатида тушуниш хато эканини тақоррлашдан чарчамаймиз. Адабиёт цивилизацияни сақлаб қолиш учун керак, у инсониятнинг энг яхши фазилатларини тараннум этиш орқали башар зотини күткаради. Тараққиёт филдираги орқага айланниб, инсонлар яна ибтидоий ҳаёт тарзига қайтиб кетмаслиги учун керак у. Одамлар воқеликка ҳаддан зиёд чукур кириб бориб, мўътадил йўлдан тойиб кетмаслиги учун керак у. Инсон ўзи яратган ақлли машиналарга кул ва хизматкор бўлиб қолмаслиги учун керак у. Бу дунё адабиётсиз идеаллардан мосуво, жонсиз темиртан машиналар оламига айланади, инсонни инсон қилувчи, одамийликнинг жавҳари бўлган фазилатлар унутилади.

Тафаккур ва тасаввур меваси бўлган адабиёт ғорлардан осмонўпар биноларга қадар, сўйилдан оммавий қирғин куролига қадар, қабилавий ҳаётдан глобаллашув даврига қадар инсониятга муаллимлик қилди, фафлат уйқусига кетишдан, қирғин ва ҳалокатлардан сақлади. Бошқа бирор санъат тури “ёлғон ҳаёт” – адабиётчалик ҳаёлимизни ўғирламайди, онгу шууримизда инқилоб ясамайди. Зотан, адабиёт бизга реал ҳаёт бера олмайдиган қизғин саргузаштлар, оташин туйғуларни тухфа этади. Адабиёт – ёлғон, лекин онгу шууримизга у қадаган умид уруғлари ниш уриб, ниҳолга айланниб, мевага кириб, ҳақиқатга дўнади. Сехргар адабиёт инсонларга мўл-кўл умид ва ишонч улашади, ушалмас ниятларни ушалтиради, зўравонликни камайтириб, биродарқушлик урушларининг пайини қирқади, одамзодда ўзидан қоникмаслик ва исёнкорлик руҳини уйғотади, бу эса ҳамма замонларда ҳам тараққиёт омили бўлиб келган. Ҳа, зўравонликни камайтиради, лекин уни илдизи билан қуритиб ташлай олмайди. Чунки, яхшими ё ёмонми, инсоният тарихи тугалланмаган тарихдир. Демак, биз орзу қилиш, ўқиш, ёзишдан бир сония ҳам тўхтамаслигимиз керак, зоро, фонийни боқийга айлантирувчи, асов вақт устидан ҳукм юритишга имкон берувчи энг самарали йўл – шу!

*Стокҳолм, 2010 йил 7 декабрь*

*Рус тилидан  
Собиржон ЁҚУБОВ  
таржимаси*

**ЖАҲОН АДАБИЁТИ**



## ТЕАТР САНЬЯТИ ҚОИДАЛАРИ

(27 март – Халқаро театр  
куни муносабати билан)

Жаҳоншумул ихтиrolар буюкларга насиб қилади. Пушкин таъкидлаганидек, дахолар янги қонунларни кашф қилади, қобилиятлилар улардан тўғри ва унумли фойдаланади, қобилиятсизлар эса ҳар иккаласини хам инкор қилиб, фақат ўзларинигина доно деб ҳисоблайдилар.

Турли соҳаларда ихтиро қилган шахсларнинг номи, миллати, ирқи ва эътиқодидан қатби назар эҳтиром билан тилга олинади. Масалан, алгоритм ихтирочиси Ал-Хоразмий, бутун олам тортишиш қонунини кашф қилган Ньютон, ер ости ва устидаги нарсаларнинг таркибини аникловчи Менделеев даврий системаси дунёга маълум ва машҳурдир.

Жаҳон ижод ахли орасида Аристотелнинг “Поэтика” асари трагедиянинг яратилиш қоидалари билан машҳур бўлса, “Станиславский системаси” театр санъати намояндадари учун илмий-амалий дастур бўлиб келмоқда.

Театрни маънавий, маърифий, ахлоқий ва ғоявий тарбия мактаби, инсонни руҳан покловчи муқаддас даргоҳ деб билган Станиславскийнинг асл исми шарифи Константин Сергеевич Алексеев бўлиб, у 1863 йилнинг 5 январида, Москва шаҳрида туғилган. Алексеевлар авлоди йирик саноатчи зодагонлар доирасига мансуб бўлиб, бу сулоладан кўплаб машҳур маданият ва санъат намояндадари етишиб чиқкан. Алексеевлар оиласининг “Большой” ва “Малый” театрларда ўз муҳим ўриндиклари бўлиб, улар барча янги саҳналаштирилган ва гастролга келган театрларнинг спектаклларини томоша қилишган.

Константин 14 ёшга тўлганида унинг илтимосига биноан Алексеевлар хонадонида “уй театри” ташкил қилинди. 1877 йилнинг 5 сентябрида онасининг туғилган кунига бағишлаб, “уй театри”да саҳналаштирилган спектаклда Константин илк маротаба ҳаваскор актёр сифатида роль ўйнайди. У шу кундан бошлаб барча таассуротларини кундалик дафтарига муҳрлаб боради. Бу “уй театри” 1881 йилдан бошлаб “Алексеевлар тўғараги”га айланди. Машҳур тўғарак асосида 1888 или “Москва санъат ва адабиёт жамияти” ва унинг қошида “Мусиқали ва драматик театр” мактаби ташкил топди. Жамият фаoliyati тобора ривожланиб 1898 или Константин Алексеев-Станиславский ва Владимир Немирович-Данченко ҳамкорлигида “Москва Бадиий театр” ташкил қилинди. Бу оммабоп театр “кечинма санъати мактаби”нинг назарий ва амалий бешигига айланди.

Театр санъатига бўлган ихлос ва синчковлик Станиславскийни – “актёр саҳнанинг ижодкори ҳамда соҳибидир” деган фалсафий-ғоявий хulosага олиб келди. Бу ғоя унга 1877 йилдан бошлаб то умрининг охиригача тинчлик бермади. Станиславский 1935 йилнинг 7 августида Москва шаҳрида оламдан ўтди.

Станиславский – Константин Сергеевич Алексеевнинг таҳаллуси бўлиб, уни 1885 или, 22 ёшга тўлганида танлади. Сабаби, кундузи Алек-

сеевларга тегишли идораларнинг бирида раҳбарлик қилувчи амалдорнинг исми-шарифи ва обруси у ижро этадиган водевилдаги “шилким йигит” ролига мос тушмасди. Оила шифокори А.Ф.Макаров деган кишининг Станиславский тахаллуси билан “Алексеевлар тўғараги” спектаклларида қатнашиб юриши эсига тушади. Макаров бетоболиги туфайли саҳнани тарк этганини билган Константин унинг тахаллуси билан саҳнага чиқишга қарор қиласди. Бу тахаллус уни жаҳоннинг энг машхур театр назариётчиси ва амалётчиси сифатида дунёга танидти.

“Станиславский системаси” – театр санъатининг актёрлик маҳорати, режиссёрлик ва педагогика билан боғлиқ жараёнларни юксак бадий савияда ифодалаган “кечинма санъати” тизимининг назарий асослариидир. Бу назарий асослар театр санъатига бағишиланган барча системаларнинг, илмий-амалий тадқиқотларнинг диалектик ривожи эди. Натижада унгача бўлган театр санъати билан боғлиқ барча назарий ва амалий қарашларни яхлит бир тизимга солиш масаласи илмий хал қилинди.

“Намойиш этиш санъати” талаблари билан “кечинма санъати” эстетикаси фарқини Станиславский қиёслаш услуби билан очиб берди. Бунинг учун у даставвал “намойиш этиш санъати” талабларини, ўзи ўйнаган роллари мисолида ёрқин ифодалай олди. Бу йўналишда, касб маҳоратини яхши эгаллаган актёrlар томошабинларга ўз иқтидорларини намойиш қилишга бор кучларини сарфлайдилар. Станиславский улар эришган ютуқларни инкор қилмаган ҳолда, янада жозибалироқ, таъсиранкроқ, маънавий даражаси юқорироқ, актёrlар кучини асар ғоясини очишга сарфлайдиган тизим яратишга интилди. Бунинг учун “намойиш этиш санъати” хусусиятларини янада чуқуррок ўрганишга киришди.

Инсон, умуман жониворлар мушаклар хотирасига ва миянинг “сигнал системасига” таяниб кун кечирадилар. Бу система ихтироиси И.Павлов таъкидлаганидек, такрорланган ҳаракатлар бош миядаги сигналлар таъсирида мушаклар хотирасига кўчади ва сақланиб қолади. Циркдаги жониворлар табиятнинг шу қонуни асосида машқ қилдирилади ва манежга эришилган натижаларни намойиш этиш учун олиб чиқлади. Шунинг учун цирк намойиш этиш санъатининг энг ёрқин кўринишидир. Бу йўналиш назарийчиларидан бири бўлган Дени Дидронинг – “спектаклларда актёр қайта кечиниши шарт эмас, ахир актёрнинг маҳорати, хотирасида сақланган туйғуларнинг ифода воситаларидан фойдаланиб томошабинларни ишонтира олишида эмасми”, деган фикри унинг тарафдорлари учун назарий асосга айланди. Кино санъати хам бир марта ленталарга муҳрланган туйғулар ва ҳаракатларни доим айнан қайтарилиши билан намойиш этишдан ўзга нарса эмас.

“Намойиш этиш санъати” тарафдорлари саҳнанинг ўзига хос шартлилигига амал қилиб ижод қилишга, ташки кўринишига, хатти-харакатларнинг жимжимадорлигига, айниқса “театрон” томошавийликка интилишлари билан ажralиб туради. Улар бу интилишлари билан ҳаётийликдан, яъни реализмдан узоқлашиб, томошабинни ижтимоий ҳаётнинг аччиқ ҳақиқатидан чалғитишни асосий мақсад қилиб оладилар. Намойиш этиш даражасига кўтарилиш учун улар репетицияларда актёrlардан ролнинг туйғуларини, эктиросларини тўғри кечиниши талаб қиладилар. Барча ролларнинг туйғулари ва улар билан боғлиқ ҳаракатлар топилгач, режиссёр томонидан мустаҳкамланади. Эришилган натижа бундан буёғига факат шундай ижро этилиши тасдиқланади ва мускуллар хотирасида сақланган ҳаракатлар томошабинга намойиш қилинади. Репетиция жараённида топилган кечинмаларни “актёрлик туйғуси” мушаклар ва хис-туйғулар хотирасида сақлаб қолгани учун, энди уларни ижрочилар ўз ҳаракатларида кечинмасиз хам тақрорлай оладилар.

“Намойиш этиш санъати”нинг эстетик принципларидан қониқмаган Станиславский ундан юқорироқ бўлган босқични, ҳар бир спектаклда

## ЖАҲОН АДАБИЁТИ

“қайта кечиниш” йўлларини излай бошлади. Бунинг учун “инжиқ илҳом” ҳар доим актёрнинг хизматида бўлиши керак. Ҳар бир спектаклда завқ билан “қайта кечиниш” учун актёрда намойиш этишдан кўра юкорироқ бўлган босқич – “ижодкорлик туйғуси” тўғри тарбияланган бўлиши лозим эди. Шундагина томошабинларнинг қалбига ҳамда эҳтиросларига кучли таъсир этиш мумкин бўларди.

Ҳаваскорлар орасидан саралаб олинган бўлғуси актёрнинг илк қадамидан бошлаб ижодкорлик туйғуси ва иродаси тўғри тарбиялансангина, у саҳна ҳунари талабларини ижодкорлик нуқтаи назаридан ўзлаштиради. Ҳунар талабларини ўзлаштирган талабаларгина навбатдаги босқичга – драматург ва режиссёр режалаштирган ҳаракатни саҳнада бажара оладиган актёрлик даражасига кўтарилади. Бундай ижрочининг “актёрлик туйғуси” – ўзлаштирилган ҳунар талабларига таяниб, театр санъатининг асоси бўлган “акт” – ҳаракатни бажара олади, яъни персонаж интилишни ривожлантириб, перепития орқали ечимга олиб қелиш кўникмасига эга бўлади. Бундай кўникмага эга ижодкор шахс – “акт”, яъни ҳаракат бажарувчиси, актёр мақомига кўтарилади. Чунки, ҳаваскорликтан ҳунармандликка, сўнгра актёрлик даражасига эришиш мураккаб жараённи ўз ичига олади.

Станиславский актёрлик мақомига эришганларни эволюцион ривожланиб борувчи уч даражага ажратади. Биринчиси – актёрлик туйғусига таянган ижро. Иккинчиси – ижодкорлик туйғусига асосланган ижро. Учинчиси – санъаткорлик туйғусига эга бўлган, юқори бадий савиядаги ижро. Бу уч даражага орасидаги фарқни англаш факат Станиславскийга насиб килди ва “кечинма санъати” тизимини яратишига асос бўлди. У актёрлик санъати диалектик ривожланишдан иборат жараён эканлигини назарий исботлади. Қуйида шу босқичларнинг изоҳини кўрамиз.

1. Актёрлик туйғуси – ҳар бир спектаклда актёрга хизмат қилишга тайёр турган ҳунармандлик кўникмаси. Бу “ғамхўр кўникмалар” ҳар бир ролни актёрнинг мушаклари ва туйғулари хотирасида сақланиб қолган штампларга таянган ҳолда намойиш этишига қодир. Моҳирона ижро этилган ролда кечаги ҳаракатлар ва туйғулар айнан тақрорланади. Бундай актёrlар илҳомни кутуб яшайдилар. Илҳом эса – инжиқ туйғу. У ҳар доим ҳам актёрга бўйсунавермайди. Бугунги спектаклда актёрнинг илҳоми келса-келди, келмаса “ғамхўр ҳунар” штамплари уни ҳар доимгидек яна кутқаради. Илҳомсиз, завқсиз намойиш этилган роль ижросидан сўнг актёрнинг ўз ёғига ўзи қоврулиб “яна ўхшамади”, деган ички нидосини томошабинлар билмайди.

2. Ижодкорлик туйғуси – “инжиқ илҳомни” доим чақириб олишга ва уни ўз ролига хизмат қилдиришга қодир актёрларда шаклланган кўникма. Бундай актёrlар намойиш этишдан юқорироқ бўлган босқичга – ўз ролини ҳар бир спектаклда қайта кечинишга эришади. У илҳомланиб, ўз роли туйғуларини қайта кечинаётганидан завқ олади. Ижодкорлик туйғуси тўғри тарбияланган актёр, берилган шарт-шароитдаги воқеа – мен билан, ҳозир, шу ерда, биринчи марта содир бўляяпти, деган ишонч билан, жонли мулоқотга киришади. Саҳнада жонли мулоқотни узлуксиз бошқариб боришга интилади. Бу интилишнинг ижобий натижасини ўзи, саҳнадаги партнёрлари ва томошабинлар сезади. Ижодкор актёр, томошабин айнан мана шундай жонли мулоқотни кўриш учун театрга келишини билади.

3. Санъаткорлик туйғуси – ижодкорлик туйғуси тўғри тарбияланган, маънавий қиёфаси шаклланган, бадий тасаввuri ва тафаккури бой, яратувчанлик қудратига эга бўлган актёрлар кўтариладиган даражага. Бундай санъаткорлар яратган образлар – миллатнинг маънавий мулкига, маданий бойлигига айланади. Улар ижодини ёшларга намуна қилиб кўрсатиш, авлоддан-авлодга мерос қилиб қолдириш мумкин. Санъаткорлик туйғуси ижодкорнинг виждонига айланади. Бу виждон уни яна

“актёрлик туйфуси” даражасига қайтиб тушишига ва томошабинларни алдашига йўл қўймайди. Бу даража Станиславскийнинг орзуси, у яратган системанинг олий мақсади эди.

Демак, саҳнада жонли мулоқотга кириша оладиган “кечинма санъати” актёрининг ижодкорлик туйфусини тўғри тарбиялаш системанинг бош масаласидир. Саҳна амалиётида бой тажрибага эга, замонасининг энг машхур актёрларидан ва режиссёrlаридан бири бўлган Станиславский – жонли мулоқот жараёнида пайдо бўладиган табиий туйфулар ижрочининг руҳий ва жисмоний ҳаракатлари йўғунлигини талаб қилишини яхши биларди. Бу йўғунлик ёрдамида асар ғоясини ва спектаклнинг маънавий моҳиятини томошабинларга тўла бадиий шаклда етказиш мумкин деб хисобларди.

Актёрларнинг саҳнадаги жонли мулоқоти театр илгари сураётган ғояга, туйғулар ва кечинмаларга томошабинларни ҳамдард қиласди. Саҳнадаги ҳар персонажнинг нозик туйғулари, кучли эҳтиослари, чукур дарди, теран фикри томошабинларга таъсир этсагина, улар ҳамдардга айланади. Ҳамдардлик туйфуси ҳар бир спектаклда томошабинлар қалбидан жой олмаса, театр санъати аста-секин сусайиб бораверади ва саҳнадаги томошалар оддий, кўнгилочар, майший мавзудан иборат хунармандлар “ўйинига” айланади. Станиславский ижодкорлик туйфусини тўғри тарбиялаш учун аввало, “кечинма санъати”га зарур бўлган инсон вужудини саҳнада табиий ишга туширадиган жонли мулоқот қоидаларига амал қилиш зарурлигини таъкидлайди. Бу қоидалар “система”нинг эмас, балки табиатнинг азалий тизими, тартиби эканлигини асослайди.

Системанинг илмий қиймати ҳаёт қонунларини тизимга солинганлигига, тадқиқотчининг изланишлари амалиётда ўзининг исботини топганлигига, Москва Бадиий театрининг буюк актёрлари ва студияларнинг ёш талабалари билан синовдан ўтказилганлигига, Мейерхольд, Вахтангов каби жаҳонга машхур режиссёrlарни, ҳамда дунёни лол қолдирган янги актёрлар авлодини тарбиялаганлигига, улар яратган спектакллар бадиий яхлитлиги, маънавий ва ғоявий юксаклиги билан томошабинларни ҳайратга, баъзан ларзага солганлигига эди. Энг муҳими, намойиш этиш санъати тарафдорларининг актёрлик санъати “илоҳий илҳом”га, “такрорланмас иқтидорга” боғлиқ, деган тушунчаларини инкор эта олганлигидадир. Шунингдек, қобилиятли инсон табиат қонунларидан тўғри ва унумли фойдаланса, унда ижодкорлик туйфуси шаклланиши ва бу туйғу уни саънаткорлик даражасига кўтариши мумкинлигини амалда ишботланганлигидадир.

Натижада, актёр саҳнада жонли мулоқотга эришиши учун ўз табиатини зўриқтирасдан, берилган шарт-шароитда мақсадга мувофиқ, мантиқан, изчил, фаол ва сермаҳсул хатти-ҳаракат қилиши системанинг асосий талабига айланди.

Станиславский “берилган шарт-шароит” атамасини ўз “система”сига асос қилиб олди. Актёрнинг руҳий ва жисмоний туйфуларини мақсадга мувофиқ ишга тушувчи унсурларни – “ижодкорлик элементлари” деб атади. Бу унсурлар табиат қонунлари тизими бўлиб, актёрнинг туйфуларини табиий қўзговчи ва ҳаракатга келтирувчи, “кечинма санъати” талаблари асосини ташкил қилувчи элементлардир. Улар:

- мақсадга мувофиқ жамланган ва йўналтирилган диққат;
- қўриш, эшитиш, қабул қилиш ва баҳолаш;
- мажозий ички қўриш ва ҳис қилиш хотираси;
- берилган шарт-шароитларни тасаввур қилиш;
- саҳнавий муҳит билан алоқадорликни ўрната билиш;
- саҳнавий туйғу ва ҳаракатлардаги изчилликка амал қилиш;
- саҳнавий ҳақиқатни ҳис қилиш;
- ишонч ва табиийлик;

## ЖАҲОН АДАБИЁТИ

- ролнинг ва спектаклнинг истиқболини ҳис қилиш;
- фикрли ва мақсадли ҳаракат;
- темпо-ритмни идрок этиш;
- саҳнавий истарага эга бўлиш;
- эҳтиросни кўзғата олиш ва уни жиловлай билиш;
- мускуллар эркинлиги;
- гавданинг ифодавийлиги;
- овозни бошқара олиш;
- тўғри талаффуз ва фикрни етказа билиш;
- сўз билан таъсир эта билиш;
- ҳарактер ва ҳарактерлиликини ҳис қилиш каби тизимдан, актёрги саҳнада табиий ҳаракатга олиб келадиган туйғулар мажмуудан иборат.

“Кечинма санъати” талаблари унсурларини мунтазам машқ қилиб, ўз маҳоратини такомиллаштириб бориш ҳар бир актёрнинг иродаси билан боғлиқ мураккаб жараён. Бу жараённи Станиславский “туйғулар машқи” деб атайди. “Кечинма санъати” актёrlари ҳам худди балет артистлари ёки чолғучилар каби ўзларини ижрога “созлаш”ни зарурат деб билмоқлари шарт.

1923 йилга келиб жаҳоншумул воқеа содир бўлди. Америка Кўшма Штатларига гастролга борган Станиславский раҳбарлигидаги Москва Бадиий театри, у яратган назария асосида тарбияланган янги актёrlар авлоди ижроси билан томошибинларни ҳайратта солди. Америка матбуоти янги йўналишдаги актёrlик санъати пайдо бўлганлиги ҳақида бонг ура бошлади. Американинг штатлари бўйлаб уюштирилган гастроль сафари Станиславскийнинг йиллар давомида излаган ва амалга оширган кашфиётлари натижаларини “жаҳоннинг етакчи саҳна усталари” ижросидаги спектакллар деб эътироф этилди. 1924 йили нашрдан чиқсан “Санъатдаги ҳаётим” китоби Бостон шаҳрида 5 минг нусхада инглиз тилида чоп этилди. Асарни рус тилидан инглиз тилига И.Роббенс таржима қилди. Бу эътирофдан ҳайратта тушган Россия театр жамоатчилиги Станиславский ихтиrolарига янги назар билан қаради. “Санъатдаги ҳаётим” китоби илк бор рус тилида 1926 йил муаллиф назоратида 6 минг нусхада Давлат бадиий фанлар академиясиниг “Центросоюз” нашриётида чоп этилди.

“Санъатдаги ҳаётим” китобида Станиславский “система” қандай шаклланганлигини куйидагича изоҳлайди: “Кечинма санъати” талабларини синовдан ўтказишин 1901 йилда бошладим ва унинг дастлабки номини “Актёр – гўзаллик ва ҳақиқат тарғиботчиси” деб аташга қарор қилдим. 1902 йилга келиб эса уни “Драматик артистнинг маслаҳатчи китоби” деб аташни маъқул топдим. 1906 йили Германиянинг Берлин шаҳридаги гастролдан кейин тўғри йўлдан кетаётганимизга амин бўлдим. Шу тариқа 13 йил мобайнида “система”ни такомиллаштириб, синовдан ўтказиб бордим.

Станиславский ихтироси моҳиятини англаб етган шогирди Е.Вахтангов студия талабаларига 1916 йилнинг 28 октябрида “Станиславский янги йўналишдаги актёрдан нима истайди” номли мавзуда маъруза ўқиди. 12 ноябрда эса “Станиславскийнинг орзулари” номли маърузасида “юртимиздаги барча театрлар асл саҳна ижодкорларини ўз студияларида тарбиялаши лозим” деган фикрни илгари суради. Шогирдининг бу маърузасидан сўнг Станиславский – “Россияни студиялар камровига олиш керак” деган хulosага келади.

1917 йилнинг декабрь ойида В.Сахновскийнинг “Бадиий театр ва саҳнада романтизм. Станиславскийга ҳат” номли китоби нашрдан чиқди. Шу йили Петербургнинг “Эркин санъат” номли нашриётида Ф.Ф.Комиссаржевскийнинг “Актёр ижоди ва Станиславский назарияси” номли китоби ҳам чоп этилди. Асар билан танишган Станиславский устозининг ўғли, ёш режиссёр унинг назариясини тушунмаганлигини, “система”ни адабиётчи нуқтаи назаридан таҳлил қилиб адашганлигини

қўлидаги китобнинг саҳифаларига ёзиб қўяди. Айниқса, унинг ихтиорларини “натурализм” деб аталганлигидан қаттиқ ранжийди. Китоб қатор мунозараларга сабаб бўлади. Балки бундай нотўғри талқин “система”ни янада такомиллаштиришга сабаб бўлиб, Станиславскийни “театрни барча севади, балки шунинг учун ҳам улар бу соҳани тушунаман, деб ўйлади. Аслида эса театр санъатини тушунадиганлар камчиликни ташкил қиласди, уни биладиганлар эса саноқлидир” деган фикрга келишига турткада бергандир.

1917 йилдаги тўполонлар, қўзғолонлар ва тўнтарилишдан сўнг 1918 йилнинг январь ойидан бошлаб барча хусусий томошагоҳларни давлат карамогига ўтказиш ҳамда Москва Бадиий театрини қайта тузиш ва репертуарини кўриб чиқиш бошланди. Натижада, “Хар тўқисда бир айб” номли спектакль саҳнага қўйилиб, революция дохийсининг назаридан четда қолмади ва у Станиславскийнинг маҳоратига жуда катта баҳо берди. 1919 йилнинг 16 июнь куни Москвадаги театрлар раҳбарларининг мажлиси бўлди. Мажлис ахли давлат раҳбарига хат билан мурожаат қилиб, “Малый театр” ва “Москва Бадиий театр”нинг раҳбарларини, бу жамоаларнинг услубини сақлаб қолиши учун ўз жойларида қолдиришини илтимос қилишади.

Станиславский шу орада ўзининг “Актёрнинг ўз устида ишлаши” номли икки қисмдан иборат китобини ёзди. Биринчиси – актёрнинг кечинма санъати талаблари асосида ўз устида ишлаши, иккинчиси – актёрнинг ролни ўзлаштириш, яъни қиёфа яратиш жараёни масалаларига бағишлиданади. Унинг нияти ижодкорлик туйғусини ўзида тўғри тарбиялай оладиган актёрларнинг янги авлодини яратиш эди.

Ижодкорлик туйғуси – ўзидан қониқмаслик, саҳнада кечагидан яхшироқ, эркинроқ, маънилироқ, завқлироқ, муқаммалроқ ҳаракат қилиш орқали ролнинг бадиий яхлитлигига интилиши каби тушунчаларни ўз ичига оларди. Мақсад – янги авлод актёрларида “Кечинма санъати” талаблари асосида роль устида мунтазам ишлаш кўникмасини шакллантириш эди.

Станиславский системасининг китобларда шаклланган тизими қўйидагича. Биринчи том – “Санъатдаги хаётим” кечинма санъатининг назарий асосларини ёритиш учун “намойиш этиш санъати” билан таққослади ва устунлигини иммий исботлади. Иккинчи том – “Актёрнинг кечинма санъати талаблари асосида ўз устида ишлаши”, яъни “актёрлик туйғуси”дан юқорироқ босқичга – ижодкорлик туйғусига кўтарилиш учун маҳсус “туйғулар машқи”ни бажариб, ҳар бир спектаклда қайта кечиниш ва жонли мулокотга эришиш назарияси ҳамда амалиёти. Учинчи том – “Актёрнинг ролни ўзлаштириш, яъни қиёфа яратиш жараёнида ўз устида ишлаши” – гавданинг ифодавий имкониятларини такомиллаштириш, нутқ аппаратининг имкониятларини ошириш учун нафас, овоз, артикуляция, дикция устида ишлаш ҳамда сўз ижроси билан партнёрига ва томошабинга таъсир эта олиш. Персонаж ҳарактери талаб қилган гавда ва нутқ уйғунлигига эришиш орқали жонли мулокотга киришиш. Тўртинчи том – “Актёрнинг роль устида ишлаши” деб номланган бўлиб, унда ижодкорлик туйғуси тўғри тарбияланган актёрнинг “созланган” руҳиятини ва жисмини муваллиф берган шарт-шароитда, мақсадга мувофиқ ҳаракатга келтириш масаласи тизимга солинади. Бу мураккаб жараён биринчи томда ифодаланган назарий қарашлар, иккинчи ва учинчи томларда изоҳланган, амалиётда зарур бўладиган тавсиялар, роль устида ишлаш учун зарур бўлган уч таянч нуктаси атрофида назарий асослаб берилди. Булар – ақл, ирода ва ҳиссиёт уйғунлигидаги тушунчалар изоҳи эди. Станиславский ақл, ирода ва ҳиссиёт уйғунлигига қандай эришиш мумкинлиги хакидаги таълимотни саҳна асарининг хатти-ҳаракат таҳлили, олий мақсад, етакчи хатти-ҳаракат, курашни кескинлаштириб турадиган “қарама-қарши ҳаракат”, онгли ҳаракатдан – онгости бошқарадиган

## ЖАҲОН АДАБИЁТИ

табиий хатти-ҳаракатга эришиш” каби тушунчаларни изоҳлаш орқали тушунтиради.

Роль устида ишлаш жараёнида спектаклнинг олий мақсадини ва ҳар бир персонажнинг етакчи хатти-ҳаракатни тўғри белгилаш, бутун жамоанинг ғоявий юксаклигини, интилишини, маънавий даражасини, бадий фикри теранлигининг кўрсаткичига айланади. Шунинг учун спектакль яратиш жараёнида “олий мақсад ва етакчи хатти-ҳаракат”ни тўғри белгилаш ҳал қилувчи босқичга, системанинг роль устида ишлаш жараёнидаги бош масаласига айланади. Бу масала ўз навбатида актёрнинг саҳнадан ташқаридағи, яъни ҳаётдаги олий мақсадига ҳам аниқлик кирилади.

Станиславский бу тушунчаларни ижодкорнинг энг олий мақсади, яъни шахснинг олий мақсади, деб белгилади. Бу мақсад ижодкорнинг маънавий қиёфасини белгилайдиган, ижтимоий интилишини намоён қиласидиган, дунёқарашини, бадий савиясини, тарбияланганлик даражасини ва фуқаролик бурчини ошкор қиласидиган кўрсаткичидир. Табиат қонунларига асосланиб, шахс даражасига кўтарилиган актёрнинг бадий яхлит шаклда яратган образлари унинг ижодкорлик қудратини кўрсатади. Замонамизнинг машҳур актёри Олег Табаковдан “сизнинг ролларингиз бир-бирини тақорламайдиган янги қирралари билан барчани эсида қолади. Бунинг сири нимада?”, деб сўрашганида, “Мен пьесанинг таҳлилини режиссёрдан ҳам, танқидчилардан ҳам яхшироқ биламан”, деган жавобни айтган. Демак, бу актёрда акл, ирода ва ҳиссиёт уйғунлигидаги ижодкорлик туйғуси, яратувчанлик қудрати мавжуд.

1930 йилга келиб Станиславский яратган “кечинма санъати” тизими саҳнада бадий ҳақиқатни яратса оладиган янги актёрлар авлодини шакллантирганлиги ҳақида китоблар ёзила бошланди. Л.Леонидов системадан олган таассуротларини шундай изоҳлади: “Станиславский актёр нигоҳини ўзининг қалбига қаратишга ўргатди. У лабиринтлар орасида юз йиллаб адашиб юрган ижодкорлик туйғусини кенгликка олиб чиқди. “Кечинма санъати” тизими актёрни қоронғуликдан ёруғликка етаклади. Ҳунармандликка асосланган “намойиш этиш санъати” актёрлари эса лабиринт ичиди қолиб кетдилар. Таассуротларим акси туширилган “Станиславский ва унинг системаси” номли китоб ёзишга қарор қилдим. Бу китоб театрнинг эртаги куни ҳақида эмас, балки узоқ келажаги ҳақида бўлади. Чунки, Станиславский актёрнинг саҳнавий туйғуларига эркинлик берди”.

1931 йилнинг 24 декабрида “Кўркинч” номли спектакль муҳокамасида барчанинг ижобий фикрига қарши О.Литовский ва А.Роом “система” революциядан аввал пайдо бўлган методология бўлса, бугун уни социалистик театр санъатида ҳам кўллаш мумкинми?”, деган фикрни ўртага ташлашди. Табиат қонунларига асосланган ижод тизимини чуқур англаб етмаганларнинг нотўғри фикрлари Станиславскийнинг соғлиғига қаттиқ таъсир қилди.

Натижада, психофизик ҳаракатга асосланган “кечинма санъати”нинг актёрлар руҳиятини “созлаш” билан боғлиқ “туйғулар машқи”ни баъзилар тўғри англамаётганлиги учун Станиславский уни янада соддалаштириш устида изланишлар олиб борди.

Академик И.Павловнинг “Сигнал системаси” ва И.Сеченовнинг “Бош миянинг рефлекслари” номли ихтиrolари билан қайта танишиб чиққан Станиславский инсоннинг жисмоний ҳаракатларида унинг мақсади, туйғулари акс этишини англаб етди. Натижада, актёрлар ўз хошишларини оддий жисмоний ҳаракатларда мантиқан ва изчил ифодалай оладиган “жисмоний хатти-ҳаракатлар услуби”ни яратди.

Янги услуб яратилгунига қадар психофизик ҳаракат таҳлили “роль устида ишлаш жараёни” – драматург ғоясини, асар руҳиятини, персонажлар характерини, режиссёр режаси моҳиятини чуқур англашдан ва стол атрофидаги репетицияларда “берилган шарт-шароитни ҳис қилишга”

асосланган талқиндан иборат эди. Бу мураккаб жараённи соддалаштириш учун Станиславский ҳар бир актёрга ўз “ролининг жисмоний харакатлари партетурасини” мантиқан ва изчил ёзма равишда ифодалашни таклиф қиласди. “Ролнинг партетураси” нозик кечинмаларни ва кучли эхтиросларни келтириб чиқарадиган жисмоний хатти-харакатларнинг мантиқли ва изчил тизимини ифодалайди. Бу тизимда актёрни ролнинг олий мақсадига олиб борувчи етакчи хатти-харакати ёрқин намоён бўлади.

Станиславский умрининг охирида ихтиро қилган “жисмоний хатти-харакатлар услуги” мураккаб руҳий кечинмаларни “ташқи” харакатлар мантиғи ва изчиллиги орқали ўзлаштириш кечинмаларни психофизик харакатлар ёрдамида ўзлаштиришга нисбатан соддароқ йўл эканлигини исботлади.

Тинимсиз изланишлар натижасида Станиславский системаси “ички” ва “ташқи” харакатларни тахлил қилган яхлит тизимга айланди. Энди бу тизимда “ташқаридан-ичкарига”, яъни актёрларнинг руҳий кечинмаларга етиб бориши учун имкониятлар янада кенгайди. Бу ихтиrolар актёрнинг ўз устида ишлаши, роль устида ишлаши, роль устида ишлаш жараёнида ўз устида ишлаши каби яхлит тизимни вужудга келтириди.

Станиславскийнинг назарий қарашларига асосланган “Санъатдаги хаётим” китоби 1934 йилда Парижда француз тилида нашрдан чиқди. 1936 йилда эса Нью-Йоркда “Актёрнинг ўз устида ишлаши” асари инглиз тилида “Актёр тайёрланмоқда” номи билан нашрдан чиқди.

“Система”нинг дунё бўйлаб тан олингандигига гувоҳ Станиславский ўз шогирдларига “кечинма санъати” асосларини сақлаб қолинг ва уни юзакилиқдан ҳимоя қилинг, деб мурожаат қилди. “Система”ни ҳимоя қилиш учун янги йўналишда тарбияланган актёрларнинг этикаси, яъни тарбияланганлик даражаси “кечинма санъати”нинг навбатдаги бош масаласига айланди. Сабабини Станиславский қўйидагича изоҳлади: “...динга, ватангча ва театрга хизмат қиласидилар. Театрдек муқаддас даргоҳга ишга келинмайди. Театрда хизмат қиласидилар ва бу хизмат актёрларнинг инсонийлик ва фуқаролик бурчидир. Театр санъати орқали томошабинни маънавий, маърифий, бадиий, ахлоқий тарбиялаш ҳамда руҳан поклаш – фаол ва ҳалол хизматни талаб қиласидиган муқаддас бурчидир.

Арасту таъкидлаганидек, ахлоқ бу сиёсатdir. Ҳақиқатдан ҳам спектакль яратиш жараёнида жамоага манзур бўлиш, у билан ҳамкорлиқда ғалаба учун хизмат қилиш, соғлом ижодий мухитни сақлаш учун фаоллашиш актёр этикаси билан боғлиқ бўлган театр санъатининг сиёсий масаласидир. Шунинг учун Станиславский “артист этикаси системанинг қалбидир” деган таълимотни илгари суради.

Станиславский “кечинма санъати” назариётчиси, амалиётчиси ва педагоги сифатида ўзигача ҳеч ким эътибор бермаган саҳна сирлари билан боғлиқ комплекс масалаларни илмий ёритади, асослайди, исботлайди. “Роль устида ишлаш” масалаларини бешинчи ва олтинчи томлардан жой олган сұхбатлар ва маъruzalariда янада чуқурроқ изоҳлай олди. Еттинчи ва саккизинчи томлардан жой олган хатларida ўз ихтиrolарини замонасининг энг етук ижодкорлари, актёрлари, режиссёrlари, драматурглари, композиторлари, физиологлари, рассомлари билан ёзишувларидаги баҳс-мунозараларда изоҳлаган.

Жаҳонни забт этган “Станиславский системаси” 8 жилдлик “К.С.Станиславский”, 4 жилдлик “К.С.Станиславскийнинг ҳаёти ва ижоди, 6 жилдлик “Станиславскийнинг режиссёrlик маҳорати, “Станиславский ва жаҳон театри”, “Станиславский этикаси” номли китобларда ва унинг ихтиrolари билан боғлиқ катор диссертацияларда изоҳланган.

“Система”дан тўғри ва унумли фойдаланган ўзбек театр санъати арбоблари Манон Уйғур, Етим Бобоҷонов, Музаффар Муҳамедов, Тошхўжа Хўжаев, Раззоқ Ҳамроев каби режиссёrlар миллий саҳна санъатимиз-

## ЖАҲОН АДАБИЁТИ

ни, Г.Товстоногов, А.Эфрос, А.Гончаров, О.Ефремовлар рус театрини жаҳонга машҳур қилдилар.

Ўзбек театрлари амалиётига асосланган саҳна санъати педагогикаси 1964 йилдан бошлаб ҳар икки йилда ўтказиладиган театр санъати институтларининг “Диплом спектаклари фестивали”да тан олинди. 1982 йили академик Мамажон Раҳмонов раҳбарлигига ташкил қилинган “Станиславский системаси ва қардош халқлар театри” номли халқаро Конференциянинг Тошкентда ўтказилиши “система”ни Ўзбекистонда тўғри ўқитилаётганлиги, жаҳон театр арбоблари томонидан тан олганлигидан далолат эди.

2013 йил 17-19 январь кунлари Москва шаҳрида Станиславский таваллудининг 150 йиллигига бағишлиган “Станиславский ва жаҳон театрлари” номли халқаро Конференция бўлиб ўтди. Унда Англия, Франция, АҚШ ва Россиянинг жаҳонга машҳур режиссёрлари, санъат арбоблари ҳамда театршунослари Станиславский таълимотининг кудрати ва бугунги ахволи тўғрисида ўз фикрлари билан ўртоқлашишди.

Конференция иштирокчилари 2013 йилни “Станиславский йили” деб эълон қилиш ҳамда Москва Бадиий театри рўпарасида Станиславский ва Немирович-Данченколарга ҳайкал ўрнатиш мақсадга мувофиқ, деган қарорга келди.

Станиславский: “мен биронта янги қонун яратмадим, фақат табиат ҳамда инсон руҳи билан боғлиқ қоидаларни актёрлар ўз ижодида тўғри фойдалансин, деб тизимга солдим ва улар миллати, ирқи ҳамда эътиқодидан қатъи назар барча халқларга бирдек хизмат қиласди” деб таъкидлади.

Демак, бу тизимни тушунмасдан инкор қилиш, хаёт ва табиат қоидаларини тан олмаслик билан баробар эътиборсизлик, дилетантлик бўлади. У, “системани” тўғри тушунгандигар ва ундан тўғри ҳамда унумли фойдаланган ижодкорлар, келажакда ўзлари кўплаб янги тизимлар яратади, деб умид қиласди. Биз ҳам шундай бўлишига ишонамиз!

Маъмур УМАРОВ  
Фалсафа фанлари номзоди,  
ЎзДСМИ доценти



## ОБИ ҲАЁТ

Дунё адабиётида бир неча асрлардан бери турлича талқинларга йўл очиб келаётган мангу мавзулар бор. Ёзувчи Исажон Султоннинг “Боқий дарбадар” романида (“Шарқ ўлдузи” журнали, № 6, 2010; “Ўзбекистон” нашриёти, 2011) тилга олинган мавзу ҳам ана шундай мавзулар сирасидандир.

Турли-туман асарларга туртки бўлган бу воқеа: қатл учун олиб кетилаётган Исо алайхиссалом деворга суюниб бир оз тин олишни истагани учун унга қўл кўтарган ва шу сабабли Исо Алайхиссалом ер юзига қайтгунига қадар оламда дарбадар кезишга маҳкум этилган ва инсонлар нафратига дучор бўлган бир этикдўз воқеасидир.

Исо алайхиссалом билан этикдўз ўртасида бўлиб ўтган гап-сўзлар қуидагича (Брокгауз ва Эфрон қомусидан):

“**Имиллама!**”

“Мен-ку имилламайман. Лекин сен менинг қайтиб келишимни узоқ кутасан ҳамда (ер юзини) узоқ кезасан. Ки, хеч қаерда сенга на ором, на ўлим бор...”.

Ривоятларнинг баъзиларида эндиликда Боқий дарбадарга айланган ўша этикдўзнинг ҳар эллик йилда Қудусга тавба қилиш учун келиши, лекин ҳар келганида даҳшатли шамол кўтарилиши ва ниятига эриша олмаслиги ҳакида хабар берилади.

Воқеа нуқтаи назаридан олсақ, бу персонажга моҳиятан яқин бошқа ривоятлар ҳам анчагина. Масалан, ваҳший куш жазолаётган Прометей, Боқий дарбадар каби дайдишга маҳкум этилган Ҳобил, тоққа бехуда тош олиб чиқишига уринаётган Сизиф ва ниҳоят, ўрта асрлар Европасининг “Учар голландиялик” ҳақидаги машҳур афсонаси. Мангалик мотивлари асрлар бўйи ижтимоий вазиятларга қараб турлича талқин қилиниб келинмоқда. Византия асотирларида талқинларда эса, Исо Алайхиссаломнинг қатли учун мих қўйган ҳамда шу ишида давом этишга абадий маҳкум темирчи ҳакида ривоятлар учрайди.

Мазкур кичик тадқиқотимизда биз, дунёга машҳур қомуслардаги маълумотларга таянган ҳолда, турли йилларда дунёning турли адиблари мурожаат қилган мазкур воқеанинг ўзбек ёзувчиси томонидан талқин қилинишига диққат қаратмоқчимиз.

Дунё адабиётида анчайин кеч – ўн учинчи асрга келиб пайдо бўлган Боқий дарбадар образи илк бора 1228 йилда, англиялик Роджер Уэндоверскийнинг парижлик Мэтью томонидан тузилган “Катта хроника”сида учрайди. Мазкур маълумотлар Брокгауз ва Эфрон энциклопедиясида, “Википедия”эркин қомусида, “Академик адабиёт” қомусида ва “Катта инглиз қомуси”да деярли бир хилда талқин қилинади. Роджернинг талқинига кўра, у прокуратор Понтий Пилатнинг эшикбони, исми – Картафилос (маъноси дарбон) бўлиб, мангу дарбадар эмас, мангу яшовчан кишидир. У имонли, авлиёларга хос ҳаёт кечиради. Воқеанинг мазкур талқинидаги Боқий дарбадарга Исо Алайхиссалом ривоятининг тирик гувоҳи сифатида тавсифланади. Шунингдек, италиялик астролог Гвидо Бонатти 1267 йилда муқаддас Ёқуб монастирида ўзини Иоанн Буттадео

ЖАҲОН АДАБИЁТИ

деб таништирган кишини кўрганидан хабар беради.

Кейинроқ ўртага чиқкан бошқа талқинларда унинг исми Буттадэус, Малх ёки Ян Родуин (Кайафанинг қулининг исми) сифатида келади. Энди у тош ертўлалар аро адашиб юришга маҳкум бечора қиёфасида намоён бўлади. Бу талқинларда ривоятнинг ўн олтинчи-ўн еттинчи асрларда урф бўлган роман-авантюра талабларига мосланганини кўрамиз.

Халқ асотирларида у Исо алайхиссалом томонидан қарғиш олган яҳудий халқи ёки унинг бир қавмининг тимсоли дея талқин қилинади. Европа бўйлаб сочилиб кетган яҳудийлар бундай образ учун қулай асос бўла олади, албатта. Лекин, дунёга кенг тарқалган “Боқий яҳудий” иборасининг ўрта асрларда учрамаслиги бу фикрни рад этади.

Боқий дарбадар образининг немисча талқини 1602 йилда пайдо бўлади, унда епископ Эйценнинг Агасфер билан учрашуви тасвирланади. Европанинг турли ўлкаларида Агасфернинг дайдишилари ҳақидаги ҳикояларнинг бир қисми шу немис китобасидан, яна бир қисми ўрта асрлардаги Буттадео ёки Картафил афсонасидан олинган бўлса, немисча талқиннинг ўзи сал аввал сўз юритганимиз – парижлик Мэтъюнинг “Катта тарих” солномасига таянади.

Шу тариқа жаҳон адабиётида бу образ Шуберт, Гёте, Томас Карлейл, Эжен Сю, Эдуард Гренье, Василий Жуковский ва бошқа кўплаб ижодкорлар асарларида турфа хил талқин ва таҳлил қилинган. Жуковскийнинг достонида инглиз классик шоири Перси Биши Шеллининг “Боқий дарбадарнинг монологи” асаридан таъсирланиш оҳанглари сезилади.

Шунингдек, Александр Дюма 1853 йилда Боқий дарбадар ҳақидаги “Исаак Лакедем” романини ёзади. Гамерлингнинг “Дарбадар яҳудийнинг ўлими” (1857) достонида император Нероннинг ҳаёт шавқи ва Агасфернинг ўлим истаги қарама-қарши қўйилади. Мазкур талқинда Агасфер ҳар кишини ўлим сари йўллайверади. Нерон Римни унинг маслаҳатига кўра ёкиб юборади. Агасфернинг ўлимга ташналити бу асарда ғолиб келади – ҳашамдан тўйиб кетган Нерон ҳалок бўлади.

Пессимизм унсурлари итальян Артуро Графнинг “Фауст ва Агасфер” драмасида ҳам яққол кўринади. Льюис Уоллес 1893 йилда ёзилган “Шоҳ шахрининг қулаши” романида Боқий дарбадарни ҳиндистонлик сирли князь сифатида тасвирлайди.

Иигирманчи асрда ҳам бу ғалати образга мурожаатлар давом этади. Редъяд Киплинг “Боқий яҳудий”, Аполлинер “Прага йўловчиси”, Хорхе Луис Борхес “Мангулар шаҳри” новелласида, Пер. Лагерквист “Агасфернинг ўлими” романида, Габриэль Гарсиа Маркес “Ёлғизликнинг юз иили” романида, Стефан Гейм “Агасфер” асарида ва Жан д’Ормессон “Боқий дарбадарнинг тарихи” асарида (1991) мурожаат қиласидилар.

Шу тариқа бу образ бадиий тафаккур намояндадарини тобора ўзига жалб қилиб боради ва турли шаклларда намоён бўлади. Эдвард Хоҳ ҳикояларида у изқувар қиёфасида кўзга ташланади. О’Генрининг “Тиним билмаган эшик” ҳикоясида эса маст-аласт этиқдўз Майк О’Бадер провинциал газета ходимларининг ёнига келиб, ўзининг ўша – күддуслиқ этиқдўз эканини айтади.

Бу образ рус адабиётига ҳам кириб келади, Илья Ильф ва Евгений Петров ўзларининг машҳур “Олтин бузоқ” романига Боқий дарбадар ҳақидаги афсона-қиссани киритишиади. Днепр кенгликларини кўргани келган Боқий дарбадарни петлюрачилар тутиб олишади ва чопиб ташлашиади.

Фантаст ёзувчилар Борис ва Михаил Стругацкийлар “Ёвузликдан тубанлашганлар” асарида бу образга мурожаат этганлар.

Шу ўринда Михаил Булгаковнинг “Уста ва Маргарита” романини ҳам эслаб ўтиш жоиз. Романида ёзувчи Боқий дарбадарга тўғридан-тўғри тўхталмаган бўлса-да, ишора қилиб ўтади, шунингдек, асарда тилга олинган

## ЖАҲОН АДАБИЁТИ

воқеалар айнан Исо Алайхиссаломнинг қатли билан алоқадор воқеалардир.

\* \* \*

Йигирма биринчи асрга келиб ўзбек адабиётида пайдо бўлган мазкур образнинг турли халқлар ва даврлар адабиётидаги “дарбадарлиги” тарихи мана шундай.

Кўриб турганимиздек, образга муносабат ва талқинлар турлича. Талқинларда Европа пессимизми, романтизми, ижтимоий формациялар ва диний қараашларнинг таъсири яққол сезилиб турди. У шу қадар кучли тимсолки, кўплаб классикларнинг диққатини тобора ўзига жалб қиласди ва адиллар, файласуфлар, мутафаккирлар мангу дарбадарлик кисматида ўзлари яшаётган мухит ва дунё ҳақида маълум холосаларини эълон қиласдилар.

Хўш, етти юз йилдан бери давом этиб келаётган талқинларга ўзбек ёзувчisi қандай янгилик қўша олди?

Тобора жадаллик билан ривожланаётган бугунги куннинг олатасир ҳаёти ичра борар йўлини, қадриятларини йўқотиб кўйган, ихтиёрида ер юзини ағдар-тўнтар қилиб ташлашга қодир бугунги кун кишиси пешонасига “боқий дарбадар” деган тамға урилади. Ана шу имон ва виждон тимсолига “кўл кўтарган” ва алал-оқибатда муқаддас мақсадларидан айрилиб, ҳаёти фақатгина еб-ичишдан ва ўйин-кулги қилиб, дайдиб юришдан иборат бўлиб қолган дунёдаги барча кишилар дарбадардир деган фоя илгари сурилади.

Исажон ўз романида Боқий дарбадарга ўзбекона муносабатни тасвирга олган. Изланишлар жараёнида бу образга Европа адилларидан бошқа адиллар мурожаат қилишмагани маълум бўлди. Ваҳоланки, мангу кишилар образи деярли барча халқлар адабиёти ва фольклорида учрайди. Етти юз йиллик бадиий мулоҳазалар сўнгидা, замонавий дунёда яшаётган Шарқ кишиси наздида боқийликнинг мезонлари тамомила бошқа экани ҳаёлга келади. Шарқ тушунчасида мангу зотлар элига ва имон-эътиқодига қатъий содиқ кишилардир ва мангалик Шарқ кишиси учун юксак даражадир. Шу сабабдан ҳам Ҳазрати Хизрдан ташқари, турли азиз-авлиёларнинг ҳам боқий эканига урғу берилади. Фольклоримиздаги Fav sul Fiёс, чилтонлар образидан тортиб то халқимиз назидаги мангу барҳаёт зотларга, хусусан, Мир Алишер Навоий ва Бобораҳим Машрабга диққат қаратилади.

Мулоҳазакор ва вазмин Шарқ бу образга ана шундай баҳо беради ва муқаддас тушунчаларини йўқотиб қўйган ҳар қандай касга шу тариқа дарбадарлик тамғасини босади.

Гап романнинг адабий-бадиий хусусиятларидан ташқари, фалсафий-эстетик мезонлари ҳақида кетмоқда. Дарбадарликнинг шарқона фалсафадагина эмас, романда келтирилгани каби, илмсиз-жоҳил бадавийлар томонидан ҳам рад қилиниши шарқнинг ҳар қандай кишиси уни ва унинг тимсолидаги мақсадсиз ҳаётни рад этишини кўрсатади. Шарқ кишиси эътиқоди бўйича, ҳамма йўллар иймон, ҳақиқат ва Оллоҳни танишга олиб боради. Шарқнинг энг мустаҳкам идеали аслида шундан иборат, у ўзини олам марказида кўрмайди. Шарқ кишиси фақат ўз давраси, яқинлари, миллати, давлати ичида гина шахс бўла олади. Бу ғоянинг ҳаётийлиги қаршисида Боқий дарбадарнинг тақдири, Европа файласуфлари таъкидлагани каби даҳшатли тақдир эмас.

Модомики шундай экан, унда нима учун Исажоннинг “Боқий дарбадар” роман шунча фикр-мулоҳаза ва баҳслар уйғотмоқда?

Чунки, дарбадарлик деган бошқа хавф бор. У урушларнинг

## ЖАҲОН АДАБИЁТИ

қуролларидан кўра таҳликалироқ. Киши ором олиши, ҳаёт муаммоларига дуч келмасдан сокин-осойишта умр кечириши ва шу тариқа яшаб ўтиши мумкин, мана шу яшашда ҳам дарбадарлик хавфи бор. Ташвишсиз, тўкин-сочин ҳаёт кечиришга интилишнинг ўзигина етарли эмас. инсон дарбадарлик хаввидан фақат иймон йўли орқалигина кутулиши мумкин. Иймонгина ҳамма нарсани мувозанатга келтиради ва оламдаги ҳаётнинг моҳиятни белгилайди, унга қадр-қиммат баҳш этиб, умрни баҳолаб беради.

Дарбадарлик эса миллат ва маданиятни йўқ қиласиди. “Боқий дарбадар” романидаги Ҳайбар шаҳрини эсланг. Бир тўп мангудишилар очик майдонда асрлар бўйи ўтиришибди. “Сал нарида кўҳна арк бор, энгашиб қараганимда милтираб оқаётган қорамтири сувни кўрдим. У ерда косасида ғалати нақшлари бор кўр тошбақа ҳам бор эди...” дейди ёзувчи. Бу мангудишилар суви эди.

Аслида, мангудишилар суви ҳам рамзий тушунчадир. Инсон мангудишиларга саодатига эришиши мумкин. Аммо у лаънат орқали эмас, балки муқаддас тушунчаларга садоқат, элу юртнинг дуоси билан келади.

Бу ерда гап фикрий ва хиссий юксалишлар ҳақида кетмоқда. Дунёда инсонни тўғри йўлдан адаштирадиган, ақлдан оздирадиган воситалар кўп. Оламдаги барча қашфиётлар аслида инсон қалби ва тафаккурини синаш учун яратилган. Яна ривоятларга мурожаат қиласиди: Сулаймон Алайхиссаломга шамол бўйсундирилган эди. Инсон боласига у мўъжиза оммавий ўлароқ ҳадя қилинди, кишилар турли техник воситалар ёрдамида ҳавода уча оладиган бўлишди ва илк яратилган учоқлар харбий бомбалар ташиди. Довуд Алайхиссаломнинг қўлида темир хамирдай мулойим бўлиб қолар эди, инсоният бу мўъжизага ҳам оммавий равища эга чиқди, маъданлардан турли қуроллар ясалди ва алал-оқибат, ўлим қуроллари яратилди.

Демак, инсоният яратадиган қашфиётлардан агар эзгулик ва имон равнақи йўлида фойдаланилмаса ҳалокатга, фалокатга олиб боради.

Романдаги “...у оламлар Парвардигори, агар истаса, ёруғ дунёдаги ҳар қандай неъматни балога ёки ҳалокатга айлантириб қўйиши мумкинлигини намоён қилаётгандай эди. Гуллаб-яшнаётган тирикликтининг она унсурларидан бири бўлмиш сув ҳам гоҳ-гоҳ долғаланиб, теварак-атрофни ғорат айлагувчи баҳайбат бало қиёфасига кирмоқда, бағридан саноқсиз неъматларни чиқариб-муҳайё қилиб тургувчи ер юзи гоҳ-гоҳ шиддат илиа қўзғалиб, зилзилалар ҳосил қилмоқда, теранликларидан олов ва эриган маъданлардан иборат вулқонларни уфурмоқда, инсонларни совуқдан химояланишига, лаззатли таом тайёрлашларига, ҳаётлари учун лозим бўладиган турли-туман асбобларни ясашларига имкон берувчи алангага ҳам гоҳо теграсидаги барча нарсани куйдириб-кул қилувчи баҳайбат фалокат шаклига кирмоқда эди. Дунёнинг тамали бўлмиш тўрт унсур ана шу тарзда – Парвардигори оламнинг қудрат-иродасига тамомила бўйсунган ҳолда ўзгармоқда ва ер юзидаги тафаккур қилувчи ягона жонзотга – одам боласига қаратади ўз тилида хитоб айламоқда эди...” каби жумлаларда мана шу ҳикматга ишора бормикин деган фикрга келиш мумкин.

Мана шундай фикрлар ва таҳминлар чархпалаги аро Исажон яратган романнинг қай оқимга мансублиги, воқеалар оқимининг мантиғи, боғламлари, образ яратиш маҳорати, асар тузилиши, архитектоникаси, воқеалар ривожи ва ечими каби илмий жиҳатлардан ҳам кўра, унда илгари сурилган бадиий-фалсафий, этик-эстетик ғояларга дикқат қаратилса мақсадга мувофиқ бўлади.

\* \* \*

Хулоса килиб айтганда, адибнинг мазкур романини тўлдира олиши мумкин бўлган бошқа бир асарига – “Хазинабон” ҳикоясига диққат қаратмоқчиман (И. Султон, “Озод”, тўплам, “Шарқ” нашриёт-матбаа концерни, 2012).

“Хазинабон”да ҳам “Боқий дарбадар”даги мотивлар кўзга ташланади. Мангулик сирларини излаб азиз-авлиёларнинг хоки пойларини зиёрат қилаётган қаҳрамон олма қурти ривоятини ва ҳазрат Навоий ҳикматини ёдга олади: “Тухм ерга кириб чечак бўлди, Қурт жондин кечиб ипак бўлди. Лола тухмича ғайратинг йўқму, Ипак қуртича ҳимматинг йўқму?”. У ўз ҳаётига разм солар экан, “емишнинг энг лаззатлиси бериб қўйилган, аммо кўриш имкониятидан маҳрум” олма қурти каби, ҳашамларга кўмилиб яшаш ўрнига, ақлу хис, тафаккур юксакликларига қўтарилишни орзу қиласи. “У юксакликларга ўз ақлим билан етиб боролмагач, балки, Ҳазрати Хизрни учратарман?” дейди таассуф оҳангидা. Қаҳрамон ҳикоя сўнгида Хизрга дуч келади, унинг Хизр эканини англамайди ҳам, лекин... “лекин ҳикматга етиб қелганимда, теграм ўзим каби, тафаккури ва иродаси билан ўша юксакликларга етиб боролмаган, шу сабабдан ҳам Хизрнинг ёки бирон авлиёнинг иноятига сазовор бўлишни орзулаган кишилар билан тўла эди”, дея икрор бўлади.

Жоҳиллик билимсизликда эмас, тафаккурсизликда, дейди ҳикоя қаҳрамони.

Тафаккур қилиб кўрилса, ҳар бир инсон қалбининг қайсиdir қисмида пинҳон бўлган қандайдир дарбадарлик яшириндир. Бу оламдаги барча ҳодиса мазмундан иборат ва ҳамма ўзидан кўра кучлироқ маъноларга интилади. Умрнинг моҳияти ҳам ана шунда, яъни инсон ўзлигига, шахсиятига маъно юклайдиган ва қадру қиймат бахш этадиган ҳаёт тарзига эришишдан иборат. Ёзувчи мана шу қадриятларни асраб-авайлаш орқали асл моҳиятга, абадият манзилига етишиши мумкинлигини эътироф этади.

*Абдуғафур РАСУЛОВ,  
Ўзбекистон фан арбоби,  
филология фанлари доктори,  
профессор*



ЖАҲОН АДАБИЁТИ



## БАДИЯТНИНГ ИККИ ОБИДАСИ

Дунё адабиётида шундай ҳодисалар бўладики, баъзан бошқа-бошқа миллатларга мансуб буюк ижодкорлар бир-бираидан бехабар ҳолда ўзаро ўхшашиб мавзуларда асарлар яратади. Энг қизиги,

бунда мавзунинг ўзаро яқин экани ҳар икки асарнинг оригиналлигига заррача бўлсин ҳалақит бермайди. Ҳеч бир жихатдан улар бир-бираини такрорламайди. Бунинг сабаблари, бизнингча, қуидагилардир: 1) ҳар бир ижодкор услубининг ўзига хослиги; 2) мавзуга ёндашув мезонларининг фарқланиши; 3) поэтик тасвирдаги индивидуаллик. Ушбу адабий-эстетик ҳодисанинг яна бошқа тури – бир ижодкорнинг иккинчисидан таъсиrlаниши натижасида ҳам мутлақ мукаммал, оригинал асарлар дунёга келиши мумкин. Бундай асарларни киёсий ўрганиш бадиий адабиёт сирларини, шунингдек, ижодкор руҳиятини англашда алоҳида аҳамиятга эга. Оврупо Уйғониш адабиётининг асосчиси Данте Алигьерининг “Илоҳий комедия” ва ўзбек шоири Абдулла Ориповнинг “Жаннатга йўл” драматик достонлари худди шундай асарлар сирасига киради. Аммо бу икки асар аро умумий ва хусусий жихатларнинг майдонга келиш жараёнлари тамомила ўзгача қонуниятлар маҳсулики, мақолада имкон қадар шу масалага диққат қартишга уринамиз.

Бу асарлар муаллифлари инсон руҳиятини қанчалик теран очиб берганни мутахассисларга маълум. Улкан адиларнинг, улуғ шоирларнинг, катта истеъдод эгалари нигоҳининг нақадар ўткирлиги жамиятдаги ҳодисаларни бадиий асарга кўчирганда улар замиридаги яширин ҳақиқатларни қанчалик нозик ҳис этиши, бу воқеаларни синчиклаб таҳлил қила билиши, улардан бадиий умумлашмалар чиқара олиши билан ҳам белгиланади. Бу икки асарни ўзаро қиёсий ўрганиш ана шу жихатдан ҳам зарур.

Қисқача мазкур асарларнинг ўзбек олимлари томонидан ўрганилиш тарихи ҳақида. Профессор Нажмиддин Комилов “Тафаккур карвонлари” (Тошкент, “Шарқ”, 2011) китобида Ибн Сино ва Данте ҳақида тўхталиб ўтади. Данте ҳақида фикр юритар экан, олим: “У Шарқ ва Ғарб маданияти оқимини бирлаштириди, умумбашибарий меросни қабул қилиб, уни янги юксак бадиий чўққига олиб чиқди”, дея таъкидлайди.

Абдулла Орипов Данте Алигьерининг “Илоҳий комедия” (1975) асари “Дўзах” қисмини ўзбек тилига таржима қилди. Ушбу асарнинг ўзбек ҳалқи маънавий мулкига айланишида ана шу таржиманинг ўрни бекиёс. Шоир “Дантенинг безовта руҳи” мақолосида (1983) улуғ италиян адиби ватанига саёҳати натижасида одам ҳамма жойда ҳам одам экани, шафқатсиз тузум, бойликка хирс, шуҳратпастлик ва қашшоқлик шундайлигича ҳам иллатлардан холи бўлмаган инсон руҳиятини вайрон қилиши, одам боласини ёвуз бўрига айлантириб қўйиши ҳақидаги хуласаларини изҳор этар экан, Дантели ҳам худди шу каби ўйлар қийнаганини ёзади (А.Орипов. Танланган асарлар, 4-том).

Акмал Саидов “Данте – юрист” (Тошкент, “Адолат”, 2011) китобида ижодкорнинг хукуқий қарашларини таҳлил этиб берди. Изланишлари натижасида олим мана бундай тўхтамга келади: “Данте адабиёт тарихида

маълум ва машхур, лекин мен Дантенинг бугун катта қизиқиш ўйғотаётган хуқук мавзуидаги трактат ва бошқа ишлари яхши ўрганилмагани боис, жаҳон юриспруденцияси кўў нарсани бой берганини айтмоқчиман”.

Улуғбек Сайдовнинг “Шарқ ва Ғарб: маданиятлар туташган манзиллар” (Тошкент, “Янги аср авлоди”, 2009) китобида Данте фалсафасида инсон талқини муаммосига эътибор қаратилади. Китобда, жумладан, мазкур буюқ шахс ҳаёти, шоир ижодида илоҳий тушунчалар талқини, аллома фалсафий-адабий меросининг аҳамияти ҳақида ҳам фикр юритилган.

Абдулла Ориповнинг “Жаннатга йўл” достони жуда чуқур ўрганилмаган бўлса-да, бу асар ҳақида ҳам бир неча мақолалар ёзилган, мулоҳазалар билдирилган. Узоқ Жўракулов “Армон талқинлари” мақоласида достондаги Йигитнинг висоли насиб бўлган жаннатмакон онаси хузурини армон билан тарқ этиши хусусида ёзар экан, муҳим умумлашмалар чиқаради. Она хузурига қайтиш учун гуноҳлардан пок бўлмоқ талаф этилиши, бунинг учун шоиргина эмас, жамият ҳам комил бўлиши зарурлиги, Йигит армонининг сўнгсизлиги сабаби шунда экани ҳақидаги олим хулосалари, айниқса, аҳамиятилдири.

Шоир Сирожиддин Сайиддининг “Ростини айтсан, кўксимдаги дилим янги” мақоласида асар хусусида қўйидагича мулоҳаза билдирилади: “Бу достон воқеаларни диний ақидалар асосига қуриши, ажойиб ғояларни тараннум этиши, таъсирли тимсоллар вужудга келтирилиши билан эътиборни тортади. Ўқувчи ва томошабинга охир-оқибатни ўйлатади”.

Ақрам Ҳамдамовнинг номзодлик диссертациясида (2011) шоир шеъриятида, жумладан достонларида ҳалқона поэтик тафаккурнинг ифода этилиш усуслари, ушбу муаммонинг бадиий талқини хусусида эътиборга молик фикрлар билдирилган.

“Абдулла Орипов ҳақида” (2011) номли мақоласида Дониёр Бегимкулов: “Шоирнинг бу драматик достони даврнинг бадиий-эстетик моҳияти тагзамили ижтимоий, ғоявий йўналишдан туриб пухта таҳлил этилганлиги, юксак бадиий пафоси билан ўзбек достончилигига муҳим ютуқ бўлди”, дея эътироф этади.

Бу сингари бир қанча тадқиқотлар, мақолалар эълон қилинган бўлишига қарамай, Данте Алигьерининг “Илоҳий комедия” ва Абдулла Ориповнинг “Жаннатга йўл” достонлари ўзбек адабиётшунослигига ҳанузгача тўлақонли ўрганилган эмас. Уларнинг қиёсий таҳлили эса мутлақо амалга оширилмаган. Шунинг учун ҳам ана шу икки улкан бадиий ҳодисани бир-бири билан қиёслаб ўрганишга жазм қилдик.

Бу икки бадиий обиданинг яратилиш тарихи ҳақида. Мухтасар тўхталадиган бўлсақ, шуни таъкидламоқ лозимки, “Илоҳий комедия” Данте Алигьери ижод этган асарларнинг бадиий ва ғоявий жиҳатдан энг юксаги ҳисобланади. Шоир бу асарини дастлаб “Комедия” деб атаган. Асар таржи-мони Абдулла Ориповнинг ёзишича: “...бу асар воқеалари кўринишдан “нариги дунё” да кечса ҳам, унинг марказида ҳақиқат ахтарган жафокаш инсон, иқболи нигун дохий санъаткор образи турибди. Шунинг учун бўлса керак, бу асарни “Дантенома” деб ҳам аташади. “Илоҳий комедия” ёзилган даврларда, комедия ҳозиргидек кулги аралаш саҳна асарини эмас, балки умуман бадиий шаклни, хусусан, йирик шеърий лавҳаларни ҳам англатган. Кейинги асрлардагина Бокаччио уни қайта нашрга тайёрлаётib, “Илоҳий комедия” деб атаган”. Бундай номланишига сабаб, асарнинг бадиий жиҳатдан мукаммалиги; инсонни ҳаёт ва ўлим, яъни охират ҳақида фикр юритишга ундашидир. Асар “Дўзах”, “Аросат”, ва “Жаннат” деб номланган уч қисмдан иборат. Ҳар бир қисм 33 та кўшиқдан ташкил топган. Биринчи қисмдаги дебоча билан умумий 100 кўшиқдан иборат. Унда муаллифнинг устози Вергилий кўмагига охиратга қилган саёҳати тасвирланади. Дантенинг бундай асар яратишига сабаб муҳаббати бўлмиш Беатриченинг барвақт ўлимидир. Бу йўқотишдан у қаттиқ таъсирланади, шундан сўнг ҳаёт ва ўлим тўғрисида фалсафий фикр юрита бошлайди ва “Илоҳий комедия” асарини дунёга келтиради.

## ЖАҲОН АДАБИЁТИ

“Илоҳий комедия”даги сингари “Жаннатга йўл” достонида ҳам воқеа-ҳодисалар охиратда содир бўлади. Устоз Абдулла Орипов билан сухбатда “Илоҳий комедия” качон таржима қилингани ва “Жаннатга йўл”нинг ёзиши санаси билан қизиқдик. Устоз бу ижодий жараён деярли бир вактда содир бўлганини айтди. “Жаннатга йўл”ни ёзишда “Илоҳий комедия”дан таъсиранланганмисиз? – деган саволга эса ижодкор: “Илоҳий комедия” шундай бу юк асарки, ундан таъсиранмаслик мумкин эмас” – деб жавоб берди. Шунинг барбарида, муаллиф “Жаннатга йўл”ни ёзишда муборак бир ҳадисдан таъсирангани ҳақида сўзлаб берди. Бу ҳадис мазмунига кўра, охиратдаги хисоб-китоб вактида инсонга ота-онаси ҳам, бошқа қариндошлари ҳам ёрдам бера олмаслиги, факат ҳақиқий дўстгина унинг оғирини енгил қилиши мумкинлиги зикр этилган экан. Бундан “Жаннатга йўл”нинг асосий фояси ана шу муборак ҳадис таъсирида туғилгани маълум бўлади.

“Илоҳий комедия” Европа адабиётига хос ҳар бир банди уч мисралик анчайин мураккаб шеърий шакл – терцинада ижод қилинган. Абдулла Орипов эътирофича, “...терцинада уч қатор баравар келаверади. Лекин уч қатор баравар бўлгани билан қофиялар занжир бўлиб, бир-бiri билан боғланиб кетаверади. Шарқ мумтоз адабиётидаги аruz вазнининг бузилиши қанчалик сакта бўлса, бу ерда терцинанинг бузилиши ҳам шеърий жиноятга айланиб кетиши мумкин”. Кўйидаги фикр эса, таржимоннинг қанчалик заҳматли меҳнатни амалга оширганини ҳис этиш имконини беради: “Асарда агар бир сатрнинг иккинчиси билан қофияси бузилса, шу иморат таг-туги билан нураб кетади. Занжир узилади! Мен бу билан катта бир ишни бажардим, деб айтишни хоҳламайман. Лекин воқеликка объектив баҳо беришим керак”.

Бадиият – бу, биринчи навбатда, бекиёс рамз ва тимсоллар дунёси, оҳорли образлар олами демакдир. Ҳар икки асар рамз ва тимсолларга бой. Энг эътиборли жихати, улар бу жихатдан ҳам бир-бирини зинҳор тақрорламайди.

*Ердаги умримнинг ярмини юриб,  
Зулмат водийисида адашиб қолдим.  
Боқсан, бир ўрмонга кетибман кириб.*

“Илоҳий комедия” ана шу мисралар билан бошланади. Бу асарда бош образ Дантелинг ўзи. Унинг ўрмонда адашиб қолишида Италиянинг ўша давр ижтимоий-сиёсий муҳитига ишора бор. Умуман олганда, асарда ўрмон – бу биз яшаб турган ҳаёт, яъни фоний дунё рамзи ўлароқ намоён бўлади. Данте ҳаётда шу қадар адашдимки, бундан кўра ажал ҳам яхши эди дейди:

*Даҳшатларга тўла ўрмон эди у,  
Эсадан чиқаролмай неча ийл толдим  
Ҳатто ажсал ундан түнглай эзгу.*

Баланд тоғдан тушиб келар экан, шоир олдидан қоплон, арслон ва қашқир чиқиб, йўлинни тўсади. Бу уч ҳайвон – асарда нафс рамзи сифатида келган. Қоплон – соҳтакорлик ва соткинлик тимсоли бўлса, арслон – мағрурлик ва зўравонлик; қашқир эса, очкўзлик ва такаббурлик рамзлариdir.

Зулматда қолган Дантелинг қаршисидан устози Вергилий чиқади ва уни бу коронғилиқдан олиб чиқажагини, Дўзах ва Аросатдан олиб ўтажагини, Жаннатга эса Беатриче орқали етишишини айтади.

Асарда Вергилий – йўлбошчи, пир тимсоли. У ўз шогирдини Жаннатга эришиши учун зарур бўлган босқичлардан олиб ўтишини таъкидлайди. Беатриче эса – илоҳий ишқ рамзи. Алишер Навоийнинг “Лайли ва Мажнун” достонида Мажнун Лайлининг тимсолида Аллоҳнинг васлига интилади, бу йўлда турли босқичларни босиб ўтади. Шундан келиб чиқиб, Дантелинг муҳаббатини ҳам икки томонлама изоҳлаш мумкин. Биринчиси, мажозий ишқ бўлиб, Данте ҳаётда чиндан ҳам Beатричени севади ва унинг ўлимидан

қаттиқ изтиробга тушади. Иккинчиси, илоҳий ишқ бўлиб, у Беатриче тимсолида Аллоҳнинг васлини мушоҳада этади. Асардаги доиралар рамзи эса, бизнингча, инсонларнинг дунё ҳаётида қилган ёмонликларига кўра жойлаширилишини англатади. Яъни доиралар – бу дараҷалар кетма-кетлигидир.

“Жаннатга йўл” достонидаги рамзлар ва тимсоллар, табиийки, ўзига хос; “Илоҳий комедия” дагига ўхшамайди. Асардаги Тарозибон – инсонларни эзгуликка чорлаш тимсоли. Диний-мътирифий манбаларда охиратда гуноҳу савоблар мезонга, яъни тарозига солиниши зикр этилади, бироқ айнан тарозибон ҳақида сўз юритилмайди. Бадиий асар бўлгани учун ҳам “Жаннатга йўл”да бундай тимсолнинг кўлланиши ўринли. Асарда тарозибон ҳатто кимнинг жойи жаннатда, қай биринчики дўзахда, яна қайсиси аросатда эканини ҳам эълон қиласди. Жумладан, Ўзга одам Тарозибонга титраб яқинлашар экан, унга нисбатан мана бундай хукм янграйди:

*Бу ёққа тур. Исминг нима? Ҳожати ҳам йўқ.  
Тамға босиб қўйган экан сенга Оллоҳим  
Сенинг жойинг аросатда. Кўнглинг бўлсин тўқ.*

Ўзга одам – умрини бесамар ўтказаётган, на ўзига, на жамиятга наф етказадиган кимсалар тимсоли. Табиийки, унинг қилмиши одамийликка ёт. Асарда унга исм кўйилмагани сабаби ҳам шунда. Ўзга одам – ана шу номнинг ўзиёқ бу тоифадагилар устидан чиқарилган поэтик хулоса.

Хур қиз – вафосизлик тимсоли. У инсон нима учун яратилганини, аёл зотининг зиммасида қандай масъулият борлигини англамай ўтган. Она томонидан айтилган мана бу мисралар фикримизни тасдиқлайди:

*Ҳа, Хур қизнинг у дунёси қорадир бутун,  
У қисматга бўй бермаган, қисмат бунга ёв  
Бегонадан хуфя совға олгани учун  
Бўғиб кетган буни бир кун бўлајсак куёв.*

“Бегонадан хуфя совға олиш” – унаштирилган қизнинг бундай қилмиши шарқона удумга хилоф. Шунинг учун ҳам асарнинг бу қаҳрамонига мана бундай баҳо берилади: “у дунёси қора”.

“Илоҳий комедия” ва “Жаннатга йўл” асарларида рамз ва тимсоллар ўзига хос. Уларда ўхшаш жиҳатлар бўлмаса-да, ҳар бири ўзига хос чуқур маъно-мазмунга эга. Ҳар икки асардаги бу рамз ва тимсоллар юксак бадииятни таъминлашга хизмат қиласди.

“Илоҳий комедия” ва “Жаннатга йўл” асарларида айрим муштарак жиҳатлар ҳам бор. Авваламбор, ҳар иккаласида воқеа-ходисалар охиратда юз беради. Данте ўз дунёқарашидан келиб чиқиб, буюк шахсларнинг Дўзах, Аросат ёки Жаннатдаги ҳаётини тасвиrlайди. У христианлик мезонларига таянган ҳолда Шарқ мутафаккирларидан Ибн Сино, Ибн Рушд каби буюк сиймолар ва яна Цезар, Афлотун, Сукрот, Демокрит, Гераклит, Гиппократ каби улуғ шахсларни Дўзахнинг биринчи доирасида, яъни христиан динига мансуб бўлмаган шахсадар жойлашириладиган доирада тасвиrlайди.

Абдулла Орипов эса Ўзга одамни Аросатда, йигитни Дўзахда, ота-онасини Жаннатда тасвиrlайди. Бунда у мезон сифатида Куръони карим ва ҳадиси шарифга таянади. Икки ижодкор ёндашувидаги бу тафовут, биринчи навбатда, уларнинг дунёқарashi, эътиқоди билан боғлиқ. Йккинчидан, Шарқ ва Ғарб менталитети ҳам бунда ўз сўзини айтган, дейиш мумкин.

Яна бир муштарак жиҳати, иккала асарнинг ҳам бош гояси инсон ва унинг моҳиятини англаш экани билан белгиланади. Улардан келиб чиқадиган хулоса: одам болалари умрини бехуда ишларга сарфламаслиги, дунё ва охиратини обод қилиш ҳақида қайғуриши зарур. “Жаннатга йўл” достонида ушбу муаммо талқини тамомила ўзига хос. Жумладан, асарда тасвиrlанишича,

ЖАҲОН АДАБИЁТИ

бир мўйсафид чол етти марта ҳажга борган, бор-йўғи бир мартагина отасини сансирагани учун унинг аслида савоб саналган бу амали қабул бўлмаган. Шоир бу орқали инсон ҳар канча савоб ишларни қилмасин, ота-онасини хурмат қилиб, уларнинг розилигини топмаса, унинг амали бехуда кетиши ҳакидаги машхур ҳадиси шариф мазмунига ишора қиласди. Асардаги Ўзга одам қисмати аянчли: у на гуноҳ ва на савобга қўл урган. Аросатга тушиши сабаби шунда. Зеро, одам болалари ўзга жонзотлардан ақлу тафаккури билан ажралиб туради. Шу боис у азиз умрини имкон даражасида эзгу амалларга сарфламоғи керак – бу образ замирига сингдирилган маъно, муаллифнинг бадиий нияти – ана шу.

Жаннатга киришига икки пайса етмаган Йигит образида ҳам ибрат олиш зарур бўлган жиҳатлар талайгина. Жумладан, у бирорвга ёмонлик қилмаган бўлса ҳам, товламачи, текинхўр инсонларни кўра билиб туриб, уларни йўлдан қайтармаган. Бундай лоқайдлик, табиийки, жазосиз қолмаган. Инсон – энг буюк ҳилқат. Шу боис у умринг ҳар бир лаҳзасини эзгуликка сафарбар этиши зарур. Бу эса, ўз навбатида, уни икки дунёда азизу мукаррам этади – Йигит қисматидан муаллиф чиқарган поэтик хулоса ана шундай.

*Бир қария ётар эди менинг ёнимда,  
Уғли унинг тенасига қўйди улкан тоши.  
Бироқ бир кун иблис кирди ўғил қонига,  
Ўғил бир кун таъмасини айлаб қўйди фоши:  
Қабр тошида ўзин исми ёзилмай қолмии,  
Сангтарошни олиб келди бир кун у нокас  
Ва ўз исмин ўйдирди ҳам, бу савоб эмии,  
Йўқ бу савоб атамлагай, манманлик, холос.*

Ота қабрига тош қўйгач, сангтарошни олиб келиб, ўз исмини ўйиб ёздириган ўғил хусусида ёзар экан, муаллиф “унинг қонига иблис киргач, у таъмасини фош этгани; бу савоб эмас, манманлик” экани хусусидаги бадиий хукмни чиқаради. Унинг бу тошни кўрган инсонлар фалончи азamat қўйдирган экан дейишини исташи, отасини эмас, ўз обрўсини ўлаши ҳақидаги мисралар ўқувчини чукур мушоҳада юритишга чорлайди. Шоир Ота номидан, кўряпсанми, инсон зоти манманлиги йўлида ҳатто ўлимдан ҳам фойдаланади, деган бадиий умумлашма чиқаради.

*Қабристондан ўтиб қолган бирорта кимса  
Ҳашаматли мармар тошини кўриб қолган он,  
О, бу тошини қўйған фалон азамат деса,  
Ота эмас, ўз обрўсин билган у инсон.*

Юқоридаги мuloҳазалардан хулоса қилиш мумкинки, Данте Алигьерилининг “Илоҳий комедия” ва Абдулла Ориповнинг “Жаннатга йўл” асрлари том маънода мураккаб ва зиддиятли жараён – ўзликни англаш йўлиниг ўзига хос бадиий талқини ўлароқ ижод этилган. Мавзу бир қадар яқин бўлишига қарамай, кўлланган рамз ва тимсоллар моҳияти, поэтик талқин, муаллифлар бадиий нияти ва ижодий услугу нуқтаи назаридан бу икки асар бир-биридан кескин фарқ қиласди. Бу икки буюк бадиият обидасини ҳар жиҳатдан мукаммал қиёсий ўрганиш адабиётшунослигимизнинг галдаги вазифалариданdir.

*Ойбарчин АБДУЛҲАКИМОВА,  
ЎзМУ талабаси*



## “ХАМСАТ УЛ-МУТАҲАЙИРИН” ВА АБДУРАҲМОН ЖОМИЙ

Хар бир шахснинг камолга етишида унга йўл йўриқ кўрсатган, таълим-тарбия берган, бевосита таъсир ўтказган инсонларнинг алоҳида ўрни бўлади. Шу жиҳатдан қараганда, Абдураҳмон Жомий буюк ўзбек шоири ва мутафаккири Алишер Навоий ҳаёти ва ижодига пир ва устоз сифатида тўғридан-тўғри таъсир ўтказган улуғ зот эди.

Хижрий 898 йил, муҳаррам ойининг 17-куни, яъни милодий 1492 йилнинг 8 ноябри бутун Хурросон эли, хусусан, Ҳирот ахли, айникса, Алишер Навоий учун ўта оғир кун бўлди. Чунки шу куни Навоийнинг пири ва устози, энг яқин қадрдони Абдураҳмон Жомий вафот этди. Буюк ўзбек шоири учун бу жуда катта йўқотиш бўлди.

Навоий ўзининг аксарият шеърий ва насрой асарларида устозини юксак даражада таъриifu тавсиф этди. Аммо, қайсиdir маънода, устози ҳақида бир бутун тасаввур уйғотадиган яхлит бир асар ёзиб, унинг хотирасини абадийлаштиришга эҳтиёж бор эди. Шу мақсадда Навоий Жомий вафотидан икки йил ўтганидан кейин, яъни 1494 йили у ҳақда маҳсус “Хамсат ул-мутахайирин” (“Ҳайратланарли бешлик”) асарини яратди.

Навоий ўзи дастлаб тузган “Бадойиъ ул-бидоя” дебочаси, “Хазойин ул-маоний” таркибиға кирувчи “Ғаройиб ус-сигар” (“Болалик ғаройиботлари”), “Наводир уш-шабоб” (“Ёшлик нодирликлари”), “Бадоеъ ул-васат” (“Ўрта яшарлик гўзалликлари”), “Фавойид ул-кибар” (“Қариллик фойдалари”) девонларидан жой олган шеърий асарларида, “Ситтайи зарурия” дебочаси ва ундаги қасидаларда устозини мадҳ этади. “Девони Фоний”да Жомийга татаббуълар битиб, унинг таврида ҳам ғазаллар ёзади. “Маҳбуб ул-кулуб”, “Мухокамат ул-лугатайн” ва “Мезон ул-авzon”да ҳам устозини қайта-қайта ёдга олади. “Ҳамса”нинг ҳар бир достонида унга маҳсус боб бағишилаб, “Мажолис ун-нафоис” тазкирасида ҳам Жомийни алоҳида таъриfu тавсиф этади.

Навоий ижодида Жомий билан бевосита боғлиқ ҳолда яратилган асарлар алоҳида ўрин тутади. Бироқ устозга алоқадор асарлар орасида “Хамсат ул-мутахайирин” яққол ажралиб туради. Чунки асар, авваламбор, бошдан-охир Жомий таъриfu тавсифига бағишилангани, Жомий вафотидан кейин ёзилгани учун ҳам у, қайсиdir маънода, икки буюк ижодкор муносабатларининг ўзига хос хотимаси ҳам ҳисобланади. Қолаверса, у Жомий хотирасини абадийлаштириш учун маҳсус ёзилган.

Жомийни батағфисил таърифлаш жиҳатидан эса “Ҳамса” достонлари, “Мажолис ун-нафоис”, “Насойим ул-муҳаббат” ҳамда “Хамсат ул-мутахайирин” асарлари алоҳида ўринда туради. Чунки “Ҳамса” достонларининг ҳар бирида устозга бағишиланган маҳсус боб, тазкираларда эса бу зоти шарифга алоҳида таъриф мавжуд. “Ҳамсат ул-мутахайирин” эса – айтиб ўтилганидек, тўлиғича Жомий ҳаёти ва ижодига бағишиланган асар. Шунинг учун ҳам икки буюк шоир муносабатларини тадқиқ этишда, аввало, ана шу асарларга мурожаат қилинади.

“Ҳамса”, биринчидан, амалда “Хамсат ул-мутахайирин” моҳиятига етиш учун жуда-жуда аскотади, иккинчидан, ҳатто, бу буюк эпопеяда Жомий таърифларида келган боблар ҳам устоз-шогирд ва пир-мурид муносабатларини тўла ёритиб беролмайди, яъни “Ҳамсат ул-мутахайирин”га бўлган

ЖАҲОН АДАБИЁТИ

эҳтиёжни тўла қондира олмайди, учинчидан, “Хамса”да Жомий сиймоси – адабий тимсол, шунинг учун бу ерда у ўта бадиий бўёкларда тасвиrlа-нади, тўртинчидан, Жомий сиймосини яратишда муаллифнинг “Хамса”ни ёзаётгандаги ўз олдига қўйган мақсади билан “Хамсат ул-мутаҳайирин”ни битишда ўз олдига қўйган мақсади кўп жиҳатдан фарқ қиласди.

Навоий ҳар қанча соҳир сўз санъаткори бўлмасин, барибир, давр мухити, реал воқеалар, инсоний муносабатларни хаққоний, тўлиқ тасвиrlаш учун назмнинг имкониятлари торлик қиласди. Шунинг учун ҳам у насрга кўл урди. Бироқ тазкира жанри ҳам Жомий тимсолини тўлиқ яратиб бериш учун учнчалик қулай эмас эди. Чунки тазкирада бир қанча шахс ҳаётни ва фаолиятини ёритиш кўзда тутилади. Бундан ташқари, “Мажолис ун-нафоис” – шоирлар, “Насойим ул-муҳаббат...” эса авлиёлар – ҳақидаги тазкира. Шунинг учун бу тазкираларнинг бирида Жомий шоир сифатида, иккинчисида авлиё тарзида таърифу тасниф этилади. “Хамсат ул-мутаҳайирин”да эса шоир ва авлиё, устоз ва рахнамо – Жомий сиймоси бир бутун ҳолда гавдалантирилади.

“Хамсат ул-мутаҳайирин”нинг композицияси ҳам – жуда ўзига хос. Асар – асосан, “Муқаддима”, уч мақолат ва “Хотима”дан, яъни жами беш қисмдан иборат. Бироқ унинг “Бисмилло...” деб бошланувчи алоҳида кириш қисми ҳам бор. Унда Навоий ҳамд ва наът, Жомий таърифидан кейин асарнинг ҳар бир қисмida айнан нималар ҳақида тўхталишини ўзи батафсил хикоя қиласди.

Бешта асосий боб таркибига кирмаган “Бисмилло...” китобхонга ўзига хос тарзда йўл қўрсаткич вазифасини бажаради.

“Хамсат ул-мутаҳайирин”нинг ҳар бир қисми нималардан таркиб топганини қисқача қайд этсак, қўйидагича манзара намоён бўлади:

**“Бисмилло...”** – ҳамд, наът, Жомий мадҳи, асарнинг мақсади ва режаси.

**“Муқаддима”** – Жомийнинг туғилиши, насаби, болалик ва йигитлик даври, устозлари ва пири, зоҳирий ва ботиний илмда эришган даражаси, Навоийнинг бу зот билан илк бор учрашгани.

**“Аввалги мақолат”** – икки ижодкор ўртасидаги нозик устоз-шогирдлик муносабатларини акс эттирувчи 17 та ҳикоят.

**“Иккинчи мақолат”** – Жомий ва Навоий ўртасидаги турли ёзишмалар ва улар билан боғлиқ воқеаларни қамраб олган 13 та ҳикоят.

**“Учинчи мақолат”** – Жомий асарлари рўйхати (жами 37 та китоб ва рисола санаалган), шунингдек, икки буюк ижодкорнинг бир-бирига адабий таъсир этиши натижасида дунёга келган асарлар. Жами 12 масала.

**“Хотима”** – Навоий Жомий ҳузурида ўқиган ва таълим олган китоб ва рисолалар рўйхати, Жомийнинг кароматлари билан боғлиқ 5 ҳикоят, Жомий вафотининг тафсилотлари, Навоийнинг устозига атаб ёзган марсияси.

Навоий буюклигининг ўзига хос жиҳати шундаки, бу қалам соҳибига назмда ҳам, насрда ҳам тенгсиз асарлар яратиш қобилияти ато этилган эди. Аммо “Хамсат ул-мутаҳайирин”да Навоийни тамоман бошқа ижодкор сифатида кўрамиз. Лайли ва Мажнун, Фарҳод ва Ширин каби тўқима тимсолларни ҳадди аълосига етказиб яратган шоир ўзи билан ҳамнафас яшаган реал шахс – Жомий сиймосини акс эттиришда бутунлай ўзгача йўлдан боради. Устози ва пирини таърифлашда турли жимжимадор, муболағага бой сўзлар, ифодалардан максимал даражада қочади. Ҳаётда ўзи кўрган, билган воқеаларни ўта аниқ қилиб ифодалайди. Энг мухими, ҳеч ерда китобхонни чалғитмайди. Ҳаётий ҳақиқатни борлигича акс эттиради.

“Хамсат ул-мутаҳайирин” – Гарб адабиётшунослиги атамаси билан ифодалаганда, а г и о г р а ф и к асар. Чунки унда диний-тасаввуфий жиҳатдан комил шахс мадҳ этилади. Навоий бу асарда Жомийни факат устози бўлгани учунгина эмас, балки комилликка етган тасаввуф вакили ва ўзининг пири бўлгани учун таърифу тавсиф этади. Ана шу жиҳати билан асар – мумтоз адабиётимиздаги м а н о қ и б жанрига мансуб. Бироқ “Хамсат ул-мутаҳайирин” анъанавий маноқиблардан ҳам бирмунча фарқ қиласди. Анъанавий маноқибларда ҳам, агиографик асарларнинг Европадаги на-

муналарида ҳам мадҳ этилаётган диний ёки мистик (тасаввуфий) жиҳатдан комил деб ҳисобланган асар қаҳрамонининг ибратли ҳаёт йўли, кароматлари, фалсафий хуносалари батафсил ҳикоя килинади. Бироқ уларда муаллифнинг нуқтаи назари, асар қаҳрамонига бевосита муносабати (симпатияси) деярли акс этмайди. Шунинг учун ҳам, кўпгина агиографик асарларнинг муаллифлари – номаълум. Уларда муаллифнинг фикр-мулоҳазаси эмас, мадҳ этилаётган қаҳрамоннинг ҳаёти бирламчи аҳамият касб этган. Бундан ташқари, агиографик асарларнинг аксарияти кўлдан-кўлга кўчирилиб, йўл-йўлакай таҳрир килиниб, матннинг шакл ва мазмуни ўзгариб, у жамоавий ижод маҳсулига айланниб бораверган. Шу сабаб бундай асарларда таъриф этилаётган тарихий шахсни идеаллаштириш учун муболагаға кўп эрк берилган, реал воқеалар турли тўқима ривоятлар билан қўшилиб кетган.

“Хамсат ул-мутахайирин”да эса тамоман бунинг аксини кўрамиз. Биринчидан, Навоий Жомийнинг бутун ҳаётини тўлиқ эмас, балки унинг ўзи кўрган-билган жиҳатларинигина ёритишни асосий мақсад қиласи. Йиккинчидан, факат ўзи ишонган, гувоҳ бўлган воқеаларнигина баён этади. Учинчидан эса асарда қаҳрамоннинг эмас, балки муаллифнинг унга бўлган муносабати, фикр-мулоҳазалари бирламчилик қиласи. Навоий устози сиймоси, яъни объектни ҳар тарафлама эмас, балки, асосан, ўзи яхши билган жиҳатдан, субъект нуқтаи назаридан туриб тасвирлайди. Шунинг учун ҳам, *Навоий маноқиб-ҳолотлар анъаналари негизида янги бир жсанрни яратган*, деб ҳисоблаш мумкин.

Алишер Навоийнинг “Хамсат ул-мутахайирин”, “Холоти Сайид Ҳасан Ардашер”, “Холоти Пахлавон Муҳаммад” асарлари бир-биридан қанчалик фарқли хусусиятлари билан ажралиб турмасин, барибир, учталаси ҳам бир типдаги ва айнан бир жанрдаги асарлар ҳисобланади. Бу уч асарни бугунги кундаги жанрлар билан муқояса қиласиган бўлсак, улар бадиий публицистиканиң *портрет очерк ҳамда тарихий-биографик эссе* жуда яқин туради. Гарчи эссе дастлаб Европа адабиётида шаклланиб, такомиллашган бўлса-да, Навоийнинг бу уч асарини, эссе жсанрининг ўзбек адабиётидаги дастлабки намуналари, деб айта оламиз.

Навоийнинг бу уч асари том маънодаги бадиий наср намунаси эмас. Реал тарихий шахслар ва воқеаларни ифода этгани, шунингдек, тимсолијилик(образлилик)ни саклаб қолгани билан, барибир, бугунги тушунчалар асосида уларни публицистикага мансуб асарлар, дея оламиз. Шу ўринда Навоийнинг тенги йўқ шоир ёки ёзувчигина эмас, балки ўта маҳоратли публицист эканига ҳам гувоҳ бўламиз.

Навоий дастлаб яқин кишиси, қайсиdir маънода пири Сайид Ҳасан вафотидан икки йил кейин, яъни хижрий 896, милодий 1490\91 или “Холоти Сайид Ҳасан Ардашер” асарини ёзган эди. “Хамсат ул-мутахайирин” билан бу анъанани давом эттириди. Жомий вафотидан бир йил ўтиб Навоийнинг яна бир қадрдони Пахлавон Муҳаммад вафот этди. Шундан сўнг Навоий 1495 или “Холоти Пахлавон Муҳаммад” асарини қоғозга тушириди.

Навоийнинг айнан шу уч киши ҳақида улар вафотидан кейин асар ёзиши бежиз эмас эди. Чунки у бу учала шахсни ўзига энг яқин дўст, устоз, раҳнамо деб билган. Қолаверса, бу шахсларни Навоий замонасининг ўзи яқиндан билган авлиёсифат инсонлари сифатида тасвирлаган. Аммо буларнинг орасида, табиийки, Абдурахмон Жомийнинг ўрни бутунлай бошқача эди. Шунинг учун “Хамсат ул-мутахайирин” қолган икки “Холот”га нисбатан ҳам номланиш, ҳам мазмун, ҳам ҳажм жиҳатидан кескин фарқ қиласи. Шу ўринда: “*Навоий Жомий ҳақидаги асарни нима учун ўз анъанасига кўра “Холоти Абдураҳмон Жомий” деб эмас, балки “Хамсат ул-мутахайирин” деб номлади?*” – деган табиий савол туғилади.

Айнан шу саволга Зайниддин Восифийнинг “Бадоеъ ул-вақоеъ”<sup>1</sup> асаридан

<sup>1</sup> “Бадоеъ ул-вақоеъ” (“Нодир воқеалар”) – Зайниддин ибн Абдужалил Восифий (тахминан 1485\86 – 1566)нинг эсдалик сифатида ёзган асари.

жавоб топгандек бўламиз. Унда “Хамсайи мутахаййира” (“Хайратлантиарли бешлик”) ҳикояти келтирилади. Адибнинг ёзишича, бу ҳикоятни у ҳижрий 933 йилнинг жумадилохир ойи, яъни милодий 1547 йилнинг марта Султон Мухаммад Баҳодирхон билан Тошкент шаҳридан 1 фарсаҳ (8 километр) ма-софа бўлган Парак дарёси бўйига овга чиққанида айнан шоҳнинг илтимосига биноан айтиб беради. Демак, бу ҳикоят халқ орасида кенг ёйилган. Унда келтирилишича, “Хамсайи мутахаййира” силсиласининг бошлиғи Абдурахмон Жомий бўлган. Бу ҳайратлантиарли бешликка яна Мавлоно Камолиддин Шайх Ҳусайн, қашф соҳиби – Мавлоно Шамсиддин, Мавлоно Довуд ва Мавлоно Муъин Тунийлар киришган. Зайнiddин Восифий бу бешликни санар экан: “*Бирор ақл эгаси буларга олтинчи бўлиб қўшила олмади*”, – деб ёзади.

Бу беш талаба 18 ёшларида ўз замонасининг кучли мударрисларидан бири Амир Сайид Шариф қўлида таҳсил олишар эди. Дарсларнинг бирида ўртага мураккаб бир масала ташланади. Шогирдлар билимдонликими, маҳмадоналикими қилиб, шу хусусда маъруза ўқиётган устознинг сўзини етти марта бўлишади. Али Кушчининг “Шарҳи тажрид” асари мутолаасида эса илми толиблар устознинг фикрига бутунлай қарши чиқишади. Шогирдларини илм жиҳатдан енголмаган Амир Сайид Шариф хийла йўлига ўтиб, ўзини касалга солади ва йигитларга қирқ кун таътил беради. Ўзи эса камчиликларини тўлдириш учун мук тушиб китоб ўқишига киришади. Бироқ шогирдлар ҳам анойи эмас эди. Улар вақтни бекор кетказмаслик учун чора излашарди. Ён-атрофда буларга бас келадиган мударрис топилмасди. Шунинг учун улар ҳар қуни куръа ташлаб, ўзларининг ораларидан бир мударрис сайлашар эди. Биринчи қуни дарс бериш Абдурахмон Жомий чекига тушади. Шундай қилиб, талabalар бир-бирларига дарс бериб, ўз билимларини янада ҷархлаб боришади. Устоз Амир Сайид Шарифнинг ҳам кўнгли хотиржам эди. У: “*Шогирдларим бекорчиликда юрибди, мен эса тинмай ўқиб, уларни енга оладиган даражада далиллар тўплайдим*”, – деб ўйлаганди. Бироқ таътилдан сўнг шогирдларини ўз ҳузурига чорлаб, маърузани бошлаган устозни талабалар илм билан яна рад эта бошлашади. Шундан сўнг Амир Сайид Шариф: “*Боринглар, қаерни кўнглингиз тиласа, шу ерга бориб, дарс бераверинглар*”, – деб шогирдларига жавоб бериб юборади.

Зайнiddин Восифий ҳикоя якунида шундай ёзади: “Мавлавий (Амир Сайид Шариф – Ф. О.) ҳузуридан чиққанларидан кейин Мавлоно Жомий ишқ ва тасаввуф водийсига шўнгидилар. Мавлоно Шайх Ҳусайн ва Муъин Туний таҳсил ва мутолаага машгул бўлдилар. Мавлоно Довуд эса Султон Маҳмуд ибни Султон Абусаъид Мустанд садрлигига сайланди. Мавлоно Шамсиддин соҳиби қашф Султон Абусаъиднинг садри бўлди”<sup>1</sup>.

Шундай қилиб, илм-маърифатнинг чўққисига чиққан бу бешлик халқ орасида “Хамсайи мутахаййира” номи билан машҳур бўлади.

Алишер Навоийнинг Жомий ҳақидаги асарига “Хамсат ул-мутахаййирин” деб ном бериши ҳам – шу машҳур воқеа билан бевосита боғлиқ. “Хамсайи мутахаййира” воқеаси ўз даври ўқувчиси учун маълум бўлгани учун ҳам муаллиф асарнинг номи ва воқеа ўртасидаги боғлиқлик ҳақида ҳеч нарса демаган. Шу далилларга асосланиб, “Хамсайи мутахаййира” воқеаси асарнинг номланиши ва айнан беш қисмдан таркиб топшишини белгилаб берган, деган хulosага келамиз. Аслида, Навоий устози ҳақида беш эмас, балки бир неча қисмдан иборат асар ёзиши мумкин эди. Агар, муаллиф “5” сонининг ҳалқ оғзаки ижоди ва мумтоз адабиётдаги анъанавийлигини инобатга олган, десак, “7” рақамининг үрни ундан ҳам каттароқ эди.

Демак, Навоийнинг “Хамсат ул-мутахаййирин” асари номида юқоридаги ҳикоятга ишора бор. Шунинг учун ҳам бу асарнинг номи ва тузилиши муаллиф қаламига мансуб икки “Ҳолот”дан кескин фарқ қиласи.

<sup>1</sup> Зайнiddин В о с и ф и й. Бадоев ул-вақоев. Т.:Faafur Fулом номидаги адабиёт ва санъат нашириёти. 1979. 184-бет.

<sup>2</sup> Ўша манба, 186-бет.

<sup>3</sup> Ўша манба, ўша бет.

Умуман, XV аср адабий мухити, хусусан, Жомий ва Навоий муносабатларини ўрганиш учун бу икки даҳо ёзган асарларнинг ўзи камлик қилади. Муносабатлар қиёфасини янада ёркинроқ очиб бериш учун уларга замондош бўлган бошқа адибларнинг асарларини ҳам чукур тадқиқ этишимиз керак. Шундагина ўша даврдаги адабий мухит, ўша замонда яратилган асарлардаги маъно-мазмунни теранроқ англаймиз. Агар Зайниддин Восифийнинг “Бадоеъ ул-вақо’еъ” сида “Хамсайи мутахаййира” ҳикояти бўлмаганида, “Хамсат ул-мутахаййирин” асарининг номланиш моҳиятини тўлиқ англамаган, унинг номланишини фақат асарнинг беш қисмдан иборат эканигагина боғлаб тушунтирган бўлар эдик. Бу эса тарих ҳақиқатини чукур англашга имконият яратмас эди.

Биз мулоҳаза юритган бешта билимдонга нисбатан ишлатилган “Хамсайи мутахаййира” иборасининг ўзи ҳам – рамзий маънога эга. Бу ҳақда “Фиёс ул-луғот”дан қимматли маълумот оламиз: “Хамсайи мутахаййира” – *Ой ва Күёйдан ташқари, бешта сайёра бўлиб, булар Уторуд (Меркурий), Зуҳра (Венера), Мирриҳ (Марс), Муштарий (Юпитер) ҳамда Зуҳал (Сатурн)* дан иборат. Уларни шунинг учун “мутахаййира” дейдиларки, улар гоҳ-гоҳ ўзларининг асосий, табиий йўлларидан чекиниб, ўзларига яқин тарафга қараб ҳаракат қила бошлиайди. Яна у томондан қайтиб, ўзларининг доимий йўлларига тушиб олади”<sup>1</sup>. Шундан хулоса қилиш мумкинки, Жомий бошлиқ бешлик ана шу улкан сайёralарга менгзалган. Бешликнинг бир баҳона туфайли устоздан чекиниб, 40 кундан сўнг яна мударрис олдида тўпланишини ҳам беш сайёранинг юқорида санаб ўтилган хусусиятига ўхшатиш мумкин.

“Хамсат ул-мутахаййирин”да Жомий ва Навоий муносабатларининг турли томонлари акс этган бўлса ҳам, аввало, улар ўртасидаги ҳақиқий устоз-шогирдлик ришталари кўрсатилади. Жумладан, асарда муаллиф эринмасдан устози ҳузурида таълим олиш ва фойдаланиш юзасидан ўқиган китоблари рўйхатини ҳам келтириб ўтади. Бундан ташқари, Навоий Жомий “Хамса” билан “Хафт авранг”ни қиёслаш йўли билан овоз чиқариб ўқиганида тинглаганини, шунингдек, баъзи рисолалар Жомий олдида ўқилмаган бўлса ҳам, улардаги айрим мураккаб жойларни устоздан сўраб турганини ёзади. Ана шу маълумотлар Жомийнинг, ҳақиқатан ҳам, Навоийга тўғридан-тўғри муаллим, мударрис, чинакам устоз эканини яна бир карра исботлайди.

Жомий ва Навоий ўртасида ўта кучли адабий алоқа бўлган. Бу “Хамсат ул-мутахаййирин”нинг деярли ҳар бир сахифасида акс этиб туради. Навоий Жомийнинг турткиси билан кўплаб асарлар яратган бўлса, ўз ўрнида устоз ҳам шогирдининг даъвати билан йирик-йирик асарларга қўл уради. Бу тарьсири Навоий фахр билан қайта-қайта такрорлашдан чарчамайди.

Энг мухими, устоз ва шогирднинг бир-бирига хурмат-эҳтироми, меҳр-муҳаббати – чексиз. Бундан ташқари, икки буюк қалам соҳибининг адабий дид ва савиялари – деярли бир хил даражада. Бунга ишонч ҳосил қилиш учун “Хамсат ул-мутахаййирин”даги турли ҳикоятларни ўқишининг ўзи – кифоя.

“Хамсат ул-мутахаййирин” Жомий ва Навоий ўртасидаги устоз-шогирдлик муносабатларини ёритиш учун энг мўътабар илмий-тарихий манба хисобланади. Нафакат навоийшунос, балки<sup>2</sup> жомийшуносларнинг ҳам бу бебаҳо асарга мурожаат этмай иложлари йўқ.

“Хамсат ул-мутахаййирин” ҳам Жомий, ҳам Навоий ҳаёти, фаолияти, айниқса, ижодини тадқиқ этишда бирдек хизмат қиласеради. Энг мухими, бу асар икки буюк қалам соҳибининг ўзаро юксак муносабати, колаверса, бир буюк тарихий шахснинг иккинчи бир бемисл даҳога бўлган чексиз хурмат-эътиборини намоён этади. Бу эса мазкур асарнинг қадр-қиммати юксак эканидан далолат беради.

Навоий Жомий билан айнан қайси йили учрашганини қайд этмаган. Бироқ

<sup>1</sup> Фиёс ул-луғот. 1-жилд. Душанбе. Нашриёти “Адиб”, 1987. саҳ. 313.

<sup>2</sup> “Хамсат ул-мутахаййирин” тожик тилига ҳам таржима қилиниб, чоп этилган. Қаранг: Хамсат ул-мутахаййирин. Д.: Нашриёти “Адиб”. 1989.

“Хамсат ул-мутахайирин”даги айрим маълумотлар, бу иккала шаҳс Ҳусайн Бойқаро таҳтни эгаллаган 1969 йилдан кейин ишлар кўришишиган, деб хулоса қилишга ундаиди. Шу йилнинг апрелида Навоий Самарқанддан Ҳиротга қайтиб келгани – аниқ. Жомий ва Навоий ўртасидаги устоз-шогирдлик муносабатлари дастлабки учрашувдан бошланган бўлса ҳам (Навоий “Хамсат ул-мутахайирин”да Жомий биринчи кўришишдаёқ “Рисолайи қофия”дан сабок берганини алоҳида таъкидлайди), пир-муридлик ришталари кейинроқ боғланган. Евгений Бертельс, *Навоий 1476/77 ишли Жомий боичилигида нақшбандийлик тариқатига кириб, унга мурид тушган*, деб ҳисоблайди.

Жомий тасаввуфда нақшбандия тариқатининг йирик вакили эди. У зимдан нақшбандияга руҳан мос бўлган маломатия оқимига, унинг одобига амал қиласа эди. Буни Навоий “Хамсат ул-мутахайирин”да алоҳида таъкидлаб ўтади. Маломатийларнинг ботиний оламлари зоҳирда акс этмаслиги, яъни улар ташки тарафдан оддий одамлардан асло фарқланмаслиги, шунингдек, уларнинг сўфийлигини хеч ким сезмаслиги керак. Улар ўта камтарлик билан ўзларига маломат ёғдиришни истаганлар. Бирор кишидан маломат кўрса, яъни кимдир уларни камситса, менсимаслик қилса, буни улар ўзлари учун фаҳр деб билишган. Жомий ҳам камтарликнинг олий намунасини курсатиб, ўзига маломат ёғдиришни хуш кўрган.

Маноқиб жанрининг талабига биноан, унда мадҳ этилаётган диний-тасаввуфий вакилнинг камолоти, эришган даражаси кўрсатиб берилиши керак. Шу жиҳатдан олиб қараганда, асарда Жомийнинг ҳам тасаввуфда тутган ўрнини белгилаб бериш муаллиф олдидаги муҳим масалалардан бири эди. Навоий Жомийнинг, зоҳирий илмлар билан бир каторда, ботиний илмларни ҳам эгаллаганини таъкидлаб, уларни қуидагича учга бўлиб кўрсатади:

Биринчиси – шеър, Жомий унинг ҳар турида ижод қилиб, барча шоирлардан кўра ҳам кўпроқ шуҳрат қозонди.

Иккинчиси – олдин ўтган шайх ва авлиёларнинг тасаввуфга оид, тушуниш мураккаб бўлган турли китобларини шундай шарҳлаш санъатини қўлга киритдики, бундан кўплаб эҳтиёжмандлар баҳраманд бўлди.

Учинчиси – тариқат одоби бобида шундай нозик йўл тутдики, унинг дунёвий илмлар, шеъриятдан ҳам улуғроқ бўлган ниҳоний иш, яъни тасаввуф билан машғул бўлганини атрофдагилар деярли билмади ва фаҳмламади ҳам.

Навоий устози ва пирини “кошифи сирри Илоҳ”, яъни “Илоҳ сирларини каиф этувчи” деб таърифлайди. Бу таърифни унча-мунча кишига нисбатан қўллаб бўлмайди. Жомийнинг бу илоҳий даражасини ҳар ким ҳам сезаверманган. Навоий эса бевосита гувоҳ сифатида устозининг пирлик хусусиятларини замондошлари ва келажак авлодга билдириб кетишни ўзининг бурчи деб билди, шу масъулиятни бўйнига олиб, айни вазифани ҳалоллик, адолат ва маҳорат билан адо этди.

Мустабид тузум даврида Жомийнинг ҳаёти, илмий-адабий мероси хусусида талайгина тадқиқотлар амалга оширилган. Бироқ унинг сўфийлиги масаласини етарлича ўрганишга имкон берилмаган. Шунинг учун ҳам бугунги кун Жомий ва Навоий ҳаётининг тасаввуфий жиҳатларини янада изчил, ҳар тарафлама ва чуқур ўрганишни талаб этади.

Жомий ва Навоий ўртасидаги илмий-ижодий яқинлик масалаларини ўрганишда шу икки буюк ижодкор ёзиб қолдирган бебаҳо мерос энг асосий манба бўлиб хизмат қиласи. Жумладан, “Хамсат ул-мутахайирин” ана шу нозик масалани ҳал этишда энг ноёб манба ҳисобланади.

*Фаррухбек ОЛИМ,  
тадқиқотчи*



## “ҚУШ ТИЛИ” ТИЛСИМЛАРИ

Маълумки, улут шоир Алишер Навоий болалик чоғларида Шайх Фаридиддин Аттор қаламига мансуб “Мантиқ ут-тайр” достонини ёд олган ва сўнгги нафасларигача шу дурдана асар ҳаяжони билан яшаган. Ҳазрат “Лисон ут-тайр” асарини шу достонга жавоб тариқасида битгани тасодифий эмас.

Захиридин Мұхаммад Бобур “Бобурнома” китобида Навоий асарларини санаr экан: “Алишербек назири йўқ киши эрди. Туркий тил била то шеър айтибтурлар. Ҳеч ким онча кўп ва хўп айтқон эмас. Олти маснавий китоб қилибтур, беши “Хамса” жавобида яна бир “Мантиқ ут-тайр” вазнида “Лисон ут-тайр” отлиқ...” деб алоҳида урғу беради.

“Лисон ут-тайр”нинг бир боби “Узининг Шайх рухи мададидан анга татаббу қилганга қақнус тимсоли” деб номланган. Дурдана асарда сўзга икки хил маъно юкланди. Биринчиси сўз – калом, иккинчиси сўз – куймоқ маъносида. Зотан, “Сўзона” сўзи форсийда куйиш маъносини билдиради. Мазкур атама ўзаги “сўз” хисобланади. Ана шунга ишора сифатида Навоий ёзадики:

Ўртадим олам элини, ўзни ҳам,  
Куш тилидин ўзга қилмай сўзни ҳам.  
Будур умидимки, бу сўзи фано,  
Борча куйганга бақо бергай яно.

Навоий шу байт воситасида шоирларни – Сўз кишиларини мангаликка дахлдор бўлишига ишора қиласи. Ҳақиқатан ҳам сўз кишилари жисмонан бу дунёни тарк этганидан сўнг ҳам шеърсеварлар қалбида яшаб қолаверадилар. Зотан, Фаридиддин Аттор дунёдан кўз юмганига қарийб саккиз аср бўлди. У ҳамон руҳан яшамоқда. Бу хусусият Навоий шахсияти ва ижодига ҳам тааллуқлидир. Алишер Навоий фано оламини тарк этганига беш юз ўн уч йилдан ошди. Пировардида, Навоий шеърияти олам узра тилло қанотларини қоқаётганига шоҳид бўламиз.

Бу таърифларни қаламга олишдан мақсад шуки, “Қуш тили” халқаро антологияси (“Гафаккур” нашриёти, Тошкент, 2011 йил. Лойиҳа муаллифи: Баҳром Рўзимуҳаммад. Нашрга тайёрловчи: Аъзам Обидов.) жаҳоннинг кўп мамлакатларида эътироф этилаётганини бир карра ўқувчига эслатиб қўйишидир. Шу антология боис бўлиб, Навоий ғазалларига Польшада ҳам қизиқиши уйғонган. Алишер Навоийнинг асарлари поляк тилида нашр килинмоқда. Бундан аввал ул зот асарлари Америка Кўшма Штатлари, Франция, Россия каби нуфузли давлатларда эълон қилиниб, юксак эътирофларга сазовор бўлди.

“Қуш тили” халқаро антологияси ўзбек, рус, турк, инглиз, немис, испан, поляк, француз тилларида нашрдан чиқарилган. Антологияга қирқдан ортиқ мамлакатларда яшаб ижод қилаётган етмиш етти нафар шоирнинг қуш мавзусидаги ёки “қуш” сўзи ишлатилган шеърлари жамланган. Антология марказида Алишер Навоий ижоди турганлиги китоб қадрини янада оширади. Зотан, жилла қурса шу антологияга кирган хорижлик муаллифлар мутафаккир бобомиз ижод сарчашмасидан озиқ оладилар.

Мазкур тўпламнинг ilk саҳифаларида шоир ижодидан айрим намуна-

**ЖАҲОН АДАБИЁТИ**

лар француз, рус, инглиз, немис, поляк тилларида ҳавола этилган. Бундан кўзланган мақсад ўзбек мумтоз шеърияти миқёси, жилоларини жаҳон бўйлаб тарқалишини таъминлашдир. Бу – биринчи хусусият. Иккинчи хусусият шуки, бугунги кунда шеърият шайдолари Ёвропа, Америка, Африка китъаларида қалам тебратётган шоирлар назидан унчалик ҳам викиф эмаслар. Бу китоб ана ўша бўшлиқни тўлдириш учун ҳам муайян маънода хизмат қиласди.

Учинчи хусусият шуки, бу антология воситасида бу антология боис бундан беш аср аввалги ва ҳамда йигирма биринчи аср бошидаги Шарқу Ғарб шеърияти ўзаро туташтирилади. Олис ўтмиш ва бугунги давр оралиғидаги “девор” олиб кўйилади. Бир муқова остида мозий ва замона шеърияти жамлашуви Сўзнинг яшовчанлигига, замон ва макон танламаслигига гувоҳ бўлади.

Тўртинчи хусусият – жаҳон тилларини пухта биладиган тадқиқотчилар дунёнинг машҳур шоирлари шеъриятини аслиятда ўқишилари, аслият ва ўғирмаларни ўзаро қиёслашлари мумкин.

Бешинчи хусусият тўғрисида тўхталсак... Антологияга кирган шеърларнинг аксариятида воқеликка кўчган шакл ўқувчиларимизга у қадар таниш эмас. Гоҳо ўқувчига постмодерн йўналишига мансуб битиклар эриш туюлиши мумкин. Аммо, ўзбек ўқувчиси мутолаа жараённида авангард усууллар ҳавосидан нафас олишга киришадилар, деб ўйлаймиз.

Айрим муаллифлар, дейлик, Праяг Сайкиа (Хиндистон), Кристофер Меррилл (АҚШ), Вивен Пламб (Янги Зеландия), София Безжинска (Польша), Жене Доти (АҚШ) каби шоирлар синчков муҳлисларга таниш. Чунки, бу муаллифларнинг шеърлари даврий нашрларимизда, “Илонбалик” халқаро антологиясида эълон этилган. Улар халқаро адабий алоқалар тараққиётига хизмат қилиб келишмоқда. Масалан, доктор Праяг Сайкиа Чўлпон, Усмон Носир, Рауф Парфи, Абдулла Орипов доҳил қирқ саккиз шоиримиз шеърларини инглиз тилидан ассам тилига ўғириб, Хиндистонда нашр этди. Кристофер Меррил эса жаҳонда довруқ қозонган Айова Халқаро Ёзувчилар Дастури директори сифатида ижодкорларимиз билан яқин алоқалар ўрнатган.

Энди “Күш тили”га мансуб айрим шеърлар таҳлилига ўтсан. Венесуэла Лотин Америкаси шеърияти тараққий этиб бораётган мамлакат хисобланади. Ушбу мамлакат вакили Антония Трухило қаламига мансуб шеърнинг илк сатрлари ёки эътиборимизни ўзига жалб этади:

*Бу қуш ўлимидан олдин  
Тумшуқласини очишига ва сайрашга интилади  
Баргни эмас  
Уни кўллаб турган дарахтни  
Кесиб ўтмоқчи*

Бармоқ вазни оҳангларига кўнинкан, миллий образларимиз, ўта таниш мавзулар “таъмини” обдон тотган ўзбек ўқувчиларимизга бу ритм, бу гап бошламаси, бу иллюзия кутилгани қадар “ботмайди”. Аммо, матн астойдил хис қилинса, ўқувчи бошқача шеърий кайфиятга тушади.

Күш орқали яратилаётган воқелик ўта сирли. Күш шохга қўниб ўтиаркан, ёнидаги япроқни эмас, яхлит дарахтни ўйлади. У ўляпти, яъни жисмидан руҳи чиқиши арафасида турибди. Унинг фикрлари телбалик ва хақиқат оралиғидаги мулоҳазалардир. Бу телбалик учиб, бошқа ҳақиқат келади. Ана ўша чизгилардан сўнг шоир ҳолатлар рўйхатини ўқувчиларга тақдим этади. Ва унинг нигоҳи энди далаларга қадалмайди. Анави дарахтлардан олтин ҳам кутмайди. Бу қуш ўлимидан олдин ўз дунёсида учади, ичиди товланаётган, ўша шохчага. Демак, күш энди кўк сари эмас, ўзининг ичига, яъни руҳий дунёсига қараб учяпти. Гап озодлик хусусида кетмоқда.

Хар қандай шакл озодликка рахна солиши мумкин, дея уқтиради муаллиф. Ва шеърнинг иккинчи қисмида бу мулоҳазаларини янада “куюқлаштиради”:

*Боиқа қуши  
Чинакам қуши  
Саҳифага тушишидан  
Бои тортмоқда*

Шоир энди Күш ва Озодлик ғояларини ёнма-ён қўяди. Озодликка эришув йўлларини босқичма-босқич таърифлаб боради. Пировардида “у бўшлиқни танлади”, деб ёзади. Аён бўладики, шоир қуш образи, қушнинг харакатлари воситасида Озодликка интилиш ғояларини кўрсатиб беради. Аммо, танланган усул, образлар силсиласини осонгина англамоқ мушкул. Хўщ, бу мушкулот нимадан?

Ўн бешинчى асрларда Алишер Навоий форс шеъриятидан таъсирланиб, бир қанча шоҳ асрлар яратди. Форс шеърияти эса араб халқлари назмидан озиқланган тарихдан маълум. Умуман олганда, тамаддун ўчоғи ҳисобланган Арабистон шеъриятга бошқача оҳанглар, бошқача мотивлар тақдим этган эди. Тадқиқотчиларнинг фикрига кўра, Европада қўп йиллардан бўён нашъу намо сураётган сонет жанри ҳам аслида Арабистонда шаклу шамойил касб этган. Бу ўринда, шартли равища умумий нуқталар мажмуи иборасини қўллаймиз. Бинобарин, араб дунёсида шаклланган усувлар замон тақозоси боис дунё халқлари адабиётига кенг тарқалган. Бу ноодатий, тасодифий ходиса десак, бу мантиққа зид ҳолатдир. Зотан, Шарқнинг буюк мутафаккирлари араб, форс, ҳинд тилларини бирвакайига ўзлаштиришгани ҳам чукур мазмунга эга. Кузатишлар шуни кўрсатадики, ўн бешинчى асрларда яшаган Ғарб шоирлари ижодида ҳам улар услубига хос батағсиллик, сўфиёна ёки ички кечинмалар түғёнини кузатиш мумкин. Бу ҳолат орадан беш-олти асрдан сўнг ҳам такрорланар экан, нега ҳайрон қоламиз?

Америкалик олимма Рэйчел Харел “Жаҳон адабиёти” журналида эълон қилдирган “Кўкламдан кўкламгача” (2005 йил) мақоласида умумий нуқталар мажмуи иборасига қуйидагича ёндашади: “... Барча “модернизмлар” ва уларнинг давомчилари бўлган оқимлар ( шу жумладан, америка постмодернизми ҳам) баъзи умумий импульслардан озиқланади – тилнинг “чарчаганлиги”га, ўз ифода имкониятларини “тугатганлиги”га реакцияси, шаклнинг ўзи билан ҳам анъанавийликка исён, замонавий дунёнинг илгари назардан четда қолган жиҳатларига эътибор, рух безовталиги ва ҳ.к. Шундай бўлса ҳам, ўзбек модернизми бошқа ўқувчилар доираси, бошқа тил шарорити ва шоирларнинг ўз ўтмишдошлари билан бошқача муносабатларига мувофиқ равища ўзига хос йўналишда ривожланмоқда”

Ушбу мақола ўзбек тилида ёзилгани билан ҳам алоҳида аҳамият касб этади. Зотан, маданиятлар ўзаро яқинлашаётган буғунги кунда тилларни ўрганишга иштиёқ кучайиб бормоқда. Аслини олганда “модернизм” атамаси нисбий бўлиб, бошқа ўлчамдаги адабиёт ёрлиғи мазмунини ўзида ифода этади. Эҳтимол, “Илонбалик”, “Күш тили” халқаро антологиялари пайдо бўлишига ҳам замона билан ҳамнағаслик туйғуси сабабчи бўлгандир? Агарда биз бу тўғрида чукурроқ ўйлаб кўрсак, шу икки антологиянинг қадри янада ошади.

Жаҳон халқларининг буғунги шеърияти рамзийликка асосланган туфайли ҳам ўқувчини зериктирмайди, аксинча, қат-қат “пардалар” ичida нималар борлигига қизиқиш асносида идрокингиз тобланади. Бу ребус ёки кроссворд жумбоклари эмас, балки, ўша ўн бешинчى асрлардаги сирлиликнинг янгича кўринишлариdir. Зотан, Алишер Навоий қаламига мансуб “Лисон ут-тайр”нинг Шайх Фаридиддин Аттор асари – “Мантиқ ут-тайр”га муштарак жиҳатлари ҳам сирли образлар силсиласи билан изоҳланган.

## ЖАҲОН АДАБИЁТИ

Иккала давр шоирлари ҳам қүш деганда қүшни назарда тутишмайды. Бу бир тимсол. Навоийнинг “Сен гумон қилғандин ўзга..” таъкидини ёдимизга келтирсақ, масала ойдинлашади. Дейлик, қүш тимсоли орқали инсон тасвирланаётган норвегиялик шоир Йстерин Иралу шеъри мисол бўла олади:

*Пага-пага тушар экан қор  
Шамол ҳилдиратган  
Сариқ-яшил палтоли  
Жувонининг нақ устида  
Сирғалиб сирғалиб учади чорлоқ  
Иккисини ҳилдиратар қор*

Шеър бор-йўғи олти сатрдан иборат. Кўлланилган усул у қадар мураккаб ҳам эмас. Аммо “сариқ-яшил палтоли жувон” ибораси орқали ажойиб ташбех яратилган. Шеърда қор ва шамол ҳаракати тасвири сўнгги сатрларни “очиб юборади”. “Сирғалиб-сирғалиб учади чорлоқ, иккисини ҳилдиратар қор”. Қор ва шамол образлари қүш ва инсон образлари билан уйғунликда чизилади. Бу чиройли тасвирга айланади. Айнан шу кичик шеър ёдимизга япон хайку ва танкалари руҳини соладики, буям тасодиф эмас. Зотан, ҳозирда Европа ва Америка шоирлари ҳам япон шеъриятидан таъсиранмокдалар. Жумладан, антологияга киритилган америкалик шоир Жене Доти хайкулари бунга мисол бўла олади. Жене Доти инглиз тилидаги мумтоз замонавий ғазаллар веб-сайтини очган. Бу шоир айни даврда ғазалнависликни дунё бўйича тарғиб қиласи экан, ўзи ҳам ғазаллар битади. Хайкулари эса Жене Дотининг Шарқ мумтоз назми, жумладан, узоқ Шарқ мумтоз шеърияти руҳини теран англаганидан дарак беради:

*Кунчиқарда турибди йога  
Олис зөвлар қагиллар гўё  
Кўзойнакли илон бўлгуси*

Истеъдодли ёш таржимон Нозима Тошпўлатова таржимасида ҳозирги кунда Испаниянинг Барселона шаҳрида яшаётган шоир Рохелио Сандерснинг “Олтин қүш” сарлавҳали шеъри антологияга кирганди бошқа шеърлардан алоҳида ажралиб туради. Бу шеър бир жиҳатдан визуал шеърият намунаси. Чунончи, матнда турли чизмалар мавжуд. Чизмалар ўзаро туташтирилса, қүш сурати пайдо бўлади.

Шеърлари инглиз, ўзбек, мўғул тилларига ўғирилган араб шоири Саид Гоуда (Гонг-конг) қаламига мансуб “Маъюс қүшим” сарлавҳали шеърнинг илк сатрлариданоқ Шарқ шеърияти анъаналари бўртиб кўринади. “Олтин қафас” образи ила мумтоз шеъриятимизга ишора қилгандек гўё. Зотан, улуғ Навоий ҳам шу турдаги образларни ғазал, рубоийларида кўп ишлатган. Саид Гоуда оддий тасвирдан мураккаб усуllibарга ўта бошлайди:

*Күшлар дўқонидан сотиб олганим  
Олтин қафасдаги дон-дунга сероб  
Анҳор оқиб турган маъвода ўсган  
Күшим хомуши бетоб  
Айвонга иламан  
Жаннатий овоз-ла  
Уйготишин истайман ҳар тонг...*

Аммо, қүшнинг боши эгик: “Күшим хомуши-хомуши, Сайрга чиққанда қаддин ғоз тутар, Самога боқади ноумид, соғиндиникин ё муҳаббатини”. Саид Гоуда қүш образи орқали садоқат, вафо ҳиссиятларини ифодалайди. Пировардида, рамз-тимсолларга мурожаат қилиб, қуйидагича холоса ясади:

*Үни мазлуб ва хор ташлаб кетарми  
Ўлжса қилиб инсон зотига  
Жаланинг шарпаси?*

Мазкур тўпламни мутолаа қиласр экансиз, хаёлан олам бўйлаб саёхатга чиққандай бўласиз. Гарчанд масофа олислиги сизни ўйга толдирса-да, шоирлар орасидаги фикрий муштаракликлар ҳайратга солади. Алхол, шоирларнинг ботиний яқинлиги образлар орқали намоён бўлади. Мазкур антологияяга Ҳалима Худойбердиева, Баҳром Рўзимуҳаммад, Муҳаммад Faффор, Хосият Рустамова, Рифат Гумеров шеърлари ҳам киритилгани қизиқишимизни оширади ва уларнинг битиклари билан бошқа қитъа шоирлари назмий асарларини қиёслашимизга имкон беради. Бу муаллифдарнинг шеърлари ҳам тўпламнинг умумий руҳига мос тушган. Ҳусусан, Ўзбекистон халқ шоираси Ҳалима Худойбердиева қаламига мансуб “Батамом уйғонсам...” сарлавҳали шеър лирик қаҳрамони уйғониш ҳиссиёти билан озодликни ёнма-ён кўяди. Шеър холосаси тубандагича:

*Ўзимча кимнингдир  
Ғанини едим,  
Кимнингдир кунига  
Юрибман яраб.  
Батамом уйғониб  
Ололсам дейман,  
Учиб кетармидим  
Кўкларга қараб.*


Инглизча таржимада шеър шакли, руҳи сақлаб қолинган. Бадиий таржима муваффакиятли чиққанми-йўқми, бу соҳа мутахассислари ҳукмига ҳавола. Бизга аҳамиятлиси, ўзбек шоираси ижоди хусусида инглиззабон адабиёт шайдолари тасаввур ҳосил қилишидир.

Хосият Рустамова – ҳозирги замон ўзбек шеъриятининг пешқадам вакиласи. Унинг шеърлари кўплаб хорижий тилларга ўгирилиб, чоп этилди. Шоиранинг күш мавзуидаги шеъри мазкур антологияянинг энг таъсирчан битиклари сирасига мансуб:

Жовдираб қарайсан қафасга отсам  
Бир ҳовуч ушоқ дон, сув ва майсани...  
Олдингга ташлайман нимаки топсам –  
Озодликдан бошқа ҳамма нарсани.

Мақоламиз ниҳоясида таъкидлашни истардикки, “Күш тили” халқаро антологиясини юзага келишида, кирқдан ошиқ мамлакатларга тарқатилишида шоир, таржимон, лойиха ижрочиси Аъзам Обидовнинг хизматлари бекиёс. Нашрга тайёрловчилар антологияга янада жозиба бағишлийдиган картиналарни ҳам танлай билган. Жумладан, мусаввиралар – Гулнора Раҳмон ва Нодира Иброҳим мўйқаламамига мансуб картиналар шарқона оҳангда кўнгил гўзалликларидан “куйлайдилар”. Бу куйлар шеър мусиқасидан асло кам эмас.

*Одинабону ҚУЛМУРОДОВА  
Ўзбекистон Давлат Жаҳон тиллари  
университети битириувчиси*



## СУРАТЛАРДА СИРЛИ СИЙРАТ

Санъат оламида истеъдодли инсонлар кўп. Ана шундай истеъдод соҳибларидан бири – Африка кўйчиси, “афроамерика” рассоми Кейт Маллет 1948 йилнинг 7 октябринда Американинг Пенсильвания штатида таваллуд топган. Отаси Бойд Маллет иккинчи жаҳон урушида иштирок этган, кейинчалик муҳандис, электрик бўлиб ишлаган. Бойд ўттиз уч ёшида юрак хуружидан вафот этади. Бу вакътда бўлажак рассом эндигина олти ёшга тўлганди. Турмуш ўргонинг вафотидан сўнг Дороти Уильямс хоним олти ёшли болакай Кейт, кизи Ева ҳамда икки ўғли Жейсон ва Рональд билан қолади. Шу тариқа болалиги учнчалик ширин хотираларга бой бўлмаган Кейт ўн икки ёшида расм чизишни бошлайди. У дастлаб шунчаки ҳавас учун чизарди. Оила аъзолари орасида санъаткорлар бўлмаса-да, болакайда Худо берган ноёб қобилият бор эди. Кейинчалик расм чизишга қизиқиши янада ортиб, унга жиддийроқ эътибор қаратди.

Тасвирий санъат борасидаги илк таҳсилни Рассомчилик талабалар лигасида ҳамда Нью-Йоркдаги Хантэр коллежида олди. Ўқиши мобайнида устозлари унинг ажойиб санъатига тан беришиб, ҳамкорликда фаолият юритишини ҳам таклиф қилишади. Уша вакътларда Кейт Нью-Йоркдаги Виржин рекордз овоз ёзиш студиясига рассом сифатида ишга киради. Бундан ташкари, бир қатор машхур мусиқа гурӯҳлари учун ташқи кўриниш, кўйлак яратишда ҳам фаол иштирок этиб, безакчилик қиласди. Дастлаб эркин ижодкор сифатида иш бошлаб, ўн беш йил мобайнида Фронтлайн рассомлик нашриётida бе-закчи-мусаввир бўлиб ишлади. Унинг ижод намуналари дунёдаги энг катта нашриёт ҳисобланмиши “Art Prints”да (Канада) босилади. Бугунги кунда ҳам ушбу ташкилот Кейтнинг санъат асарларини тарғиб қиласди.

1980 йилда Кейт Лос-Анжелесга кўучиб келади. Бир қанча нашриётлар асарларига расм чизади. “Авлод” деб номланган асари унга чинакам омад келтирди, у шу ишининг савдосидан кейин, ўзининг шахсий студиясини очган.

У дастлабки ишларida мойбўёқдан фойдаланаарди, кейинчалик акрил бўёқларга меҳр кўйиб, жаҳонга машхур санъат асарларини яратади. Унинг ишларига талабгорлар жуда кўп эди. Кўпгина ташкилотлар унга буюртма бериш учун ҳатто навбат кутишарди.

Кейинчалик рассом нафакат ташкилотлар учун, балки фильм ва телестудиялар илтимосига биноан ҳам гўзал санъат намуналарини яратади. Шунингдек, “афро-америка” аёллари учун севимли бўлиб қолган таомнома китобларининг муқоваси унинг сержило бўёқлари билан безалиб, харидорларга манзур бўла бошлайди. Бугунги кунда оммабоп саналган кўплаб китоблар муқовасида ҳам у чизган суратларни учратиш мумкин. Унинг ижоди намуналари дунёнинг нуфузли музейларида намойиш этилмоқда.



Зилола ЖАЛОЛОВА  
тайёрлади

ЖАҲОН АДАБИЁТИ

204

## ТАҚВИМ



### УЛАР ҲАМ ШУ ОЙДА ТУҒИЛГАНЛАР...

#### 1 МАРТ

**1445 йил.** Сандро Боттичелли, итальян мусавири. “Данте портрети”, “Паллада ва Кентавр”, “Бахор”, “Венера ва Марс”, “Хушхабар”, “Сехргарларга сажда”, “Гўдак тутган Мадонна” сингари кўплаб асарлар яратган.

**1892 йил.** Рюносек Акутагава, япон ёзувчи. “Расёмон дарвозаси”, “Темир лабиринт”, “Ўрмонда”, “Алвости”, “Апрель-июнъ”, “Телбанинг ҳаёти”, “Фарб одамлари”, “Ўргимчак тўри”, “Мандаринлар” каби асарлар муаллифи.

#### 6 МАРТ

**1927 йил.** Габриэль Гарсиа Маркес, колумбиялик ёзувчи. Нобель мукофоти лауреати (1982). “Ёлғизликнинг юз иили”, “Вабо пайтидаги севги”, “Патриарх кузи”, романлари, “Ошкора қотиллик қиссаси”, “Мовий кўзли кучуклар”, “Бальтасар ҳаётида унутилмас кун”, “Кўзгу билан сухбат”, “Полковника ҳеч ким ёзмайди” каби қисса ва хикоялари билан машхур.

**1929 йил.** Фозил Исқандар, абхазияли ёзувчи, шоир. “Йўл”, “Езги ўрмон”, “Яшил ёмғир” шеърий китоблари, “Номаълум меҳмон”,

“Эчки буржи”, “Инсон ва атрофидагилар”, “Ёнгоқ соясида”, “Болалик дарахти”, “Гераклининг ўн учинчи жасорати”, “Чегемдан чиққан Сандро”, “Оҳ, Марат!”, “Инсон манзиллари” каби насрый асарлар муаллифи.

#### 7 МАРТ

**1924 йил.** Кобо Абе, япон ёзувчи, драматург. “Бегона киши”, “Ёндирилган карта”, “Кумдаги аёл” романлари, “Дўстлик”, “Яшил пайпокча”, “Арвоҳ шу ерда” пьесалари муваффақият келтирган.

#### 12 МАРТ

**1928 йил.** Эдвард Олби, американлик драматург. “Хайвонот боғида нима юз берди?”, “Бесси Смитнинг ўлими”, “Фэм ва Йем”, “Америкача орзу”, “Ҳаммаси тамом”, “Денгиз рамзи”, “Эчки ёхуд Сильвия ким?” каби пьесалар муаллифи.

#### 15 МАРТ

**1830 йил.** Пауль Йоханин Людвиг фон Хейне, немис шоири ва ёзувчи. Нобель мукофоти лауреати (1910). “Мария Магдалина”, “Ганс Ланга” номли пьесалар, “Аср болалари”, “Жаннатда”, “Мерилин” ва бошқа кўплаб романлар яратган.

#### 20 МАРТ

**Эрамиздан аввалги 43 – милюдий 18-йиллар.** Публий Овидий Назон, улуғ итальян шоири. “Фанишки”, “Ғамгин элегиялар”, “Метаморфозалар”, “Фастлар” сингари асарлари жаҳон адабиёти хазинасидан жой олган.

**1828 йил.** Генрик Ибсен, норвегиялик драматург. “Ёввойи ўрдак”, “Қўғирчоқ уй”, “Халқ душмани”, “Тедда Габлер”, “Пер Гюнт” пьесалари билан машхур.

**21 МАРТ**

**1885 йил.** Алихонтўра Соғуний, дин ва жамоат арбоби, шоир, мутаржим. “Темур тузуклари”, Аҳмад Донишнинг “Наводир-ул вақое”, Дарвиш Али Чангийнинг “Мусиқа рисоласи” асарларини таржима килган. “Девони Соғуний”, “Тарихи Мухаммадий”, “Шифо-ул илал” каби асарлар муаллифи.

**22 МАРТ**

**1394 йил.** Мирзо Улугбек, буюк ўзбек қомусий олими. “Зиёжи жадиди Кўрагоний”, “Бир дараҷа синусини аниқлаш ҳақида рисола”, “Рисолаи Улугбек”, “Тўрт улус тарихи” асарлари дунёга машхур.

**23 МАРТ**

**1881 йил.** Роже Мартин дю Гар, француз ёзувчisi. Нобель мукофоти лауреати (1937). “Шаклланиш”, “Тиболар оиласи”, “Жан Баруа”, “Африкача икрор” романлари, “Эски Франция”, “Полковник Моморнинг кундалиги” қиссалари ва “Камган” драмаси муаллифи.

**1910 йил.** Акира Курасава, япон кинорежиссёри. “Дзюдо ҳақида афсона”, “Осмон билан ер ўртасида”, “Жаннат ва дўзах”, “Расёмон”, “Тахт ва кон”, “Кизил соқол”, “Додэскодэн”, “Дерсу Узала”, “Телба”, “Ажойиб якшанба” каби фильмлари шуҳрат келтирган.

**24 МАРТ**

**1832 йил.** Роберт Гамерлинг, австриялик шоир ва драматург. “Қувғиндаги Венера”, “Оққушларнинг мунгли кўшиклари” шеърий китоблари, “Агасфер Римда” ва “Кирол Сион” поэмалари, “Гомункулус”, “Аспазия”, “Дантон ва Робеспьер” каби драматик асарлар муаллифи.

**26 МАРТ**

**1926 йил.** Дарио Фо, италиялик драматург, режиссёр. Нобель мукофоти лауреати (1997). “Анархистнинг тасодифий ўлими”, “Тук-тук! Ким у? Полиция”, “Йиғлама дедимми, йиғлама” сингари пьесалар муаллифи.

**28 МАРТ**

**1483 йил.** Рафаэль Сантини, буюк итальян мусаввири. “Папа Юлий II портрети”, “Африка мақтаби”, “Одам Ато ва Момо Ҳаво”, “Ўтлоқдаги Мадонна”, “Мария никоҳи”, “Аёллар портрети. Соқов қиз” каби кўплаб асарлар ижодкори.

**31 МАРТ**

**1685 йил.** Иоганн Себастьян Бах, немис композитори. Концерти, симфония, вокал, хорал, сюита, вариациялардан иборат мингдан ортиқ мусикий асарлари жаҳон мусиқаси хазинасидан жой олган.

**1732 йил.** Йозеф Гайдн, австрийлик композитор. “Оқсоқ шайтон”, “Орфей ва Эвридика ёхуд дил фалсафаси”, “Асмодей ёхуд янги оқсоқ шайтон”, “Дориҳоначи”, “Кимсасиз орол”, “Баликчи аёллар” каби ўтизга яқин опералари, юздан ортиқ симфония, кўплаб сонаталари билан шуҳрат қозонган.

М.МУҲАММАДАМИНОВА  
тайёрглади

---

## RESUME

✍ In the next issue of the magazine is printed the completion of “Financier” by T. Dreiser and a story is named of “Elder King in exile” by A. Geiger. Early translations into Uzbek of classical Russian literature works of Maxim Gorky, carried out in twenties years of the last century by Yuldash Amanov and Oston.

✍ In the column of “Heritage Masters in Translation” are printed samples of world poetry in translated unsurpassed poetess, translator Zulfiya. Among the translations focuses to work of the great Ukrainian poet Taras Shevchenko, the 200th anniversary of which is celebrated throughout the world.

✍ In “Literature. Philosophy” column is published Nobel report of Mario Vargas Llosa, in the sub-heading “Comparison and interpretation” are printed some articles for comparative literature.

✍ As this issue of the magazine devoted to literature and art of Central Africa, in the column “Globe” are published samples of prose and poetry in Africa, articles and essays about her great personalities.

---

## РЕЗЮМЕ

✍ В очередном номере журнала печатается завершение романа Т.Драйзера «Финансист» и повесть А.Гайгера «Пожилой король в изгнании». Опубликованы ранние переводы на узбекский язык произведений классика русской литературы Максима Горького, осуществленные в 20-годы прошлого века Юлдашом Омоном и Остоном.

✍ В рубрике «Наследие мастеров перевода» печатается образцы мировой поэзии переведённые непревзойдённой поэтессой, переводчицей Зулфией. Среди переводов особое внимание уделяется к творчеству великого украинского поэта Тараса Шевченко, 200-летие которого празднуется во всем мире.

✍ В рубрике «Литературоведение. Философия» публикуется нобелевский доклад Марио Варгаса Льосы, в подрубрике «Сопоставление и истолкование» предлагаются некоторые статьи сравнительного характера.

✍ Поскольку этот выпуск журнала посвящается литературе и искусству Центральной Африки, в рубрике «Глобус» опубликованы образцы прозы и поэзии Африки, статьи и эссе о её великих личностях.

---

## ЖАҲОН АДАБИЁТИ

---

---

# **Жаҳон**

# **АДАБИЁТИ**

**2014 йил марта сони**

## **Обуначилар дикқатига!**

Журнални обуначига етказишда  
муаммолар пайдо бўлса, қуйидаги  
манзилга мурожаат қилинг:  
Тошкент шаҳар, Амир Темур  
1-тор кўча, 2-йўл. Тел: (8371)  
233-67-98,  
233-60-78

---

Навбатчи мухаррир А.ФАЙЗУЛЛА,  
С.АЛИЖОНОВА  
Техник мухаррир З.ЖАЛОЛОВА  
Мусаххих Д.АЛИЕВА  
Компьютерда сахифаловчи М.АЛИЕВА

**Жаҳон адабиёти, 2014**

ИНДЕКС 828, 829

2007 йилда №0252 рақами билан лицензия олинган.

Ўзбекистон Матбуот ва аҳборот агентлигига рўйхатга олинган, №189

Уч босма табоқ ҳажмгача бўлған кўлёзмалар қайтарилмайди.

“Жаҳон адабиёти” журналида эълон қилинган асарларни кўчириб босишида ва қайта нашр этишида таҳририятнинг ёзма розилиги олиниши шарт.

**Таҳририят манзили:**

100129, Тошкент, Навоий кўчаси, 30.  
Телефонлар: 244-41-60; 244-41-61; 244-41-62.  
Сайт: [www.jahonadabiyoti.uz](http://www.jahonadabiyoti.uz)  
E-mail: [jahonadabiyoti@list.ru](mailto:jahonadabiyoti@list.ru)

Босишига руҳсат этилди 11.04.2014 й. Бичими 70x108 1/16. Офсет коғози.

Офсет босма. Шартли босма табоқ 18,2. Нашриёт босма табоби 20,0.

Адади 3640 нусха. 3360 рақамли буюртма. Баҳоси шартнома асосида.

“Жаҳон адабиёти” журнали компьютерида терилиб, “SHARQ” НМАКда чоп этилди.  
100000, Ўзбекистон, Тошкент ш. Буюк Турон кўчаси, 41 уй.

© Жаҳон адабиёти, 2014 й.